

道尧丁未镌

桂蕊兼井田

海山僊館叢書

[illegible]

並
次
下

PL
2457
P29
v.51

校印桂苑筆耕集序

記有之曰酒醴之美而元酒醴水之尚貴五味之本也
黼黻文繡之美而疏布之反女功之始也古之君子
必重其本始如此吾東方之有文章而能著書傳後者
自孤雲崔公始吾東方之工北學于中國而以文聲天
下者亦自崔公始崔公之真傳于後者唯桂苑筆耕與
中山覆簣集二部是二書亦吾東方文章之本始也
吾東方以文爲尙至我朝益煥以融家燕許而戶曹劉
以詩若文成集者無慮充棟宇矣而顧鮮有知崔公之

書者余嘗見近代人所撰東國書目有載中山覆篋集
者徧求之終不可得唯桂苑筆耕二十卷爲吾家先世
舊藏自童幼時知珍而玩之然間以語人雖博雅能文
而好古者亦皆言未曾見然則是書也幾乎絕矣使是
書不行于東方是元酒不設于太室而疏布不囂于犧
尊也豈所以教民不忘哉世或謂公文皆駢儷四六
殊不類古作者公之入中國在唐懿僖之際中國之文
方專事駢儷風會所趨固有一不得而免者然觀公所爲
辭遑遑多華而不浮如櫟黃巢言一篇氣勁意直絕不

以雕鏤爲工至其詩平易近雅非晚唐人所可及是
蓋以明水疏布之質而兼有平酒醴黼黻之美者豈不
彌可珍哉公在中國取科第入軍府亦旣已聲施當時
矣而一朝去之如脫屣及歸東方躋翰苑貳兵部以至
阿飡阿飡者新羅大官其纒用方未已也而顧又自放
於山林寂寞之濱以終老其身而不悔蓋度其時之皆
不可有爲也士君子立身行道莫有大乎出處之際出
處而不失其時非賢者不能也賢者之作固不可使其
無傳况其文傑然如彼而又爲東國文章之本始者哉

湖南觀察使徐公準平卽余所稱博雅能文而好古者也聞余蓄是書亟取而校之捐其俸揭以活字得數十百本用廣其傳曰不可使只書絕于東國也嗚呼不忘本始教民厚也表章賢人勸民善也徐公之用心也如此其所以爲政於湖南者亦可知已役旣完徐公屬余曰子實傳是書今不可以靳一言余辭不能得若崔公之蹟行本末與是書之可備攷證者徐公之序詳之矣余無所復贅云甲午九月大匡輔國崇祿大夫議政府左議政豐山洪奭周序

校印桂苑筆耕集序

桂苑筆耕集二十卷新羅孤雲佳公在唐淮南幕府時
公私應酬之作而東還之後手編表進于朝者也公名
致遠字海夫孤雲其號也河南之沃溝人幼穎慧絕倫
年十二從商舶入中原十八舉進士第久之調溧水縣
尉任滿而罷時值黃巢之亂諸道行營都統高駢開府
淮南辟公爲都統巡官凡奏狀文告皆出公手其討黃
巢檄天下傳誦奏除殿中侍御史賜緋魚袋後四年充
國信使東歸事憲康王定康王爲翰林學士兵部侍郎

出爲武城太守真聖時挈家入江陽郡伽倻山以終焉
葬在湖西之鴻山或謂公羽化者妄也夫以海隅偏壤
之產而弱齡北學取科宦如拾芥終以文章鳴一世同
時賓貢之流莫之或先豈不誠豪傑之士哉若其居幕
數載知高駢之不足有爲呂用之諸葛殷等之誕妄必
敗超然引去去三年而淮南亂作則又有似乎知幾明
哲之君子其人與文要之可傳不可泯者也據進表是
集之外復有今體賦一卷今體詩一卷雜詩賦一卷中
山覆簣集五卷唐藝文志則稱在苑筆耕二十卷文集

十卷而他皆不傳唯是集屢經鈐印板刻舊佚搨本亦絕罕癸巳秋余按察湖南巡到武城謁公書院裴徊乎石龜流觴臺之間俛仰遺囑有餘慨焉會淵泉洪公以是集寄曰此近千年不絕如綫之文獻耳子其無流通古書之思乎余如獲拱璧懼其愈遠而愈佚也亟加証校用聚珍字擺印分藏諸素仁縣之武城書院陝川郡之伽倻寺嗟乎名醞之坊必題杜康良劍之鏐必標歐冶爲其不忘本始也我東詩文集之祇今傳者不得不以是集爲開山鼻祖是亦東方藝苑之本始也庸詎可

一任其銷沉殘滅而不之圖哉東還後著作散逸無傳
唯有梵宮祠墓之間披林藪剔苔蘚尙可得十數篇彙
附原集剗剗壽傳余竊有志而未遑云按史稱中和二
年正月王鐸代高駢爲諸道行營都統五月加高駢侍
中罷鹽鐵轉運使駢旣失兵柄復解利權攘袂大詬上
表自訴言辭不遜上命鄭畋草詔切責之今考集中有
謝加侍中表巽辭引咎而已無一語激忿勃謾又有謝
賜宣慰表云仰瞻綸音深嘉師徒輯睦黎庶安寧其假
借慰獎也若是之慙摯史所謂早詔切責者無乃非當

時實錄也歟又按中和紀年止於四年而公進表年月
系以中和六年蓋公以中和四年十月浮海翌年春始
抵國又翌年編進是集而前一年之改元光啟容或未
聞知也

歲在闕逢敦牂中元達城徐有桀書于湖南布政司之
觀風軒中

--	--	--

桂苑筆耕序錄

淮南入本國兼送詔書等使前都統巡官承務郎侍
御史內供奉賜紫金魚袋臣崔致遠進所著雜詩賦
及表奏集二十八卷具錄如後

私試今體賦五首一卷

五言七言今體詩共一百首一卷

雜詩賦共三十首一卷

中山覆簣集一部五卷

桂苑筆耕集一部二十卷

右臣自年十二離家西泛當乘桴之際父誠之曰十年不第進士則勿謂吾兒吾亦不謂有兒往矣勤哉無隙乃力臣佩服嚴訓不敢弭忘懸刺無遑冀諧養志實得人百之已千之觀光六年金榜尾此時諷詠情性寓物名篇曰賦曰詩幾溢箱篋但以童子篆刻壯夫所慙及忝得魚皆爲棄物尋以浪跡東都筆作飯囊遂有賦五首詩一百首雜詩賦三十首共成三篇爾後調授宣州溧水縣尉祿厚官閑飽食終日仕優則學免擲寸陰公私所爲有集五卷益勵爲山之志爰標覆瓿之名

地號中山遂冠其首及罷微秩從職淮南蒙高侍中專
委筆硯軍書輻至竭力抵當四年用心萬有餘首然淘
之汰之十無一二敢比披沙見寶粗勝毀瓦畫墁遂勒
成桂苑集二十卷臣適當亂離寓食戎幕所謂鱣於是
粥於是輒以筆耕爲目仍以王詔之語前事可憑雖則
僵僂言歸有慙鳬雀旣望旣藉用破情田自惜微勞冀
達聖鑑其詩賦表狀等集二十八卷隨狀奉進謹進

中和六年正月日前都統巡官承務郎侍御史內
供奉賜紫金魚袋臣崔致遠狀奏

桂苑筆耕集一部二十卷

都統巡官侍御史內供奉崔致遠撰

桂苑筆耕集卷一

表一十首

唐高麗都統巡官侍御史內供奉崔致遠撰

表一十首

賀改年號表

賀通和南蠻表

賀建王除魏博表

賀封公主表

賀殺戮黃巢徒伴表

賀處斬草賊阡能表

賀收復京闕表

賀殺黃巢表

賀降德音表

賀迴駕日不許進歌樂表

賀改年號表

臣某言今月某日得進奏院狀報奉十一日宣下改廣明元年爲中和元年者展義龜城易名鳳紀美號旣新於厯象歡聲遍振於寰區臣某誠抃誠躍頓首頓首臣謹案王制云天子西巡狩命典禮考時月定日同律然

則三秋啟候萬乘省方金郊興肅殺之風玉壘應巡游
之地遂遵規於舉正爰降命于改元且大戴禮曰中也
者天下之大本和也者天下之達道致中和天地位焉
萬物育焉故漢益州刺史王襄俾蜀詞人王褒作中和
樂職宣布之詩以歌君德耆舊傳楊況及聖朝曾編新
樂舉二月恬和之節播八風調暢之音永驗休譚實諧
昌運伏惟聖神聰睿仁哲明孝皇帝陛下纂承寶位丕
闡皇猷將務格苗暫勞避狄風始行於地上易象可徵
日再耀於天中休禎斯在是以紀年有裕懸法無虧帝

業中興則遠超于前漢後漢物情允洽則近繼於元和
太和足可使蠢植昭蘇華夷悅服掩神雀黃龍之瑞應
河清海晏之期則彼蕞爾叛徒騷然嘯聚偶縱煙塵之
患卽歸原野之誅佇迴西幸之儀便舉東封之禮臣今
者旣獲成師以出必能仗義而行跡泛戈船心馳劍閣
冀陳戎捷永賀堯年臨楚水以魂飛朝天可待望秦雲
而目極捧日爲期未獲榮列朝班稱慶行在無任抃躍
戰懼屏營之至謹奉表陳賀以聞臣某誠歡誠喜頓首
頓首謹言

賀通和南蠻表

臣某言臣得進奏院狀報入南蠻通和使劉光裕等迴
雲南通和兼進獻國信金銀器物匹段香藥馬等者天
威遠振星使遄歸化外癡內黠之徒竭奉^上贊獻琛之禮
德既超於萬古恩已洽於四夷臣某誠欣誠抃頓首頓
首伏以聖主卜征既以用和爲貴遠人從化自知犯義
不祥是得事尙從權德資含垢言皆答響禮不違經且
南蠻嘗懷異謀久稔邊患數年猾夏獨虧控北之誠列
鎮徵兵驟動征南之役則築虛可慮怙亂難防今者鳳

口銜書纔飛遠地狼心感德永順皇風有以見皇帝陛下法古爲君視人如子以藏疾匿瑕爲妙策以玩兵黷武爲良箴能昭利害之鄉不失羈縻之道遂使要服修貢賓旅歸仁適當多事之秋已見太平之兆則彼驃信實狗封之族尙革昏迷賊巢迺蟻聚之羣何難撲滅佇聆大捷永賀中興必可驅堯舜而殿禹湯苑五岳而池四海盛矣美矣念茲在茲臣頃者禦寇交州董戎蜀郡先則展馬拔討除之勢後乃設隨何說諭之機仰托皇威粗申將略喜當今日免負初心限守藩條不獲稱慶

行在無任賀聖戀恩欣躍屏營之至謹奉表陳賀以聞
臣某誠抃誠躍頓首頓首謹言

賀建王除魏博表

臣某言臣得進奏院狀報二月二十二日恩除建王可
開府儀同三司兼太保充魏博節度使者維城茂德列
土殊勞遠分閩外之憂實表寰中之慶臣某誠歡誠喜
頓首頓首臣聆周歌麟趾漢譬犬牙固須地處親賢方
得天垂寵寄伏以建王修善爲樂居高不危好書而旣
擅多才獻表而肯慙求試今以鄴稱上鎮魏有大名將

資磐石之宗遂錫分圭之寵豈獨漳濱之俗遠荷恩威
永命海內之人皆歌德業臣限守藩鎮不獲稱慶行在
無任踴躍屏營之至謹奉表陳賀以聞臣某誠欣誠躍
頓首頓首謹言

賀封公主表

臣某言臣得進奏院狀報奉去年十月十四日勅旨皇
帝第十一妹封遂寧公主長女封唐興公主次女封永
平公主待收復京闕備禮冊命者芳舒玉葉寵襲金根
鬱佳氣於高天振歡聲於率土臣某誠欣誠抃頓首頓

首伏以遂寧公主德資元吉考祥於歸妹之占唐興公
主永平公主譽治肅雍稟慶於降嬪之典伴嫦娥於獨
月分婺女於雙星秀發青春光浮碧落伏惟皇帝陛下
齊家理國恭已敬親流鳳展之殊恩舉鸞闈之美命猶
以暫勞仙蹕未復皇恩畱具禮於宮闈待成功於干羽
捧日而榮滋九族欽風而喜播四方臣限守藩條不獲
陪位稱慶行在無任抃蹈聳踊之至謹奉表陳賀以聞
臣某誠喜誠躍頓首頓首謹言

賀殺黃巢徒伴表

臣某言臣得進奏院狀報北路軍前定難軍節度使拓跋思恭保大軍節度使東方達等奏宜君縣南殺戮逆賊黃巢徒伴二萬餘人生擒三千人並賊將者又鳳翔節度使李昌言奏探知京中賊徒潰散六月十三日皇帝御宣政殿排仗受宰臣及百僚賀禮畢者睿謀遠叶戎捷遄陳開雉扇而儼皇威舉鸞旌而恭列辟天浮喜氣地匝歡聲臣某誠喜誠抃頓首頓首伏以逆賊黃巢嘯聚兇狂偷生晷刻養姦而惟日不足恃暴而謂天可欺敢驅螻蟻之羣累拒熊羆之衆孽唯自作罪欲何逃

拓跋思恭東方達等身居重位手握雄師氣吞蠹彼之
徒志解赫斯之怒齊驅於六步七步果剗於左之右之
戰於野而騰威戎難伏莽拘諸原而騁勇勢若焚枯不
唯剝面舂喉乃得連頭係頸况李昌言鎮於岐下伺彼
京中識虞譚鷹集之祥辯師曠鳥聲之樂遂飛吉語遠
達宸聰佇看大戮之期克踐中興之運伏惟聖神聰睿
仁哲明孝皇帝陛下財成三極敦敘九疇出震位而臨
人方瞻堯日幸坤維而罪已更闡舜風暫勞遵養之師
遙委仁賢之將旣誅逆黨爰列賀班濯錦江邊已睹霞

舒綵仗蒼龍闕下卽聆雷振鑾音永清四海之波遍灑
九天之澤臣謬操鈇鉞尙默鼓鼙未唱凱歌唯知抃舞
顧彭野之久妨道路怒髮雖衝望秦原而將滅烟塵愁
睂已展臣限拘守鎮不獲稱慶行在無任欣抃聳踴屏
營之至謹奉表陳賀以聞臣某誠歡誠躍頓首頓首謹
言

賀處斬草賊阡能表

臣某言得進奏院狀報西川都將高仁厚部領兵馬收
捉草賊阡能已於十月十八日並處置訖二十一日聖

駕出羅城北樓宜慰迴戈將士各賜優賞放歸本營者
遠耀日旗高張天網梟帥已歸於大戮鴻圖永耀於中
興臣某誠歡誠抃頓首頓首臣伏以草賊旣能跡陷迷
津心辜聖澤短狐稔射人之毒癩狗喧吠主之聲高仁
厚逐惡志雄擒奸氣勇仰資睿略靜剋兇徒伏惟皇帝
陛下有罪必誅無思不服歌採薇而遣卒念破竹之成
功親降如綸之言遍安被練之卒妖氛息而綿山益翠
喜氣浮而錦水先春自此遠振軍聲深摧寇黨覆頑巢
而在卽迴法駕以何遙臣方事專征先聆吉語限拘藩

鎮不獲稱慶行在無任踴躍屏營之至謹奉表陳賀以聞臣某誠歡誠喜頓首頓首謹言

賀收復京闕表

臣某言臣得河中節度使王重榮牒報四月十日當道與雁門節度使李克用及都監楊復光下諸都馬軍齊入京城與賊交戰約殺却賊步軍一萬餘人其馬軍賊便走出城往東南路去其賊軍家口錢帛並皆遺下黃巢亦未知存亡其逃遁賊徒尋差兵馬追奔並已收復京闕訖者天威耀武月捷傳聲望宸階而初奏凱歌舉

區宇而咸增壯舞臣某誠喜誠躍頓首頓首臣竊窺曩
代旁採前經靜理邦家必須以殺止殺保安社稷固在
雖休勿休是故不得已而用兵無所私而煦物伏惟皇
帝陛下纂臨寶位丕闡宏圖匝四溟而不見揚波安九
野而皆能偃草而乃逆賊黃巢暗遵邪徑深入禍門久
騰吠噪之聲敢恣穿窬之便穢黷宮闕淹延歲時偷安
暫戲於鼎中戮暴難逃於机上今者風行睿略雨集王
師楊復光任在信臣李克用名爲勇將各思報効競奮
驍雄齊心而覆滅梟巢戮力而尅收鳳里賊巢拒輪不

暇亂轍潛奔于戈則雹散風飛金帛則填街塞巷更展
追遊之勢必擒稔惡之徒自此日月重光烟塵永息唯
望宸遊之返駕佇觀盛禮於登封臣職忝董戎功慙徇
難雖手無重柄數年虧奮擊之能而耳得嘉聲遠地倍
歡呼之切臣限拘藩鎮不獲稱賀行在無任手舞足蹈
慶抃屏營之至謹奉表陳賀以聞臣某誠喜誠躍頓首
頓首謹言

賀殺黃巢表

臣某言臣得武寧節度使時溥狀報逆賊黃巢尙讓分

隊並在東北界於六月十五日行營都將李師悅陳景
瑜等於萊蕪縣北大滅羣兇至十七日遂被賊將僞僕
射林言梟斬黃巢首級並將徒伴降部下都將李惟政
田球等訖其黃巢函首已送行在者聖日重耀狂氛暗
銷戎捷超於古今歡聲振於夷夏臣某誠抃誠躍頓首
頓首臣伏以歲有四時則秋行肅殺之令武有七德則
兵貴禁戢之能是故歲以無相奪而克成兵所不得已
而方用自革結繩之政皆勞祝網之仁賊巢食土懷頑
含沙稔毒深犯天紀廣缺地灾九州則半致侵凌三輔

則久經穢黷擢髮而旣難數罪舂喉而只待懲姦今者
窮寇迴心元兇授首殺傷老少歸附居多有征無戰之
言實符王道以靜待勞之勢深叶軍機伏惟皇帝陛下
運啟中興功資下武睹天鑑而實爲大警聽風謠而非
只少康永當銷干戈之鋒便可鑄耒耜之器况迺西山
八國數年飽巡幸之恩東岳百神終日渴登封之禮佇
迎雲馭俯納巖音臣密邇寇戎撫安疆境不暇爭鋒而
進實防代俎之譏慙虧犬馬之勞喜睹鯨鯢之戮手舞
足蹈魂飛膽揚臣限守藩條不獲奔走稱賀行在無任

慶抃兢越之至謹奉表陳賀以聞臣某誠歡誠喜頓首
頓首謹言

賀降德音表

臣某言臣得進奏院狀報司天臺奏六月十六日夜太
陰虧伏奉六月二十三日德音應三川管内見禁囚徒
等宜委所在長吏五日內疎理決遣其京畿四面暴露
骸骨宜委諸鎮切准前後勅旨差人收拾埋瘞者望舒
匿影曲赦流恩化洽泣辜義資掩骼振歡聲於蜀壘蕩
妖氛於秦川臣某誠抃誠躍頓首頓首臣伏以日能順

晷而照臨不失其所月以順時而盈缺則維其當况當
冀葉初凋桂輪自減兵銷下土非石麟暗闕於東陵謫
見上天致玉兔暫虧於西汜既同君子之過乃軫聖人
之憂伏惟聖神聰睿仁哲明孝皇帝陛下光闡睿圖保
寧區宇仁能及遠德以勝妖爰當展義之辰克舉眚灾
之典慈傷瘼死牢囚免滯於風霜義貫幽魂道殫皆沾
於雨露可使涪水耀千年之色巴山呼萬歲之聲道能
繼於垂衣法無妨於委轡佇迴巡幸仰賀登封臣限守
戎藩不獲稱賀行在無任抃躍屏營之至謹奉表陳賀

以聞臣某誠歡誠喜頓首頓首謹言

賀迴駕日不許進歌樂表

臣某言臣得進奏院狀報伏審勅旨迴駕日應沿路州縣切不得輒進歌樂及屠殺者聲除飾喜味減薦珍遠遵罪已之言深播好生之德凡於蠢動孰不歡呼臣某誠抃誠躍頓首頓首伏惟皇帝陛下日月運行雷雨作解體堯舜之理能咸若法禹湯之興必勃焉退庭舞而撤宮懸惡衣服而非飲食一慈二儉守元祖之格言沐雨櫛風稟太宗之不訓今則冕旒東顧櫪枿西移師乙

收心無以逞鏗錡之曲庖丁斂手何由挫觝鯨之形義
感六牲恩加萬姓則乃蜀山力士旣無煩役之虞漢水
老人豈有深譏之事帝業永資於下武物情皆慶於中
興臣方擁戎旃阻隨仙蹕遙思盛禮空馳拱北之誠願
報深恩但勵鎮南之志無任抃躍屏營之至謹奉表陳
賀以聞臣某誠歡誠喜頓首頓首謹言

桂苑筆耕集卷二

表一十首

謝加太尉表

謝示南蠻通和事宜表

謝立西川築城碑表

謝賜御製真贊表

謝御札衣襟並國信表

謝就加侍中表

謝賜宣慰兼加侍中實封表

請巡幸江淮表

請巡幸第二表

讓官請致仕表

謝加太尉表

臣某言今月某日宣慰使供奉官嚴遵美至奉宣聖旨
慰諭臣及將校等並賜臣勅書手詔各一封加臣檢校
太尉依前充淮南節度使兼東面都統者仰窺鳳詔謂
對龍顏寵榮極而何力負山戰灼深而自容無地臣某
誠朴誠感頓首頓首臣伏以大司馬之威權百官所仰
上將軍之法令十道皆遵豈唯整戢五兵實在諧和七

政况當今日宜屬全材如臣者德乏潤身智虧周物於
儒則筆慙五色在武則劍敵一夫但以荷寵天庭分憂
水國擁旄重寄榮冠絕於一時仗鉞專征冀折衝於萬
里幸逢聖鑑得盡忠誠今者已率雄師將誅巨猾征旗
指路遠趨堯日之光戰艦凌波方託舜風之力豈期王
人遠降帝命俄臨獎其外鎮之微勞授以上司之劇任
未著緇衣之美旋叨錦被之榮况乃兼制利權廣潤軍
食瑞節不移於南兗兵符亦綰於東陲將何異能勝此
寵寄謹當冰爲夕飯蘂作朝餐褰帷則面撫烝黎建旆

則身先士卒羣寇旣蝟毛而起偶恣俯張諸侯必馬首
是瞻共成翦滅唯力斯視何心自安必也臨亂忘身見
危致命仰解焦勞之念粗申式遏之功臣旣當下瀨屯
師佇欲中流設誓枕雕戈而輟寐跡寄轅門瞻帝座以
馳誠魂飛輦路未獲稱謝行在無任感恩戀聖榮抃戰
懼之至謹因宣慰使嚴遵美迴附表陳謝以聞臣某誠
感誠懼頓首頓首謹言

謝示南蠻通和事宜表

臣某言二月二十六日宣慰使供奉官李從孟至伏奉

勅旨入鶴拓使胄嗣王龜年閤門使劉光裕等迴得驃
信表並國信兼布燮楊奇肱與西川節度使書皆備述
情誠無不順命其表及書白並答信物數並令錄往此
事首末自卿良謀者遠降王言深窺使節跪閣上天之
旨坐知外域之心寵飾踰涯憂惶若厲臣某誠抃誠躍
頓首頓首臣才非間代智不濟時但以每鎮窮邊粗安
荒服免使飽飛饑附欲令前倨後恭頃者忝守成都冀
申遠略遂憑釋子善諭蒙王仰稟天威得揚風教永戢
干戈之患俾陳玉帛之儀雖羣議沸騰競銜鑠金之口

而宸衷剴斷早推匪石之心是以暫事西巡或虞南叛
爰遣維城貴胄直閤近臣迴聖德以降尊遠傳元化譯
訛言而獻款備寫真誠既令抱義戴仁果見奉琛執贄
此皆陛下威德臣何力之有焉而迺謂臣有先見之能
知未來之事設和蠻之良策備幸蜀之嚴城俯錄勤勞
迴垂稱獎睹雕題之章奏書軌既同息猾夏之猜嫌梯
航相接驗南琛之贖咎知北極之紓憂雖云五利有餘
敢希茂賞唯願四方無事永贊昌期臣限守藩條不獲
稱謝行在無任欣躍感戴兢惕之至謹因供奉官李從

孟迴附表陳謝以聞臣某誠惶誠恐頓首頓首謹言

謝立西川築城碑表

臣某言伏奉十一月六日勅旨以臣在任西川節度使
日創築羅城昨因有勅嘉獎方進所賜碑詞今已付所
司鐫寫建立者一片石文龜初戴立九重天語鳳已銜
來雕銘莫繼於色絲寵飾遽超於華袞仰窺恩獎俯抱
憂惶臣某誠感誠懼頓首頓首頃者幸夢三刀久臨益
部遙提一劍得挫蒙兵但以其玉壘可稱金城未設山
口則空吞蠻蜚水頭則斜枕牂牁含溪抱谷之形雖云

天險比屋連薨之勢實類野居臣是以運度籌謀斟量
板築蓋從人欲果致子來遂得役興而草偃川中誠感
而土生石上長圍於三十六里高鎮於百千萬年不愧
鐵名可將錐試隼墉烏堞儼若鸞飛錦浪綿峯迴然裝
飾遂蒙陛下辱褒稱之重許刊勒之榮以爲事實可觀
足得詞華不朽臣雖遇泥封激賞豈將油素矜誇非敢
彰謙所期避謗今者伏遇皇帝陛下遠巡勝槩親覽微
功徵舊賜之碑詞命新鐫之筆跡永使卓立琴臺之境
平欺劍閣之銘且杜元凱之峴亭無非自銜阮德規之

齊國蓋是衆成謾傳身後之虛名豈睹目前之盛事曷
若彩毫見獎翠琰斯刊因成下土之功終應上天之意
得逢今日別振孤風向非陛下錄善恩深酬勞德厚則
何以未有出師之紫篆刻叨榮會無興學之規傳揚竊
美臣限拘鎮守不獲稱謝行在無任感戴欣躍戰懼之
至謹奉表陳謝以聞臣某誠惶誠恐頓首頓首謹言

謝賜御製真贊表

臣某言二月二十六日宣慰使供奉官李從孟至伏奉
勅旨已令於大慈寺御真院寫朕真並扈從宰臣等真

列卿儀貌俱會此堂今先寄卿真軸並朕親製贊述賜卿冀表顯恩式彰異禮者銀璫降使玉簡傳詞受宣而頂踵光輝拜賜而神魂驚越臣某誠感誠懼頓首頓首臣志欽涓訣業鍊圯書敢憑涓滴之勞自安寵寄願掃氛霧之患永竭忠誠遂在先朝便從戎役南征北伐豈暇寧居東鎮西藩累叨重任遇陛下龍飛之後委微臣隼擊之能蜀國防蠻則粗申遠略楚宮捍寇則偶遂良機旋令移節於海門復許建牙於淮甸是以常拘戎閫未覲宸階唯披天上之詔書似睹日中之王字空增戀

闕莫遂歸期項者虔託仁祠寫留麼質豈致去思於舊
鎮唯慙取笑於空門伏遇陛下展義陳詩停轡駐蹕遂
徵繪事俾寫聖容其於侍從之臣宜居左右豈料孱微
之質得潤丹青愧無燕領之姿永侍龍顏之側况蒙宸
襟顧矚御筆贊揚高題而素壁爭輝卓立而浮埃不染
然後遠飛寵詔特遣貴臣乍捧綵牋驟竊游揚之譽初
開寶軸深驚刻畫之恩窺看而形影自慙感激而肺腸
何極昔漢朝中興聖帝下念功臣列形像於禁宮載勳
名於史筆雖令贊述不自稱揚豈如陛下暫事巡游迴

垂獎飾別降絲綸之命親編錦繡之詞俾臣位掛於鳳
凰池中名超於麒麟閣上遐尋故實獨荷殊榮有何出
衆之能見此非常之寵所謂于年嘉遇萬代美譚唯當
志勵風霜永驗松筠之不改身霑雨露免憂蒲柳之先
衰臣限守藩條不獲稱謝行在無任感恩戀聖榮耀兢
懼之至謹因供奉官李從孟迴附表陳謝以聞臣某誠
惶誠恐頓首頓首謹言

謝御札衣襟並國信表

臣某言二月二十六日宣慰使李從孟至伏蒙聖恩別

賜臣御札衣襟並御服衫一領龍腦香一金合金釵花

散梳一口金花銀榼一隻者

缺

窺神筆恩襲御衣仙香

氣撲於鼻根寶器光騰於眼界仰霑寵錫俯積憂兢臣
某誠感誠懼頓首頓首臣每念業紹弓裘任叨斧鉞誓
傾忠節終報聖朝去年親率驍雄願殲兇醜旋承綸旨
已駐舟師旣慙叩櫂之言徒切枕戈之望豈期貂冠傳
命龍袞裁書辱宣尼一字之褒過光武十行之詔加以
粉分御筍香滿雕奩花錐乃麗水之珍雪缺透任山之
器捧玩而寶驚寮吏緘藏而永耀子孫雖有幸逢時輝

榮驟集而無功受賞愧恥難居徒荷鴻私何申豹略身
依楚水未陳告捷之書目斷蜀天但灑感恩之淚臣限
守藩鎮不獲稱謝行在無任荷戴激切榮抃兢懼之至
謹因供奉官李從孟迴附表陳謝以聞臣某誠惶誠恐
頓首頓首謹言

謝就加侍中表

臣某言臣伏奉去年十一月十一日恩制加授臣侍中
依前淮南節度使階勳封並如故仍加食實封一百戶
者有命自天處身無地感深以泣寵極而驚臣誠抃誠

懼頓首頓首伏以黜陟分科聖君至教行藏守道達士
良規慮受爵以斯亡在持盈而不殆臣自提權筦便遇
兵戈郡邑爲征戰之場山海足遁逃之藪旣難聚利莫
遂成功况乃權有他門刃無餘地動見越庖代俎無非
避柱觸楹遂虧漕輓之程僅壞銅鹽之法伏蒙皇帝陛
下俯詳直道不寘嚴誅選用良才改移重務而乃察臣
在公之節念臣戀主之誠重委將壇更增封邑怨乏一
時之秀許攀七葉之榮唯慮慙卿或譏竊位然臣今所
以自賀者三朝獨立七鎮榮遷每當拜爵王庭不省謝

恩私室以茲勵已永免愧人謹當激發壯圖殲夷窮寇
粗息四方之患仰寬萬乘之憂臣限守藩條不獲稱謝
行在感恩戰灼屏營之至謹奉表陳謝以聞臣某誠慙
誠懼頓首頓首謹言

謝賜宣慰兼加侍中實封表

臣某言六月十六日供奉官劉叔齊至奉宣聖旨慰諭
臣及將校並賜臣勅書手詔各一封官告一通就加臣
侍中仍加食實封一百戶餘如故者自天降命無地安
身啟鳳詔而魂驚對貂冠而股慄臣某誠感誠懼頓首

頓首臣早因薄效每忝殊榮勤王而素乏實勤受爵而
但多虛受負山寡力臨谷戒心況自戎馬生郊陣蛇出
穴妖氛蔽闕法駕省方臣久鎮雄藩嘗提重柄一無成
績兩拜寵章前者以上將軍爲大司馬今則兼納言之
任加真食之榮累年虧橫草之功終日抱伐檀之恥且
易曰或錫鞶帶終朝三褫之詩云受爵不讓至于已斯
亡遍覽格言是徵貪祿不能報國苟欲榮家臣實何心
有覲于目但遇王人遠降聖澤傍流仰睹綸音深嘉稯
政以爲師徒輯睦黎庶安寧俯念忠誠特行懋賞臣也

方寸之地可倚咫尺之顏不違豈敢矯俗陳情節詞讓
爵難效一辭而退唯期三命益恭旣除勞力於利權終
願勵心於閫寄臣伏限守藩不獲奔赴行在稱謝無任
感恩戀聖戰汗屏營之至謹附供奉官劉叔齊奉表陳
謝以聞臣某誠惶誠戀頓首頓首謹言

請巡幸江淮表

臣某言伏以舜伐有苗修德而終能率服湯征自葛行
恩而競望來蘇斯皆今古之美譚實乃帝王之盛事固
敢跼天負責向日裁誠仰陳利害之端冀副華夷之望

不量狂瞽遠黷聖聰臣某誠惶誠懼頓首頓首臣聞日月以運行為德永麗於天江河以委輸是期必朝于海上能昭其煦育下方遂於通流况乃天災非人力能除地分有兵戎不起將獻永安之兆輒陳可復之詞伏自寇陷上京兵徵外鎮猛銳始從於鶴列旋致徒歸頑兇尙固於蟻封難成盡殪臣豈唯投袂實至衝冠昨率舟師暫屯江次必欲朝離楚岸暮及漢濱旗張商嶺之風劍拂秦川之霧願言薄伐冀效微勞尋蒙陛下遠許分憂不令離任臣進退惟命始終無虧寧招曠職之譏敢

涉爭功之責又緣淮海乍息烟塵忽若去兵必當致寇
則迺江南沃壤盡成蠶食之資淮北強隣暗展鯨吞之
勢輿賦既無所倚軍須將必屢空是以仰奉勅書已班
師旅四境之赤眉歸伏八州之黔首謐寧遍布皇恩粗
申將略然而關中縱敵閩外偷安旣乖踊躍以身先每
切忸怩於顏厚伏惟皇帝陛下省方展義駐蹕經時龜
城壯麗之形金湯雖固鳳輦巡游之費桂玉可虞况舊
謂西川富疆祇因北路商旅託其茶利瞻彼軍儲今則
諸道發表章則半載始迴徵貢獻則經年未達實緣道

路遠負兼值干戈阻難值剽掠者斯多至行朝者甚少
加以僦僱所費耗盡不輕每當水運陸般只可率鍾致
石以此征稅則漸成抗弊軍兵則未遂飫饒伏慮扈從
實繁宴牖仍廣盡搜資於三蜀難濟用於百司苟興盱
食之憂實慊庶寮之望又以蜀川僻居邛棘缺人密邇
蠻戎虺毒潛吹獸心難測儻或乘虛犯境率衆渡瀘六
軍之熊豹騰威縱能制敵八詔之豺狼作暴不免喧驚
事可酌於將來禍須防於未兆伏惟陛下覽臣忠懇察
臣直言暫迴西幸之儀更舉南巡之禮使處處息後子

之怨人人安戀主之心天下幸甚天下幸甚且如遠狩
河陽僞遊雲夢將興霸王俯順權宜况江淮爲富庶之
鄉吳楚乃繁華之地陛下九年理國四海爲家豈比周
之東遷非擬晉之南渡賊巢兇狂久聚穢黷難除縱便
收城未宜迴駕豈如揚都輿壤桂苑名區四夷之賓易
朝天九牧之貢無虛月伏乞陛下俯迴鳳宸略泛龍舟
必想山靈卷三峽之風水伯寢九江之浪遐尋禹跡允
叶堯巡昔也日耀錦川天不傾於西北今則風行澤國
地無缺於東南然後發使清宮舉章司隸振盛儀於歸

闕告休績於登封臣雖識昧變通而志勤匡濟敢憑草
奏輒貢管窺無任戀聖感恩戰越屏營之至謹奉表陳
請以聞臣某誠惶誠懼頓首頓首謹言

請巡幸第二表

臣某言聞聖人能以天下爲一家以中國爲一人者必
關於其義達於其患然後能爲之臣遂自前年繼陳短
識請移車駕巡幸江淮計資於避險就安事叶於暫勞
永樂未迴聖鑑再獻瞽言臣某誠慙誠懼頓首頓首臣
尙阻擒奸敢言伐善然但願愚夫之一得難追賢者之

三思臣頃鎮成都偶諧遠慮克符天意亟就土功別營
雉堞之雄規永壯龜城之峻境爰憑釋子善誘蒙王果
恢偏疆之愆便付懷柔之信皆資帝力能肅物心伏遇
陛下遠耀珠旗高臨玉壘樂降絲綸之旨深嘉毫髮之
勞謂臣有先見之機念臣以至誠所感仰銜睿獎倍激
忠誠然則當年已往之功粗成籌畫今日未來之事竊
有管窺苟或緘辭則爲負德不辭鼎鑊輒貢菑莢臣近
者俯察時情仰瞻乾象荊州道路羣寇將侵蜀國封疆
微災似起儻或未收鳳闕尙駐鑾輿忽有妖氛潛興近

境必恐烏合蠶食之徒占據江陵把斷峽路則列鎮貢
賦無計流通行在詔書亦難傳降若見東西阻絕固當
遐邇動搖伏惟陛下斷自宸衷斥其橫議念江淮之進
獻遠涉多虞察蠻蜚之奸兇乘虛可懼早移仙蹕直幸
揚都滅星辰交錯之灾叶日月運行之理則乃九州斧
鉞討戎而齊願風驅四海梯航奉贄而必能雲集盛矣
美矣念茲在茲且逆賊黃巢久黷皇居多成穢跡直到
剋收之後須勞繕葺之功更俟二三年之間可興千萬
世之業慮不先定事難速成伏乞陛下覽竭節之言闡

隨時之義俯從衷懇暫事宸游天下幸甚天下幸甚臣
粗識古今略詳利害自非徼以爲智豈敢知而不言謹
奉表陳請以聞臣某誠惶誠懼頓首頓首謹言

讓官請致仕表

臣言臣伏以聖君御宇必先塞彼倖門良士省躬唯慮
妨其賢路苟速官謗是辜主恩况臣關中無定難之勳
閫外乏分憂之效強欲晏安寵祿其如玷浼刑章永言
量力而行固在奉身以退既知無隱寧避有辭臣某誠
慙誠懼頓首頓首臣少勵琢磨晚師擒縱不以一經介

意相於三略畱心願紹家勲免虧堂構先皇帝念臣孤
直試以諸難出分大將之威權坐受上卿之爵秩故得
內稟聿修之訓外伸式遏之能北掃虜庭則胡雛不敢
南牧南清獠海則蠻謀無由北窺及覲彤墀暫司緹騎
俄屬齊郊聚孽鉅野興師臣也不才謬膺斯任伏遇皇
帝陛下纂臨宸極警諭戎藩舉旌鉞以分勞聽鼓鼙而
軫念謂臣有戢兵之奇略察臣立降寇之微勞遂令位
假中台名編外相夢想旣通於鳳沼威稜益峻於龍旌
其後瀘水波驚蜀山霧暗久念雕題之患遍流黔首之

災又蒙命臣曰俞爲帥於彼爰遵薄伐得解倒懸豈敢
貪天之功願銘鐘鼎祇能因地之利別建溝隍伏蒙陞
下俯獎忠誠特行懋賞開國授周司徒之貴立家紹漢
丞相之榮臣此時早誠持盈輒思請老必願告休錦里
退隱羅浮不料壠上耕夫盡解揭竿斬木草間惡子競
謀蟻聚蜂飛當荆門失守之時乃楚塞宿兵之際忝趨
戎旆兼綰牢盤僂俛而未能報恩驅馳而何敢言病或
猥兪磨牙於原野或鯨鯢噴毒於江湖尋提招討之權
來撫句吳之俗遠憑睿略深挫羣兇洎解印海門建牙

雄甸上將軍之劇任首冠列藩大司馬之雄資先沾宥
禮揣頂踵而偏濡雨露扼咽喉而莫效涓埃且自黃寇
憑陵翠華巡狩仰天戮力竊嘗服王導之言終日痛心
何止灑袁安之淚及至成軍已出又緣奉詔卻迴行藏
雖順於綸詞進退實慙於物論遂見時薄興北林戎役
周寶致南鄰責言玉每慮於俱焚金亦憂於衆鑠幸蒙
陛下涵之以海量炤之以天光如見肺腸得保首領然
臣也先軫以直言逞志曹植以深過責躬則二年忝都
統之名不能誅奸戮暴四載主銅鹽之務不能富國贍

軍是以兵權則屢見改移利柄則變爲分割凡此辱君
之命莫非職臣之由臣猶自知況在陛下擢髮而旣難
數罪乞骸而唯願辭榮今者大憝奔逃上京克復氛祲
卽當殄滅寰區永見廓清臣有忝登壇無能報國行當
暮齒居亦胡顏兼以頃鎮蠻陬久棲瘴嶺蒙犯其妖烟
毒霧剗除其封豕長蛇當年而靡憚勤劬晚歲而皆成
疾疹不將筋力爲禮旣載前經苟或身心自讎難逃後
患雖思強飯實愧素餐廣陵爲楚澤上游離府乃漢朝
大任以臣衰老當此重難必恐終無所成遂希不可則

止伏惟皇帝陛下知人爲哲多士以寧選英才而代處
是邦俾微臣而退居散地鬪於菟之逃富固是忠貞王
內史之辭官誠非矯飾幸遇舜風無外漢日再中陛下
旣已除盱食之憂微臣亦希免夜行不息臣無任望恩
戀聖懇迫兢灼之至謹奉表陳請以聞臣某誠感誠懼
頓首頓首謹言

桂苑筆耕集卷二

南海譚瑩校

桂苑筆耕集卷三

狀一十首

狀

狀一十首 奏狀二
十首 堂狀一十首

謝詔狀

謝詔示權令鄭相充都統狀

謝宣慰狀

謝詔獎飾進奉狀

謝詔示徐州事宜狀

謝詔止行墨勅狀

謝邈公甫充監軍手詔狀

謝除鍾傳充江西觀察使狀

謝就加侍中兼實封狀

謝秦彥等正授刺史狀

謝詔狀

右臣伏奉四月十日詔旨黃巢兇逆穢黷宮城罪惡貫盈人神共怒尋東兵合勢翦滅元兇想副朕懷已遵道路佇聞克復永耀功名者十行天語萬里星飛捧窺而壯膽初驚跪讀而愁眉頓豁竊以黃巢禍心斯極狠力既衰肉已太鹹果缺將落甃起烟塵之患則歸原野之

誅臣每當永夜枕戈早願中流叩櫂自啟行十乘已屯
駐五旬伏緣江路多虞風波未便暫淹行色用俟良時
非致役於遷延但興懷於矍鑠今則仰觀鳳銜之詔况
乘隼擊之秋俯勵軍謀仰遵睿筭卽冀朝離江北暮到
漠南長驅背水之師永破滔天之孽率奮義感恩之衆
氣已凌雲殄藏奸匿暴之徒勢如沃雪伏惟陛下歲巡
備禮時邁傳歌將示罪於三危乃宣威於七德臣遠承
獎諭誓盡勤勞身暫寄於戈船心每馳於劍閣唯願西
都獻捷早申收復之微功東嶽告成得覩登封之盛事

臣無任感激兢懼之至謹奉狀陳謝以聞謹奏

謝詔示權令鄭相充都統狀

右臣伏奉去年九月九日詔旨卿曾間道獻章諸鎮飛檄便欲長驅甲馬親議專征未卽便來須權制置遂命鄭畋等分爲京城四面都指揮諸道師徒慮卿偶未委知故茲詔示者伏以書曰無偏無黨王化乃興詩云不識不知帝謀是稟况兵當伐叛事合從權臣去年先因淮北侵疆後值江南阻路久屯師旅未遂戰征陛下妙選羣才近分重寄鄭畋等莫不身先貔武手運豹韜旣

當怒髮爭衝固謂賊智可堪仰酬睿獎竟勵忠誠臣也
遠鎮臨戎強鄰結憾唯慙曠職豈望成功伏蒙陛下尙
念勤勞曲垂慰諭觀上天之慈意解外地之深憂既許
將軍獨舉柳營之令終期叛卒必歸竹町之誅臣限守
戎藩不獲稱謝行在無任感激戰懼之至謹奉狀陳謝
以聞謹奏

謝宣慰狀

右宣慰使供奉官李從孟至伏奉去年九月九日勅書
手詔兼宣恩旨慰諭臣及將士等者伏以感恩效命武

士常規仗順摧兇元戎素分賊巢偶乘奸便向道嚴誅
臣願膾彼逆鱗嚙其邪膽掃重氛於魏闕迎法駕於蜀
都是以去年據馬援之鞍敢矜獨勇杖辛毗之鉞親率
諸軍久在江干再承天旨不令離任遂已班師豈料伏
蒙陛下念及老臣撫茲衆卒特迂星使遠降泥封綸傳
萬乘之言纖微不聞曠彼百夫之體慰暖皆均歡呼而
聲已振雷感泣而淚將成雨唯期勵節共願報恩臣限
守藩條不獲稱謝行在臣無任感戴榮抃戰懼之至謹
因供奉官李從孟迴奉狀陳謝以聞謹奏

謝詔獎飾進奉狀

進奏院遞到恩賜手詔一封

右臣伏奉詔旨以臣先

缺

供軍應接使駱潛等進奉銀

事特賜獎飾者伏以收功示賞乃聖主之異恩寓物輸

誠固藩臣之常事但屬敵滋鄰境寇阻道途運綱而既

闕先登贊禮而僅侔錫貢早成

缺

滯况涉渺微是以雖

憑孱水之珍難追塗山之罪豈料鴻毛比價方申懇悃

之心鳳口銜書遠降褒稱之旨感激而懷榮爲懼揣脩

而報德何期臣限守藩條不獲稱謝行在無任荷恩戀

聖屏營之至謹奉狀陳謝以聞謹奏

謝詔示徐州事宜狀

右臣先奉詔旨據時溥奏卿本道羌兵侵境殺傷令務止遏者臣遂具時溥誣謗事由申奏伏奉二月二十五日詔旨今則寇孽不日勦降藩方務息爭競所宜和叶各保封疆者臣伏以天德旣高側管者固難窺測日恩至廣戴盆者自阻照臨是以遠竭愚誠動違聖慮時溥旣銜睿獎得縱兵威早成熊據之謀更展鯨吞之勢累興師旅來犯封疆焚郭邑於山陽掠資財於淮上臣遂

令捍禦略挫兇狂而乃時溥奸計已成根株巧言頗有
枝葉不思已過敢惑宸聰今者再奉絲綸仰遵徽纆唯
期寬則得衆粗可和而不同臣分閫無功戢兵爲務至
於草寇猶許歸降况是鄰藩豈謀侵擾彼無此詐此無
彼虞臣限拘鎮守不獲稱謝行在無任感激屏營之至
謹奉狀陳謝以聞謹奏

謝詔止行墨勅狀

右臣伏奉詔旨去春權降詔命許諸道承制除官已兩
度降勅止絕自今後凡有要甄獎者並於急遞奏聞不

得更議承制者臣伏以漢朝鄧禹始啟倖門魏室曹瞞
敢專重柄欲敦於自家刑國所惜者唯器與名伏遇陛
下遠事宸遊慮防爵賞遂降無私之澤遍資諸道之權
不料人人而競弄筆端處處而皆誇墨勅長蛇封豕猶
匿暴於神州狗尾羊頭已成羣於列鎮臣前年雖奉詔
旨未欲施行卻緣親率軍兵遠期征討此時久屯南浦
將泛西江忽被鎮海節度使周寶欲感軍情潛施巧計
便以無功將吏悉皆超授官榮臣所領士卒旣多將校
不少彼安坐者猶爲甄獎此遠行者豈免怨嗟遞口聲

傳從頭憤激臣若不依周寶必恐事生遂准詔書得行
軍賞已會一一具事由申奏訖自奉前年十一月一日
勅旨仰遵成命靜守常規至於近日所招賊徒只與往
時先賜官告會無僭越豈可隱藏今者外將忠誠永當
無二大君善教已至再三泣告而天何未聆憂懷而地
謂可入臣限拘藩鎮不獲稱謝行在無任戰越屏營之
至謹奉狀陳謝以聞謹奏

謝鄒公甫充監軍手詔狀

伏奉某月日勅書手詔各一封

右新授當道監軍郃公甫四月十日到伏蒙聖恩賜臣
勅書手詔兼慰諭臣及將校等九天降詔萬里宣恩柳
營之列將歡呼桂苑之羣寮感泣伏以郃公甫素懷材
略久撫軍戎漢南之職業可觀江北之物情獲賴旣見
寬能得衆必令師克在和臣仰窺五色之書俯慰三行
之士喜氣高侵於畏日歡聲遠振於薰風臣與將校等
無任感恩激切榮抃屏營之至謹奉狀陳謝以聞謹奏

謝除鍾傳充江西觀察使狀

右臣先奏請授鍾傳江西觀察使其高茂卿乞別除廉

鎮伏奉七月五日詔旨允許特賜獎飾者天從素望風
遞仙音既諧舉善之誠實叶分憂之寄伏以鍾傳比從
屬郡來援府城撫綏而便洽衆情禦備而能成遠略高
茂卿旣多梗阻不免回翔固難掉鞅而旋豈許垂囊而
入臣以戒之在鬪事可從權遂具奏論輒陳利害不料
一言之善遽得動天終令二將之才皆榮列土鍾陵江
徼銅柱海隅政成而必有可觀恩重而各得其所臣限
拘鎮守不獲稱謝行在無任感激兢灼之至謹奉狀陳
謝以聞謹奏

謝就加侍中兼實封狀

右臣得進奏院狀報伏奉某月日恩制加授臣侍中餘
並如故仍加食實封一百戶者九重降命萬里傳聲側
聆而踴躍忘疲內揣而怔忡失措伏以納言進秩頒邑
賞功固須德望鎮時仍有勲勞濟物然後方可謂君無
虛授臣無虛受如臣者謬提旄鉞免墜弓裘空有志於
四方竟無能於一割况自羣兇蝟結戰陣蛇奔狂鱗久
戲於鼎中聖駕遠巡於劍外臣也動不能剗烟塵之患
靜不能贍山海之資遂蒙改易兵權分張權課雖值盤

根錯節其如有斧無柯安邦之計策何成富國之機謀
莫就唯甘黜爵以警慢官豈期陛下恩洽無偏義深宥
過特超衆例許陟高資印標石鵲之祥早慙不次冠聳
金貂之飾愈覺非宜况叨眞食之榮實愧素餐之咎但
屬狼星未滅鯨浪猶翻方期抗旆以專征不敢懸車而
請老謹當訓兵是務殄寇爲期粗申武弁之威仰報彤
門之賞臣限守藩鎮不獲稱謝行在無任感恩戀聖戰
汗屏營之至謹奉狀陳謝以聞謹奏

謝秦彥等正授刺史狀

新授和州刺史秦彥

新授滁州刺史許勛

右件官臣先奏請各授管內刺史今月某日得進奏院
狀報伏奉某月日勅旨允許者九天降寵兩地分榮觀
降將之懷恩喜元戎之獲請伏以秦彥等比者爲梟爲
獍維虺維蛇久流螫蠱之災未有誅鋤之便臣偶令招
諭旋自歸投遂假分符皆能守節誠宜獎勸輒具奏論
今者聖澤濡枯皇風盪垢纔擲黃巾之飾許登皐益之
資秦彥等旣荷新恩永除舊惡必也出榮建隼入効懸

魚學其守土之規贖彼滔天之罪臣限拘藩鎮不獲稱
謝行在無任抃戴兢灼之至謹奉狀陳謝以聞謹奏

桂苑筆耕集卷三

南海譚瑩校

桂苑筆耕集卷四

奏狀一十首

奏請從事官狀

奏請僧宏鼎充管内僧正狀

謝宏鼎充僧正狀

謝除姪男瓊授彭州九隴縣令狀

謝弟祝再除綿州刺史狀

謝姪男宏約改名濟除授揚州大都府左司馬狀

奏請姪男劬轉官狀

奏請歸順軍孫端狀

奏李楷已下參軍縣尉等狀

奏請楊行敏知廬州軍州事狀

奏請從事官狀

營田判官將仕郎殿中侍御史內供奉賜緋魚

袋宋絢

右件官相門傳慶詞苑成名退居安東郭之貧就養奉
南陔之詠自參戎幕備見良籌佐理而星霜屢遷清勤
而風雨不改久裨重任敢覬殊榮伏請轉官改章服依
前充職

攝鹽鐵巡官朝議郎守京兆府咸陽縣尉柱國

高彥休

右前件官訓稟儒宗才兼吏術王畿結綬早見勤勞賓
席曳裾頗多婉畫望憲臺之清秩助權筦之重權伏請
轉官依前充職

缺

以前件狀如前伏以臣子之所以立

身者以孝以忠慎終如始若遂榮親之望必勤事主之
誠且如擇鄰卜居斷織勵學至於成立色養無虧能報
慈母之恩則宋絢有焉又如教以義方退而學禮至於
仕官力行有規能遵嚴父之訓則彥休有焉臣是以久

藉謨猷仍嘉德行事堪勵俗志切薦賢伏惟皇帝陛下
恩流域中孝理天下特迴睿獎許假賓_缺冀令修已從
知盡以敬親務本干黷宸扆無任兢惶謹錄奏聞伏聽
勅旨

奏請僧宏鼎充管内僧正狀

右件僧跡洗四流心拘八政演法於有緣之衆致功於
無_缺之言伏自翠華遠省於風謠丹詔屢徵於月捷兇
渠未滅銳旅猶勤宏鼎常令僧二十人晝夜轉念功德
張開覺道教化闔城所願早覆梟巢便迴鸞駕雖不關

於至理實自發於精誠兼緣當道屬郡旣多仁祠不少
若無綱領難肅緇流伏乞聖慈俯詳所請許充當道管
內僧正仍賜紫衣所冀身掛金襴逞養鷹之雋氣手持
玉柄制醉象之狂徒謹緣奏聞伏聽勅旨

謝許宏鼎充僧正狀

右件僧臣先具狀申奏請充當道管內僧正仍賜紫衣
伏奉勅旨依允者伏以宏鼎久勤轉念輒具薦論能資
十地之因遽荷九天之寵元戎獲請喜三教之並行法
侶歡呼驚一佛之或出唯冀永持功德上報慈悲苟不

能盪火宅之餘災則何以稱水田之華服必可潛燃慧炬助滅妖氛臣限守藩條不獲陳謝行在無任感戴兢灼之至謹奉狀陳謝以聞謹奏

謝除姪男瓊授彭州九隴縣令狀

前守京兆府鄠縣尉高瓊

右件官是臣姪男今得進奏院狀報伏蒙勅旨除授彭州九隴縣令仍賜緋魚袋者伏以高瓊早乏藝能忝從祿仕佐理未閑於吏道列官已陟於王畿昨者背秦嶺而脫烟塵面蜀川而就雲日雖有心於葵藿且無托於

萍蓬豈料不由薦論便賜超擢纔拋黃綬遽沾墨綬之
榮始佩銅章又竊銀章之貴况乃濠陽屬邑益部名區
正當巡幸之邦實謂來蘇之地豈伊殘劣能此勝當臣
也必令行慎履冰坐勤飲水勉追芳於花縣無致辱於
竹林臣限守戎藩不獲稱謝天庭無任感恩戰懼之至
謹奉狀陳謝以聞謹奏

謝弟柷再除綿州刺史狀

綿州刺史高柷

右件官是臣堂弟今得進奏院狀報奉某月某日恩制

除授金吾將軍被軍州官衆狀舉畱續准勅旨依前授
綿州刺史者恩資鳳宸喜集鵠原形影光輝精魂震越
伏以高枕早從裾履免墜箕裘旣懸報主之誠得習牧
人之術昨者忝膺寵寄粗舉政條銀水金山曾無自潤
帶牛佩犢或有可觀振家聲廉慎之名致郡俗舉畱之
請况乃秩假帝之喉舌官登王之瓜牙仕宦旣榮分憂
又重柷也必遵勗勵更慎撫綏不辜署劍之恩以謝擁
轅之衆臣亦申教誨俾贖貪叨俱在朝之盛儀雖慙前
哲各爲郡之清譽可畏後生共資綽綽之詩冀播優優

之政臣限拘藩鎮不獲稱謝行在無任感恩抃躍之至
謹奉狀陳謝謹奏

謝姪男宏約改名濟除授揚州大都府左司馬狀

朝散大夫前行潤州上元縣令柱國高宏紱

右件官是臣姪男先具奏請除授揚州司馬並請改名
濟伏奉勅旨依允者九天滌澤萬里塗程沐恩命於堯
階泛光輝於阮巷負山旣重臨谷何安臣以高濟早列
官常頗聞吏術建業字人之政曾有微功維揚典午之
資敢希薄授始陳上請驟竊殊榮濟也譽雖讓於王睢

名不慙於程昱聖君如父照臨實表於無偏猶子比兒
訓勵必遵於匪懈俾申勤效少贖貪叨臣限守藩條不
獲稱謝行在無任感恩激切兢灼之至謹奉狀陳謝以
聞謹奏

奏請姪男劬轉官狀

前鄂州都團練副使朝議郎檢校祠部郎中兼
侍御史柱國賜緋魚袋高劬

右件官是臣親姪男粗詳吏術早忝官常始佐理於江
陽旋從知於寒壤實得片言以折獄未嘗枉道而事人

遂荷寵榮已登班列尋叨命服久倅廉車方當寇盜喧
驚亦有籌謀施展加以每遵家法願報國恩宗族稱孝
悌之名僚友許溫恭之行臣是以輒思內舉敢具上陳
引以進之守戴禮之深義惟善所舉憑魯書之美譚伏
乞聖慈俯鑑忠懇特賜除授峽內刺史劬也必能勵心
從政常銘馬援之言竭力分憂不負謝安之舉于黷宸
扆無任兢惶謹錄奏聞伏聽勅旨

奏請歸順軍孫端狀

歸順軍都知兵馬使銀青光祿大夫檢校國子

祭酒兼左武衛將軍御史中丞上柱國孫端

右件官巢鳥知風園葵向日能投善教永戢奸圖既悛
抗斧之心可在執爰之列仰希甄獎輒具奏論伏乞聖
慈特授一官勒在軍前驅使冀率感恩之衆永除稔惡
之徒謹錄奏聞伏聽勅旨

奏李楷已下叅軍縣尉等狀

以前件狀如前伏以臣當府淮海奧區州縣多事永言
屬吏實藉得人每憂輿賦闕懸漸難責辦若俟銓衡注
擬恐失舉賢前件官等皆爲君子儒有古人志學優則

仕旣知祿在其中見善若驚不愧藝成而下可以參臣
軍事可以代臣邑僚試假缺員頗彰殊效况抱斑衣之
樂冀攀黃綬之榮伏乞聖慈允臣所請干冒宸鑑無任
兢惶請錄奏聞伏聽勅旨

奏請楊行敏知廬州軍州事狀

右臣伏以武士所先惟忠與勇忠勇兼著行敏有之自
假郡符缺能勤理銳旅有爭先之志齊昨無背怨之詞
蓋乃訓練齊戎撫綏周室在於巡屬實越輩流累具奏
論請賜正授伏慮道塗艱阻未達宸聰每藉幹能再陳

薦舉永言成績可使頒條伏乞聖慈特賜允許干黷宸
鑑無任兢惶謹錄奏聞伏聽勅旨

桂苑筆耕集卷四

南海譚瑩校

桂苑筆耕集卷五

奏狀一十首

奏誘降黃巢下賊將成令瓌狀

奏誘降福建道草賊狀

奏姪劭華州失守請行軍令狀

奏論天征軍任從海等衣糧狀

奏論抽發兵士狀

奏請叛將鹿晏宏授興元節度使狀

進金銀器物狀

進漆器狀

進御衣段狀

進綾絹錦綺等狀

奏誘降黃巢下賊將成令瓌狀

草賊黃巢下孽隊賊將成令瓌徒伴四萬人馬
軍七千騎

右件賊徒元受黃巢指使占據潼關尋自孽隊奔逃所
在燒劫就中斫黃管内最甚傷殘臣伏以肅齊王者之
師必期無戰遵奉聖君之德可恕有瑕暫緩討除先加
告諭臣昨者專差押衙丁威賚委曲深入招誘果願歸

降兼乞委任郡符展效忠節其成令瓌臣當時補充軍
前押衙兼給功名檢校國子祭酒兼御史中丞官告一
通權知楚州軍州事以今月二十三日部領手下兵士
到楚州倒戈訖伏緣楚州與徐州漣水對岸今春曾被
寇戎驟來攻劫雖頻討逐未盡誅擒况漣水賊徒久蓄
姦謀潛行偵諜常排戰艦欺視孤城再欲奔衝終爲患
害臣以此特將此郡權授令瓌既能投信義而來必得
破頑兇之窟臣久臨戎事素習軍謀以爲前則惠而後
則誅兵家所貴遠者懷而近者悅帝道方興上窺含垢

之恩下察慕羶之志不勞寸刃唯假尺書成令瓌遂革
野心能從天意叛徒四萬盡爲樂業之齊人精騎七千
皆作輸忠之烈士既當恕罪倍見感恩蜂飛之小寇旋
銷蝟結之元兇可殄斯乃陛下祝除三綱舞耀兩階信
既洽於豚魚化能移於梟獍善師不陣敢矜止殺之權
至道無私但仰好生之德其成令瓌下願在軍門及放
散人數請續具申奏謹錄奏聞謹奏

奏誘降福建道草賊狀

福建道溪洞草賊何嶠張延鄂璉棟等徒伴共

八萬人

右件賊徒自去年冬侵劫信州界內臣以其道途阻闊
溪洞險艱若欲討除恐爲勞役遂於今年二月內差節
度衙推諸葛成充東面招諭使判官便資委曲職牒招
誘其賊首何嶠等三人雖行匪有師而卜能從吉一時
應響三窟除姦纔當言下歸投兼乞軍前展效臣

缺缺

委曲補職名追赴軍前俾申忠節臣伏以小人興叛所
迷者貪競之心上帝垂恩所惡者殺傷之事終能耀德
固可弭兵與其繼獻捷書曷若盡收降款是以遠飛折

簡便倒羣戈塵不假於曳柴風自行於偃草溪頭洞口
免汚烟霞閭嶺鄱江豁通道路况乃各期後效盡願前
驅能令八萬餘人永不二三其意有以見陛下皇威天
覆元德日新四郊之煙壘將銷萬國之梯航競集則乃
軍中士卒安身而永別戰場宇內生靈攜手而齊登壽
域臣無任歌詠屏營之至其何嶠等下補職名願隨臣
征行及放散人數請續具申奏謹錄奏聞謹奏

奏姪男劬華州失守請行軍令狀

具銜高劭

右臣伏以僨軍之將禮所興譏大義滅親傳曾垂訓將
肅安危之本必嚴賞罰之科竊自巨猾增驕王師致討
臣堂姪男劭比在河中司錄得受李缺都指揮領昭義
之甲兵收華州之城邑稍申鷹犬之力暫挫梟狼之聲
已蒙特降殊恩俯旌微效服榮金紫位忝星郎始離蒲
坂之具寮遽假蓮峯之通守誠合率忠勵勇馘醜摧兇
稟進尺退寸之規決萬死一生之計終申誠節仰報寵
光昨者狂孽僅來疲兵再戰旣絕安西之救難申逐北
之威然而不能潤草塗原永忘苟活仰使靡旗亂轍旋

見脫歸致諸道之星分縱姦徒之霧結職此之過罪無
所逃豈可當二峯保守之時遽沾寵賞及一陣奔亡之
後得免誅夷國有常刑軍無貸法懲一勵百念茲在茲
伏乞聖恩特行嚴典徇于藩鎮警彼師徒所冀國章永
能安于社稷微臣家法亦願昧於神祇干冒宸聰無任
責躬泣血戰越之至謹奉狀陳請以聞謹奏

奏論天征軍任從海等衣糧狀

天征軍都將任從海及節級軍將並官健總二
百八十七人

右臣得都將任從海及節級狀稱自赴征行已逾五載
累曾沿海襲賊上江防虞去年軍都放迴本道從海等
且在當府願隨行營者各得家信知西川已停衣糧伏
緣從海等皆是貧寒更無營業彼處父母親屬便須委
壑填溝請具奏論乞還衣糧者謹按史記釋云天子車
駕所至則人臣爲僇幸賜人爵有級數或賜田租之半
故因謂之幸也伏以任從海等萬里從戎五年于役不
辭艱險願盡勤勞今者身在東吳職居西蜀此方苦於
鞠旅彼已停其衣糧遠路音書難寫征人之恨貧家親

戚先懷餓殍之憂伏遇陛下暫幸龜城未迴龍闕三川
草木別有光榮萬戶烝黎永能蘇息而任從海等久離
本鎮不睹殊恩望雨露之均沾恨烟波之迴隔固堪傷
憫輒具奏論伏乞聖慈允臣所請特令本道卻給全糧
所冀鳳駕巡遊士卒皆知其有幸鴻慈煦育君親必表
於無私謹具錄奏聞伏聽勅旨

奏論抽發兵士狀

當道先准詔旨抽盧壽滌和等州兵馬共二萬人
仍委監軍使押領赴軍前者臣當時已各帖

諸州令排比點檢次又得進奏院狀報近奉詔
旨更於諸州催促兵士者

右臣伏以兵惟飾怒雖尙勇於戰征師克在和固推誠
於輯睦苟非得衆何以成功臣當管廬州與和州舊有
讎嫌至今疑忌唯謀以怨報怨未遂知和而和孫端新
授滁州又與秦彥有隙既是滁和接境動有他虞若於
光蔡會軍必酬舊憾事非便穩理合奏論臣自得招降
多方控馭粗能禁戢免有動搖如令各出兵戈必恐自
相魚肉輒陳利害冀慎始終謹錄奏聞伏聽勅旨

奏請叛將鹿晏宏授興元節度使狀

右當道賀正子將許令琮等今月日迴得狀稱三月五日陳許軍潰散節級鹿晏宏領兵馬二萬餘人打破金洋等州突入興元府坐節度使牛勗四日夜領隨從人並家累約二千餘人奔投龍州西山谷者伏以天未悔禍地多受災旣當易動難安非可懲一勸百鹿晏宏早驅散卒廣集叛夫始聆焚劫東都旋見奔衝西路本道節度使周岌累令招諭終不歸降豈興破浪之風但熾燎原之火今者逆黨則鯨吞盛府元戎則鼠竄危途瓜

距已成根株難剗儻或未恕亂常之咎別興伐叛之師
卽恐終成一秦固應不利三蜀且列藩貢獻諸道表章
得達刀州皆由劍路况乃鳳城已復轡輅將旋縱令鷗
鷺在天能摧狡窟若更豺狼當道必礙行宮峽路雖通
水程多慮不唯險阻實且遐遙兼至上江皆爲賊境唯
憂進獻莫遂通流臣久竊寵光深懷驚憤遠詳事意輒
具奏陳伏乞聖慈霽雷霆之威迴雨露之澤速飛寬大
之詔特委撫綏之權鹿晏宏免致麀驚便當豹變必當
克己永務安人聖主含宏旣宥其窮斯濫矣姦臣警悟

亦免於尤而效之謹錄奏聞伏聽勅旨

進金銀器物狀

金器 銀器

右臣伏以烟塵向息道路猶虞每慙仗鉞之榮多曠獻琛之禮得申遠貢唯有輕賁前件金器銀器等質變披沙形分鑄礫雖愧易盈之用且資虛受之功固敢竭航波梯巘之心助麟趾馬蹄之瑞貢金三品空陳任土之宜望闕九重未遂朝天之願感恩何極戀聖徒勤今差押衙王虔隨狀奉進謹進

進漆器狀

當道造成乾符六年供進漆器一萬五千九百三十五事

右件漆器作非淫巧用得質良冀資尙儉之規早就惟新之製雖有慙於瓊玉或可代於璫瓶伏緣道路多虞星霜屢換器貢難通於萬里綱行遂滯於三年旣失及時唯憂虛月臣今差押銀青光祿大夫檢校太子賓客兼御史中丞上柱國辛從實押領隨狀奉進謹進

進御衣段狀

當道先兼鹽鐵使織造中和四年已前御衣羅
折造布並綾錦等除先進納外續織造九千六
百七十八段謹具如後物色

右臣久權筦貨素乏籌謀多虧山海之資莫報雲天之
澤前件御衣並綾錦綺等薄慙蟬翼輕愧鴻毛然而舒
張則凍雪交光疊積則餘霞鬬彩旣成功於鳳杼希入
用於龍衣儉德彌彰致美宜先於敝冕皇恩遠燭輸誠
必鑑於絲毫其匹段物等臣謹差某官某押領隨狀奉
進謹進

進綾絹錦綺等狀

進奉綾絹錦綺銀等一十萬匹段兩謹具色目
如後物色

右臣伏以兵戈充熾郡邑凋殘仰思御輦巡遊唯恨賦
輿懸闕况乃當道巡屬之內招降頗多皆請占畱將充
供贍貴息寇戎之患難豐進獻之儀前件綾絹錦綺等
雖製自鴛機而價慙鮫室負謝八蠶之號劣登三品之
名祇將申任土之宜豈足備補天之用輕微旣甚隕越
何安其匹段物色謹差節度散兵馬使王審球等押領

隨狀奉進謹進

桂苑筆耕集卷五

南海譚瑩校

桂苑筆耕集卷六

堂狀一十首

唐高麗都統巡官侍御史內供奉崔致遠撰

賀入蠻使迴狀

賀殺黃巢賊徒狀

賀收復京城狀

賀月蝕德音狀

賀內宴仍給百官料錢狀

請降詔旨指喻兩浙狀

謝加侍中兼實封狀

謝落諸道鹽鐵使加侍中兼實封狀

謝弟杞再除綿州狀

請轉官從事狀

賀入蠻使迴狀

右臣得進奏院狀報入南蠻通和使劉光裕等迴雲南
通和兼進獻國信金銀器物匹段香藥信馬等漢使傳
詔則星迴象林蒙王奉琛則雲集龍闕能舉羈縻之術
果悛倔強之心若非聖上德叶棄瑕化敷柔遠則何以
感鑠耳鏤身之衆啟隳肝瀝膽之誠彼越雉呈祥未爲

盛觀旅獒入貢徒見良箴曷若正在艱時能安獷俗使
雲南酋長再遵奉贄之儀天下賢良免獻征蠻之策斯
皆相公魏絳陳利王商振威已令六詔歸投即使八紘
清謐某比者南尊銅柱西鎮劍關曾施上將之謀免辱
大君之命今則遠聆盛事倍切歡心陳賀未由無任欣
抃云云

賀殺黃巢賊徒狀

右得進奏院狀報定難軍拓跋相公保大軍東方達尙
書奏於宜君縣南殺戮賊徒並生擒賊將又鳳翔李相

公奏探知京中賊徒潰散六月十三日聖上御宣政殿
排仗受賀者竊以逆賊黃巢稔惡旣多就刑非久敢驅
烏合之衆屢拒鷹揚之師拓跋相公東方尙書或力微
裔孫或曼倩餘慶皆申祕略共弭兇徒能順天誅遂陳
月捷軍名定難雅稱關張之聲縣號宜君克符堯舜之
德是以聖上高臨紫極遠耀皇威睹百辟之歡呼雷驚
蜀國想六師之勇戰電掃秦川卽當靜滅氛霾永見均
施渥澤此皆相公調鼎中之味運堂上之兵右援枹而
得功左執律而至獻勳功相繼稱慶何窮某久阻淮夷

尙淹海徼遠聆捷語但切歡聲然必願劍拂狼星旗迎
聖日終繼張飛之拒俊不慙攝叔之致師限守戎藩未
由陳賀下情無任踴躍之至謹奉狀陳賀謹錄狀上

賀收復京城狀

右得河中節度使王司空牒報四月十日當道與雁門
節度使李僕射及都監楊驃騎下諸道馬軍齊入京城
與賊軍交戰約殺賊步軍一萬餘人其馬軍賊便走出
城黃巢亦未知存亡其逃遁賊徒尋差兵馬追奔並已
收復京闕訖者伏以逆賊黃巢藏姦匿募惡積禍盈久

於輦下偷生固是檻中待死楊驃騎受聖君之重寄李
僕射傳飛將之雄名旣無慮於二心果有成於一力想
其霜鋒電擊月羽風驅壓雀卵之威高燎鴻毛之勢猛
遂使賊巢困不能鬪亂無所歸雖爲漏網之鱗已是傷
弓之翼則期加顯戮永掃羣兇加以熊據六宮豕豕九
陌今茲克復免致焚燒佇望翠華便歸丹闕稍豁上天
之怒實除下土之灾此皆相公靜運廟謀遠揚戎略旣
叶一匡之妙道北極何憂將流萬古之美談東封可俟
某登壇有忝仗鉞無功遠聽歡聲始除慙色限拘守鎮

陳賀末由下情無任抃躍之至謹錄狀上

賀月蝕德音狀

右伏見六月二十六日德音以太陰薄蝕曲赦三川管內囚徒及委諸鎮收拾埋瘞京畿四面暴露骸骨者伏以金精隱耀玉展垂仁答天誠以震驚省風謠而欽恤園扉宥罪掃彗銷冤近鄙北齊號御囚而肆虐遠遵西伯葬枯骨以施恩蜀山之草木先春秦甸之烟塵永息此皆相公功成燮理道洽變通助日月之光輝振雲雷之號令八方翹首萬彙歡心某跡繫戎旃心馳臺室阻

隨班列莫遂歡呼下情無任抃躍之至謹奉狀陳賀謹
錄狀上

賀內宴仍給百官料錢狀

右得進奏院狀報七月一日於內殿宴百官仍令度支
各給三箇月料錢並奉勅旨迴駕之日應沿路州縣切
不得輒進歌樂及屠殺者伏以聖上繼周匡業避狄興
聖日幸成都彌資儉德守元元之三寶達舜帝之四聰
撤彼珍肴掛其素服言唯罪已事不勞人今者已復上
京將迴大駕致柏梁之高宴盡醉千鍾鄙鍊布之乏財

均頒九府然後繼飛綸翰仍命繡衣制郡邑之嚴科節
道途之浮費既施合於好生惡殺亦停歡於八列九成
王化斯行物情皆泰此皆相公手攜多士躬賀聖君駕
行賦在鎬之章鳳藻詠濟汾之樂一時盛事萬代美談
某限守藩條阻攀仙仗心馳蜀棧目斷堯樽下情無任
抃躍之至謹奉狀陳賀謹錄狀上

請降詔旨指喻兩浙狀

右先淮浙西周相公牒杭州與浙東兵士鬪敵某遂具
事由申奏請降詔書速令戢斂伏奉二月二十日詔旨

已詔兩浙務在叶和者某當時備錄王言各移公牒訖
兼先差人賫書牒與劉漢宏尙書詰彼起戎之本諭其
繼好之規今得迴書其言不讓唯稱周相公與董昌苟
恃寵榮妄行威福虐侵近境阻截通津況有不同國之
讎嫌又失無蘊年之誓約必想見豺而戰猶能首鼠幸
生已決加兵終期釋憾然則此無和氣彼有鬪心嘗膽
者結怨旣深抉眼者遺言可驗必恐以吳興越終當有
越無吳實所謂夫差之麋鹿興譏范蠡之鼃鼃得便唯
憂黎庶枉見殺傷輒再具奏狀陳請更飛詔止遏某徒

圓鑿方柄避柱觸楹累陳高鳳之詞莫解子都之怒且
讎因手足疾在腹心久練師徒決期戰伐今也衛絲轉
亂鄭蔓難除三人是仇百姓何罪伏惟相公贊成睿略
施展廟謨俾陳兩武之事端唯仰一言之恩庇謹錄狀
上

謝加侍中兼實封狀

右得進奏院狀報伏奉十一月十一日恩制加授侍中
仍加食實封一百戶者伏以某材輸美箭業紹良弓早
勤式遏之規敢怠聿修之訓遂得一分戎闡七換師壇

提漢法之重權陟秦官之極品恩榮獨盛績効何申况
自蠱尾之徒蝟毛而起神州傾陷御輦巡遊不能踴躍
用兵有類遷延之役雖進退惟命不敢爭功而行藏相
時豈無懷愧而又鑄山煮海瓜剖豆分莫成贍國之權
徒竊經邦之位唯甘廢棄永見沉淪敢期渥澤之無私
俯念涓埃之有效許登玉署高戴金璫仍忝真封式加
懋賞且如講能奪席諫切引裾方升鸞渚之榮俾稱鳳
池之望豈伊孱劣所可貪叨此皆相公仰贊萬機俯安
九牧無使怨乎不以能令可者與之唯當三命益恭一

辭無退入則撫安疆圉出則誓掃氛霧佇成滅寇之功
冀贖曠官之責戎鎮有限不獲陳謝下情無任感恩兢
懼之至謹奉狀陳謝謹錄狀上

謝落諸道鹽鐵使加侍中兼實封狀

右某伏奉去年十一月十一日恩制加授侍中並餘如
故仍加食實封一百戶落諸道鹽鐵使者伏以君親委
任固能捨短從長臣子忠勤唯願從微至著某一司權
課六換暄涼正逢多事之秋莫展牢籠之用况自頻更
統帥別致租庸既當狐讓千皮實見羊分九牧贍軍富

國固絕籌謀熬海鎔山幾隳條貫今者聖上恕其不逮
察以無私將漢法之重權委儒流之妙術豈料更畱宸
慮猶念戎勲許登負璽之班資不替擁旄之寵寄尙假
極品重增實封當主憂臣辱之時若斯榮盛審福過灾
生之理何以遑安此皆相公曲庇庸虛全忘僭忝俾息
躬於負重當銳志於專征寧無淬礪之功仰答陶鈞之
賜此外以榮爲懼至末如初下情無任感戴兢惕之至
謹奉狀陳謝云云

謝弟祝再除綿州狀

右件官是某堂弟今得進奏院狀報奉某月某日恩制
除金吾將軍被本州官吏衆狀舉畱續准勅旨依前充
綿州刺史某嘗讀後漢書見寇恂爲潁川守後拜金吾
從上經過潁川郡人遮道願借寇君仍畱一年以慰百
姓此實國家殊寵郡邑美譚萬代以來一人而已誰知
盛事得屬鄙宗安貧恤孤潁川之政化雖乏出官入仕
子翼之官資略同感深而喜作悲端效淺而榮爲懼本
伏以高枳粗糲吏術忝荷君恩分憂而地壓劍關理俗
而塵銷鈴閣今者纔升緹騎卻擁朱輪謂施撫輯之能

特徇衆多之請此皆相公愛忘其短仁及於微仰贊帝
俞俯從羣願某唯知提訓俾愼揣摩同驅軾下之熊但
期靜理雖暗堂前之燕免限分飛限守戎藩末由陳賀
云云

請轉官從事狀

某官薛礪

右件官閔損登科良由德行陳琳從職實假詞華林幽
而轉識芝蘭木落而方知松桂深敦操尙夙著幹能遠
叨分閫之榮唯藉運籌之妙伏請轉官仍改章服轉充

觀察判官

某官鄭俶

右件官早登上第久佐大藩能修檢慎之規每助撫綏
之政實筵所重健筆爲先伏請轉官仍賜章服轉充節
度掌書記

某官顧雲

前件官東筠孕美南桂抽芳曳謝眺之長裾從衛青之
軍幕五穀皮之爲重豈謂虛譚百鷺鳥之不如方知實
事良資妙畫共展壯圖伏請轉官仍賜章服充觀察支


使以前件狀如前伏以某遠率舟師誓除國賊征帆則
雲掛行色戰鼓則雷含殺聲畱務旣繁良籌是托或倚
幕中之婉婉或求馬上之翩翩輒具薦論仰希甄獎不
拘月限別覲天恩伏惟相公庇護戎藩激揚賓席稍超
常例特受清資略假潤於丹青許分榮於朱紫所冀元
戎十乘速成討罰之功越府三才各得弛張之處已具
狀申奏訖云云

桂苑筆耕集卷六

南海譚瑩校







PL
2451
p29
1152

桂苑筆耕集卷七

別紙二十首

別紙 八十首

滑州都統王令公三首

鄭畋相公二首

史館蕭邁相公一首

度支裴澈相公一首

租庸王徽相公一首

前太原鄭從讜尚書一首

禮部夏侯潭侍郎一首

吏部裴瓚尚書二首

宣歙裴虔餘尚書二首

鹽鐵李都相公二首

盧紹給事一首

壁州鄭凝績尚書一首

泗州鄭庾常侍一首

湖州杜孺休常侍一首

滑州都統王令公

伏見制書伏承榮加內史之任暫執元戎之權往鎮雄

藩誓殲窮寇佇復宮闕期歸廟堂九重之倚賴如山八
表之歡呼動地而況令公志勤捧日力贍補天三秉台
衡兩分戎律入則建蕭何之功業出則振黃霸之恩威
此皆羣議稱揚不假拙辭贊詠今者聖上以叛徒乘便
尙敢侮張諸道徵師互相逗撓蠢彼之姦兇未弭赫斯
之憤怒良深遂輟股肱遠資心膂薦敖宰楚設前茅後
勁之規管仲相齊致九合一匡之譽是以榮轉西臺左
相請爲東道主人儒武全材古今罕遇伏想近承睿略
嚴令諸侯誠知白馬封疆幸而獲賴必料蒼鵠羣黨困

不能飛卽當立刻臬巢去迎鑾駕海晏而永興龍德池
清而再睹鳳儀凡在含靈皆增係望某靜思奮擊動見
悔尤四隣多是異心十道竟誰同力今所以自賀者得
逢知己親總貞師巧脣無所構之端壯膽有可傾之處
唯冀遙稟大將軍之命用勵驍雄仰憑眞宰相之威永
除妖孽末由陳賀下情不任欣慰瞻攀虔祝云云

第二

伏睹制書伏承榮膺寵命正鎮雄藩伏惟感慰竊以動
惟佐聖靜乃優賢百穀垂成則暫停霖雨八紘向泰則

貴息兵戈詎勞有道之人久練不祥之器羣情旣鬱帝
命斯行令公獨竭忠誠克扶厄運當六師扈從司南之
制度無虧及十乘啟行逐北之威稜有裕但屬王事靡
盥人心不同祖豫州志在誓江佇申壯節蕭相國力謀
佐漢或致遊詞今以小寇必殲大臣于役慮失華夷之
望倍興宵旰之憂遂仍鳳紙傳恩遠離西蜀蜂旗卷影
卻到南燕指蹤旣稟於成謀搏噬佇看於衆旅坐驅十
道臥理百城顯爲出入之寵榮保就始終之勲業某夙
銜深獎繼奉好音覽古人賀滿之言睹君子持盈之節

抃慰攀戀不任下情伏惟云云

第三

伏承旌幢已到鎮上訖伏惟感慰令公手傾霖雨身耀
福星三入廟堂已超仲父一匡寰宇更屬何人昨者十
乘啟行九重軫慮以爲螢不勞海灌卵何假山摧遂請
元臣却臨重鎮今則徐迴龍節靜撫雄師下車而恩澤
均沾舉扇而仁風廣振南燕受賜北極紓憂某早荷獎
知倍增欣慰云云

鄭畋相公

伏見二月六日制書伏承相公正居宏父光弼聖君兼
總蘭臺再調梅鼎凡云遠者近者莫不舞之蹈之伏以
相公碩德茂勲雄才奧學播在四方之口飫於萬乘之
心固絕贊揚但增瞻仰况自關中聚寇岐下屯兵率先
諸侯累展奇略是以才趨鳳輦便陟鸞臺遠陟山川行
就九天之寵克平水土坐升百日之榮竹宮旣託於清
規芸館更歸於雅望則乃孫叔敖之慎守愈貴愈恭胡
伯始之累遷有倫有要永憑上德佇賀中興使仲父執
鞭鄼侯捧轡驅蠢動入華胥之域格蠻夷歸虞舜之風

某早沐深知遠聆殊拜末由陳賀抃聳倍深云云

第二

伏承太保相公累陳章表懇讓鈞衡暫輟任於股肱果
優賢於羽翼緇衣纁美青綬加榮守難進易退之規叶
居安慮危之道莫不宸展欽矚搢紳詠歌而况相公比
者統冠甸侯深攻國賊倡義聲而飛羽檄官爵賞而練
甲兵方驅破浪之風佇滅燎原之火而乃腹心有疾牙
爪無功何君子之見欺實小人之難養然而災爲福始
小往大來再秉洪鈞遠安仙蹕調鼎中之實味運堂上

之奇謀決勝漢籌弭災魏闕皆憑蕭丞相指蹤之力豈
假鮑尚書統集之兵咸推第一之功能贊登三之業今
則奉身有裕止足無虧將尋疏傳之高蹤乃訪畱侯之
故事用黃石公之妙略蔚爲帝師從赤松子之勝遊別
作仙侶雖云獨樂其奈衆情氛曠餘妖方願靜銷於天
下隆谿重望豈宜久滯於山中必計才返鸞旌請歸鳳
闕永使蜩螳罷噪仍令鹿馬分形深荷眷私况聯親懿
依攀禱望可鑑遠誠拜賀末由悚戀增切云云

史館蕭邁相公

昨睹制書恭承高辭大計正陟中台兼升史館之榮實
副儒門之望竊以冊書所重筆削爲難別成一代之楷
模夔掩百王之規矩是得宸衷妙選朝列具瞻而況相
公真君子儒老成人德允釐百揆顯贊萬機今者邦計
旣豐國經斯整東西臺之極位敷歷無遺左右史之直
言裁成有賴莫不勛華表德遊夏緘詞能施補袞之功
備載垂衣之化必使褒貶彰發傳之體有三激濁
揚清勵事君之心無二古今盛美遐邇欽依某遠守藩
維忝資陶冶每愼六條之理敢希一字之褒抃躍旣多

啟陳無及伏惟俯賜念察

度支裴徹相公

伏睹除書伏承相公再履台席榮均貺_禮連凡在生靈莫
非欣躍某今之所賀者真以天上之福與大國之幸不
欲更牽俗禮強飾繁詞然而歡心有餘祝史無愧敢陳
贊詠冀豁懇誠伏以相公德襲清通道資恭儉歷游華
貫高陟台衡當聖君巡行之初見賢相變諧之業而乃
鵠原陷難鳳閣辭榮暫屈跡於外藩尋秉權於大計今
者天將悔禍日待升平果請英才卻歸舊位躡周司馬

統兵之秩聘晉尚書較運之謀四方所傳一意相賀某
每慙薄伎偏荷殊私再逢調鼎之期實切彈冠之望末
由陳賀但增攀戀聳抃之至云云

租庸王徽相公

伏睹制書伏承榮膺寵命伏惟感慰伏以萬乘巡游最
難畱事百官毗倚允屬持綱况當返駕之時尤重清宮
之禮膺茲寵寄實在賢能司空相公靜抱長材動施餘
刃報主安人之業早冠鼎司束姦芟弊之名已諧輿論
今者鳴鳩命氏鷹隼揚威內清輦轂之塵外肅關畿之

地聖君新命永託中庸司隸舊章佇觀大禮某忝承眷
獎欣抃實深云云

前太原鄭從讜尙書

得河中王相國書報伏承相公榮膺寵命將赴京國伏
惟感慰伏以宸游旣遠居守是難須倚元臣方安聖慮
是故昔漢帝曰吾與僕射何異則知重寄別表顯恩而
况相公岳立儒宗川流相業頃辭鳳閣遠耀龍旌郭伋
示信之鄉廣沾恩化周舉移書之地遍活疲羸肅軍令
於貔貅振兵威於玃狁求安邊境胡雛不敢南侵遽值

妖氛周馥久勞西狩今以玉京雖復鑾輅未迴輟戎略
於藩垣託繁機於宮闕必計中和樂職已繼雅音司隸
舊章卽興盛禮然後重調梅鼎永對冀階贊成天下之
春固是穀中之事凡云品彙莫不欣歡某早忝恩知倍
增抃慰末由陳賀但切依攀云云

禮部夏侯潭侍郎

伏承榮膺寵命伏惟感慰侍郎泰初朗鑑日月難踰孝
若美姿風塵莫染儒室別開其戶牖相門必繼其弓裘
是以始於憲府宣威便見儀曹主貢履歷而皆遵仙路

操持而永振貞風柏列朝霜昨日揖登臺御史桂開夜
月今朝選入室生徒採珠而蓬島待空搜玉而藍峯寡
色副天下正人之顒望息場中藝士之屈聲某早沐眷
私不任欣抃云云

吏部裴瓚尚書

伏承榮膺寵命伏惟感慰竊以勛華聖代唯務舉能邵
泰賢流共推取實用捨旣歸於重柄古今皆託於長材
人望所諧主恩斯在尚書情疎宦路性悅道風月高而
霜鶴數聲雲卷而蓮峯萬仞早知厄運久避囂氛洋川

之瑞草仙花幾牽蝶夢閨苑之朝嵐暮靄深潤豹姿然而陶鈞難住於山中塗炭待平於天下遂辭肥遯來謁宸遊果登銓管之司允洽簪纓之望昔年掌貢搜海嶽而皆空今日掄材酌淄澠而不混清通所在淆亂必除厯居六郡之峻資終補三台之缺位遠祈邇禱匪夕伊朝某早仰仙標遙欽懿範抃慰瞻望不任下情云云

第二

伏以禮稱選士實資秀孝之科書貴知人允屬銓衡之職君命旣將厯試物情固得僉諧而况侍郎雲鶴性情

天驥行止璣窗近日高批帝語於筆端絳帳生風妙選
羣才於門下泊湖湘察俗灋洛尹都便宜入秉化權坐
匡聖略直以手能持滿心切避榮唯求勇退之謀久阻
急徵之詔萬乘夢思於隱霧四方渴望於爲霖今者移
黜陟之司託情通之鑑何假山濤之密啟能遵李重之
良箴永期涇渭分流必使輪轅適用某每思玉昆金季
皆辱眷知松茂竹苞深敦交契禱祝瞻戀並同衆誠伏
惟云云

宣歙裴虔餘尙書

伏承榮奉徵詔將赴闕庭伏惟感慶兼極今者妖氛向
息聖運重興諸葛亮之用兵已非急務叔孫通之制禮
方藉賢才以尙書望積臯夔政成宛句三年察俗以仁
義爲先四境懷恩俾寇戎自戢是得傳巖結夢宣室飛
書黎庶傾心莫遂攀轅之懇君王聳耳待聽曳履之聲
况乃親侍安輿榮趨帝輦行聆調鼎永使建囊豈獨關
中又安實爲天下幸甚某久鄰仁境深飽德風抃慰瞻
攀不任誠懇云云

第二

特垂手筆榮函兼示陳情表藁捧尋無斃欣賀有餘且
近者時風僅訛無道多缺事親則薄奉已爲先只將奔
競榮身不以違離介意今睹尙書遠辭徵詔懇致奏章
敘向來爲國分憂不矜茂績請從此於家就養實稟格
言况尙書若赴行朝必登相位而乃不親梅鼎願奉板
輿是逃台袞之榮唯戀斑衣之樂永使李密之表萬古
齊名仍令束皙之詩千秋長價有以見聿修令問橫勵
時流豈唯上德之美譚實乃中興之盛事拜賀末由但
切攀依之至云云

鹽鐵李都相公

伏承榮膺寵命兼掌漕運伏惟感慰伏以鑄山熬海旣
標富國之權紫帳皂檐固是安邦之彥况從多事諒託
全才相公中庸日彰大任天降舟楫暫妨於援溺棟梁
必俟於扶危今者三年禮成萬乘恩至假途端揆正位
司元憑孔僅之智謀繼齊桓之霸業必也廣施奇計遍
致豐資答上帝之殊恩振中興之盛事凡云品彙孰不
欣歡某每慙糠粃居前久阻鹽梅入用主張多失固難
稱老成人交代叨榮無以告新令尹朴慰競惕不任下

情拜賀末由攀戀空切云云

第二

每辱榮緘卽垂虛譽周顥齊名於樂廣固是懷慙韓非
接傳於老聃實爲過望荷戴增切兢惶益深伏以相公
宋劍倚天魯戈駐日再居重任大洽羣情必計海若傾
心廣潤煎熬之利山靈効力助成鎔鑄之功便令流馬
飛牛終得踰千越萬國用則立期饒羨廟謨則坐致昇
平勤王之誠在我而已伏惟遵護用慰禱祠其他下誠
已具前狀云云

盧紹給事

近睹除書恭承賢兄左丞榮膺寵命伏惟感慰竊以國
有司直野無遺賢蓋前代之所難實我朝之獨盛况乃
上可以紂彈八座下可整肅百官永言其才固屬全德
賢兄左丞中庸處厚大雅含清柱晴空而嶽頂無雲瑩
秋色而潭心有月是得厯游華貫輝綽令猷頃遇分憂
暫作甘棠太守尋聆徵詔請爲仙桂主人此時也歡聲
則風振儒林喜氣則雲鋪筆陣有口皆賀無心不歸蓬
島靈珠想離頷下荆山瑞玉待入掌中而屬鷺谷藏春

鳳城陷寇不見孔門盛事唯傷魏闕餘災今者遠從行
朝久臨憲府既躡清資於侍極榮升重位於肅機傳咸
之畏愼無虧鄭晉之矜莊有裕正當今日必繼芳塵給
事避地經時陟岡勞念今聆美拜稍慰遠思然每於絳
帳馳心共懷遺恨須到洪鈞入手方洽羣情高接雁行
佇迎鳳詔虔禱瞻戀無以披陳云云

壁州鄭凝績尙書

伏承自小司馬假大宗伯出刺始寧伏惟慶慰竊以進
有致君之志共託阿衡仕無擇祿之言常聆季路綽然

遺範宛若合符尙書玉樹一枝金山萬仞雅望全騰於
八海華資緩步於五雲漢丞相之傳經永光儒室周司
徒之善職固屬高門况乃於國於家曰忠曰孝比者黃
巾犯闕翠輦省方尙書暫別鯉庭遠趨鳳展高提夢筆
仰贊宸猷稟大聖之指歸立中朝之張本此實爲人臣
之忠於國也今以聖主優賢嚴君遜位尙書固辭武部
峻陟儀曹榮掛萊衣俾歌廉袴毛義之喜難自己胡威
之清必衆知又爲人子之孝於家也莫不事標雙美譽
冠一時今被郡而昔彼州豈能較盛出傳舍而入官舍

未足齊榮佇見風扇揚名雲屏隔位隼旟高建免勞陟
帖之詩龍鼎待調卽展濟川之業某早銜眷獎常切禱
祠拜賀未期瞻攀無極云云

泗川鄭庾常侍

伏承已到貴鎮上訖伏惟感慰昔鄭宏爲臨淮太守熊
初架軾鹿乃挾輶旣傳一郡之政聲終陟三公之寵秩
果符瑞應永振美譚今則常侍族茂山東威臨泗上實
繼巨君之芳跡足分聖上之遠憂况乃沛帥戢兵淮民
復業懸一城之愛日振四境之和風羣情允諧新命非

遠某近封斯接殊眷先垂抃慰瞻攀但切誠抱云云

湖州杜孺休常侍

昨睹除書伏承榮膺寵命再理吳興伏惟感慰常侍比
臨霅水大振袁風適聆高握新蘭又見重分舊竹實謂
政聲日洽人欲天從徵黃太守之書卻隨鳳去借寇使
君之衆迎得春來自此烟封茗畦月挂蘋渚不詠洞庭
歸客卽吟金谷主人再樂三年終蘇一境然後入居青
瑣坐演紫泥福庶品而旣多掌陶鈞而不晚某早銜殊
眷抃慰實深拜賀末由瞻馳倍切云云

五言雜詩卷之七

五言雜詩卷之七

桂苑筆耕集卷七終

南海譚瑩校

桂苑筆耕集卷八

別紙二十首

泗州于濤常侍

西川陳敬瑄相公

徐州時溥司空三首

諸葛爽相公二首

湖南閔頊尚書

幽州李可舉大王四首

滑州王令公

鹽鐵李都相公二首

龍川裴峴尙書

西川柳常侍

史館蕭邁相公

三相公

翰林侯飴學士

泗州于濤常侍

常侍榮戴貂冠遠驅熊軾能施善政遍恤疲氓暫牧雄
州已安樂國斯乃鄭巨君之甘雨再潤淮邊卜子夏之
儒風重興泗上況屬彭門叛亂仍當汴路艱難獨守危

城終摧敵壘果成茂績實驗全才且羣師悅挾纘之心
鄰孽縮吞舟之口仁者有勇信非虛譚某昨奉詔書許
令軍賞設爵而唯憑帝命舉賢而實契私誠今則寵換
銀璫威兼鐵柱敬申厚禮用報殊功楚岸風聲處處而
旣傳滅寇隋堤柳色年年而祇望行春拜賀未期瞻思
頗切某公牒同封送上云云

西川陳敬瑄相公

伏睹除書伏承相公以祝鳩之榮兼大貂之貴禮登八
命寵冠三台伏惟感慶兼極伏以掌邦教之司無人則

闕負國璽之任有德始居昔丁固休徵終叶生松之夢
戴憑奧學會標奪席之名然十八年而旣居後時五十
重而何益於事曷若相公雄臨玉壘榮奉金輿昔也坐
振風謠作一方之慈父今乃立迎天寵爲萬乘之主人
使西夷免怨於後予南詔永知於戀聖是以秩歸鳳闕
化洽龜城躡高蹤於黃闥紫扉耀偉質於朱衣皓帶豈
獨一時之盛事實爲萬代之美譚某早沐眷知不任欣
抃云云

徐州時溥司空

竊以誓於晉乘則重其執贄往來諷以楚詞則愧彼隨
波上下永言有義有禮唯在知和而和況乃仁境接邦
之彥兮善鄰存國之寶也始終相契今古何殊去春特
辱長牋兼貽幣使者乃和門上校覘之以華棧大宛
引夏殷罪已之言鋪陳數幅舉邾魯息民之義撫綏近
封有以見真男子之用心古諸侯之行事其於景仰豈
可弭忘今遣專人聊馳徵信匪足爲報永以爲好伏惟
照察

第二

司空利器倚天忠誠貫日授律而舉無遺策訓戎而動
有成功昨者窮寇驚奔銳師薄伐審麟史追逃之勢展
豹篇決勝之機靜剗羣兇暗梟戎首范丹縣側雷威騰
肅殺之聲季氏山邊天罰示告成之慶久畱盛績終屬
雄才所謂有非常之人然後有非常之事絳灌亦一時
俊傑關張非累世勲庸鏤姓名於金鼎玉鐘飾儀形於
雲臺烟閣永言盡美孰敢爭先某幸接德隣深遵義路
每增欣賀固異等倫云云

時辱長牋俯傳大捷誘賊將而暗除梟師剗羣兇而逼
戢豺聲夫何壯哉誠可畏也且黃巢謂逃天得計乃揆
日偷生書罪則竹乏南山流惡則浪乾東海逞暴於鋸
牙鉤爪挺災於金闕玉京烟氛所侵塗炭皆匝諸道遞
相逗撓別自倂張驅兵而未暇塞旗喪律而先聆返旆
養姦旣久翫寇何安若非司空以當春滋雨露之恩則
坐迎龍節及初夏順雷霆之怒則立展豹韜遂得纔發
銳師果殲窮寇刷國家之積憤弭州縣之餘殃所謂三
年不飛終當一戰而霸况可飲頭而快意何須擢髮以

論辜有以見報聖天子之恩固須待舉真將軍之令幸
聯仁境先聽好音欣抃欽矚翰墨何寄云云

諸葛爽相公

伏承親提師旅遠赴戰征跋履山川蒙犯霜露不審近
日尊體何似急景周年寒威肅物令行麾下盡忘皲瘃
之傷望峻寰中將救瘡痍之患必有百靈薦祉七萃成
功遠揚郤元帥之高名近繼郭汾陽之雄略卽銷氛祲
遍活烝黎有心之徒引領而望伏惟每加保重早副禱
祈遠誠所望云云

第二

訪聆賊巢自逃商嶺久偪許田蔡師相連狂鋒尙熾當
使以道途遠隔行止難知未施倚鹿之能但養斬蛟之
勇伏承相公親麾八陣深運六韜將靜掃其羣兇已齊
驅其銳旅旣見三冬擐甲卽致殊功方知五月渡瀘誠
爲易事諸道固當高枕聖君便可迴鑾而未測鯨奔頃
防獸搏凡居戎閫合審軍機輒遣專人遠偵賊勢幸垂
示及冀助討除伏惟照鑑謹狀

湖南閔頊尙書

親故前河西朱大夫到遠垂書示深荷眷私兼將尙書
弄馬圖及貴府祥瑞事跡相示閱覽忘倦欣仰有餘且
武藝所稱厯朝可數楚誇徹札魯衍蒙輪彎三百斤之
長弓嘗傳漢史掉八十斤之雙戟亦著魏書然而唯守
一隅莫能四達長於射而短於御力甚壯而心甚怯永
言戎伎難遇全才今者尙書術繼白猿名高赤兔旣占
萬人之敵真爲一代之雄雖居仗鉞之榮不忘據鞍之
勇爰徵粉繪妙寫風儀遍覽左旋右抽唯知目駭神聳
彼繫繩逞捷運臂服勤實謂區區瑣瑣者爾况乃夢符

捧日政治觀風花竹呈祥果驗中興之運龜龍薦感皆
標上瑞之姿若非望重行春歌喧來暮則何以三軍效
勇永諧欽化之名七郡懷恩盡表殊常之應必期渥澤
繼入瀟湘此則但睹其電擊雲飛鷹麟鶚視每勞企想
無以喻言唯望慎舉政條仰酬寵寄方值四郊多壘實
憑萬里長城其他中心藏之永以爲好幸垂諒察云云

幽州李可舉大王

不審自履初夏尊體動止何如伏想趙盾日威雄臨北
塞袁宏風化遙助南薰固當九郡懷恩百靈薦祉符提

白玉儼標萬里之長城臺築黃金遍啟四方之賢路豈
止應掛絲之夢自然超衣錦之榮伏惟精愼寢興別迎
寵冊永扶昌運大洽羣情今遣諸葛果卿假以郵巡修
聘旣愧未成好幣又慮或失良材無限違誠各具別狀
云云

第二

雲龍在想風馬異區末由傾蓋之誠空切著鞭之望雖
傳鱗翼莫寫肺肝况某俯顧家門忝同里閭每詠維桑
之什卽懷喬木之恩幸蒙侍中大王不賤家邱深知國

產曲垂厚獎頻辱好音然則苟能知心何假會面以斯
佩荷可鑑依攀今緣國患未除鄰讎不戢甚欲慎言結
舌其如憤氣填膺略假牋毫具陳事實恃惠子之知我
望明王之鑑賢伏惟恩私遠察誠素云云

第三

伏以蜂蟻巢窠猶能稔惡熊羆隊伍未見摧兇在於義
士忠臣莫不痛心疾首某蓋謂去年奉詔遂於近境旋
師然今若終不自行必恐竟無所就已從中夏遍閱大
軍待剗淮戎卽登汴道但以指其百勝決此一行人不

異心事希同力侍中大王族榮周姓爵貴漢封固多報
國之誠常貯安邦之術見茲禍難忍不憂勤某旣事征
行輒申控告伏望差借兵士助平寇戎得貴藩精騎五
千勝諸道羸師十萬行收京闕尅在旬時亦已先具奏
陳所貴免成專輒申包胥之告急與此雖殊趙充國之
請行于今可試幸垂亮察必賜允從不敢獨擅茂勳所
冀均分重賞忠誠之切實在於斯伏惟永存始終早示
可否未間願望可想眷翹云云

第四

別奉榮緘遠搜古籍其於降歎無以喻陳且近者列土
諸侯盈庭多士唯以宦塗銳志少於儒術畱心而乃侍
中大王博古通今去華取實燕碣石之接士已繼芳蹤
漢維城之好書遠符仁旨是以訪遺編於汲冢尋墜簡
於魯宮然則荆軻易水之歌徒聆壯氣召伯甘棠之詠
虛播政聲豈若博采聖人之書用光君子之道但懷鑽
仰敢覬切磋况某久擁戎旃難親講席耽讀闕五千卷
之數藏貯無三十車之多自奉指蹤願申誠懇遍令列
肆廣集異書冀資日益之功寧憚風詠之過必可徵名

東觀承乏西齋伏惟俯賜鑑察云云

滑州王令公

某蒙恩忝官不任感懼某粗傳堂構謬荷國恩然而術
略素貧勲勞甚淺早分相印累陟師壇每遇福過灾生
蓋爲材微任重一自四郊多壘萬乘蒙塵未施毫髮之
功深負咽喉之寄羊皮狐腋空思趙簡子之言瓦釜黃
鍾寧免楚大夫之歎旣難展用唯願退閑方欲瀝血拜
章奉身請老豈料更隨衆例亦忝殊榮遽登常伯之高
資復益實封之異寵伐檀可懼橫草何申伏緣遞路不

通制書未到先垂榮問過辱獎詞既聆天上之音不愧
月中之夢末由陳謝但切兢惶云云

鹽鐵李都相公

某蒙恩忝官不任感懼伏以納言峻秩真食殊榮有扶
持社稷之功有變理陰陽之術方居正位允洽羣情如
某德乏潤身智慙周物况逢多事未展壯圖動無効於
啟行靜有乖於臥理加以久司莞貨實寡籌謀既虧於
富國瞻軍深愧於木牛流馬唯甘黜削永遂優閒豈料
聖澤無偏戎藩有忝輶飛盡鹿昔年而莫見休徵冠聳

豐貂今日而愈慙非據仍加班邑何報聖朝此皆僕射
每賜保持得榮交代唯期勵節共願匡時陳謝末由依
攀益切云云

第二

竊以世途易變時事難言泛泛如水中自安滔滔者天
下皆是雖董卓已燃巨腹衆切歡呼而桓彝若有忠魂
潛應慟哭每窺師律空激壯圖今則大駕未旋外藩多
難獲利者唯謀潤屋握兵者誰解清宮當道雖乏供須
但勤貢獻願早迴於御輦難空倚於賦輿割占所因指

撫斯在必希朗鑑深察鄙誠其他卽遣專人冀其後狀
云云

龍州裴峴尙書

遠勞專介特枉華緘發函睹不滅之蹤滿幅示相憂之
旨其於佩惠何以寄言且國步猶艱天心難測忠直者
韜聲戢影姦邪者鼓舌簸唇彼旣一時此須三黜唯當
竭節豈足興言尙書偶值危時暫淹雅望將期厯試無
限卑棲寵辱若驚周柱史非無意也行藏自保魯司寇
有是言乎多謝故人勉報聖主分憂救瘼爲政非輕志

操不虧恩榮斯在伏惟諒察云云

西川柳常侍

某頃鎮龜城別營雉堞蓋符天意得就土功今者幸遇
巡遊謂申績効久畱御輦俾立豐碑杜元凱方愧勲名
李元盛敢言德政雖忝當功受賞其如見寵若驚常侍
直道而行樂人之善遠垂華翰過辱獎詞以永傳不朽
之譚先見未來之事可使美掩蜀都之賦高齊劍閣之
銘荷戴兢慙無以指喻伏惟照察云云

史館蕭遠相公

某日無勞効天降寵光雖雨露常均不辭潤物而邱山
漸重莫遂安身况蒙相公察以獨立聖朝勤行直道迴
乖芘蔭免使湮沉既闢洪爐辱陶鎔之厚賜仍揮彩筆
煩刻畫之妍詞以爲動有成功前無強敵撫寧淮甸靜
戢烟塵繼陳任土之儀遠瀝望雲之懇遂使榮升畫室
特解牢盆更增班邑之恩尙假統兵之位仰窺華翰俯
揣凡材未能息多壘之灾何以竊長城之譽唯期激勵
少報生成拜賜未前懷仁益切云云

三相公

某蒙恩忝官不任感懼伏以風后古官是聖代弼諧所
重國僑美賞非賢才負荷固難必也挺秀儒林鉤深學
海方可奪席占五十重之譽享秩稱二千石之榮如某
任重咽喉功微毫髮早提兵柄不能靜剗寇戎久握利
權無以廣資經費雖進退每從於帝命而否臧實愧於
軍謀以茲責躬無所逃罪但願罷歸林藪絕望雲霄豈
料宸襟猶傷墜履自上安下方慙畫鹿之幡居高飲清
忽戴附蟬之冕解煩難於平準增寵祿於實封此皆相
公啟導睿慈庇安戎律使貞金鍊火免銷耗於毒烟直

材摧霜更敷榮於聖日唯當親驅銳旅幸討羣兇冀成
破竹之功少贖伐檀之劾末由陳謝悚惕增深云云

翰林侯翽學士

某材略素貧勳勞甚薄謬蒙睿渥累陟華資今者拜以
古官加之真食伏蒙學士親奉宸睠過垂獎詞煩郭璞
之彩毫榮勝軒冕使夷吾之瑣器頓異斗筭遭逢實契
於百生銘鏤豈唯於一字但冀仰憑筆陣更鍊戎韜充
國壯心早遂征行之望無鹽陋質免慙刻畫之恩荷戴
兢惶不任誠懇末由拜賜但切依攀云云

桂苑筆耕集卷八

南海譚瑩校

桂苑筆耕集卷九

別紙二十首

都統王令公三首

浙西周寶司空五首

宣歙裴虔餘尙書三首

壁州鄭凝績尙書二首

太保相公鄭畋一首

護軍郗公甫將軍三首

前左省衛增常侍一首

泗州于濤尙書二首

都統王令公

近者專馳賀狀伏計已覽卑誠久絕來音但多景戀令
公始終陶冶表裏經綸王商能止於訛言謝萬暫提其
勁卒奪窮寇姦兇之魄活疲甿震懾之魂行旣順天捷
當克日某比承詔旨久緩師期今伏見令公命許君親
身先將校幸叶彈冠之望倍驚投袂之心已閱全師旣
離弊鎮雖自稱岸上之虎或謂當仁而不畏水中之龍
實歸重德唯期助役非敢貪功欲取來月上旬決謀進
退直衝宋野先會梁園請遣專人咨探行李輒覲迴信

聊紓遠懷伏惟恩私深賜鑑察云云

第二

累專寓狀粗得輸誠繼奉榮緘益銘殊眷不審近日尊
體何似夏星沒火秋琯飄灰佇妖氣之雪銷想軍聲之
雷振伏計振振君子之德伋伋勇夫之誠足可憑有慶
之威誓無譁之衆功期一舉勢必萬全謝太傅之智謀
預知大捷鮑參軍之歌詠唯佇中興伏惟慎保節宣用
諧時望某常銜曩顧况捧溫言朝禱暮祈可量卑懇云
云

第三

某自承令公親率銳師佇殲窮寇便謀訓練欲赴戰征
願折豺牙仰瞻馬首履山川而犯霜露久決心期環甲
胄而峙糗糧早成力辦不料徐戎忽聚費誓猶陳未豁
征途難通饋輦以此早申誠懇但切憂惶伏想萬夫爭
殲弩之先八表望建囊之令佇見龍歸魏闕却迎鳳舞
荀池雖居喙息跂行盡解口祈心禱某早窺偉量遙稟
壯圖仰視旄頭漸覓奔藏之處俯看屐齒唯懷斷折之
虞恭竢捷音專申賀禮未前祝望不暇啟陳云云

浙西周寶司空

昨奉緘翰兼寄示書碑樣眷私旣深披閱無倦其於榮
抃無以喻陳某每念久握兵戎累移節制雖纘弓裘之
業未場鍾鼎之勳況乃來暮歌稀行春化拙豈期睿獎
特采微勞許標不朽之規遠降非常之寵至如仲尼儒
術始流芳於沂水之湄元凱戰功方掛美於峴山之頂
愚實何効遂叨此榮司空念切憂忘事諧響應猥垂恩
力妙選書工所謂知臣者莫若聖君成我者固須良友
有始有卒念茲在茲彼雖未起雕鐫此已先深銘鏤今

者干戈務壅筆硯事疎不及別請他人敬遵來命唯望
早成刊勒實賴獎憐其碑詞同封呈上云云

第二

錄溫者包藏異謀玷污元化螻蝻暫成聚窟鴟梟貴欲
同巢誠謂天高可欺不知日遠能照果彰罪跡遂舉刑
書既絕慮於竊鉄俾成規於用鉞言堪自賀事必相傳
豈料司空染五色毫飛一函紙徵美詞於魯史辱虛譽
於劉牋列土除兇不負國章在手臨風拜賜其如戎律
拘身未啟素誠但銘殊貺

第三

揚示詔書仰窺聖旨佇攀高躅倍激壯懷司空寄綰吳
門敢懸魏闕况奉臣哉之命必興王者之師但希水簇
舟船幸遵舊俗山堆戈甲早振雄威副大君旰食之勤
慰下走朝飢之望某祇看風信便泛江程五兩翩飏解
指朝天之路三軍踴躍待申破竹之功許接後塵遠示
行日儻可從心所欲必希攜手同行王導有言無作楚
囚相對劉琨養勇以誅逆虜爲期事可榮今功何讓古
旣銜帝語勿老師徒願因江漢之征得遂瀟湘之遇云

云

第四

伏以山岳降靈尹吉甫之全德風雷奮氣竇世寧之異
祥况乃景值新秋時當聖代間生英傑高建勳庸伏惟
相公名可掩瑜志堪奪璧魏公子春霆振響有物皆驚
晉大夫冬日流輝無人不愛深蘊安劉之業終成佐漢
之謀今則又慶生辰永資景福出握元戎之柄旣播嘉
聲入持宰相之權卽迎急詔禱祝攀戀不任下情有少
續壽之儀謹具別狀寄獻云云

第五

專使押衙傳遜至啟閱華緘奉承珍貺光輝奪目荷戴
銘心况承已奉堯言永除回恐繼好息民之義遠耀麟
經輸忠報主之誠頻傳雁訊喜氣連鋪於兩岸嘉聲遍
振於四隣敬仰成規深敦曩契唯願內防蜴譖外息狐
疑必期戮力於公家不敢欺心於閭室伏惟深賜云云
宣歙裴虔餘尚書

今月十六日裴校書至伏蒙深追曩顧迴黜違言損之
以榮賤辱之以好幣情敦刻畫無非譽過之詞事繫琢

磨宛是愛忘之眷既多受賜永切銜知不審自履閨秋
尊體何似伏想蟬噪暮景鶴叫晴空樓下長溪閣政聲
而不息窗中遠岫引詩思以無窮伏惟侍膳之餘公退
之暇精加保愛佇俟寵徵某早願攀嵇近蒙善鄭深祝
瞻望豈任下情云云

第二

去年因景氏子有小人言讒誣之事多興噂喅之詞不
少動成忌器久阻親仁昨以戎首既摧禍胎自剖遂修
舊好聊達微誠伏蒙尙書特請嘉賓遠賁厚幣俾息四

方之笑永通兩地之歡捧嘉貺而增榮窺雅言而竊朴
况對蓮池之客實逢桂苑之仙自此句渚清波已能流
惡隋河遠派亦得洗瑕鍊多而既識金精燒罷而共知
玉冷伏惟仁鑑俯察愚衷云云

第三

當司宣歙院被浙西越局侵權差官奪務以強自恃謂
暴無傷仰計通仁備詳深弊今者鹺務却仍舊貫已有
詔書浙西雖近宋聳固殊魯瘠只解租庸副職尙提招
討兵符宜慙已往之非用結將來之好竊知猶尋亂轍

愈弄雄權再署周正罔思唐令宣歙院上違聖旨下阻
羣情實虧臣子之誠豈道鬼神之怒旣失用和爲貴唯
知長惡不悛伏望尙書洞察事情俾全理體雖知秦鏡
固無遺鑑之虞或恐齊竽猶有濫吹之誚能摧狡妄遠
托威嚴亦慮官吏驚疑必望深加撫恤幸甚

壁州鄭凝績尙書

賢尊相公不閒庸虛早垂眷顧每念攀鴻之懇頻傳繫
雁之書動皆陶侃之手蹤曾非陳遵之口占寶玩而字
終不滅何翅三年輝榮而恩有所從倍賢十部况與尙

書頃依鳳里已覲龍章清談深仰於阿戎異禮得攀於
侯豈高山仰止何日忘之今者遠辱榮緘過垂虛譽永
言抃荷但務鐫銘云云

第二

某素無材術謬荷寵章頃握兵權方舉上將軍之令爰
沾睿渥叨承大司馬之榮仰覲鳳書深慙豹略此時未
審尙書躡八花塼之影綴五色筆之詞刻畫恩深游揚
意重不獲早申感激遠謝褒稱又奉華緘方知麗藻雖
早榮紙貴固無愧於士安而每想筆乾實有慙於元照

既多闕禮何贖深辜伏惟眷私終賜恕察云云

太保相公鄭畋

自承相公大郎再持廟筭大庇藩條况蒙特假陶鈞正
歸權筦雖則魯爲長府仍舊貫之言行其如晉閱被廬
作新軍之意切未能措手尋見移權凡所阻躡自能審
度遠垂批示倍荷恩私如愚者焉所獲多矣敢速官謗
有負親知伏惟鑑察云云

護軍鄒公甫將軍

某用舍行藏唯遵帝命始終去就冀洽羣情仰酬萬乘

之知豈計一朝之忿昨者繼窺天旨更勵冰心遂令專
介傳書願得近鄰釋憾周相公似能遵稟免致悔尤既
知遽瑗之非必息廉頗之怒一帶水永除多梗九重天
實鑑忠誠自此日聆雞犬之音風識馬牛之性往來無
壅彼此相成斯皆將軍遠贊睿慈旁均和氣共成美事
但荷深仁特辱芳緘過垂虛譽銘戴慙惕豈任下情

第二

特垂寵示過辱獎詞竊知將校官寮三軍百姓共陳衆
狀請發奏章以爲烟塵自起於四郊塗炭遍加於九野

唯有斗牛之境稍無戎馬之災此實地分所招天心見
庇蓋烝黎之福也何功力之有焉豈料將軍過聽衆詞
助成美事欲煩錄奏特賜傳言然以拙政而誘羣情以
虛言而干聖鑑固爲不可實所難當伏惟終寢奏論俾
速官謗便同受賜非敢矯言伏惟允察云云

第三

特辱華緘猥傳吉語初驚善謔終荷深仁某每省庸虛
過沾寵寄未能報主豈至封王雖漢代諸侯亦流恩於
異姓而周書列爵須示賞於殊勳曾無剖竹之聲詎有

分茅之望旣非實譽必恐虛傳但慙眷私未敢陳謝云

前左省衛增常侍

忽奉榮緘特垂善謔宣父則欽遵三益老君則唯贈一言仰銜成我之恩但抱起予之歎自常侍遠勞仙騎俯顧弊藩竊承久陟道途倦乖軒蓋戀德而披雲尙阻懷誠而啟露未期每憶笑談莫勝饑渴某也早以勤行至道唯希翊贊聖朝張良正遇於漢恩敢言絕跡范蠡未除其越恥詎欲逃名非求八百歲以成春但讀五千言

而勵節幸無大故且恕小瑕方願惠然肯來豈將率爾而對云云

泗州于濤尚書

蠢彼徐戎聚茲餘燼敢侵貴境再逞姦謀只應來就誅夷固可立期撲滅况尚書德超定國威跨栗磳妙略防危實知孺子可教強鄰結憾是表忠臣不和去年旣振雄威今日更資茂績此已微驅衆旅救援仁封永言牙爪之勤須託指蹤之妙願詣羣望暫屈長才輒敢請充都指揮使仰俟一呼之命同成九拒之功冀耀兵權早

燭寇黨得脫齊桓之恥唯憑郤縠之賢伏惟眷私深賜
照察

第二

昨者竊聆有拔城之議遂申忠告冀保遠圖伏奉迴緘
得窺深旨且徐戎肆虐固非楚子之能泗俗懷忠不比
蕭人之怯欲謀自潰何謂克終雖云有慮於防川豈可
潛思於坐井某近奉詔旨頗促軍期卽得經過貴州便
可剗除寇壘未見殷輪之苦且更勉旃其於破釜之言
已承命也他具前狀此不繁陳云云

桂苑筆耕集卷九

南海譚瑩校

桂苑筆耕集卷十

別紙二十首

魏博韓簡侍中一首

鄂州崔紹大夫一首

考功蔣泳郎中一首

前泗州鄭廉常侍一首

新羅探候使朴仁範員外一首

蕭邁相公二首

田軍容一首

都統王令公賀冬一首

浙西周寶相公一首

前宣歙裴虔餘尙書一首

幽州李可舉太保五首

徐泗時司空一首

田令孜軍容送器物一首

振武赫連鐸尙書謝馬狗一首

幽州李可舉大王一首

魏博韓簡侍中

一自黃巾北侵翠輦西幸蝗無避境蟻已壞堤內無宮

闕之災外結藩維之恥諸葛爽者豕食難飽豺聲易驕
却躡迷途敢凌貴圉侍中手驅虎隊心閱豹韜一陣纔
施三城遂復雄功始見冊命俄臨永爲壯士之盛談別
作諸侯之美事某昨欲剖巢燠穴久爲淬甲厲兵及出
師徒又蒙詔旨且令利權山海鎮壓江淮一弭國讎先
資邦賦然其奈夜眠軍幕霜橫枕上之戈曉掛戎衣雷
吼匣中之劍終願親揚勇略靜滅兇徒伏惟鑑察

鄂州崔紹大夫

遠蒙仁私特示表藁其於歎仰無以喻陳某夙練戎韜

願裨王略不愧於管天錐地猶勤於撮壤導涓遂敢累
貢忠誠冀迴聖鑑儻或六龍下峽豈同五馬渡江中朝
之禮樂無虧下武之功猷斯在果蒙大夫惠於宗族贊
以表章過垂華袞之褒益睹彩毫之妙古詩云不惜歌
者苦但傷知音稀今日知音幸遇之矣然榮示中媿茂
安之德業齊越石之機謀自顧瑣才何當虛譽今則王
導清望已推於首座相公劉琨至誠亦付於襄陽僕射
必期英鑑永察愚衷云云

考功蔣泳郎中

特勞專介忽辱榮緘過垂軒冕之褒永寘巾箱之寶實
慙彼已豈敢當仁郎中學士暫避艱時偶勞僑跡今者
官清司績職峻集仙麟趾殿中久侍驂鸞之客螭頭階
上別親吐鳳之才豈唯舉四善之精詳蓋必備九重之
顧問鋪陳組繡演暢絲綸且也虞夏商周之書重行聖
代蕭曹魏邴之位更屬何人詎可守三徑之寂寥慮千
山之險阻許垂訪別專冀祇迎伏惟眷私幸賜鑑察

前泗州鄭廉常侍

竊以寇戎未殄士卒多驕凡曰郡侯實難政理縱得上

和下睦猶爲朝是夕非况福乃儻來禍惟不測但無慙
於屋漏亦何累於國恩然而常侍蓋切奉公匪疎撫士
雖云驚擾終免侵傷有以見爲政無私當仁有裕伏承
已離泗水始及淮山捧閱來緘摛謙往咎其於瞻仰胡
可弭忘然則郡守懸魚旣繼古人之節塞翁失馬可寬
達士之懷云云

新羅探候使朴仁範員外

忽奉公狀備睹忠誠慰愜欽依但增衷抱員外芳含雞
樹秀稟鰲山來登天上之金牌桂分高影去陟日邊之

粉署蘭吐餘香今者仰戀聖朝遠銜王命捧琛執贄棧
險航深能獻款於表章欲致誠於官守雖無奉使難在
此時九州之侯伯傾心萬國之臣僚沮色幸來弊鎮得
接清規况奉貴國大王特致書信相問將成美事不惜
直言儻員外止到淮壖卻歸海徼縱得上陳有理其如
外議難防無念東還決爲西笑聖主方深倚望賢王佇
荷寵榮道路亦通舟船無壅勿移素志勉赴遠行峽中
寇戎或聚或散此亦專令防援必應免致驚憂且過鬱
蒸可謀征邁館中有闕幸垂示之所來探候事已令錄

表申奏敬惟鑑察

蕭邁相公

某累貢表章請議巡幸忠誠屢罄宸睠未迴冀保始終
再陳利害匪望河陽之狩願迎汾水之遊竊以諸道賦
輿皆遵峽路多是僥五致一蓋已萬水千山後綱不繼
前綱所貢不如所費况近者西從蜀國南至荆門似有
微災恐遺巨患忽若草寇侵據江陵阻艱則榛梗旣多
苞茅莫入或更蠻戎伺隙必令越旬勞兵避柱觸楹防
微可誠行舟墜劍戟滯固難某以孝子不諛其親忠臣

不詔其主遂陳狂瞽遠黷聖聰唯望略泛龍舟暫遷鳳
里庶使九州修貢不愆任土之宜四海歸仁盡遂朝天
之望且賊巢兇狂聚衆穢黷經時縱能早覆妖巢豈可
便迴法駕淮南乃寰中俗富閫外名高喻以金甌永無
釁缺比於玉壘實異繁華伏惟相公居注意之朝處沃
心之位周成王之卜洛始託姬公晉元帝之渡江終資
仲父早申決議仰贊宸衷能成可久之規益表無私之
德某頃在西川制置及於南詔通和雖爲先察於微豈
欲驟稱其伐但緣相公皆垂目驗不敢面欺則今日荆

蜀灾星未能退舍吳楚福地實可遷都事歸從權化資
垂拱永致一家之理必輸萬里之誠某言不近誣志唯
遠慮非奪日官之業冀垂天子之恩幸望國僑無譏裨
竈謹以具表陳請訖伏惟鑑察

第二

伏以物忌太盛器滿必傾自古有言至今爲誠苟或不
能知止但欲貪榮則有折鼎足之虞炊劍頭之險某每
念遭逢聖運紹續舊勳北定羌戎南征蠻蜚東降齊盜
西建蜀城高提三尺之權粗展四方之志然自烟塵聚

孽原野宿兵曾無敦說之全材先叨統帥詎有縱橫之
令策兼領利權而乃不能首唱義聲身先銳旅戮奔鯨
於海澤逐獠犬於秦關遽及火熾祠篝火驚御輦遠聆
巡幸便議征行但以每當誓衆之時卽奉止軍之詔雖
自始終勵節其如進退失圖華元興城者之謳子產致
國人之謗乃有浙侯構隙沛將加兵三年已來二憾不
釋蝸螳競噪蚌鷸相譏厚誣而巧弄舌端顯奏而亂搖
心曲求刺船而不暇想投杼以難逃伏賴相公照以秦
臺調之伊鼎察邾公之愬鄭伯解晉帝之疑石苞免挂

刑章尙縻寵秩旣蒙明洗誠合淬磨更修克己之心永
竭勤王之力直以松筠不改雖自保於堅貞蒲柳先秋
遽已傷於衰暮筋骸漸憊志氣潛摧縱欲自強終憂不
逮今者幸遇上京已復大駕卽迴麟鬪龍吟固息興妖
之慮放牛歸馬實迎偃武之期某也旣在清時誠爲棄
物况縈沉痼深負壯圖攬鏡無憊投簪是念豈慕祁奚
請老尙處冗員唯思范蠡愛閒得行素意乞解所職自
卜爲宜伏惟相公選士惟賢退人以禮俯矜羸劣特賜
允從雖慚未遂報恩免更久爲尸祿仰干陶冶敬託牋

毫始知調急聲哀唯愧詞窮理盡伏惟俯賜恩鑑

田軍容

某慙無術略久竊寵榮提漢法之重權陟秦官之極品
莫申展効何贖貪叨况自寇盜奔侵京都陷覆久守咽
喉之寄不成毫髮之功雖兵柄旣多固難措手而君恩
未報實切覲顏况乃室怒潛興鄰讎競起陸遜徒稱其
佳吏崔暹終憾於癡人顯奏相誣多言可畏幸蒙軍容
推心庇護極力保持雖遭貝錦之詞免陷織羅之罪祇
合以戀軒思幄策蹇磨鉛畢命爲期在公無倦但緣攝

生罕妙從役久勤齒髮旣衰精神亦耗少私寡欲敢言
君子者乎多病愛閒方謂古人是也智力不可強進寵
章不可濫行實覺妨賢只宜求退今者肅清鳳闕撲滅
梟巢囊弓矢以銷兵永除戎備垂衣裳而致理廣任賢
才如某者寒灰罷爇智井誰顧往歲之南征北伐雖忝
當仁此時之尸祿素餐逾慙非據旣失行驅十乘豈能
臥護六軍輒貢表章懇辭爵位伏惟軍容察以有犯無
隱之義難進易退之規仰贊帝俞俯從愚願敢有脅肩
諂笑固無沒齒怨言幸逢四海之昇平願指一邱而養

老干黷清德兢惕實深伏惟云云

都統王令公賀冬

伏以律管潛吹星躔改候觀臺望瑞雲物呈祥伏惟令
公每布祥雲常懸愛日三軍殲弩挾楚纘以忘寒五夜
枕戈擁孫衾而達曙必資景福早建殊功雅當肅殺之
時便遂討除之勢四方聳耳佇聆大捷之音萬乘傾心
永致中興之運某末由陳賀但切禱祈

浙西周寶司空

伏以禮慶履長傳標視朔夷夏契混同之運乾坤叶交

泰之期伏惟司空相公浙水流恩吳山變俗旣睹趙衰之日永洽物情願親傳說之星早環帝座末由拜賀但切禱祈云云

前宣歙裴虔餘尙書

伏以禮稱迎日傳載書雲當寰中賀聖之辰是水外寢兵之際宜陳善祝仰薦殊祥伏惟尙書政報褰帷慶資溫席已捧徵黃之詔固諧夢說之期人仰板輿羨老萊之榮養帝畱金鼎待伊尹之來調某雖戎律拘身而清規在想末由拜賀但切禱祈

幽州李可舉太保

碾玉排方腰帶一條並金魚袋一枚金花銀合

盛重一百六十兩

石件腰帶體資廉潤功就琢磨雖慙鄂坂之金稍勝延陵之縞珪璋比德宜親佩劍之腰霜雪呈華願近生松之腹動則金章躍鯉靜乃寶匣盤龍既當屈以求伸唯望服之無斃謹專寄獻遠表依攀伏惟恩私特垂檢納

銀結條燈籠一枚

承燈蓋白盛荷葉一漆木匣盛金銅鐫餘並全

金花平脫銀裝硯臺一具

垂鈎香囊五枚漆木匣盛金銅鐫全具

金花平脫銀裝硯匣並硯几一具

銀硯水瓶等四事硯几在

第二缺內

右伏以持異物而奉異人嘗聆新語覽遠書而愧遠客
亦驗古詩志常切於攀鴻事不慙於獻鵠每逢珍玩則
繫懇誠前件燈籠硯臺等鑄鑠成功披砂潤色運巧而
靈絲綴藻標奇而霞藻雕華高懸謂雲葢凌風遙視疑
露盤含日龍膏豹髓偏宜卜夜於歡筵鳳筆鵝牋亦可
依仁於末席加以謝囊分掛孔硯深藏虛心而只待含
香蘊器而終能處默是敢徵美言於舉燭寄徵慊於濡

毫伏惟無思宋殿葛籠癖敦儉約或逞張池草聖許近
恩輝必可遠耀九光深滋五色隔飛蛾而救物仁化彌
彰研含麝以傳書德馨增馥非無所採粗有可觀必望
眷私俯垂容納幸甚云云

金花陷銀柘裏合大小共三具

銀接頭紅牙匙一十對

犀杓子四隻已上大合內盛銀裝茶碗四隻在
中合內盛

犀櫟子二十片在小合內盛金花銀腳螺杯一

隻

石件匙筯犀合茶椀螺杯等雖愧金盤粗勝棘匕鈿玳
瑰之表異固讓魏銘詠玳瑁之標奇敢徵潘賦所貴者
烟排翠點霞染纖條掌握增榮不慮劉使君見失指蹤
任意或希柳御史自攜况乃水族殊姿天成雅器永免
蜘蛛寄跡能將鸚鵡齊名稍謂珍奇遠思寄獻伏惟靜
籌帷幄許接樽壘對郭隗於高臺深傾露液遣甘需於
仙闕勝醉霞漿伏惟恩私特賜檢納幸甚云云

織成紅錦繳壁兩條 暖子錦三匹

被錦兩匹 西川羅夾纈二十四匹

真紅地絹夾纈八十匹

右件繳壁錦纈等龜城傳樣鳳杼成功張廣幅而宛見
虹舒疊綵繪而免慙鮫織雖五千里之誇步障則難可
爭光而四十匹之製戎衣則或堪入用亦冀備會稽守
晝行之服換平津侯夜寐之衾不咎輕微特垂容納于
浼斯甚兢慙實多云云

安南開海路圖一面

西川羅城圖一面 並八幅紫綾綠

右竊以事畏人知功慙自衒孟側奔殿終著美於魯論
卻至驟稱果興譏於晉乘妍蚩可鑑今古何殊頃者銅
柱南標金墉西建開八百里之險路則雲將驅石雷師
劈山築四十里之新城則水神滲泉地媪供土蓋乃感
忠誠於上鑑標壯觀於外藩敢言簡在帝心實匪率由
人力今則八蠻歸化萬乘省方既能有備無虞亦所當
仁不讓去年嘗傳雅旨欲覽微功乃徵於墨妙筆精遍
寫彼長途峻壘宛如縮地不止移山遠遣寄呈略希展
閱必謂桂陽衛颯誠瑣瑣焉亦知蜀國張儀是區區者

恃深眷而不拘小節激壯圖而無訝大言伏惟云云

徐泗時司空

右伏以縞帶紵衣魯史乃先其所出投桃報李周詩用
表於相知永言沼沚之毛豈讓琅玕之寶蓋防闕禮只
貴申誠前件物等雖曰土宜亦由波及實慙華麗況至
眇微難把八行盡寫傳心之語唯憑一介聊陳藉手之
儀伏惟眷私特賜檢納云云

田令孜軍容送器物

右竊以氣曠未銷道途尙梗久乖專信略達微誠每憂

於遠莫致之不敢以多爲貴者前件器物貨非難得器
實易盈雖慙鏐銑之名願接樽壘之列輒將寄獻遠表
依攀伏望無掛意於四知幸流恩於一諾特垂容納云
云

振武赫連鐸尙書謝馬狗

右特蒙眷知遠有惠賚無庾亮的顙之害有陸機黃耳
之能敢謂備於左牽右牽實爲馴於執勒執縶寧唯致
遠况解防姦旣驅策之有期固指蹤而無失仰承重貺
倍荷殊私末由報酬益多愧悚伏惟云云

幽州李可舉大王

青氎帳一口 金銅裝鉸具

右伏蒙恩私特賜惠賚委之專介衛以壯夫遙陟危途
得張官舍不假棟梁交構能令戶牖全開出觀則一朶
蓮峯入玩則千重錦浪加以頂標曉日額展晨霞靜吟
而筠箔搖風俯視而地衣鋪雪舒卷皆成其壯觀行藏
永佩於深仁莫不銜沙漠之奇模駭江淮之衆聽臥龍
竊譽固當高枕無憂虜豹成功必可運籌決勝唯期尅
捷全賴庇庥荷戴所深啟陳何及伏惟云云

桂苑筆耕集卷十

南海譚瑩校

桂苑筆耕集卷十一

檄書書共十首

唐高麗都統巡官侍御史內供奉崔致遠撰

檄書

四首

檄黃巢書

招趙璋書

告報諸道徵會軍兵書

告報諸道徵促綱運書

書

六首

答浙西周司空書

答江西王尚書書

答徐州時溥書

答襄陽郗將軍書

浙西周寶司空書

浙西護軍焦將軍書

檄黃巢書

廣明二年七月八日諸道都統檢校太尉某告黃巢夫
守正修常曰道臨危制變曰權智者成之於順時愚者
敗之於逆理然則雖百年繫命生死難期而萬事主心

是非可辨今我以王師則有征無戰軍政則先惠後誅
將期尅復上京固且敷陳大信敬承善論用戢奸謀且
汝素是遐眦驟爲勁敵偶因乘勢輒敢亂常遂乃包藏
禍心竊弄神器侵凌城闕穢黷宮闈旣當罪極滔天必
見敗深塗地噫唐虞已降苗扈弗賓無良無賴之徒不
義不忠之輩爾曹所作何代而無遠則有劉曜王敦覬
覷晉室近則有祿山朱泚吠噪皇家彼皆或手握強兵
或身居重任叱咤則雷奔電走喧呼則霧塞烟橫然猶
暫逞奸圖終殲醜類日輪闊輾豈縱妖氛天網高懸必

除克族況汝出自閭閻之末起於隴畝之間以焚劫爲
良謀以殺傷爲急務有大憊可以擢髮無小善可以贖
身不唯天下之人皆思顯戮抑亦地中之鬼已議陰誅
縱饒假氣遊魂早合亡神奪魄凡爲人事莫若自知吾
不妄言汝須審聽比者我國家德深含垢恩重棄瑕授
爾節旄寄爾方鎮爾猶自揚鳩毒不斂梟聲動則齧人
行唯吠主乃至身負元化兵纏紫微公侯則奔竄危途
警蹕則巡遊遠地不能早歸德義但養頑克斯則聖上
於汝有赦罪之恩汝則於國有辜恩之罪必當死亡無

日何不畏懼於天况周鼎非發問之端漢宮豈偷安之
所不知爾意終欲奚爲汝不聽乎道德經云飄風不終
朝驟雨不終日天地尙不能久而况於人乎又不聽乎
春秋傳曰天之假助不善非祚之也厚其凶惡而降之
罰今汝藏奸匿暴惡積禍盈危以自安迷以不復所謂
燕巢幕上漫恣鴛飛魚戲鼎中卽看焦爛我緝熙雄畧
糾合諸軍猛將雲飛勇士雨集高旌大旆圍將楚塞之
風戰艦樓船塞斷吳江之浪陶太尉銳於破敵楊司空
嚴可稱神旁眺八維橫行萬里旣謂廣張烈火蒸彼鴻

毛何殊高舉泰山壓其鳥卵卽日金神御節水伯迎師
商風助肅殺之威晨露滌昏煩之氣波濤旣息道路卽
通當解纜於石頭孫權後殿佇落帆於峴首杜預前驅
收復京都尅期旬朔但以好生惡殺上帝深仁屈法申
恩大朝令典討官賊者不懷私忿諭迷途者固在直言
飛吾折簡之詞解爾倒懸之急汝其無成膠柱早學見
機善自爲謀過而能改若願分茅列土開國承家免身
首之橫分得功名之卓立無取信於面友可傳榮於耳
孫此非兒女子所知實乃大丈夫之事早須相報無用

見疑我命戴皇天信資白水必須言發響應不可恩多
怨深或若狂走所牽酣眠未寤猶將拒轍固欲守株則
乃批熊拉豹之師一麾撲滅烏合鳴張之衆四散分飛
身爲齊斧之膏骨作戎車之粉妻兒被戮宗族見誅想
當燃腹之時必恐噬臍不及爾須酌量進退分別否臧
與其叛而滅亡曷若順而榮貴但所望者必能致之勉
尋壯士之規立期豹變無執愚夫之慮坐守狐疑某告

招趙璋書

都統太尉騎問趙璋古人有言曰大廈成而燕雀相賀

湯沐具而蟣蝨相弔審其賀之與弔由彼依之與違且
爾同惡相成異謀斯構遠爲犯順尙敢偷安今我水陸
徵軍天人助信久審風雲之會遠揚雷電之威卽當行
展豹韜立擒梟帥剋收城闕靜剋烟塵想計爾曹具知
吾意但以先春而後秋者天之道重賞而輕罰者君之
恩遂乃馳吾咫尺之書問爾方寸之事爾等依憑大憝
猾亂中朝罪已貫盈理須誅翦然若黃巢狠性能改雄
心自新望其國封建彼家社勲業可超今邁古恩榮可
付子傳孫必爲致之速相報也如或螳螂努臂猥偷磨

牙輒欲拒張必當撲滅爾須詳審至理勸誘元克欲令
天下知名早申忠節奈何草間求活終作叛徒况居成
算之中卽在覆巢之下死生有命禍福無門唯審是非
可知成敗所謂燕雀相賀蟣蝨相吊實在於知與不知
順與不順良時易失嘉會難逢生爲有害之人死作無
知之鬼深可耻也深可痛也勉唯去就早副指蹤悉之
告報諸道徵會軍兵書

中和二年五月十二日具銜某謹告某州府節度使逆
賊黃巢自亂天常亟移星律縱使擢其賈髮詰罪難窮

未能春彼狄喉稔奸斯極神誅可俟鬼怪何憑而敢鴟
張鳳城熊據龍闕至於五尺童子猶欲請纓况在四方
諸侯忍爲投袂偶屬朝廷密施廣畫先倚甸侯不勞十
道徵驅必謂一毫蕩定豈料軍令雖殊於兒戲將名莫
驗於童謠未暇塞旗旋聆反旆遂使犬猶狂吠猿不驚
號徒招翫寇之譏孰擅弭兵之譽聖上暫飛日馭親省
風謠蔭暘行恩睿慮則雖勞罪已慕羶結望羣情則却
怨後予然而自幸龜城久停鑾輅秦雲遠隔蜀柳再芳
每興霜露之懷聖情可想未滅烟塵之患臣節何安某

去年羽檄先馳牙璋後舉唱義聲於遐邇養勇氣於偏
裨於是廣徵陶侃之船久握辛毗之鉞畫鷁齊飛於雪
浪檣烏高轉於烟空必欲帆張曉風旗侵夜月纔離楚
岸便到漢江直驅背水之師永破滔天之孽而乃未施
豹畧頻降鳳書已知諸道進軍不許遠藩離任詔旨云
爲朕全吳越之地遣朕無東南之憂是以再閱綸音遂
回組甲蓋乃仰遵帝命固非敢緩師期今則萬里專征
誰能奮翼三年縱敵尙許磨牙賊巢雖戲鼎中已居机
上掘尾狗子輒曾發狂斷頭將軍難可釋怒某幸忝握

兵之要固當仗義而行近奉詔條遍徵戎旅一呼巡屬
四集驍雄不唯被練三千實有控弦十萬已取今月十
八日部領兵士發離本鎮必得直趨汴道徑入潼關立
剗梟巢去迎鑾駕引舜風之無外覩漢日之再中况都
統王令公暗運智機別操戎柄已提勁卒卽展奇功足
可相應軍謀共興王畧諸道自從賊盛皆峻官榮况爲
食土之毛盡思効命矧乃荷天之寵豈合安身且大丈
夫之在世也壯氣難申良時易失苟或美事讓他人之
手殊恩負聖主之心則莫測肺肝何施面目固應各勤

訓練同願誅鋤瞻帝輦而魂飛擁戎軒而毗裂早看行
色勿懷兒女之悲須把戰勳永作子孫之福謹告

告報諸道徵促綱運書

謹告某州節度使夫忠於國者無以家爲是故漢代微
臣有傾產助邊之請魏朝烈士有舉宗陳力之言况乃
邊寄榮身兵符在手遇大朝之多難見上宰之董戎而
不能役致泛舟令行挈畚使戰士猶多饑色將軍未獻
捷書但忝分憂實爲忍耻某昨從中夏再集大軍不慙
素飽之名已警無譁之眾仍差都押衙韓汶先資金帛

百萬匹救接都統令公軍前旣裝運船將扣飛檄言遵
汴道徑指圃田乃值徐戎來侵淮口扼斷河路攻圍郡
城近者又擁寇徒直衝近境敢憑蜩結欲恣鯨吞當道
旣見阻艱暫須停駐遂乃揀徵驍勇往討頑寇佇靜封
疆便登道路必可豁通綱運廣備供輸行稱東道主人
非無意也立斬南陽太守竊有志焉諸道久荷深恩各
居重任縱以家門寶貨猶合瞻軍况將州縣賦輿豈宜
壅利其宣武忠武天平昭義泰寧平虜河陽等道盡發
雄師咸從統命共依饋運各已通流其浙東浙西宣州

江西鄂州荆南湖南嶺南福建等道今欲踰年未貽發
運若由水路須入汴河如此稽畱何因濟集必計杜畿
美化遍得人心任峻奇謀兼施兵力速請同勤饋輦繼
發綱船齊至都統軍前早期收復京闕其徐州實爲國
蠹豈止隣讎蓋以天暫容奸地猶聚慝昔爲龐助叛亂
早合瀦宮昨因時溥猖狂更宜塗地偶屬朝廷未誅大
愆不問小瑕貴悅軍情驟加爵賞而乃時溥罔遵詔旨
尙構奸謀去年曾犯淮山今夏又侵泗水乃作黃巢外
應久妨諸道進軍先須剗當路之豺狼後可殄壞堤之

螻蟻冀使隋皇新路楊柳含春無令漢祖舊鄉荆榛撲地凡承寵寄其察忠誠謹告

答浙西周司空書

某白忽覽來示驚憤兩深是何見事之乖如此發言之過且趙公約者背軍逃走行怙追擒遽投跡於貴藩遂偷生於逋藪今則異端斯構細作爲名若能懷上士之心豈可信下人之口譚何容易事不酌量來示云位極上公權專都統別興異見遽起他謀以何悔尤欲爲燒劫此乃稍殊雅責僅涉穢詞鼠尚有皮蓋譏無禮駟難

及舌亦戒慎言豈是不爲虐兮誠非所可道也司空晚
歲縱不以學識爲長從事雋才亦合以智謀相贊虛成陷
飯難望和羹未諭是非須陳本末具標五信無貯一疑
且此三世立功無非報國四方出鎮曾不安家身持將
相之權手握恩威之柄豈獨撫淮邊之俗終期安海內
之人方切輯綏何言侵伐其可信而不合疑者一也况
今黃巾尙熾翠輦未歸方驅貔虎之師欲破豺狼之窟
遠離弊鎮深託善鄰臨危而猶冀依憑守靜而更除損
害其可信而不合疑者二也司空早聯中外永保初終

言旣馥於芝蘭操彌貞於松桂曾無罅隙每有音書偏
深魯衛之情永絕張陳之事其可信而不合疑者三也
浙西始爲交代未得多時陶公之官柳誰移召伯之遺
棠不讓至於賊壘猶將信義招行况是舊藩豈以兵戎
侵逼其可信而不合疑者四也昨自師過江浦令肅雪
霜軍門則擊柝夜嚴行路則銜枚晝靜豈有任從海則
登舫趙公約則隔簾通報旣不難爲指麾又何易得直
至上流嘉客不暇接迎是何下等健兒敢來親近其可
信而不合疑者五也粗申大較可察中心何乃憑叛卒

之讒詞失賢人之事體以此陳奏聖主以此傳告諸侯
非我無詞是誰有過細審來旨莫測貴懷爲當老耄所
侵末年多變爲復狂迷偶作忠節遽乖夫耳不辨五聲
目聾目不分五采曰昧司空久當重寄已謂元臣因何
妄發莠言或似自懷逢性不知彭寵此時有按劍之疑
却恐廉頗他日無負荆之處噫將帥則空榮列土君王
則尙遠蒙塵更無匡復之誠唯有猜嫌之事祇隔一條
水脈便興萬種風言必計心虛遂成口實大凡獻酬以
禮來往爲書理失其中事生非小且須審諦勿恣豪強

於此難盡私誠其他備載公牒無遺後悔併棄前功

某白

答江西王尚書書

十二月六日某白閣下遠損長書深貽善諭一覽而發
皇耳目再窺而驚越神魂是何詞彩之彬彬能致言端
之懇懇既知約我以禮方信起予者商况乃事徵於美
里聖人道婉於首陽義士切磋雖至刻畫何勝敬佩良
箴專銘鄙抱然慮虛聲易應真寶難知弄脣吻以鑠金
眾皆妙手拭瞳眸而辨玉多是清盲苟非原始要終則
必唱予和汝是以畧陳梗槩用察根源匪欲廣援古今

所希暫曉左右僅同伐善豈免興慙君其審之僕所望
也僕與浙帥周司空早於鳳里相識亦爲鵠原往還接
載笑載言之時展如兄如弟之分况作建旗交代真爲
結綬相知旣睦比鄰罷局外戶江南江北祇鬪行春三
楚三吳盡喧來暮方謂憑我友歲寒之節解吾君宵旰
之憂豈料蒼鳥高飛翠華遠狩僕以久叨重寄便決專
征偶緣兵力未加人心尙懾遂於春首先發羽書仍請
都統判官顧雲協律議其成之事謀相見之期固非閱
被廬之軍徵夾谷之會實欲親謀敵血方寫痛心若能

接濟師徒粗得振揚聲勢而乃周司空却自棄同卽異
不能捨短從長忽疑惑於澠池謂矜誇於踐土便見戒
嚴城壁阻塞津途構猜嫌而信有小人遺故舊而曾無
大過僕雖逢彼怒但守吾真及至中夏出軍外方多事
冀安弊鎮旁倚近鄰又令幕客過江請爲都統副使豈
街弓旗之禮邀辟元戎祇憑鈇鉞之威撫綏近境周司
空確乎阻意亮爾興譏不從固請之言自惜有餘之刃
頓移曩顧但積沈猜見此初屯下瀨之師未設中流之
誓猶淹水道久候天風軍聲旣振於四鄰人意自防於

兩岸偶有背軍官健趙公約者走投浙西釣以巧言構
爲細作便移長牒妄說異端其書云位極上公權專都
統別興異見遽起他謀以何悔尤欲爲燒劫僕以趙襄
子之忍辱念茲在茲蘭相如之慎微有始有卒遂馳書
牒具述事情聞司空尙發怨言自懷忤色與宣護景德
貞徐帥時溥者暗資積釁相應密謀各興梗路之兵戈
遍告沿江之郡邑以至練成戰陣鎖斷征途僕若不辭
險阻之虞必致殺傷之患坐甲而未期破竹回車而用
待負荆尋屬繼奉絲綸不令離鎮遂驅組練卻已班師

雖云帝命斯遵實乃隣兵所阻彼宣州者亦有所因春
初寇犯黟州勢侵旬水况值前廉已去新帥未來旣無
禦捍之權恐落奸覓之便遂差押衙馮綬暫令安撫郡
城蓋緣曾奉詔書特許便宜從事凡於制置得以指麾
景虔貞常侍菽粟不分蘭蕕莫辨謂言專輒遽有侵凌
殺害軍人劫掠財物馮綬幾臨死所劣得生還自此隋
國怨興謝城信絕將投彼鼠其如有礙之時欲債於豚
又是無端之事且爲含忍未及通和必知橫被織羅巧
成貝錦傳之於遠誰曰不然噫滔滔者天下皆同君子

所恥泛泛如水中自樂壯夫不爲但問事之若何則知
曲之在彼今則特垂教督益驗獎憐自緣有理可申豈
便無辭以對固非飾過不敢憑虛莊生不云乎其智適
足以知人之過而不知其所以過若非辱殷勤之旨何
以息睚眦之詞僕也不能嫉惡如讎唯以用和爲貴但
以賢愚其惑本末未彰復書而不覺詞繁比事而終慙
理短身修三省勉尋曾子之規心敬一言永荷伯陽之
惠幸垂鑑志某頓首

答徐州時溥書

六月十六日某白僕射足下特辱長牒仍移公牒細詳
來旨頗涉多端有同戲以前言無乃驚於眾聽雖倚兵
強力壯其如作僞心勞且泗水舊隸仁封新標使額固
非郡守專輒蓋是朝廷指揮爲在頃年獨全忠節遂編
名於防禦永傳賞於驍雄近者久結隣讎蓋遵國典獨
行直道固守危城嘗膽爭先斷頭非苦此亦古人云寧
爲忠鬼不作叛臣之義也况于尙書有定國恩威有粟
礪武勇自安疲俗甚洽羣情每將句踐單醪均沾無黨
不獨臧洪薄粥分啜有餘固當散三年之儲充一日之

費寡能敵眾安可待勞豈比於築室反耕杜門卻掃者哉忽覩來示云泗州獨阻淮河自牢城壘使四方多阻諸道莫通而又每於朝廷妄爲訕謫今有城中將校潛來計圖請少振兵戎卽便期開泰者大凡人事莫若自知足下去年忍雋不禁求榮頗切暫奮橫行之氣果成順守之權是以累受國恩遠膺藩寄豈可尊身忽物是已非人偏致嫌於蘭生終歸過於季氏其於淮河久阻道路不通皆因貴府出兵不是泗濱爲梗是非可辨遠近所聆去歲夏初早蒙侵伐呼蟻軍於漣水拒虎旅於

淮山此緣將援親仁難逃善戰爰謀薄伐用救倒懸君
異荀吳莫振受降之譽僕慙呂布有虧解鬪之言泗州
以實奏陳豈爲謗譏僕也雖慙知己嘗敢薦賢亦曾錄
詔寄呈必合垂情見悉誰料旣踰望始翻起釁端甲兵
繼興疆場頻駭所云泗州城中將校頻來計圖此乃巧
飾虛辭遍行長牒盡知譎詭孰肯詭隨朝廷以足下身
處雄城刃多餘地委催綱運冀濟權宜但自戢歛兵車
必得流通饋輦今則却云奉朝廷旨收徐泗封疆廣
出師徒難窮事意必若足下訓戎勇銳報主忠勤何不

親總全軍往殲巨憝早立非常之效以酬不次之恩而
乃知僕再次西征卽謀北渡便侵泗境來犯淮壩負國
家之寵榮構州縣之患害幸其賊勢阻此師期未諭雅
懷何辜聖獎言但繁於枝葉事莫究於根源來示又云
此皆廬州海州皆爲背叛累來投款不遣措詞者強謂
恩情形於書札顏雖不厚心且何安彼東海廬江偶聚
奸惡異端斯起旣非鄭有人焉同氣相求盡是跖之徒
也足下已居重任不徇危謀自守詔條何煩飾說僕累
將軍食頻救臨淮爲分順逆之蹤令保始終之志實以

泗州曾非杞子之無禮亦類展禽之有詞每當告急告
窮唯以行仁行義唯望足下暫息餘怒深量遠圖且先
報國之誠無急伐隣之役兼覩詔書獎諭請與忠武協
和足見睿情俾銷微憾在於臣子合更慎思求將安撫
氓黎速自追迴士卒苟或上負君命下違物情隔礙征
途侵凌近境則亦難辭借一用試當干必見傷禽易驚
困獸猶鬪悔須防後險已居前矧乃泗州以抱節爲名
貴鎮以翫兵爲務泗州則唯遵王化貴鎮則虛構牒詞
以較否臧可知曲直是敢遠申忠告冀絕後誣正當聖

主蒙塵未除禍難何忍諸侯列士更起兵戎猛發忠言
懶爲諂笑勉思大體勿暴小瑕必因此日所箴却得後
時見謝幸從誠信無損功名某官某頓首

答襄陽郃將軍書

中和二年七月四日具銜高某謹復書於將軍閣下某
側窺前史嘗慕古賢贈人以至言則老聃垂誠成我者
良友則管仲知恩但恨季俗寢訛芳規僅喪豈期今日
得覩餘風將軍唯恐掩瑜欲令磨玷特勞彩翰遠辱長
牋初尋歸美之獎詞汗驚浹背後覽扶危之箴諭淚迸

沾頤旣乃粲然可觀焉敢率爾而對輒憑毫素仰疏血
誠終冀恩私畧垂採覽幸甚幸甚某自去年春知寇侵
秦旬帝幸蜀川欲會兵於大梁遂傳檄於外鎮練成軍
伍選定行期便被武寧忽興戎役先侵泗境後犯淮壖
聲言則狼顧舊封實意則鯨吞樊鎮長驅猛陣直犯近
疆是以分遣偏裨果殲兇醜及當中夏乃出大軍旣知
其北路阻艱遂決於西征利涉尋奉詔旨云卿手下甲
兵數少眼前防慮處多但保淮南之封疆協和浙右之
師旅爲朕全吳越之地遣朕無東南之憂言其垂功固

亦不朽某以兵機固難自滯君命有所不從已事征行
必期進發占風選日只欲奮飛又奉七月十一日詔旨
云諸道師徒四面攻討計度收剋旦夕可期卿宜式遏
寇戎饋輦粟帛何必離任則是勤王或恐餘孽遁逃最
要先事布置以此再承綸旨遂駐舟師唯廣利權宜供
戎費殊不知無虧進退唯命是從却被近鎮讒誣聖朝
猜慮食駃騠之良肉何敢望焉絆騏驥之駿蹄無能爲
也遂使忠誠未展睿獎難期非敢自辜海內之人心但
養淮邊之兵力詢之於理良有所因將軍以泗州舊屬

彭門謂某妄爲占護必慮未詳狡計或採浮詞且徐州
昨自俯張更無戢斂威權旣盛暴虐轉深見某自五月
初再謀征討已排勁卒欲援令公兼差都押衙韓汝先
賁一百萬貫救濟都統軍前盡載舟船將臨道路又興
兵甲來擾疆陲把斷淮河簇成寨柵是以行計猶阻羣
情莫安細察徐州所爲是作黃巢外應不然則何以每
見當軍臨發卽將克黨奔衝又乃執稱泗濱阻絕汴路
且臨淮則城孤氣寡劣保疲羸彭門則地險兵強恐行
狂悖以茲斟酌可見端倪况無諸道綱船曾過泗州本

路今則皆因此寇卻滯諸綱近則浙東浙西遠則容府
廣府並未聆饋運何濟急難某見簇楚師俾誅餘孽一
則遵行詔旨救援鄰封二則得靜長淮欲登征路固非
貪泗民之租稅排徐帥之兵戎蓋分曲直之端將保初
終之節泗州二年閉壘一境絕烟織婦停梭耕夫釋耒
滿城軍食猶仰給於弊藩閩郡賦輿固難徵於疲俗將
軍謂某藉其地利構此鄰讎細閱來言難知深意泗州
不獨咸通之際得振雄聲曾於天寶之中亦遵直道况
于濤尙書政條旣舉武畧兼精收百姓之歡心得三軍

之死力將軍便令棄而不問理復如何徐州實有大憊
固非小患若將助虐豈謂輸忠某今所俟者戮當道之
豺狼奮乘秋之鷗鶚星言夙邁電擊專征必與王令公
腹心見知首尾相應齊驅蛇陣豁展豹韜尅復上京奉
迎大駕亦不敢負秣陵之節度爭強弩之功名所冀得
繼前勞自防後患使藺相如之謙德不損雄威費無極
之讒徒皆歸顯戮捨此之外餘無所云敬佩良箴豈離
愚抱伏惟鑑察某再拜

浙西周寶司空書

昨奉公牒云當道臨淮叛卒過江來投集眾廣場已受
降訖三復來示言雖不酬且降之爲名其理甚大虞舜
之七旬苗格晉侯之三日原歸此皆以干紀亂常起兵
動眾緩之則稔成患害急之則橫致殺傷遂假小慈終
施大信能敷德化俾革奸覓若有偶聚萑蒲散爲榛梗
者其須撲滅勿使晏安今相公幸此隣灾樂其軍禍莫
能嫉惡翻欲惠奸恐乖仗鉞之威虛銜倒戈之捷且如
去年陳儒徒伴唐突貴鎮封疆僅有六萬餘人宣州日
告危急此時相公何不招諭致令侵凌却見瑣瑣頑覓

卽自勤勤誘引莫測高旨實辜眾心傳不云乎召

缺外

盜書不云乎爲逋逃主稍詳至理無信虛詞昔漢朝匈奴叛黨來附景帝便欲與之封周亞夫曰彼背其主而見賞何以責人臣之節以小喻大可量事情況臨淮一郡早從淝上行營及淮邊戰敵每有優賞曾無偏頗自是臨財則競起貪心遇賊則皆無鬪志旋爲逗撓猶與矜寬昨又請換都頭已依眾請殊不知犬易興於狂瘼豕難制於喧豗未盡誅擒便謀奔竄幸且未離近境固合同塞奸源在此旣已不忠於彼亦應非利石祁子所

云天下之惡一也惡於宋而保於我保之何補其在茲乎况凡隣府事宜一彼一此互相救援同致安寧是以前年六月中貴鎮有天平潞府元從兵士背叛奔逃數僅百人爲患非小遂蒙移牒請爲追擒當使羌都將梁楚部領馬軍所在討襲並各帖管內諸州令差精兵同力捕逐尋卽諸鎮及東塘遊奕使相次收獲三十八人纔見擒來便令押送續得梁楚狀報到濠州界趕及殘孽殺得三十餘人其餘漏網之徒盡以傷弓而走所生擒之兇黨皆就戮於貴藩能致彼之快心實賴此之勞

力今則却見臨淮叛卒特向沿江招呼便稱受降仍

缺

補職累牒咨請不送過江蒐慝何多養奸斯甚敢言以
怨報德實恐在安忘危詩云投我以木瓜報之以瓊琚
匪報也永以爲好此乃國風遺訓昭晰可觀相公通人
畧賜詳度無自賈天下之戮笑也其他已具迴牒伏惟
俯賜照察

浙西護軍焦將軍書

昨有臨淮背叛兵士誅擒不盡奔逃過江便蒙貴鎮相
公特許歸降遍加補署兼移公牒頗構虛詞旣乖七縱

之謀誰謂三驅之禮蓋是幸災樂禍固非撫士安人自古受降之爲義也叛而伐之服而捨之忠信能敷德刑乃就或以賊數則動盈千萬奸謀則難測二三若欲戰爭恐多傷殺或吹笳感動或書箭招呼免致膏鋒俾從肉袒其或蔓爾宛狡率然叛離免奔岡而終必自顛鼠失穴而將欲安往在於接境合與同擒不料豁開伴奐之門深作逋逃之藪慰安螻蟻雖欲好生訓練熊羆有何用處纔招稔惡之輩遽銜受降之名蘊豹韜而畧不弛張對龍節而恐須慙愧魯史云晉楚設誓無相加戎

同卹災危備救凶患若有害楚則晉伐之在晉楚亦如
之交贊往來道路無壅謀其不協而討不庭此則古時
敵國猶保話言今日善鄰豈傷師律况晉楚則各在遠
地揚濶則只隔長江曾無交惡之端豈有相欺之事實
驚眾聽甚爽遠圖已無蠶女爭桑永安兩境宜效農夫
去草靜剗本根伏惟將軍遠護兵符共成王事必不欲
和之如響知而不言唯望稍致良箴終除巨弊永使必
誠必信誰云莫往莫來此旣無噂喏以背憎彼亦免忸
怩於顏厚幸垂採聽特惠終始伏惟云云

卷十一

海山仙館叢書


圭范筆耕卷十一


三


海山仙館叢書


桂苑筆耕集卷十一

南海譚瑩校









桂苑筆耕集卷十二

委曲二十首

委曲 二十首

滁州許勅

昭義成璘

廬江縣令李清

淮口鎮李質

光州李罕之

楚壽兩州防秋迴戈將士

歸順軍孫端

楚州張雄

楚州張義府

滁州許勅

壽州張勳

廬州楊行敏

和州秦彥

廬傳

戴盧

光州王緒

楚州營田判官綦母蘋

鄆州耿元審

海陵鎮高霸

淮口李質

滁州許勅

報許勅得狀知妻劉氏將從征討願效勤勞嘉尚之懷
諭言不及吾嘗覽後魏書見楊大眼者武伎絕倫戰功
居最其妻潘氏頗善騎射至於攻戰遊獵之際潘亦戎
裝齊鑣並驅及至還營同坐幕下對諸寮佐笑言自得

大眼時指諸人曰此潘將軍也吾思見若人爲日已久
不期今夕得舉妙才此亦可謂劉將軍矣想鼓鼙方振
琴瑟相隨旣在同心可知竭力教戰則必欺孫武解圍
則可假陳平勉致殊功卽行懋賞悉之不具云云

昭義成璘

報成璘大夫魯史云臣一主二漢書曰一心可以事百
君則知下有離心蓋爲上無全德姪孫僕射夙虧家訓
驟荷國恩累忝藩方曾微績効每於撫俗畧不隨時恩
威豈得並行寬猛無由相濟况近關西之賊窟持山北

之兵權戰伐既勞輯綏莫至固知軍情潰散物議喧張
大夫名旣超倫事能從眾息貔貅之憤怒慰黎庶之疲
羸實謂有三雋才誰云犯五不韙古之所有今也何疑
遠遣專人迎取家口儻或行程齟齬且令彼處婆娑如
能斷送出來便與支持發遣一踣墜履猶能牽念舊之
心百口孤孀何忍見含愁之色必應慰暖免至饑寒倚
望所多諭言無及彼但勤修政理佇荷寵榮不令外盜
侵凌必見大君委寄冬寒慎爲將息節級各與安存悉
之

廬江縣令李清

報李令昔有垣榮祖者少曾學武或曰何不學書答云
上馬橫槊下馬談經方可謂不負飲食矣若無自全之
伎何異於犬羊乎昨見所申眾情可獎昔也一百里之
疲俗託在神君今則十八砦之義兵請爲軍帥若非寬
將猛濟惠與威行則何以鯁鯁懷仁各能遂性能罷聚
黨盡得降心姑拋堂上之琴便握匣中之劍所謂文一
變而至於武者也况李令族聯天派名比水源才機爲
一代之雄心術乃萬人之敵足得以指麾銳卒掃蕩叛

往不惟除郡邑之災亦可定國家之難然而軍務旣常
獨理職銜須有可稱未見所求固難抑致爲復願兼知
戎役却守縣曹爲復欲改轍從知乘機立事察斯二者
決取一途專期奏論早與飛報且如班超投筆蒯恩捨
芻當池蛟得水之秋有天驥追風之便古詩云寧爲百
夫長羞作一書生信知倜儻之人懶守低徊之節勉成
勲業永荷寵光戎務方殷善自將息諸寨將士各與慰
問悉之

淮口鎮李質

報李質覽所申狀慰愜良多李再興未革狼心敢張蜂
目構稱虛事違負本軍初憑逐寇之名却設起戎之計
賴質深懷智策善審兵機一唱義聲四圍逆黨狀疾風
之掃危葉如烈火之蕪飛蓬再興將見誅夷果當懾竄
然既是傷弓之物必爲釁鼓之資兼知質男裕黃口小
兒血氣未定偶虧嚴父之訓以涉叛夫之謀質又徇公
絕私捨曲取直愛而知惡義而滅親削其舐犢之言遵
彼烹臯之理若非忠勇何得如斯古語有之蝮蛇在手
則壯士斷其節是乃忍小痛而除大患也况石碣傳芳

於魯史日磾載美於漢書故事斯存令名不朽足以見
質有大丈夫之氣有真君子之心權兵而動必成功鎮
境而靜能守節前勞後効日就月將固當榮盛可期勿
以滯淹爲恨勉安軍旅善保勳名以古況今惟吾知汝
悉之

光州李罕之

報李罕之成覲有言彼丈夫也我丈夫也然則成功立
節不獨古人仗順輸忠正當今日近奉勅書手詔無非
激勵衆心兼除王令公充都統西門軍容充都監此乃

藩鎮功虧朝廷計盡遂將大任專付老儒雖漫傳聲必
難濟事此五年齊驅猛銳將掃頑兇尋奉絲綸俾安淮
海詔書云爲朕全吳越之地遣朕無東南之憂遂乃旋
師不敢違命然則詳審物議參酌軍期關中有執斧之
徒閫外無枕戈之志誰能竭力實可痛心吾若不行眾
將焉往今欲直趨汴路便入潼關佇復鳳城奉迎鑾駕
永使流傳萬代終能肅靜四方罕之已處分憂久爲養
勇必欲揀精練銳以期伐叛摧兇今錄勅書手詔白寄
往仰窺聖旨必勵忠誠便決征行共圖富貴時不可失

吾子勉之故此告知速宜飛報悉之

楚壽兩州防秋迴戈將士

報王承問等久勞防戍又役戰征知得遠歸良多慰愜
詩稱束楚不免怨思傳載及瓜亦嘗憤恚之難事今
見忠誠况承問限過三年則齊一旅值國家之多難息
鄉井之懷歸言下忘身軍前効命遂得永別伍符之列
高登八座之榮固知實勤豈慮虛擲且往年被練而去
今日衣錦而迴孫權努力之言已成顯驗王昶寶身之
誠更慎操持深秋遠行善自將息節級將士遍與安存

遣此不具

歸順軍孫端

報孫端將軍自從歸投久處閒散想多鬱悵不暫弭忘
但以端職秩已高官資須稱使司累具奏薦朝廷則有
指揮且仰安撫師徒佇迎恩命古人貴其晚達君子誠
其速成王化旣無偏無頗寵章則盡善盡美勉期守順
勿念躁求秋晚其涼切慎將息節級遍與慰問悉之

楚州張雄

報張雄中丞得狀知已點練兵士兼請出軍西去討逆

賊徒憤氣勃興忠詞懇切覽之嘉歎深置於懷且每值
寇戎稍侵疆圉雄必心騰勇畧首唱義聲去年已建殊
功今日又申丹請不辭危於馬革願展用於豹韜實謂
起予者雄始可與言兵已矣則帝委之以郡侯吾待之
以國士永揚茂績固在良時然彼州司事力猶困未可
便謀征役且宜更候指揮兵士各與慰安秋深善自將
息馳此不具

楚州張義府

報張義府得狀兼送罰錢引咎自責足驗用心古語有

之人誰無過過而能改善莫大焉饋餼之儀春秋所重
在於屬郡豈可外交勿爲饑則附人別欲申於知己將
滅白圭之玷遂以金作贖刑細覽來詞似懷他慮膚受
之愬固不行焉但愼始終永圖富貴悉之

滁州許勅

報許勅語曰兵食可去無信不立則知守信之道乃是
立身之本歟苟若壞墮自爲顛覆訪知近日浙西周相
公頻差上元鎮使馬暨專贄書曲兼將金銀送到和州
說誘秦彥令歸浙岸許授雪川信使繼來事情甚細則

未知秦彥終欲如何且浙西素乏勲勞驟沾恩寵謂得
長久遽爲驕矜殊不知人盡指楹鬼多瞰室惡旣天稔
道唯日亡今更阻絕我通津動搖我屬郡已乖衆議可
見前途以勅直木干尋精金百鍊固無憂於邪曲終不
改於貞剛况乃邦媛相隨家肥是保永除異慮必享同
榮或恐未審浙西所爲先此告示悉之

壽州張翱

報張翱知已部領兵士將赴合公軍前言念遠征倍所
加念且仗鉞者皆誇闔外分珪者略滿寰中而乃顧家

產爲遠圖剗國讎爲閒事唯矜肉食孰肯身先今則翺
首唱義聲躬提銳卒騁大丈夫之志氣副上宰相之指
蹤况知素蘊機謀久施訓練佇伸壯節必樹奇功當五
馬離鄉遠境之芳聲獨振及六龍歸闕前程之變化難
量暫此苦辛善爲將理今附衣段銀器茶藥等往到宜
檢領春寒慎爲行李將士倍與慰安馳此不具云云

廬州楊行敏

報楊行敏使至得狀送芝草圖一軸覽之嘉歎喜有餘
懷且草木之祥異也雖自天成皆因地秀物有所應吾

何以堪行敏始假都符已彰瑞牒天其誠爾爾宜慎之
况鄉號千年村名穀祿足驗一百年之壽與二千石之
資固保前程之富貴矣將酬美貺更勵忠誠非忝獎詞
盧騎銳志悉之夏熟切好將息使迴附此不具云云

和州奏彥

報秦彥尙書使至得狀兼送羊五百口勤誠斯展其數
實繁所謂爾羊來思我愛其禮况彥雖榮建隼能效懸
魚遠傳廉慎之名深舉撫綏之政而乃特申懇悃倍所
歎嘉既無慮於觸藩勉致功於荷筮使迴附此不具

盧傳

報盧傳殿中監裴尙書將到洪州武寧縣人吏百姓及僧道等狀舉論傳前後戰敵賊徒保全縣邑功績一十五件細覽事實慰愜滿懷傳不云乎公侯子孫必復其始傳能資餘慶無怠聿修自值危時便揚壯節一呼義旅四討克徒兄弟二人義聲俱唱遂得疲甿獲賴廉使見知始提百里之權尋假六條之寄忠誠所至寵命非遙勉慎始終穩圖富貴所希薦舉必不弭忘悉之

戴盧

報戴盧殿中監裴尙書經過彼縣日得百姓僧道等狀
舉論盧自乾符五年主鎮兼知縣事課績一十三件事
皆摭實情切舉能詞理燦然良增慰愜盧竭誠報國傾
產忘家糺集義軍訓齊宗族撫寧羸瘵捕襲寇戎六年
於茲一邑獲賴有功不伐唯善是從遂領縣曹永安鄉
黨古者田稱續命邑號義興求之於盧未足多也旣增
嘉歎不忘薦論勉保忠誠終邀美命悉之

光州王緒

報王緒天不容奸人唯助順苟違至理必亂常刑知緒

昨因顏璋久藏禍心果致眾怒璋既誅戮緒乃奔逃何不束手戎場投身義域而敢更謀嘯聚尙恣喧張自招相鼠之譏莫識牽羊之禮未知爾意終欲奚爲此乃先惠後誅武經所重好生惡殺王化斯行豁開誘善之門俾躡歸仁之路遂加誨諭試問端倪速仰割捨本情指陳他望待詳來狀卽與指麾禮云志不可滿傳曰惡不可長緒之今日其意若何勿驅齊甞枉入罪網秋令切可將息節級各與慰問悉之

楚州營田判官綦母蘋

報綦母評事夫欲均調兵食必須妙選公才供億既多
料量非易評事自匡郡政甚洽物情剗割而案無滯詞
淬磨而筆有餘刃今委兼判順國軍糧料舉牒同封寄
往孔聖猶爲委吏蕭何亦作功曹唯託幹能無辭猥屑
欲令小人懷惠佇看君子勞心悉之

鄆州耿元審

報耿元審古來名將多是耿家恭賈秉弇徽音相繼永
言苗裔固贍機謀元審雖名異雙聲而志能獨立佇申
忠勇別埃恩榮况逢危難之秋實建勲勞之日勉存終

始慎守行藏其他並令樊谷面述今寄衣一副烏觜茶
二觔到宜一一領之秋涼切好將息悉之

海陵鎮高霸

報高霸得進奏院狀報知轉授右散騎常侍永言欣愜
霈然滿懷昔周盤龍破虜有功繼霈爵賞齊世祖戲之
曰卿著貂蟬何如兜鍪對曰此貂蟬乃自兜鍪中出耳
當時以爲名對前史標之美談今此官榮實彰君寵唯
在專勤戍遏固守邊陲更俟大來永揚忠節知之

淮口李質

報李質得進奏院狀報知質轉授右衛大將軍且自數
年君恩溥合官榮職賞可謂均沾然而成功可爲受爵
無愧者屈指而數能復幾人唯質久戍淮壩遠防寇孽
勤勞最至品秩尙卑今授大將軍之名乃滿烈丈夫之
望更宜慎守無慮湮沈慰愜歎嘉不離懷抱遣此不具
云云

桂苑筆耕集卷十二

南海譚瑩校

桂苑筆耕集卷十三

舉牒凡五首

內行墨勅牒詞五首

舉牒

五十首內行墨勅牒詞五首

行墨勅授散騎常侍牒詞

授盱眙鎮將鄒唐兼御史中丞

授楚州刺史張雄將軍

授高霸權知江州軍州事

許勅妻劉氏封彭城郡君

請節度判官李琯大夫充副使

請副使李大夫知畱後

請高彥休少府充鹽鐵巡官

請泗州于濤尚書充都指揮使

王榮端公攝右司馬

右司馬王榮端公攝鹽鐵出使巡官

前邵州錄事參軍顧元夫攝桐城縣令

海陵縣令鄭杞

前宣州當塗縣令王翺攝揚子縣令

柳孝讓攝滁州清流縣令

前浙西館驛巡官鄉貢三傳張咸又攝山陽縣丞

前婺州金華縣尉李涵攝天長縣尉

前潁上縣主簿鄭綬攝盛唐縣丞舅韋緘評事薦

諸葛殷知權酒務

李昭望充奉國巡官

柴巖充洪澤雨塘巡官楚州營田

許權攝觀察衙推充洪澤巡官

王榮端公知丹陽監事

臧澣知鹽城監事

趙詞攝和州刺史

行墨勅授散騎常侍牒詞

勅淮南節度鹽鐵轉運等使東面都統兼指揮京西京
北神策諸道節度兵馬制置等使牒某官乞右可檢校
右散騎常侍餘如故如將軍須言員外置同正員牒准
今年二月九日詔應諸州有功刺史及大將軍等如要
勸獎者從監察御史至常侍便可墨勅授訖分析聞奏
者大君降命元帥從權但云能立勤勞特許先申獎勸
漢祖則手無剗印不阻論功武侯則心若懸衡必能舉
職用示軍中之賞式資闕下之恩前件官夙蘊壯圖久

從戎事將救奔沈之患固憑擒縱之能垣榮祖之馳名
不唯馬稍周盤龍之受爵允稱貂冠事須准詔授檢校
右散騎常侍仍具申奏並牒如者故牒

授盱眙鎮將鄒唐兼御史中丞

廣明二年六月十二日使兼都統檢校太尉平章事燕
國公牒准詔云云將軍分闔大夫出疆可專求請之權
况奉已成之命高懸懋賞用報奇功前件官銜繼自猿
名齊赤兔夙歸信義備察忠良雖遷柱下之官尙慊軍
中之望宜昇專席更勵枕戈爾其心保清廉好對映淮

之月力誇驍銳無慙破浪之風事須准詔行墨勅授御
史中丞

授楚州刺史張雄將軍

牒准詔云云見功必賞漢高祖之殊恩承制無疑鄧司
空之故事前件官材標落落韻稟錚錚自假使符已揚
政績理股肱之名郡登耳目之高官信義相從功名愈
振佇擅外臺之寄宜昇大樹之資爾其益勵忠規仰銜
成命用副劉宏之善舉無嗟李廣之難封事須准詔行
墨勅轉授右武衛將軍員外置同政

授高霸權知江州軍州事

牒准詔應諸州刺史如有軍功卿量加爵賞如有罪犯卿宜書罰別差人知州具狀申奏者大元帥之權既資成命古諸侯之任宜選良才前件官蛟躍池中虎蹲岸上用軍以義守節唯忠不辭白刃之危累挫黃巾之衆或短兵鬪勇或圓陣呈奇動有所成往無不利今以九江闕牧一郡思春將活疲甿命憑幹吏爾其遏強撫弱削弊蠲苛無登庾亮之樓空知翫月好把袁宏之扇且學揚風稍展政聲佇沾恩命事須准詔行墨勅差知江

州軍州事仍具事由申奏並牒知者

許勅妻劉氏封彭城郡君

牒奉處分古者官至大夫室稱命婦遂有從夫之貴乃爲處世之榮而況靜則能慎內言動則克從外役躬擐甲冑志凌雪霜功名旣異於常流封拜豈拘於成命以滁州刺史許勅妻劉氏英才天授貞節日彰平欺後魏將軍洛陽失行仰慕聖朝公主司竹興兵一昨專命良夫討除叛卒遽陳丹赤固願同征手驅組練之羣遠攻城壘身脫綺羅之色久犯氛埃四德有餘六韜可試豈

獨家之肥也實謂邦之媛兮夫旣冠其銀璫婦宜榮於
石甯豈可使松標峻影早致凌雲蘿抱柔姿猶嗟委地
先行茂賞用報前功軍中之晉爵策勲與人從欲天上
之錦牋鈿軸待鳳銜來事須准詔行墨勅封彭城郡君
仍表次錄奏並牒知者

請節度判官李琯大夫充副使

牒大夫天芝稟秀霜桂含貞蔚爾芳猷每見用和爲貴
凜然直氣終能嫉惡如讎信知賢良實救凋弊頃者再
握一同之政曾標三異之名旣發縣花佇分郡竹而乃

鵬鵬自滯羔鴈相從鉅鹿卑棲劒川遠役察俗而唯資
婉畫犒師而不乏豐儲果得人奏玉墀出懸金印泊某
暫臨江陸旋鎮海門永言移節之難咸假運籌之妙一
來淮甸四換星霜判官德以潤身固爲已任恩能濟物
不欲人知莅事實繁在公匪懈筆直而吏多畏色鞭輕
而獄絕冤聲見君子之用心實古人之用意十二年之
宏益久而彌芳千萬里之追從永以爲好雖將徐榻別
致猶恐燕臺未高今已假小秩宗兼大司憲不遷職位
何稱官榮幸屈跡於副車冀揚威於戎幕陳寵宣詔條

無失嘗賴功曹呂虔致郡俗永安亦憑別駕若言今日
彼在下風事須請攝節度副使表次錄奏

請副使李大夫知雷後

牒大夫劒橫天外珠媚水中雄稜則仰決浮雲溫潤則
旁無枯草深藏利器久佐遠藩每施婉婉之謀共化蚩
蚩之俗五鎮相倚一紀於茲嘗於折獄按刑唯遵直道
縱至旬休節假不離公門敢言知己之難實荷成人之
美今已三年翫寇尙恣侮張十道徵師遞相逼撓若不
專征鉄鉞何因倒載干戈遂驅養勇之鋒佇破稔奸之

窟代行拙政畱託長才慰八郡之疲羸察四鄰之劬勩
冀使袁宏黎庶粗識詠誦無令陶侃賓僚只耽閒戲數
年臥理今日出行皆資裨助之功聿保始終之惠事須
請知觀察畱後

請高彥休少府充鹽鐵巡官

牒少府學麟成角詞鳳傳毛偶輕桂客之遊暫樂梅仙
之曲鶴唳而月籠寒野萬里清音鵬飛而雲簸長天九
霄高躡幸聯宗黨得接徽猷敢興念於維駒無見辭於
絆驥稍假縱橫之術終匡幹運之權雖慙燕國之金臺

願接謝家之玉樹同姓必親於異姓今人何讓於古人
事須請攝鹽鐵巡官表次錄奏

請泗州于濤尚書充都指揮使

牒尚書洞究儒經旁探武緯指清途於萬里牧遠郡於
三年旟看隼飛輶待鹿挾慰疲氓以仁政捍寇盜以智
謀克歸合浦之珍曾散曲堤之眾今者徐戎遺燼敢恣
侵凌楚卒精鋒佇期掃蕩終免致包胥之哭况非奪晉
鄙之軍但以鷹犬呈功能罷就列須俟指揮之命仍申
搏噬之能實託威權遠希統攝俾瞻馬首皆知進退之

宜永滅梟聲用審否臧之律事須充都指揮使其應援
諸郡及寧淮盱眙淮陰等三鎮將士悉受指揮

王榮端公攝右司馬

牒端公烏衣茂族鶴氅清流早列官榮頗精吏術口中
金石常聆直韻之高手下銅鹽曾展長才之妙事既同
於外舉理無愧於旁求今則秩挂方書職參典午雖云
承乏且欲試能憲府威稜他日見豺狼懾伏郡庭閒散
此時樂魚鳥畱連事須差攝右司馬

右司馬王榮端公攝鹽鐵出使巡官

牒奉處分且權筦之設也本資戎事將贍軍須旣當薄
伐之期實藉均輸之利能成重務固選良才端公韻振
維山慶流淮水靜處五常之域勤尋六義之門每覽緣
情備知守節繼委當仁之任皆傳幹吏之名已爲厯試
諸難可謂多能鄙事今以仰裨國用効濟兵儲權課方
殷旬稽匪易官居典午旣已優閒志在推公無辭冗屑
佇縻幕職立展籌謀雖見王晞長寄心於方外何妨裴
楷暫勞力於俗中事須請攝鹽鐵出使巡官句勘當司
錢物

前邵州錄事參軍顧元夫攝桐城縣令

牒前件官善水無壅謙山自高腹飽詩書口含鋒刃厚
利唯勤於耕道閒情素懶於釣名爲疎奔競之門尙處
卑棲之地既能潔已何惜愛人州主簿之提綱昔嘗畱
意邑大夫之製錦今可呈功永言不憚勤勞方謂克承
闕乏稍念時危而慎守勿云俗弊而難除一門多詠雪
之才眾推餘慶百里渴象雷之理勉振政聲事須差攝
舒州桐城縣令

海陵縣令鄭杞

牒奉處分字人之政爲吏所難欲俟三年有成同須一日必葺永言委任實藉賢能前件官深於詩敏於行不近劉輿脂膩唯資謝朓膏腴累假一同備彰三善睠彼東吳之近境實爲南兗之奧區昔也承乏多歡去思猶在今可以舉舊令尹之政修真君子之誠均調政刑遍慰黎庶展驥終希於得路割雞無憚於發硎行平敬哉勿隳乃事須請攝海陵縣令

前宣州當塗縣令王勣攝揚子縣令

牒奉處分宰字之術若驅羣雞緩之則散急之則亂此

言雖小其理甚中知者非難行之不易况乃隋城近邑
楚岸通津螟蝗則久待消除鰓鮓則每思養育前件官
相門積慶儒室推賢早登廉孝之科嘗厯旬稽之任雖
棲下位不墜令名果逢連帥之知再假字人之秩雉誰
忍捕鵲自停喧陶潛之腰腹缺孔奮之膏腴不潤今
以揚子一同繁劇四達要衝每當使命交馳實託宰僚
勤幹遂重責成之寄况逢多事之秋而乃有令患風請
告踰月若言考秩亦合替移固選長才俾修闕政其在
上瞻夏日下視春冰宜無憚於徒勞佇有成於厯試苟

有經年沈醉必虧莅事之能如將終夕清談亦失相時
之理勉於二說慎自三思事須差攝揚子縣令

柳孝讓攝滁州清流縣令

牒奉處分今世之獎邑大夫也多以河陽花彭澤柳爲
美事永言至理我則不然唯某在其視人如傷潔已以
仕能懷冰蘖之操迴掩花柳之名實難其才得副吾意
前件官展禽苗裔言偃政能曾宰濟陰克安屬邑久依
江徼靜守窮居數年而雖甚食貧直道而未嘗改節今
將厯試俾假缺員無與喧鵲之譏勉致驅雞之術事差

攝滁州清流縣令

前浙西館驛巡官鄉貢三傳張咸又攝山陽縣丞牒奉處分前件官族資鵠印業練麟經未躬壯圖嘗從碎職既精簡牘之事寧辭州縣之勞習傳之體有三能詳正義在公之心無二宜慎爾官往矣敬哉賞罰斯在事須差攝山陽縣令

前婺州金華縣尉李涵攝天長縣尉

牒奉處分夫縣尉之設也其官雖卑其務甚重動則推詳滯獄靜則慰撫疲氓是以佐僚能慕其直聲宰尹亦

懷其畏色永言至理實繫長才前件官性習五常身資
一命嘗佐金華劇邑頗傳玉潔高名久見退修誠思進
取俾助養鰥之政且昇化鮪之資其在蘂作朝飡冰爲
夕飲高懸曹棒靜和宓琴譽能息於鴻喧勢必登於鴻
漸云云

前穎上縣主簿鄭綬攝盛唐縣丞舅韋緘評事薦
牒奉處分凡城一邑皆刻六曹雖云具體而微豈可從
心所欲况縣丞之佐理也舍長憚其糺摘猾吏稟其規
程苟能自強何患不立前件官康成求己季智奉公會

申頴上之勤勞遂見渭陽之論舉桓譚貳政且宜肅彼
奸豪殷浩吟詩無用傷其貧賤事須差攝壽州盛唐縣
丞

諸葛殷知權酒務

牒奉處分權酤之權起於漢代會計之利著在周經既
當預備闕懸難可不從改作將成重務固選良才前件
官隱豹含章臥龍襲慶潔已則隋珠無類在公則庖刃
有餘昨分孔僅之重司已成厯試今躡魯匡之良策何
憚專勤無辭鄭驛之卑棲早致卓壚之餘利能資美祿

必瞻雄師所期百姓無譁非阻三軍告醉事須差攝館
驛巡官專知權酒務

李昭望充奉國巡官

牒奉處分昔孔子誡伯魚學曰其先祖不足稱其族姓
不足道然而大以流聲後裔者豈非學之所致乎若然
則先祖之與族姓也不唯時世所榮亦乃聖人所重前
件官搢紳上品結綬中朝方襲芸香遽飄蓬跡遠逃虎
口猶絆驥蹄今以一言爲賢三代可數豈但渭陽之族
坐振重名漂流淮徼之居來承碎職遂茲響應用試才

能既知各有司存唯在聿修厥德事須充補楚州營田奉國巡官

柴巖充洪澤雨塘巡官楚州營田

牒奉處分三農就稔一漑推功苟非浚降雨之渠何以致如雲之稼俾無隳墮固藉專勤前件官壯志不渝公才可任承乏而善參軍事慎終而益見吏能今以洪澤近封雨塘美號徵小喻大昇高自卑爾其靜勗冰心潛窺水脈勉稟龔黃之令遠繼田曹無慙鄭白之名有虧地利高懸賞罰用試否臧事須差充楚州營田院洪澤

雨塘專知官

許權攝觀察衙推充洪澤巡官

牒奉處分撫俗所先勸農爲最是以鄭渾則奪其獵具
溫嶠則請置田曹仰順天時俯徵日力俾督耕夫之業
須憑幹吏之才前件官厯試已多忠勤可獎令尹之功
成製錦督郵之政克提綱但承闕乏之時皆有輯綏之
譽今以山陽沃壤淮畔奧區地占三巡田逾萬頃非乏
決渠爲雨尙虧多稼如雲蓋謂編氓不勤功於穠蔭縱
當稔歲皆失利於稻梁知爾奉公勸民務本若使耰而

不輟必期敏則有功委以農時假之使職永言從政實
可與權無取潤於膏腴苟徇私於毫髮勉強施乃力廣諭
眾心事須差攝觀察衙推充洪澤巡官兼都巡勘指揮
奉國謝陽等巡務者

王榮端公知丹陽監事

牒前件官蹈冰守節飲水安貧靜吟而篋有新詩寂坐
而門無雜客卓爾君子宛然古人今以將濟軍須誠資
吏術少輟琢磨之業俾專鼓鑄之權想夷甫之不言無
虧祖德思仲宣之未遇勉俟官榮事須差知丹陽監事

臧澣知鹽城監事

牒奉處分若官無直道則利有多門凡厯任於牢盆或
成資於潤屋而乃就此繁劇守其潔廉心誅則不惹脂
膏智刃則能分髓髀嘗聆斯語罕覩其人前件官雅淡
裝懷清勤綰務嘗握由拳之權課唯遵止足之規模休
替未遙功勞可驗更資厯試必濟重難展才於近塩之
鄉守節於作鹹之地不須對雪中吟謝朗之詩只在
熬波言下見張融之賦事須權糶使巡官知鹽城監事

趙詞攝和州刺史

牒奉處分昔張緒子充少好遊獵右臂鷹左牽犬緒見
而謂曰一身兩役無乃勞乎充跪答曰丈夫三十而立
今二十九矣請至來歲緒曰過而能改顏氏子焉其後
折節修身終爲賢達則古之豪俊今可規模前件官脫
跡迷途投身義域永除惑志可獎悛容既能資父事君
是得居官理務俾參上佐用試忠誠況當缺榮之時好
縱安居之樂詞其勉輸後効善補前愆已銷九族之憂
無起一朝之忿事須差攝和州刺史

桂苑筆耕集卷十三終

南海譚瑩校

桂苑筆耕集卷十四

舉牒二十五首

淮口鎮將李質充沿淮應接使

淮陰鎮將陳季連充沿淮應接副使

宋再雄差充水軍都知兵馬使

蘇聿補衙前虞候

曹威轉補散兵馬使

許勅授廬州刺史

孫端權知舒州軍州事

朱鄴補討擊使

郝定補衙前兵馬使

客將哥舒璫兼充樂營使

王處順充鹽城鎮使

張晏充廬州軍前催陣使

歸順軍補衙前兵馬使

安再榮管臨淮都

呂用之兼管山陽都知兵馬使

獬豸都將

宿松縣令李敏之充招討都知兵馬使

張雄充白沙鎮將

安再榮充行營都指揮使

徐莓充權酒務專知

柳孝讓知白沙場權酒務

行營都虞候

曹鵬知行在進奏補充節度押衙

朱祝大夫起復

上都昊天觀聲讚大德賜紫謝遵符充淮南管内威儀指揮諸宮觀制置

淮口鎮將李質充浴淮應接使

牒奉處分用兵之難擇利而動不論遠者近者須賴倚
之角之在安思危有備無患前件官名超廣利勇繼雄
飛自提外戍之軍每審中權之要彼徐寇以屢侵吾圉
莫戢其鋒急之則鼠竄彭墟緩之則豕豕楚岸遂徵眾
旅俾剗羣兇豈從援溺之權將助焚枯之勢爾其指呼
順命擒縱成功終令入海之波偏能流惡乃使映淮之
月早見洗兵茂賞高懸良時倏往勉思委寄勿負利終
事須差充浴淮都應接使便仰量出兵士討除賊徒

淮陰鎮將陳季連充沿淮應接副使

牒前件官勇於戰賊樂在從軍操戈而只待春喉發箭
而曾無曠目自居遠戍久練雄兵每聆捍蔽之勞能息
奔衝之患今則未殲彭孽猶役楚軍將資首尾之權是
成蛇陣固藉爪牙之利其展豹韜爾其跡脫五符身居
貳職專防險道佇靜長淮雖云迴繞之川未是縈紆之
地坐思前哲猶傳胯下之蹤立取奇功好豁胸中之氣
勉期竭節實謂逢時事須差充沿淮都應接副使便仰
量出兵士討除賊徒

宋再雄差充水軍都知兵馬使

牒奉處分舟楫施利干戈騁威自古爲難在今所急固
托縱橫之畧始成捍蔽之功前件官學劍有成彎弧自
許嚼犢而當年逞俊曳牛而是處爭雄高列軍門深遵
義路久居江戍妙練舟師今以泗上流災淮中聚寇旣
犯觀風之境頗昏映月之流爾其總握雄兵遠張祕策
陸織蛇豕水截蛟螭早令賊壘皆平永使驚波不起用
官物而討官賊吾不爲難探虎穴而得虎雛爾當自勗
事須差充水軍都知兵馬使部領諸兵馬討除淮內賊

徒

蘇聿補衙前虞候

牒奉處分古之有言以小諭大則祁奚之請老也既當
問嗣能自舉親情不涉於阿私事何妨於委用前件官
早從吏役久習武才父也暮年既思休退子之壯氣可
代勤勞且令職在於早趨乃欲功歸於厯試無爽聿修
之訓勉成負荷之規事須補充衙前虞候

曹威轉補散兵馬使

牒前件官勇而好禮勤以從戎比者逞陳眾之言詞傳

郭維之訊問果驅險浪皆赴順風尋值沛戎來侵楚壤
首登鶴列深挫豺牙摩壘而每能率先殷輪而不欲言
病忠誠勵已壯節驚人今則郡守論功材官受賞俾昇
峻級用報前功事須轉補散兵馬使

許勅授廬州刺史

牒奉處分良二千石古難其人屬郡之中吾有所試勤
修靜理今得人焉前件官自舉六條已踰四載邑無吠
犬境絕飛蝗外令邱井乂安內致閭閻肅睦政聲則有
口者謂詠仁譽則無翼而奮飛遠達宸聰果霑殊寵美

秩已題於龍劒雄威愈振於隼旟旣消滁水之災來作
廬江之福分憂救瘼能諧聖主之心紅旆碧幢豈落他
人之手事須准勅授廬州刺史

孫端權知舒州軍州事

牒奉處分昔李弼有言大丈夫生世須履鋒刃以取功
名安可碌碌依階求仕是乃蓄志能壯謀身克成夕脫
羔裘朝驅熊軾不慙往哲其在茲乎前件官族繼興公
術傳武子能揚俊氣久練雄師常安乞乞之徒果就循
循之誘今則委之郡政試以公才旣逢豹變之秋善守

龍舒之境爲邦致理必見三年有成向國輸忠勉令百姓無患卽迎帝賞更峻官榮事須差權知舒州軍州事

朱鄺補討擊使

納助軍錢遂加職賞

牒奉處分漢有卜式者輸家財助軍費遂乃出自牧羊豎子終爲司憲大夫忠誠所施其利甚溥前件官石非硤硤鐵實錚錚知義重而財輕遂忘家而報國天龍地馬不藏私室之中尺籍伍符可列軍門之下俾昇峻級以諷頑氓既有賴於金多無自驚於銅臭事須補充討擊使

郝定補衙前兵馬使

能手射七十步

牒奉處分弧矢之利武藝所先號猿而永播嘉聲落鴈
而能傳妙技况乃只憑五指能代六鈞豈唯邁古超今
可謂神功聖術前件官早攻手射善應心機不彎三百
斤弓能發七十步箭紀昌若見必想張弦呂布相逢固
慙撚筈旣抱非常之伎佇成可久之功換滑臺之舊資
陟隋苑之高級事須補充衙前兵馬使

客將哥舒璫兼充樂營使

牒前件官動彰毅勇靜保兼中早成學劍之功不墜爲

裘之業頗經歷試無怠事修久委賓司既見與言之可
使俾兼樂職必期飾喜之克諧爾其有禮爲先無荒是
誠迎送於燕臺鄭驛指揮於迴雪遏雲勿使英賢或發
養痾之誚須令艷麗先臧笑璧之聲事須兼充樂營使

王處順充鹽城鎮使

牒奉處分夫藩鎮之爲制也中屯銳師外列諸戍用備
腹心之患固憑爪牙之勤前件官深蘊壯圖挺生勇氣
姜維若在未占雄兒焦度相逢應饒健物每展報恩之
節累申伐叛之功眷彼鹽城居於海岸苟或一同失理

實爲四遠多虞遂徵處順之名俾守防奸之任爾其效
勇夫之重閉致危俗之安居暫固封疆無念及瓜之限
但逢寇孽勉揚破竹之聲事須補充鹽城鎮使

張晏充廬州軍前催陣使

牒奉處分師克在和兵貴在速若許緩其善陣誠爲挫
彼奇鋒用之則行時不可失前件官志能傳畧名可止
啼待逢盤錯之難願展縱橫之術今則舒猶叛楚衛已
伐邢雨雖潤於興師雲未銷於結陣遂使魚麗猛勢阻
掃氛埃蟻聚頑徒敢安窟穴爾其驅之以馬箠訓之以

豹篇事唯託於一麾功必成於百勝將迎軍賞佇送捷
書事須差充廬州軍前催陣使

歸順軍補衙前兵馬使

牒奉處分前件官身榮豹飾志習龍韜奮心於擊鼓其
鏜騁力於挾輈以走早歸信義無憚勤勞去正寇據屬
城兵徵諸郡共誅微孽各誓前驅既遵令於牙璋宜陟
名於甲騎聊遷職秩用報軍功爾其勿替忠誠更邀上
賞事須補充衙前兵馬使

安再榮管臨淮都

牒奉處分西魏王罷率眾拒寇乃杖白梃大呼而詬曰
老羆當道臥糴子那得過敵見威勇果自驚奔則知猛
將之名能奪叛徒之魄前件官夙精韜畧歷試機謀嘗
犯重圍決成獨戰實可謂神出鬼沒豈唯缺左旋右抽
今之武力雖衰壯心益勵臨事而猶能強飯卽戎而寧
欲素餐蠹彼頑寇騷然侵擾雖徵眾旅未建奇功眷彼
臨淮處於要地其在訓之以三令激之以一呼審詳於
彼竭我盈成就於先難後獲老驥免嗟於伏櫪無令驚
馬爭先秋鷹旣遂於下韝勿使妖狐得便事須差管臨

淮都

呂用之兼管山陽都知兵馬使

牒奉處分仲尼云寬則得眾信則人仕焉嘗聆斯語今
見其人前件官慶襲玉璜業精金版遵直道而利有攸
往奉公家而知無不爲是以晉作新軍權資處右齊行
勇爵象許居先乃裨察俗之規動叶安民之策遂得晨
羊能飲夜犬停喧永除奸濫之源深得撫綏之道今以
屬城多難散卒無依窮猿旣切於投林飛鳥猶思於擇
木羣情所附戎畧可嘉俾安其督督然來實倚其多多

益辦無辭兩役用展長才事須兼充山陽軍都知兵馬使

獬豸都將

牒奉處分凡標軍額須警眾心如指喻之非宜則訓齊而何在况乃均霑好爵共荷殊恩跡雖限於柳營秩盡昇於柏署宜加一等俾異三行前件官壯氣挺生忠誠卓立曠弩則前無強敵荷戈則動有成功累建戎勳遂霑爵賞今以狼星未滅鯨浪猶翻將申戮暴之能用示觸邪之號爾其勉思一角永息二心佇銷封豕之災勿

失神羊之性事須補充獬豸軍都知兵馬使

宿松縣令李敏之充招討都知兵馬使

牒奉處分昔來護者立性卓犖初讀詩至擊鼓其鏜踴躍用兵羔裘豹飾孔武有力乃捨書歎曰夫人在世固當如是會因滅賊以取功名安能區區專事筆硯其後果申壯志累建殊勲則知奇才所爲何代不有前件官精詳吏道旁習戎機假百里之威則疲甿獲賴作萬夫之長則義旅知歸遂得縣道肅清鄰藩倚賴欲破蘄春之狡窟遙分江夏之兵權罷從役於驅雞佇承乏於建

隼聊加職賞俾振軍聲是乃丈夫雄飛君子豹變勉驅
甲騎遠應羽書旣設援於他邦必保安於吾圉事須補
充節度衙前兵馬使兼充西南招討都知兵馬使

張雄充白沙鎮將

牒奉處分昇高自卑君子所以勵素志辭大就小古人
所以傳令名但能守節不虧固在相時而動前件官密
懷義勇深貯謙和頒條而政有嘉聲馭眾而軍無愠色
今以新恩未降銳旅何安眷彼古津實爲要路是成鎮
務乃在江壩旣居使府之要衝宜假公才而管轄况兼

場課可瞻軍須且卷豹韜其養斬蛟之勇佇迎鳳詔別
遷建隼之榮事須差權句當白沙鎮務兼知場司公事

安再榮充行營都指揮使

牒奉處分昔曹公爲樂府歌云老驥伏櫪志在千里烈
士暮年壯心不已今猶古也我得人焉前件官百戰成
功一麾出守曾安海俗永振風聲而乃不求更握虎符
唯願終申豹畧豈覺老之將至每俟用之則行今以大
憝未殲外方多難諸藩命將無非竹簡探名遠道徵師
或是葵邱代戍苟虧忠勇何蕩妖覓遂付重權佇觀奇

策其在身先行伍顧指軍兵勉揚矍鑠之名無致遷延
之役時不可失往矣敬哉事須差充行營都指揮使赴
壽州西面備禦討逐黃巢徒黨者

徐莓充權酒務專知

牒奉處分前件官發跡戎行研心吏道忠勤所至幹濟
可觀今則舉漢代之權宜搜杜康之利潤贍吾軍用藉
爾公才既非若處先登無與眾人皆醉事須差句當天
長縣權酒務

柳孝謙知白沙場權酒

牒奉處分前件官直道立身公途勵志學已窺室家之
富任曾致州縣之勞今以備食三行搜資六物豈使弊
歸於下只令利在其中勉稟條章早申績効俾不欺於
釀具無自陷於醉鄉事須差知白沙場權酒務

行營都虞候

牒奉處分前件官勇而好禮敏則有功膂力甚強腹心
可委今以齊驅勁卒俾剗羣兇爾其紕摘行間防虞境
外宜拘小節善事上官勿謂忠貞有乖緝睦能成勤効
不恡甄酬事須補充行營都虞候

曹鵬知行在進奏補充節度押衙

牒奉處分藩侯所任邸吏爲先能傳萬里之音不墜九
霄之命固憑幹濟方付重難前件官魯劇長材魏仁雄
族雖處干戈之列早閑刀筆之能遂使遠赴行朝專司
遞務覩六龍之仙蹕每審巡遊傳九鳳之王言曾無阻
滯以茲厯試深可獎酬今已秩亞憲卿官昇典午身得
趨於輦路職未稱於轅門俾假牙璋遙分甲騎慎達上
天之旨以安外地之心爾能竭誠吾不愆賞事須改補
攝節度押衙依前知行在進奏

朱祝大夫起復

牒奉處分事繁金革禮奪苴麻魯公制之於前晉侯行之於後蓋乃從權順變是爲移孝就忠苟不忘家將何報國前件官方從戎役每藉公才遽鍾風樹之悲永違霜槿之養能勤泣血唯恐奪情然以羣寇未殲列藩多事確執三年之愛仰辜萬乘之恩況承勅命指揮已許軍前驅使出如綸之睿旨旣俟成功衣夫錦之格言豈同前哲時異事異念茲在茲揚名顯親竭力從命孝之終也往矣敬哉事須牒舉起復差往五嶺已來領會軍

前公事

上都昊天觀聲讚大德賜紫謝遵符充淮南

威儀指揮諸宮觀制置

牒大德真璞混成靈源廣潤淘俗態於心水瑩仙安於
面冰蓬島神仙應待銜杯之樂茅家兄弟敢攀執袂之
遊猶思救苦於寰中尙阻追歡於物外屬以陣蛇出穴
戎馬生郊每勤齋敬之心深假護持之力達聖聰而有
謂施醮禮以無虧今則秦嶺烟昏難尋四老楚淮月皎
幸伴八公但以桂苑繁華揚都壯麗旣見星壇月殿處

處荒摧難期鶴駕寬旌時時降會欲設精嚴之備須資
揚統之權白馬將軍方役大朝之元帥青牛道士暫充
下界之仙官比年旣遂於攀畱他日必同於輕舉事須
請充淮南管內威儀兼指揮諸宮觀莊田等務

桂苑筆耕集卷十四終

南海譚瑩校

桂苑筆耕集卷十五

齋詞一十五首

齋詞

一十五首

應天節齋詞三首

上元黃綠齋詞

中元齋詞

下元齋詞二首

上元齋詞

中元齋詞

下元齋詞

黃籙齋詞

禳火齋詞

天王院齋詞

爲故昭義僕射齋詞二首

應天節齋詞三首

道士某乙言伏以聖人降生王者嘉應包天地之大德
啓日月之殊祥是以電繞虹流克符龍質握乾披震允
叶龜書伏惟聖神聰睿化哲明孝皇帝紫府真宗丹陵
寶命孝理而勤修一德化成而胥悅萬方偶以犬吠堯

威熊驚漢御猶軫泣辜之念暫勞展義之行今者風振
南薰方在長嬴之節星瞻北斗乃當誕慶之辰莫不山
靈供萬歲之歡聲河伯獻千年之瑞色仰資聖壽敢設
仙齋廣成子之微言旣傳眾妙華封人之善祝實繫羣
誠伏願德乃日新禍當天悔暫興時雨遍洗妖氛高整
鸞旗早迴鳳輦然後搜濟汾之詠撰封岱之儀傳芳於
玉葉金枝積慶於天長地久使蠻戎率服蠢植咸蘇仰
沐華胥之風齊登仁壽之域普天率土永賀昇平

又

道士某乙言伏以父天母地帝道所以爲尊貫月繞星
靈符於是乎在况覩一人有慶固知萬壽無疆伏惟皇
帝陛下龍握丕圖鳳資聖紀播休聲於里社標盛禮於
高禰今著風調舜琴日緩義轡慙草舒芳於八葉丹陵
降瑞於千齡謹設仙齋仰陳善祝伏願塵銷九野波息
四溟早迴西幸之儀便舉東封之禮一千年之休運高
建武功三十世之昌期倍延福祚允諧大定永賀中興

又

伏以瀨鄉白鹿旣掛仙蹤函谷紫雲果資王氣積慶於

天長地久傳華於聖子神孫耀玉京而我李長春演金
錄而莊椿永茂伏惟皇帝陛下三無稟德萬有覃恩叶
感星夢日之祥掩四乳八眉之瑞上天降聖爰乘解慍
之風列士修齋况值晏陰之月伏願峒山順軌汾水迴
鑾迎萬歲之巖音歸九重之天闕享七百年之休運寰
宇中興守五千字之格言兵戈大定仰祈元鑑永護皇
居

上元黃籙齋詞

年月朔啓請如科儀伏以有德不德無名可名自施倏

忽之功莫究希微之旨是以紫府乃修心可到元關非
用力能開臣志慕真風躬行正道但以漢良前筋猶勞
戰伐之謀越蠡扁舟未遂優閒之望旣榮人爵須報主
恩誓殲無賴之徒久練不祥之器動拘俗役慮犯元科
今則節已及於上元災未銷於下界謹修常醮仰貢微
誠所願梟覆頑巢鳳迴仙駕帝座與三台永耀王畿與
九牧皆安雷驚而蟄戶全開風掃而妖氛靜息俾臣靈
根日茂至業天成虎符提闔外之權終安澤國虹節指
壺中之境得認家山臣無任虔肅禱祠懇悃之至謹辭

中元齋詞

年月朔啓請如科儀伏以道本強名固絕琢磨之理身
爲大患深驚寵辱之機能審自然而然必知無可不可
是以雕辭贊美則乖妙旨於混成矯志求真則爽奇功
於積學冀標玉籍在守金科臣才謝半千雖慙賢路心
凝正一早叩元關齋誠於八節三元鍊志於龍緘鳳蘊
但屬鯨翻逆浪蜮噴毒沙數年興蠹螫之災萬姓抱瘡
瘼之苦三尺劒高提在手須救危時六銖衣輕掛於身
未諧夙願今謹因中元素節大慶良辰依寶壇而醮設

常儀企仙闕而拜申精懇伏願真風蕩滌元澤滂流吾
君享萬歲於巖音賢相耀六符於渭訣調舜絃之美化
永復歲期漏湯網之克徒咸歸顯戮然後戴髮含齒鱗
潛羽翔不知日用之功各遂天成之樂俾臣代勳善繼
真位高遷畱形於烟閣雲臺縱賞於芝田蕙圃鑄金追
想終榮聖主之恩叱石閒遊得效仙人之術儻非過望
敢不精修臣某無任祈恩謝過虔禱懇悃之至謹辭

下元齋詞

年月日啓請如科儀伏以教資妙用無爲而無不爲道

在勤行不厭是以不厭苟得捧持三寶必能極護萬靈
須憑善建之根株始覩混成之閭闕故曰大丈夫處其
厚而不處其薄居其實而不居其華者也臣雖塵役拘
身而雲裝掛志大成是望上達爲期每依郭璞詩中精
調五石願向葛洪傳上得寄一名所以仰欽象帝之先
豈在他人之後聽爛柯翁之說則倍惜光陰覽抱朴子
之言則不虧忠信但以卑棲俗累深握兵符政刑之得
失難調賞罰之重輕易忒暗堆憊咎莫補精修况叨真
位之榮恐負元科之責是以三元八節顯醮遙祠唯期

致力於九層未曾妨功於一簣今則天吏叩應鍾之候
水官攬元轡之時月數就盈日辰在望仰投靈地敬設
寶壇備儀於琳几瓊盤注賞於金臺銀闕冀感通於良
夕能濟援於危時伏乞太上三尊十方眾聖曲垂元鑑
俾遂丹誠早迴翠輦於長安復振皇風於正始秉陶鈞
者永諧德化仗節鉞者共戢兵戎波濤靜寢於四溟氛
霧豁開於九野樹下有推功之將草閒無求活之徒至
於翔翼躍鱗跂行喙息偕登仁壽之域不躡昏迷之途
主道深結道緣遙申齋願望三清於通路資一溉於良

田此時枕越石之戈暫妨高臥他日把浮邱之袂豈訝
後來臣某無任慇懇投辭虔禱惶切之至謹辭

又

年月日啓請如科儀臣伏以測管窺天雖乖曠望揮戈
駐日蓋感精誠苟爲山之力不虧則至海之期何遠仰
元門之善閑遵妙道以勤行但以爲子爲臣曰忠曰孝
旣增榮於國祿願無忝於家勲手握玉符且救寰中之
難志棲金錄唯思象外之遊每慮政失務三法虧畫一
雖慎撫綏於南充尙多憊咎於北艷况當翦寇爲期弭

兵未暇今則月就盈數日臨下元遙做真儀敬陳齋法
儼星壇而稽首想風馭以馳魂伏乞太上三尊十方眾
聖元德見蔭良願克諧翠華早耀於秦雲皇祚永興於
漢日百官多慶八裔同歡寇戎則銷燧象之灾幽滯則
假燭龍之照然後使臣世官貞吉道業滋成遣榮待泛
於五湖企想潛通於三島作人間之都尉蒯訓無心拜
天上之侍郎沈羲有望唯願在家必達終能直道而行
臣無任祈恩懺罪虔切惶恐之至謹辭

上元齋詞

年月日啓請如科儀臣仰察元經乃見道資眾甫俯稽
聖典則知神應至誠是以早詳病病之言每勵賢賢之
行五音五色實除耳目之娛六甲六丁潛致爪牙之役
願躡輕飛之路常敲眾妙之門但屬戎馬生郊陣蛇奔
穴無苟免而臨難不得已而用兵蓋報主恩慮虧臣節
只誓顯誅寇孽寧知暗積憊殃雖軍律克申而真科是
懼今以日延和景月滿初元遇吸新吐故之辰懺喙腐
吞腥之罪儼陳醮禮敬薦齋誠燈耀九光燼焚百和寂
寥塵外幡幢靜設於星壇髣髴雲中環珮似傳乎風馭

冀銷妖祲仰告威靈伏乞大降元慈下從丹懇萬乘永
資於萬壽百官皆荷於百祥戰場則荆棘叢生農壤則
麥禾花茂凡云蠢動盡獲昭蘇然後俾臣援溺功成奉
身以退冲靈道遂鼓腹而遊飽瓊蘂之餽糧就瑤臺之
蹊徑遇圯上者終諧素志自有前蹤入壺中者蓋感專
心寧無後望旣殊捕影敢憚勞形臣無任悔過祈恩虔
切惶恐之至謹辭

中元齋詞

啓請如科儀域中之四大難名字之曰道物外之三清

在想心以爲齋豈徒滋福於一身唯願洽恩於萬彙臣
生逢聖日志慕真風寧貪久視之門有覬輕飛之路但
以行先不殆德貴有餘每虔一氣以存思非止三元而
展敬今則雲摧火影風戛金聲當中元積慶之辰謹修
常醮以下界罹災之事仰告元慈一昨夏景旣闌秋成
甚邇而乃曠野則飛羊斂翅深泉則黑蜃藏鱗嗷嗷之
黔庶何依烈烈之蒼穹莫訴雖近沾美澤而尙嫌農郊
伏乞太上三尊十方眾聖下從精懇大庇生靈使風雨
常調烟塵永息興聖祚於千秋萬歲振歡聲於四海九

州然後俾臣功名則與國同休道業則在家必達水中
泛泛謝時態之澆浮雲外飄飄逐仙蹤而騫翥既探珠
而有望寧種玉以無因臣不任祈恩救災懇禱虔惕之
至謹辭

下元齋詞

啓請如科儀伏以混成至道本在勤行眾妙元門唯資
善閉故曰修身則其德乃貴修之國則其德有餘既
能事少功多可謂暫勞永逸臣雖手提金鉞而心寄瑤
臺飄飄然自有良期擾擾者誰知積學是以三元致敬

一氣存思佇天上之雞聲潛縣素望待海中之鶴信每
憑丹誠終冀用之則行豈言深不可識今者謹賡薄禮
仰黷元慈所願漸茂靈根漸拋俗界餌淹啗之奇草飲
沆瀣之仙漿漢代淮王終遂仙游之樂周時柱史何妨
吏隱之名苟保天成何言日損景仰於其中有象願知
於此外無求臣無任投辭懇迫虔禱兢越之至謹辭

黃籙齋詞

啓請如科儀臣身拘俗網志仰真筌雖窈窕冥冥至道
則無形可叩而勤勤懇懇精心則有感必通是以每勵

焚修敢安晷刻所冀學海而終歸巨海好龍而不懼真
龍豈貪輕舉之名但效勤行之旨然以早分印久握
兵符當扶危靜亂之秋有戮暴誅奸之役伏慮政條失
所刑律乖宜憊違暗積於元司殃咎難逃於黑籍今則
景銷木德節啓火威稽首昊天叩心靈地跼踖而謹陳
薄奠禱祠而仰獻微誠伏乞太上三尊十方眾聖俯矜
丹慊深降洪慈使電滅千灾雲興百福永資元蔭漸茂
靈根掃閭外之烟塵早成勲業玩壺中之日月免役夢
思臣無任悔過祈恩懇迫惶恐之至謹辭

禳火齋詞

年月日啓請如科儀於紫極宮內修建洞淵妙齋三日
四夜轉經行道爲禳當府火災祈恩投辭上詣虛無元
始天尊伏以波蕩四溟塵昏九野遂見綿區匝宇未能
滅祲消氛臣雖志悅道風而身沾睿澤早託山河之誓
久臨淮海之封每愼撫綏不遑寧息粗安一境已涉五
年齋誠仰貢於上元妖氣願銷於下界豈料天心悔禍
必俟時期地分罹殃難逃厯數方當暮月始起融風遽
興鄭國之災難施瓘罍將救成都之急誰嚙酒杯所燃

旣多俱焚是慮厥力猶勤於撤屋羣心免駭於燎原今
則每念傷人唯知罪已仰投靈宇敬醮寶壇祓禳災異
於四郊寧拘古禮祈禱遠瞻於三島但獻精誠伏乞太
上三尊十方眾聖曲流元澤大挫陽精使回祿知非祝
融請罪閭閻撲地皆除火宅之灾道路生風永作水鄉
之福烝黎樂業師旅懷安構陰謀者自就消亡歸善化
者名資榮泰齊登壽域仰望仙鄉臣無任歸罪乞恩虔
禱懇迫惶恐之至謹辭

天王院齋詞

唐中和二年太歲壬寅正月望日具銜某敬請僧某乙
設齋於法雲寺天王院謹白言舍利佛大慈大悲觀音
菩薩伏以欲界將傾魔軍競起九野塵昏於劫燼四溟
波蕩於狂飈諸侯志慕於宋公星無三徙聖主德齊於
漢帝日未再中不知天養鴟梟地容螟蟻力鬪之羣寬
得便義征之眾旅摧威某也手握兵符心抱將畧欲展
焚枯之力願成拯溺之功是以景仰三歸勤行十善深
憑護念敢啓邀迎宇內瘡痍畧假醫王之術世間疲瘵
遍希慈父之恩今則幸遇初元精修美供春露灑琉璃

之境曉風吹薝蔔之香想其舍衛城中長老盡攜弟子
水精宮裏天王便作主人伏願舍利佛大慈大悲觀世
音菩薩教既東流跡能西降遠救閻浮之地暫離兜率
之天問疾語言不競維摩之說稱名功德可逃羅刹之
灾惟願共泛慈航齊揮智劍寢驚濤於苦海掃妖氣於
昏衢則乃慧燈照天帝之心法鼓破波臣之膽靜銷諸
惡暫開方便之門廣庇眾生無惜慈悲之室謹疏

爲故昭義僕射齋詞二首

中和二年七月二十三日爲故昭義姪孫僕射及二孫

予敬設齋于法雲寺聊憑法疏用寫悲詞以昭義姪孫
幼蘊壯圖長居重任不掃一室有志四方手運豹韜旣
是吾家之事身持龍節累沾聖代之恩至於越海征蠻
對河分陝立戰功於遐徼傳理化於近藩慎守詔條能
諧物議遂移上黨實委外權尋屬戎馬生郊陣蛇出穴
遽聆寇孽直犯京華頻興伐叛之師稍急訓戎之令上
將則雖期徇難欲竭忠誠小人則多是幸灾潛興狡計
叛徒忽至橫禍斯侵宏演納肝其誰能繼艷舒傷目所
不忍言噫道則日彰志惟天奪征旌永卷飛旒爰來言

念凋零莫勝悲慟但以推尋佛理仰割俗情旣知前世
因緣粗解此時冤痛况乃父立忠節子揚孝名古賢所
稱今我所恨俾資冥福敬設妙齋所願慧炬照迷慈航
援溺早推誠於貫日終致樂於生天子子孫孫永絕怨
讎之本生生世世常逢安泰之期謹疏

又

中和二年七月二十七日某官某乙奉太尉處分爲故
昭義僕射於法雲寺設三百僧齋並寫金光明經五部
法華經一部永充供養蓋聆佛修慧力普濟羣迷人發

信心終成善願苟得影從至教必能響答虔誠伏以昭
義僕射夙振雄圖繼分重寄將軍投袂練兵而方切專
征天子翦衣飛詔而唯憑妙畧佇建設中之勲業忽罹
意外之灾殃不弔昊天奪我良允今則敬投蓮宇虔設
桑門仍^缺貝葉之真蹤仰奉法華之妙義伏願乘茲功
德解彼冤讎灾星昔照於豫州已推定分慧日今懸於
覺路永絕良緣謹疏

桂苑筆耕集卷十五

南海譚瑩校

桂苑筆耕集卷十六

祭文書記疏十首

唐高麗都統巡官侍御史內供奉崔致遠撰

祭文

四首

祭五方文

築羊馬城祭土地文

祭楚州陣亡將士文

寒食祭陣亡將士文

書

二首

移浙西陳司徒廟書

手札一首

記 二首

西州羅城圖記

補安南錄異圖記

疏 二首

求化修天雲寺疏

求化修諸道觀疏

祭五方文

年月日具銜某謹以清酌庶羞量幣之奠敢昭告於五

方神之靈傳不云乎五行之官是謂五官封爲上公祀
爲貴神社稷五祀是尊是奉木正曰句芒火正曰祝融
金正曰蓐收水正曰元冥土正曰后土是以禮云其工
氏之霸九州也其子曰后土能平九州故祀以爲社然
則神主順天靈功莫測諸侯列土祀典宜行惟夫人實
統陰祇廣合坤德身爲萬物之母首冠五方之君職奉
軒皇功標缺社殷湯罷改遷之議漢武陳祠祭之誠是
知神鑑則無偏無頗物情則以享以祀昔平九土既能
疏決江河今處五方豈不庇安淮海靈其調和於金木

水火驅役於風雨雪霜使春夏秋冬永息災殃之氣東
西南北靜除氛祲之源牢幣具陳庶羞甚潔致敬不虧
於中霑施恩幸滿於大藩唯候豐穰冀申報賽尙饗

築羊馬城祭土地文

年月日具銜某以兵戎未息禦備是勤乃命修築羊馬
城遂遣某官某乙告於土地之神曰夫城郭之設邑居
所憑陋之則狡者或^缺美之則寡能固守况今豺聲競
發虺毒遍吹易動難安何處能爲樂境暫勞永泰此時
須建良功遂乃揣高卑議遠近便令百堵皆作終可三

旬而成徵名於伏檻觸楹接勢於長雲斷岸不假龜行之跡豈須龍見之期眾旣叶心事無費力神其德惟博載道實流謙勿辭板築之喧勉致金湯之固使雲螭雷杵遠振歡聲鳥堞隼墉高標壯觀北吞淮月南吸江烟平欺鐵甕之名迴壓金甌之記有備無患神其聽之

祭楚州陣亡將士文

爾等尺籍從軍寸心報國羔裘武飾旣以力稱馬革雄圖早將身許爰有徐孽來侵楚封春喉之壯氣未申失手之冤聲遽起始見荷戈就列翻爲復矢成行然而功

其可稱死且不朽有狼曠之君子無羊斟之小人昔時
之重義輕生不求苟活今日之名存身喪豈貯遺悲魂
其有知名歆薄醑

寒食祭陣亡將士文

嗚呼生也有涯古今所歎名之不朽忠義爲先爾等曠
弩勞身蒙輪逞力奮氣於熊羆之列忘形於鵝鸛之前
能衍勇於干戈固免慙於牀第今也野草綠色林鷺好
音杳杳逝川空流恨而無極纍纍荒塚誰驗魂之有知
我所念兮舊功勞我所傷兮好時節俾陳薄醑用慰冥

遊其謀抗賊於杜回無效懷歸於溫序能成壯志是謂
陰功

移浙西陳司徒廟書

滔滔逝水幽顯雖殊凜凜雄風古今何讓苟或同心立
事必能異代論交司徒壯節奇功備載外孫之碣靈恩
顯驗高傳太伯之鄉譚揚而不假再三徵引而難窮萬
一今則冀動元鑑直書素誠既當可舉而行固在不言
而信且此誓除國難齊命舟師將泛西江卽離北岸練
鋪一水指疆界以雖分黛列千山望威靈而如在今於

樊境已立嚴祠敬迓來儀迺酬前願幸移玉趾無戀石
頭桂檝蘭橈早決遷居之計鸞絲鳳管佇申迎奉之儀
况乃近境無虞芳筵不絕但得禍淫福善何妨捨舊從
新北渚烟花休起別離之恨東塘風月好追歌舞之歡
必能依統帥指揮永可振司徒勲業特差專介用啓至
誠昔之青骨標奇已謂陰陽不測今也赤眉稔惡豈宜
征戰無功將申烈烈之威實假冥冥之助所冀八公山
上遍設雄師五里霧中能呈異術則必陰子春之破賊
吳大帝之封王其立功名若合符契無誤會稽之軍備

有慙卽罌之神謀早詳禰祭之言永副里仁之義某白

手札

風煙雖邇雲霧難披景仰靈威遙申誠願今已靜搜勝地高創壽官永可安居謹令咨迂便請挈家速至專當掃席相迎且鐵甕城低金陵地狹能施百福無滯一方此欲劒拂妖星旗迎聖日必期大捷永致中興幸其來助陰兵共成王事目極東流之雪浪心馳北顧之煙峯神兮移來哀江南某白

西州羅城圖記

西州羅城四仞高三尋闊周三十三里乃今淮海太守
燕公所築也粵若梁州別壤蜀國雄都內跨犍梓外聯
蠻蜚左臨百濮右挾六戎咽喉之控引實繫唇齒之輔
依難保自昔鼃靈流異龜跡標奇藩籬始建其一城局
錡猶虧於四郭莒子則旣忘重閉衛人則唯慮徙居蠡
彼狗封恣其狼戾每至草乾熨道浪縮瀘河則必椎紒
橫侵撥羣驅隊編氓攝竄巷哭街號戎兵以茲旆爲中
權府尹以閉關爲上策稔成氛稷積有歲時洎乾符初
偶絕羈縻大興伴奐白虎之狂災漸熾黃龍之祥約難

尋兵力莫申帝心有寄以公慶傳渭夢業練圮書交趾
銘勳則永威入詔鄆城報政則不待三年屬蠻寇加囂
王師告老遂飛急詔請救倒懸由是自東徂西以晝繼
夜走單車於外境豈煩龔遂獻書受戎輅於中塗莫掩
晉侯稱伯

公鄆行次咸陽
除授西川節制

遙銜睿畧倏達成都於時驃

信屯兵逼郊遂而纔踰一舍黔黎失業焚里閭而何啻
萬家彼則舉國而濟師此則闔城而受獎外熾崑岡之
焰喫酒無能內枯疏勒之源指梅何益莫非枕倚牆壁
誰堪環執甲兵公至止之日豁啓城扉若開籠檻威振

而寧勞利器邪膽皆摧化行而如嗅新香驚魂盡返蠻
王以鑢耳飽聆其異畧鏤膚畏挂於嚴誅洵然觀電懼
雷歛爾鳥飛魚散公每令選銳暫使追逃乘其垂翅之
時展我燎毛之勢數俘莫記執馘居多爾後因閱地圖
得搜天險是猿狖養窩之窟爲豺狼伺隙之蹊乃令一
叛雄關一標巨防

修防峽關置平夷鎮
蠻賊要路固守無虞

危堞則憑巒助

峻長溝則導澗資深窵成善閉之機實扼間行之徑九

泥可固斷知無得而踰燿火罷驚坐見不爭而勝仍每

水道別建河營

大渡河側
置防河營

遠方猾夏之徒難謀航葦均

發戍申之卒免詠流薪疆陞永保於覆孟塵閑唯矜於
列鼎卿雲邦彥閒吟搜吐鳳之詞卓鄭鄉豪靜坐貯蹲
鴟之利公以寢處戎閫夢想扁舟將申遠慮於無窮豈
立空言爲不朽乃曰彼蠻之習也外癡內黠朝四暮三
雖莊叔此時功已成於長狄而季孫他日憂必在於顓
臾詎可虛號錦城尙無羅郭守民之制非我而誰啓抱
而神欽至誠飛章而帝允丹請時有賓寮進難將校獻
疑皆云公孫述躍馬雄臨非無意也諸葛亮臥龍崛起
亦有志焉但以曩築子城猶資客土九年方就百代所

難蜀缺無土昔張儀築子城輦土於
莫學射山日役往返九載後始成况今將興廓落之

基恐致遷延之誚公曰術缺先定事當速成必能終簡

天心豈謂虛穿地脈於是郡侯奔告邑尹樂從乃使揣
高卑議遠邇慮材用量事期採時候於魯書佚規模於
周令引長江而勵長塹夏禹慙能對高巘而劃高墉秦
皇失色矧乃命五丁而嘯侶運六甲以驅神天吳則滲
水於寒泉地媪則變沙爲美土蜀地穿未盈尺泉源漲起至是土出沙中城缺
如實謂百靈幽贊萬姓悅隨鋪聚雲濃杵騰雷響不見
烈風淫雨又令簋飽觴酣登登而只競歡呼屹屹而使

如湧出百堵皆作三旬而成然後郢匠勞功素材變質
優人展妙楨壤凝華攢空而烽櫓高排架險而闔閭聳
起橫分八尺結雕甍而彩鳳聯飛檻徹四隅擁繡堞而
晴虹直挂罩一川之佳景籠萬戶之歡聲遠而望焉則
巍巍峩峩若雲中之疊嶂錦霞縠霧隱映乎其上迫而
察也則赫赫燁燁想海畔之仙山金臺銀闕焜耀乎其
間始自庀徒終於解役不假朽緡於官稅無資剖粒於
軍租

築板所費錢一百五十六萬貫米
一十九萬石皆由智計不假上供

皆聚羨財儼成

壯觀遂使蠻酋褫魄賓旅歸心不敢言摩壘而旋無因

致入郢之役爰徵繪事仰貢九重旋降綸言過褒一字

宣睿旨於翰林才子綴妍辭於黃絹外孫

築城碑今租庸王相公承

旨撰詞

公雖迎金鳳銜書未議石龜戴版蓋乃謙沖自牧

耻其功伐驟稱及蒼鳥高飛翠華遠狩儼仙遊於玉壘
安聖慮於錦城故得親覽宏規益欽忠節特傳瑤檢微
進碑詞遂命雕鐫永揚威烈實萬古未貽之事乃四方
無比之榮美矣哉龍以雲興魚因水樂誰不仰公智周
物表事照機先凡施權謀若合符契在昔全蜀未城也
天畱盛績日待英才所謂有非常之人然後有非常之

事有非常之事然後有非常之功是以非常者固非常
人之所覲也致遠雖邱堂觀奧師冕何知而秦國斂賢
由余不棄謹成實錄敢記殊庸所冀四海梯航閱雄圖
而稽頌九州旄鉞望法駕而安心中和三年龍集癸卯
八月二十五日記

補安南錄異圖記

交趾四封圖經詳矣然而管多生獠境邇諸蕃畧採俚
譚用標方志安南之爲府也巡屬一十二郡

峯驩演愛
陸長郡說

武定武安
蘇茂虞林

羈縻五十八州府城東至南溟四百餘里有

山橫亘千里而遙邃穴深巖爲獠窟宅蠻蜚之眾六種
星居鄰諸蕃二十一區管生獠二十一輩水之西南則
通閭婆大食之國陸之西北則接女國烏蠻之路曾無
亭埃莫審塗程踣履者計日指期沈浮者占風定信二
十一國雞犬傳聲服食所宜大較相類管內生獠多號
山蹄或被髮鏤身或穿鼻鑿齒訛音嘲哂姦態睢盱其
中尤異者臥使頭飛飲於鼻受豹皮裹體龜殼蔽形擣
木絮而爲裘獠子多衣木皮熟槁有如纖維編竹筥而作翅生養則夫
妻代豢長成則父子爭雄縱時有傳譯可通亦俗無桑

蠶之業唯織雜彩狹布多披短襟交衫或有不縫而衣
不粒而食死喪無服嫁娶不媒戰有排刀病無藥餌固
恃險阻各稱會豪遠自漢朝迄於隋季荐興邊患頗役
遐征馬將軍標柱歸時才分地界史總管倒碑過後畧
靜海隅洎咸通初驃信挺灾元戎喪律鴟嘯於跼鳶之
地豕豕於束馬之塗摧寬欲快於椿喉拯溺唯思於援
手先帝以今淮海太尉燕公威宣大漠政治上都時公防禦
秦城剗平醜虜才乃請出鎮龍編立身豹畧剗彫題而
歸輦下出鎮安南

卯碎活黔首以肌豐復壁壘於一麾拔封疆於萬里有

蠹皆削無冤不伸

朱道古稔姦於外杜存凌恣虐於內皆爲安南巨患公乃誅滅無遺故褚

令公遂良竄歿日南子

然後使電母雷公鑿外域朝天

孫凋零公特表洗雪

之路山靈水若偃大洋沃日之波

安南經峯口天威神功所開播在遠邇

遂得絕蠻謀之北窺紆漢軍之南戍乃鳳傳徵詔鷁泛

歸程至於洞獠海蠻莫不醉恩飽義遠投聖闕請建生

祠則知善政所行殊方可誘旣見馬如羊而不敢縱令

蟻若象而何虞足以驗四夷之時或不賓九牧之任不

得所也有柔遠軍從事吳降嘗集是圖名曰錄異敘云

久客遐蕃目擊殊形手題本事然則信以傳信斯焉取

斯缺

閱前詞退而歎曰愚之所以爲異者其諸異乎人
之所異曰六合之內何物則稟至如鼠肉萬觔蝦鬚一
丈旣知南北所產永釋古今之疑則彼獸性羣分鳥聲
類聚誠不足異也頃太尉燕公受三顧恩用六奇計使
獮悍歸服邊陲晏然今聖上省方蒙王獻款不敢弄吠
堯之口永能除猾夏之心皆由燕公收交州鎮蜀郡威
振於奔魑走魅功成於金壘湯池所謂蘊先見之能察
未來之事呼吸而陰陽不測指蹤而神鬼交馳實爲天
工人其代之斯實可爲異矣聊補所闕敢貽將來時翌

華幸蜀之三載也

求化修大雲寺疏

大雲寺募緣求化重修建瓦木功價等詳夫敎列爲三
節居其一其如妙旨則暗裨元化微言則廣諭凡流開
張勸善之門解摘執迷之網然則欲使衆心歸敬須令
像設莊嚴有感必通無求不應墾情困而種福游法海
而消殃不可思議於是乎在當州城西大雲寺雖臨楚
甸實壓蜀岡舊創仁祠高標兌位兩洗烟窗之色萬朶
前山風敲月砌之聲千株古木在一郡乃偏爲勝景於

四時則最稱芳辰至如春水綠波雜花生樹都人士女
以遨以遊不勞聽法之緣自得消憂之所則與城東禪
智寺雙肩對聳兩耳齊張夾煬帝之遺宮擁淮王之仙
宅壯茲樂土倚彼福田前年偶值飛蝗未能避境旋又
聚蟻或欲毀堤故護軍特進以將隔妖氛忽興猛焰遂
使琉璃之界翻成煨燼之餘雖菩薩焚身固爲常事而
苾芻住足盡失安居可惜祇園便同隙地今幸遇太尉
將驅眾旅佇滅羣冤旣逃過去之灾或補未來之福欲
安盛府許葺精廬欲使爐續朝香鐘迎夜梵樹宿獼猴

之友林棲鸚鵡之王蓋因貞觀之中曾傳帝語豈效太
清之末酷信伽譚所願廣運慈航徐槌法鼓深資功德
靜剋妖魔百官榮從於鸞旌萬乘遄歸於象闕次願太
尉廓清寰宇高坐廟堂演伽葉之真宗龍堪比德舉儒
童之善教麟不失時克興上古之風永致大同之化凡
於戴髮含齒鱗潛羽翔皆號慈悲能盡解脫但以一毛
可拔先求信義之心百足不僵須賴扶持之力旣難獨
辦固托重緣無吝羨財合資洪福富者不仁之說自古
所譏積而能散之規於今可誠謹疏

求化修諸道觀疏

紫極宮重修城下諸宮觀求化瓦木等價伏以昔縣誕
靈神州演法真性乃聖朝之祖強名爲至道之宗玉葉
金柯耀芳陰於萬代瑤南瓊笈傳妙旨於四方遂得齋
醮有歸科儀無墜神宮靈宇宛寫諸天祕殿精壇嚴修
勝地當州東吳麗俗南充雄藩鮑參軍則賦銜精妍揚
執戟則箴誇天矯而乃至道少勤行者元門無善閉之
味澹口中動成大笑義深目外誰信上昇福庭則草沒
塵侵仙室則雨傾風壞况值梟聲競噪虺毒強吹到處


星飛但見羽書之急經年霧集唯聆甲騎之勞俗旣喧
驚教增寂默未有葺修之暇非無捨施之緣今幸遇太
尉德繼猶龍道深有象黃石公之妙訣雅稱帝師赤松
子之勝遊佇迎仙友是故出則以六奇除敵入則以九
轉服勤靜制閩外之烟塵間對壺中之日月三元遵敬
一氣精修果見真位高遷殊祥降彩雲片片飛來楚
岫之風元鶴雙雙唳向隋宮之月又乃前年則江寇南
逼去歲則淮戎北侵蟻皆恃於成羣蛇欲驚於結陣伏
賴太尉雄威坐振眾孽奔亡四鄰戴信於桓公八郡感


恩於邵父親耕農之蔽野聽歌吹之沸天古人有言爲
可爲於可爲之時則可其城下宮觀今欲旋集良工增
修舊址擬金室銀堂之制處處騰光俾星冠月帔之徒
人人潔跡微功若就良願克伸龍圖早耀於中興虎旅
永摧其大盜次願太尉運籌佐漢迴掩張良拊棹遊湖
靜追范蠡石畱馬跡臺挂鳳音蓬島花開春醉而閒乘
白鹿芝田雨過曉耕而長任青牛罷吟小桂之篇獨邁
大椿之壽然後仰從翊翼俯至潛鱗凡曰含虛悉能蒙
福但以所修宮觀荒摧旣久經費甚多無因獨辦資糧

桂苑筆耕集卷十六
唯仰眾成功德迦譚之難捨能捨猶見樂輸道教之自
然而然幸無輕諾謹疏

桂苑筆耕集卷十六

南海譚瑩校







PL
2457
P29
1.574

桂苑筆耕集卷十七

啓詩狀共四十首

啓
四首

初投獻太尉啓

再獻啓

謝生料啓

獻詩啓

詩
三十首

七言紀德詩三十首謹獻司徒相公

狀
六首

謝職狀

謝借宅狀

出師後告辭狀

謝令從軍狀

謝借舫子狀

謝許奏薦狀

初投獻太尉啓

某啓伏以嶽之高與海之深物所歸而人所仰迴拔千
仞平吞百川其如巘嶸擎天波瀾蕪日豁四方之眼醒

萬族之魂是宇內之所歌謠匪毫端之能贊詠伏惟司
徒相公獨抱神畧一匡聖朝譽洽於良哉康哉名標於
可久可大龔黃德政則郡民有遺愛之碑韓白功勳則
國史有直書之筆況某劣同窺豹淺比傾螺難將篆刻
之詞輒頌陶鎔之業但以間生賢哲年當五百之期廣
集英豪客滿三千之數旣納之似水則來者如雲斯乃
司徒相公鏡於心而寬兮綽兮秤於事而無偏無黨網
羅雋彥籠罩驍雄於儒則沈謝呈才於武則關張効力
遂使弓旌招隱士巖谷爲之一空介冑降叛夫烟塵爲

之四息豈獨分憂於閫外實惟稱慶於寰中莫不信齊
於春夏秋冬恩播於東西南北但日月照臨之所是風
雷變化之時然則尼父堂中亦有他鄉之子孟嘗門下
寧無遠地之人片善可稱前賢不讓永能執大邦之政
豈欲遺小國之賢是以敢寫微衷輕投朗鑑某新羅人
也身也賤性也愚才不雄學不贍雖形骸則鄙年齒未
衰自十二始別雞林至二十則遷鷺谷方接青衿之侶
旋從黃綬之官旣忝登龍敢言絆驥今者乍離一尉欲
應三篇更願進修且謀退縮獨依林藪再閱邱墳課日

攻詩虞訥之詆訶無避積年著賦陸機之哂笑何慙俟
其敦閱致功琢磨成器求魚道在垂竿而不挂曲鉤射
鵠心專撚筈而冀銜後鏃端操勁節佇望良時竊見萬
物投誠八紘嚮德不謁相公賓閣不遊相公德門者詞
人之所懷慙羣議之所發誚某故敢隳肝瀝膽進牘拙
毫不避嚴誅輒申素懇謹錄所業習篇章五軸兼陳情
七言長句詩一百篇齋沐上獻冒犯尊威不任戰懼之
至謹啓

再獻啓

某啓某今月五日謹以所學篇章五通貢于賓次雖慙
獻豕輒覬攀龍脩客路以心摧望仁風以目斷乍覩秦
雲之態或似美人細看燕石之姿恐爲棄物伏爲司徒
相公光逾愛日煦及寒灰念以遠別海隅久沈江徼特
垂豐餽俾濟朝饑自驚樗櫟之材已荷稻粱之惠雖龜
魚投水驟喜命蘇而蚤蝨負山深憂力敗且某也兔絲
雖絡蛛網自營萬計尋思不如學也百年勤苦猶恐失
之所以未競宦塗但遵儒道筮仕而懶趨塵土卜居而
貪憶林泉人間之要路通津眼無開處物外之青山綠

水夢有歸時所願更淬鉛刀終求鐵印斂跡而跼藏學
藪安身而跌宕詞林嘗誦古詩還符此意云志士惜日
短愁人知夜長某旣懷志士之勤又抱愁人之苦聊憑
毫牘敢述肺肝且如踢壁冥搜杜門寂坐席冷而窗風
擺雪筆乾而硯水成冰欲爲尼父之絕編無奈羲和之
促轡卽可知指萬卷之經史恨三冬之景光及其凍枕
傷神孤燈伴影寒漏則滴殘別淚遙砧則搗破羈心空
勞甯戚之悲歌莫繼陸機之安寢亦可想貯千端之鬱
邑過五夜之寂寥然則志士之勤也旣如彼愁人之苦

也又如此況某家遙日域路隔天池投客舍而方甚死
讎指何門而欲安生計唯慮道之將廢豈言人不易知
不敢以陋質凡姿覲相公清嚴之德不敢以片言隻字
希相公採錄之恩所望者或以其萬里地遠來十餘年
苦學稍垂惻憫得濟困窮則必堅背水之心終爲勇士
決移山之志不讓愚公伏以某譯殊方之語言學聖代
之章句舞態則難爲短袖辯詞則未比長裾舌無三寸
之能空緘壯氣腸有九迴之懇但戀深恩干浼尊嚴下
情無任感戴兢惶涕泗之至謹啓

謝生料啓

某啓某昨日伏蒙仁慈再賜生料恩並望外喜集愁中
安貧而已瞻晨炊感德而唯知宿飽遂使范家釜甑免
恨長閒顏巷簞瓢倍加其樂伏以某雖楊曾穿葉而蓬
且斷根空把利錐冀遇大賢之鑑豈將長鋏先興下客
之歌一昨輒貢蕪音累塵尊聽窺德宇而燕雖相賀望
威風而鵠恐退飛豈料司空相公俯念海人久爲塵吏
特垂記錄繼賜沾濡前生之溝壑無虞饑寒雖濟頭上
之邱山漸重負戴難勝依投而旣類窮猿展效而願同

病雀下情無任云云

獻詩啓

某啓某竊覽同年顧雲校書獻相公長啓一首短歌十篇學派則鯨噴海濤詞鋒則劒倚雲漢備爲贊頌永可流傳如某者跡自外方藝唯下品雖儒宮慕善每嘗窺顏冉之牆而筆陣爭雄未得摩曹劉之壘但以幸遊樂國獲覩仁風久貯懇誠冀伸歌詠輒獻紀德絕句詩三十首謹封如別定王拙舞適足自嫌嫫母濃粧轉爲人笑不足贊揚休烈翻憂浼黷尊威然聖人以激勸誠深

不間互鄉童子學者以揣摩志切皆投鬼谷先生伏惟
特恕荒蕪俯垂采覽所冀趨仁化於江北終得傳美譚
於海東唐突藻鑑下情無任戰慄之至謹啓

七言紀德詩三十首謹獻司徒相公

兵機

惟將志業練春秋早蓄雄心剗國讎二十年來天下事
漢皇高枕倚畱侯

筆法

見說書窗暫臥龍神傳妙訣助奇鋒也知外國人爭學

惟恨無因乞手蹤

南朝蕭子雲善書百濟使人求手蹤以爲國寶

性箴

波澄性海見深源理究希夷闢道門
詞翰好傳雙美跡何須更寫五千言

雪詠

五色毫編六出花三冬吟徹四方誇
始知絕句勝聯句從此芳名掩謝家

射鵬

能將一箭落雙鵬萬里胡塵當日銷
永使威名振沙漠

犬戎無復吠唐堯

安化

班筆由來不暗投
旋驅熊隼待封侯
郡名安化能宣化
更指河湟地欲收

練兵

隴水聲秋塞草間
霍將軍暫入長安
太平天子憐才畧
曾請陳兵盡日看

礮溪

刻石書蹤妙入神
一迴窺覽一迴新
况能早遂王師業

桃李終成萬代春

伏觀相公磻溪詩云及到王師身已老不知辛苦爲何人又經號縣詩云

手栽桃李十餘春

今日經過重建勲

射虎

鋸牙鉤爪礙王程一箭摧斑四海驚
口額前驅美膽碎方知破石是虛聲

秦城

遠提龍劍鎮龍庭外戶從茲永罷局
掃盡邊塵更無事暮天寒角醉吟聽

生祠

古來難化是蠻夷交趾何人得去思萬代聖朝青史上
獨傳溪峒立生祠

射鞭

休說戟枝非易中莫言楊葉是難穿須看立節沙場上
永得安邊爲射鞭

安南

西戎始定南蠻起都護能摧驃信威萬里封疆萬戶口
一麾風雨盡收歸

天威徑

鑿斷龍門猶勞身擘分華嶽徒稱神如何劈開海山道
坐令八國爭來賓

崖口徑

濟物能迴造化心驅山偃海立功深安南真得安南界
從此蠻兵不敢侵

收城碑

功業已標征北賦威名初建鎮南碑終知不朽齊銅柱
况是儒宗綴色絲

碑今度支裴
僕射撰詞

執金吾

一陣風雷定八蠻來趨雲陞悅天顏王孫仕官多榮貴
心爲匡君不暫閒

天平

海岱烟塵匝鄆城遙揮一劍落櫓槍征旗不動降旗盡
永使天平地亦平

釣魚亭

錦筵花下飛鸚鵡羅袖風前唱鷓鴣占得仙家詩酒興
閒吟烟月憶蓬壺

伏觀相公在鄆州詩云酒滿金船花
滿枝雙娥齊唱鷓鴣詞又釣魚亭詩

云水急魚難釣
風吹柳易低

相印

早說休徵應佩刀
台星光接將星高
欲迎霖雨歸龍闕
看滅妖氛展豹韜

西川

遠持龍旆活龜城
威懾蒙王永罷兵
應笑欒巴喫杯酒
兩師風伯自歸行

平蠻

叩峽關東蠻塵絕
平夷鎮扼蠻地裂
又築羅城變錦城
蠻兵永滅功不滅

築城

一心能感眾心齊鐵甕高吞劒閣低
多上散花樓上望江山俱盡好詩題

荆南

虎吼龍驤出峽來福星才照陣雲開
遙思屈宋忠魂在應向風前奠一杯

漕運

濟川已展爲舟業煮海終成富國功
能與吾君緩宵旰爲資心計四方通

浙西

九江賊膽望風摧萬戶愁眉向日開
楚舞吳歌一何樂相逢相賀相公來

降寇

唯將德化欲銷兵常笑長平恣意坑
更想太邱行小惠何如言下濟羣生

淮南

八郡榮超陶太尉三邊靜掩霍嫖姚
玉皇終日置金鼎應待淮王手自調

劔南荆南淮南乃天下名鎮相公累移節制西戎南蠻東鄙賊起相公皆

目討
除

朝上清

齊心不倦自朝真豈爲修仙欲濟人
天香風吹楚澤
江南江北鎮成春

陳情

俗眼難窺冰雪姿終朝共詠小山詞
此身依托同雞犬
他日昇天莫棄遺

謝職狀

右某今月二十五日伏奉公牒特賜署充館驛巡官者

恩降台階光生旅舍承命而吟魂乍懾叨榮而病骨能
蘇攀依有心荷戴無力伏以某櫟生曠野莠託荒田豈
惟良匠不窺抑亦農人見棄風歆弱植難舉勢於凌雲
塵纖纖莖但懷愁於委地昨者不慙狷者輒效狂生累
貢巴詞仰黷秦鑑伏惟司徒相公念某來從異域遠寓
樂郊俯愛似龍不嫌非鳳拔衰英於糞上搜滯刃於獄
中許廁嘉賓仍沾厚俸神仙見顧稍親郭隗之臺駑蹇
何施得主鄭莊之驛況乃念子襟之志業辱華袞之褒
詞刻畫恩深已能長價琢磨志切終願成功修身則飲

水懷冰鍊思則吟煙嘯露唯當勵節以謂報恩謹詣衙門祇候陳謝下情無任感激彷徨榮懼之至謹狀

謝借宅狀

右某昨日客司奉傳處分借賜官宅安下者仰聆尊旨俯省庸才旣榮投跡之有門唯恨殺身之無路伏以某自趨龍旆免泣牛衣職俸非輕書糧頗贍嘗讀魯論語曰學而優則仕仕而優則學是以望東開之閣永誓依仁坐北面之窗唯期肄業非敢隱居而不嫁祇將直道而自媒今者幸寓樂郊况棲靜室登屨則不勞涉遠簞

瓢則永遂安貧豈謂愛閒誠堪養勇三年就學非缺慕
藺之心一日成功願滿依劉之志下情無任感恩激切
兢惕之至謹詣衙門祇候陳謝謹狀

出師後告辭狀

右某伏念來從異域託在德門昔曾名列桂科未知稱
意今忝職居蓮府始覺榮身恩既厚於稻梁跡能安於
萍梗日增學植月贍書糧豈期市駿之金傍沾駑蹇惟
愧封侯之印未效禎祥今者屬以大憝通誅中朝多難
頃煩豹畧佇滅豺聲伏惟太尉相公身耀福星均臨庶

類手傾霖雨遍洗妖氛遠命舟師重興國祚華夷則望
風競林蠹植則尅日當蘇若某者空有肺腸方申禱祝
恨無羽翼一遂奮飛望龍節以魂銷窺虎威而股慄雖
則熊羆之力其喜安人其如犬馬之心常增戀主下情
無任攀依激切涕泣之至謹狀

謝令從軍狀

右某適見客司奉傳處分令借舟船隨從行李者深恩
旣降壯氣潛伸勵心而願效驅馳感德而難勝踴躍伏
以某塵中走吏海外腐儒五能非自濟之資一割無可

施之處惟增慷慨已分沈淪豈無投筆之心時應未偶
空有請纓之志力且難成誰謂忽被殊私不遺賤跡許
隨旌旆借賜舟航蹇足無堪敢望維駒之念麼姿何幸
遽叨泛鷁之榮况當泣路之時永荷濟川之賜下情無
任感戴欣躍兢惕之至謹狀

謝借舫子狀

客司奉傳處分借賜舫子安下者某方脫窮鱗得攀畫
鷁自慙跡在塵吏忽訝身爲水仙則彼甘寧割錦纜而
呈奢顧愷毀布帆而無恙豈若榮棲德宇又泛仙舟風

波無失所之憂烟月有搜吟之暇况清流滿望暑氣銷
威每當定志安神則乃銘肌刻骨謹課七言長句詩一
首齋沐上獻于黷台階下情無任荷戴兢惕之至謹狀

謝許奏薦狀

右某昨日見衙前兵馬使曠師禮奉傳處分特賜慰問
兼許奏薦令自修狀本來者俯慙蓬跡仰聽蘭言喜抃
而身輕欲飛驚惶而心戰難遏何者某職叨鄭驛已謂
極榮名達堯階實爲過望憑何展效佩此恩光况乃明
鑑冰開英才霧集所宜倒屣則先迎王粲築臺則次接

劇辛如某者輟耕海上之田來泣塵中之路雖云遊學
尙未成功豈料勤勞莫副於指蹤將念已傳於卵翼許
令伐善將使警愚每思邠子之驟稱深慙速誦欲效黃
公之多讓又恐失時冀緝拙詞仰遵嚴命南宮适之間
宜父實有所歸東方朔之對漢皇寧辭自責旣忝風雷
之變化佇期雨露之沾濡下情無任感戴榮林兢灼之
至謹奉狀陳謝謹狀

桂苑筆耕集卷十七

南海譚瑩校

桂苑筆耕集卷十八

狀啓共二十五首

狀啓

狀二十二
首啓三首

賀破淮口賊狀

賀高司馬官狀

謝職狀

長啓

謝加料錢狀

謝衣段狀

謝借示法雲寺天王記狀

謝示延和閣記碑狀

謝改職狀

謝探請料錢狀

與恩門裴秀才求事啓

前湖南觀察巡官裴璿啓

獻生日物狀五首

端午節送物狀二首

謝新茶狀

謝櫻桃狀

謝冬至節料狀

謝寒食節料狀

謝社日酒肉狀

謝匹段狀

賀破淮口賊狀

右某昨日竊聆淮口鎮狀報今月八日諸軍合勢殺戮
狂賊已盡者狀以徐州賊黨偶因嘯聚敢恣喧張鴟梟
同巢勢必不久蟣蝨相弔生能幾何猶懷拒轍之心未
有返轅之意伏賴太尉相公雄聲遠振妙畧潛施謀安

四方決勝千里遂使淮山樂境長承虎豹之威泗水孤
城免作鯨鯢之餌功著於暫勞永息計資於彼竭我盈
小盜旋除中興可望三軍之勇氣方振百姓之驚魂再
蘇但仰恩威咸增抃躍謹祇候陳賀謹狀

賀高司馬除官

某啓伏承司馬二十五郎榮膺寵命伏惟感慰伏以漢
朝美仕稱太傅少傅之榮晉代高流誇大阮小阮之譽
然而但欲脫身於利祿無非縱志於歌吟於臣則虧報
主之誠爲子則失榮親之節豈期太尉相公重言天應

美命風行遂令司馬二十五郎挂綵衣披朱紱動高堂
之喜色振德宇之嘉聲佐理多閒藹餘芳於玉樹連官
獨貴掩前哲於竹林某每愧小儒忝棲大廈覩鵬鵬之
逸勢貯燕雀之歡心下情無任抃躍之至謹奉啓陳賀
謹啓

謝職狀

右某志雖求已藝不及人伏蒙太尉相公仁慈肉被摧
骸翼成鰥卵難飾片言隻字粗伸感德懷恩今則苟貯
血誠敢憑毫素先甘鼎鑊仰黷旌幢謹具長書咨陳下

情無任戰灼之至伏惟特寬罪誅俯賜念察謹狀

長啓

某啓某伏以短綆不可以汲深頑鋒不可以剗滯是故不能者止周任有言自宜量力而行豈可從心所欲某東海一布衣也頃者萬里辭家十年觀國本望止於牘尾科第江淮一縣令耳前年冬罷離末尉望應宏詞計決居山暫爲隱退學期至海更自琢磨俱緣祿俸無餘書糧不濟輒攜勃筴來掃膺門豈料太尉相公迴垂獎憐便署職秩跡趨鄭驛身寓陶窗免憂東郭之貧但養

北宮之勇去年中夏伏遇出師忽賜招呼猥加驅策許
隨龍旆久倚鵠舟每恨布鼓音凡鈴刀器鈍縱傾肝膽
莫副指蹤遽蒙念以慕善依仁特賜奏薦重言天應忝
獲超昇若非九重倚賴於功名十道遵承於法令則其
恩命亦豈肯許某自江外一上縣尉便授內殿憲秩又
兼章紱且見聖朝簪裾烜赫子弟出身入仕二三十年
猶挂藍袍未趨蓮幕者多矣況如某異域之士乎昔有
一日九遷無以及斯榮盛某嘗讀魯論見仲尼使漆雕
開仕對曰仕進之道未能究習善其深志夫子致悅某

雖慙不敏竊有慕焉昨蒙恩慈特賜轉職尋已具狀陳
讓兼納所賜公牒伏奉批誨卽有勅命但請收之某旣
蒙未允至誠固且仰遵嚴旨立愧形影坐驚神魂每當
夜對寒釭曉窺清鏡感激而頤橫涕雨憂惶而背浹汗
漿雖榮擺脫於風塵倍赧污黷於門館伏以太尉相公
雄名峻望碩德茂勳不唯雲覆九州抑亦風揚萬國寓
目傾耳仰爲指南儒武所歸一人而已是以諸道景附
馬首是瞻其如都統巡官須選人材稱職外塞四方之
望內資十乘之威若今某塵玷恩知尸素缺位但恐買

戎狄之笑沽史傳之譏昔漢朝金日磾常在武帝左右
帝欲別加寵遇日磾辭曰臣外國人且使匈奴輕漢某
今日之請實在於茲諸廳郎官早陳公議蓋以賤無妨
貴欲令夷不亂華某伏自前年得在門下更無知識唯
謁諸廳幕中垂情幸而獲宥竊聆太尉相公去年夏於
東塘顧問某之時諸郎官同力薦揚和之如響遂沾厚
遇遽竊殊榮昨者繼陳謹言不徇尊旨實乃惜太尉相
公之名望存淮南藩府之規儀事體不虧裨贊斯在冬
末面奉處分欲使別開院宇雖承恩諾轉切憂懷何者

六韜曰人才大小猶如斗也不可盛石滿則棄矣故孔子云孟公綽爲趙魏老則優不可以爲滕薛大夫今者甘寘嚴誅輒傾真懇乞解所職以弭官謫可也伏惟太尉相公特賜允從令得其所儻蒙未垂擯棄猶許依棲則望或別補冗員或薄支虛給一枝數粒可養羽毛斗水尺波得安髻鬣固非矯飾廉讓爲名實願揣量分涯免成負累恩德春秋齊侯使敬仲爲卿辭曰羈旅之臣免於罪戾施於負擔所獲多矣敢辱高位請以死告使爲工正不失令名故事昭彰卑誠悃悃守道而得無陞

矣登門而免見餌之但願藥曰畱恩終有凌雲之望著
簪挂念永無委地之愁干冒台威下情無任懇迫憂兢
之至謹啓

謝加料錢狀

右某今日某官奉傳處分每月加給料錢二十貫者某
厚沾職俸過瞻書糧抵羊之角且不羸驢鼠之腹能易
滿惟憂福盛難報恩深豈料筆端乏白鳳之詞日無可
效囊底獲青蚨之術月有所增但懷臨谷之心恐敗負
山之力惟願除供陋巷之食分濟遠鄉之親同感厚恩

永傳遐俗或成浮費必速幽誅下情無任荷戴兢惶涕泣之至

謝衣段狀

某啓伏蒙恩慈賜及生衣段一十匹者伏以風雖解愠日可畏威始當蒸鬱之時忝受鮮華之賜敢效八公之侶欲銜六銖但隨百姓之歡同歌五袴况乃某幸趨台陞榮託德門實資千載之遭逢每濟四時之服飾愍念而情踰父母稱揚而禮異賓僚今者輕縠衫材細練褱制俾趨儉幕許曳鄒裾雖恩耀遠人足呈妍於鮫室而

名慙奇士甘致刺於鵷梁下情無任感戴之至

謝借示法雲寺天王記狀

某啓昨日伏蒙恩慈借示修法雲寺天王碑綵毫乍閱
俗眼初醒唯慙鐵印之庸流忽覩銀鉤之妙迹旣成國
寶豈許家藏竊聆將勒貞碑始揮神筆風亭減暑天酒
呈祥固知垂露之蹤便成甘露况假崩雲之勢永耀法
雲宜乎琬琰之詞鎮彼瑠璃之地共傳嘉瑞永振芳聲
然則隋煬帝之故都永爲寶窟謝將軍之舊宅終作福
田下情無任捧讀祈禱榮懼之至其碑謹專諮納謹狀

謝示延和閣記碑狀

某啓昨日觀察衙推邵宗傳奉處分賜及延和閣記碑
本一軸者跪展真蹤仰窺臣節對銀鉤而手舞足蹈望
玉輦而魂飛膽揚伏以太尉力贍補天心勤捧日遂啓
遷都之議佇聆徒蹕之期恭候宸遊儼成壯觀但以尋
章摘句素非吳主之心進牘抽毫唯在陳王之命爰令
幕客謹撰碑詞支使侍御邱門顏回融帳盧植能揮真
筆妙寫尊襟敘三年望幸之丹誠則鼓傳眾聽述一片
勤王之忠節則鏡照羣迷實乃酣飫德馨備陳事實永

使奇功祕畧皆令陋古榮今太尉相公志切迎鑾喜勝
覽檄旣贊美於凌雲百尺將掩能於入木八分遂乃親
染綵毫俾鐫翠琤隨手而龍蛇旋活迎風而劒戟交橫
畫玉點珠豈可比蘭亭醉本撇雲挑霧只宜示蓬島真
仙誰料末儒亦叨殊貺輒敢覬覦將顧是知誘諭辱庸
何則名題桂宮跡隸蓮府雖忝一時之有遇實無萬代
之可稱今者支使侍御以好善心得稽古力騁真才子
之藻思辱大丞相之筆蹤推爲賓席殊榮別是儒家盛
事則彼郭隗受黃金厚禮虞卿沾白璧深恩強欲比方

却成浼黷然則四方舐墨含筆之士也莫不競效顰眉
之態潛希唾口之恩仰脩脩然勤慥慥爾如某者學海
至海雖云有心執柯伐柯猶恐傷手持弊箒而徒增健
羨遇神錐而便欲投降唯願讀五千卷之書庶幾入室
把十九年之刃無愧發硎每覩仙書更敦壯志稍希異
闕黨童子何敢望儒林丈人其所賜碑唯慎捧持敢矜
披閱待過天池之外遍誇日域之中想彼驪龍領下之
珠永當減價巨鰲頭上之客必欲偷看下情無任寶玩
師仰之至

謝改職狀

右某伏蒙仁恩特賜公牒改署館驛巡官今隨旌旆西
去者雖命重難荷而身輕欲飛稱心懷捧檄之榮滿口
詠從軍之樂唯慙幽劣有辱獎憐感恩而旣識海深舉
步而但憂冰薄况無孫搴之精騎自比顏竣之小兒將
何以剖析事機游揚德業然所願者得睹龍飛玉劒豹
製牙旗風雷振大捷之聲日月照中興之運則某也有
望於一言長價或爲天上之人萬里從知免作池中之
物行唯踴躍坐則禱祠下情無任榮抃兢灼之至謹齋

沐祇候陳謝

謝探請料錢狀

某啓某頃者西笑傾懷南音著操蓬飛萬里迷玉京之
要路通津桂折一名作金牘之懸疣附贅乃是常常之
事徒云遠遠而來海隅未覺於榮家江徼况勞於佐邑
由是詠南陔而引咎望東道以知歸伏蒙太尉念掃德
門許遷代舍濡毫染牘深慙雪苑之清才頂豸腰魚遽
忝霜臺之峻秩傳天上披衷之命榮日邊垂白之親以
宣父見知則實同陳隼以遠人多幸則不讓漢貂雖乖

就養無方久想宗族稱孝然而煙波阻絕難申負米之
心風雨淒涼空灑梁山之泣旣疎溫清又闕旨甘但切
責躬敢言養志况又無鄉使難附家書唯吟陟岵之詩
莫遇渡溟之信今有本國使船過海某欲買茶藥寄附
家信伏緣蹄涔易竭溝壑難盈不避嚴誅更陳窮懇伏
惟太尉念以依門館次三千客別庭闔已十八年旣免
行傭有希反哺特賜探給三箇月料錢所冀祿遂及親
遠分光於異域志能求已永投跡於仙鄉干黷台階下
情伏增感泣兢悸懇道之至其請錢狀別具上呈云云

與恩門裴秀才求事啓

某伏念身托德門光生異域雖池蛟得雨無沈埋末路之憂而海燕含泥有點污畫梁之罪跡賤而兢惶倍切恩深而展效何期豈合更寫卑誠仰塵尊德但以事非獲已情或可哀不辭鈇鉞之誅冀滿斗筲之望伏緣某昨聆座主侍郎主銓東洛道路不通且在襄州行李極困早欲發遣專使切緣力未副心今有諸兄弟裴瓌遠將窮懇相告輒具別狀干瀆台階下情無任戰灼之至

前湖南觀察巡官裴瓌啓

右件人是某座主侍郎再從弟某去乾符三年冬到湖
南起居座主侍郎之時見於諸院弟兄中偏所記念自
數年繼遭剽劫生計蕩盡骨肉凋零久在江南近投當
府願披情懇泣告尊慈駐畱多時不幸疾苦遂且扶持
發去云欲逕往襄陽迎接侍郎今得書云行至滁州前
去未得道途旣阻溝壑是虞况乃孤孀三十餘口更無
產業未卜定居伏緣某家寄日邊路踰天外杳無來信
固絕他圖旣無寸土以分耕寧有尺波而假潤是以不
量僭越輒具薦論命懸沸鼎之中目斷台階之下非不

知將虎鬚之險非不知探龍領之難但緣旣忝門生豈
論賓貢鴛鴦之與螻蟻感恩皆同多士之與遠人報德
何異伏乞太尉相公念以程窮計盡缺其柱促聲哀特
賜於廬壽管內場院或堰埭中補署散職所冀月俸俸
入便獲安家裴璆卽自到襄州令弟璿仰副驅策不度
涯分浼瀆尊嚴下情無任感泣兢懼之至

獻生日物狀

某啓伏以降跡仙山爲行恩於俗界挺神維嶽期定亂
於危時是以杞梓材長松椿壽永名字已標於金錄兵

符暫理於玉鈴伏惟太尉相公員嶠稟靈尼邱誕質大
任天降中庸日彰四夷識傾膽之門遠棲仁蔭萬姓歸
返魂之域盡飽德馨况今秦甸停氛鎬京聚孽息虎旅
奔沈之患望豹篇擒縱之機暫施決勝之謀永致昇平
之運則必坐寧環海後當去會瑤池五色輕雲鎮隨行
止千年素鶴競效驅馳獨保長生卻登真位調鼎佐玉
皇之命銜杯聽金母之歌自此漢室公卿仰羨而空知
望斷仙家朋友相逢而不訝來遲某居近鰲峯遇深驥
坂每睹張良之術唯吟郭璞之詩喜對今辰敢陳善祝

龜蛇病骨叨承救活之恩雞犬癡心竊有奮飛之望下
情無任虔禱依攀欣抃之至輒以海東藥物輕贖尊嚴
謹具別幅伏惟俯賜念察謹狀

又狀

某啓某聆天降賢人濟天下之人也是以材合地寶性
契天和高闢德門深匡帝室伏唯太尉相公漢師仙格
魯聖儒機推心於三代之英鍊氣於五行之秀今者正
融韶景共慶誕辰四方飽開閭之恩萬族獻稱觴之懇
伏惟龍韜暫展靜卷妖氛鳳輦遄歸永興清運然後誠

白石生之妙術從赤松子之勝遊黿頭擎五色之雲久
勞西望豹尾指二京之路蹙事北征佇揚滅寇之勳便
舉朝真之禮某棲身大廈祝壽中春下情無任禱祠歌
詠欣躍之至謹具別狀輒申微誠伏惟恩慈俯賜念察
謹狀

物狀

海東人形參一軀 銀裝龕子盛

海東實心琴一張 紫綾袋盛

右伏以慶資五福瑞降三清中春方盛於香風上德乃

生於遲日凡荷獎延之賜合申獻賀之儀前件人參並
琴等形稟天成韻含風雅具體而既非假貌全材而免
有虛聲况皆採近仙峯攜來遠地儻許成功於藥曰必
願捐軀如能入用於蓬壺可知實腹誠慙菲薄冀續延
長塵黷尊嚴倍增戰灼伏惟俯賜容納下情幸甚

蓬萊山圖一面

右伏以重陽煦景仙界降真雖長生標金籙之名而眾
懇祝玉書之壽前件圖千堆翠錦一朵青蓮雪濤蹙出
於墨池鯨噴可駭雲嶠湧生於筆海鰲戴何輕不愧瑣

微輒將陳獻望臥龍而股慄隨賀燕以魂飛伏惟畧鑑
心誠俯賜容納所冀近台座而永安寰海展仙齋而便
對家山許沾一顧之榮預報三清之信輕黷視聽下情
無任禱祝歌謠兢灼之至

人參三觔 天麻一觔

右伏以昂宿垂芒尼邱降瑞始及中和之節爰當大慶
之辰仰沐尊慈合申卑禮前件藥物採從日域來涉天
池雖徵三極五葉之名慙無異質而過萬水千山之險
貴有餘香不揆輕微輒將陳獻所冀海人之藥或同野

老之芹伏惟特恕嚴誅俯容情懇續靈壽則後天而老
駐仙顏而與日長新下情無任禱祝忻躍兢惕之至謹
狀

端午節送物狀

織成鞍幪一條

右伏以晏陰將定令節俄臨遇天地之仁時睹江淮之
樂境伏惟太尉應五百年景運用八千歲爲春仰贊薰
風高揚畏日不假渡瀘之役自成匡漢之謀某忝在末
寮合陳微禮前件鞍幪鴛機呈妙獸錦成華當憩影於

追風或資光於照地伏願鞍也助百福永安之慶幙也
表四方率服之誠于黷尊巖下情無任禱祝兢惶懇激
之至伏惟俯賜容納謹狀

雪扇一柄

右伏以星火揚輝雲峯聳影遇陳太守饗遙祠之節效
華封人祝仙壽之誠前件扇細糝飛綿輕鋪凍練雖假
丹青之跡實含潔白之姿裁規則不學齊紈空誇圓月
委質則願依孫閣得振仁風謹獻台堦無任悚慄伏惟
俯賜容納百生榮幸謹狀

謝新茶狀

右某今日中軍使俞公楚奉傳處分送前件茶芽者伏以蜀岡養秀隋苑騰芳始興採擷之功方就精華之味所宜烹綠乳於金鼎泛香膏於玉甌若非精揖禪翁卽是閒邀羽客豈期仙貺猥及凡儒不假梅林自能愈渴免求萱草始得忘憂下情無任感恩惶懼激切之至謹狀陳謝謹狀

謝櫻桃狀

右中軍使俞公楚奉傳處分伏蒙賜及前件櫻桃者伏

以三春之下始聞羣芳百果之中獨誇先達綴仙露而
堪教鳳食被德風而皆許鶯含遂令摘自喬枝分其美
實豈期末品亦荷深恩捧持而色奪楚萍咽咀而味欺
蘇橘何必貯赤瑛盤上最宜對白玉樽前勻排萬顆之
珠不唯眼飽似服一丸之藥便覺身輕下情伏增感戴
之至謹奉狀陳謝謹狀

謝冬至料狀

右伏蒙仁恩特賜前件節料者伏以某忝棲德宇不愧
異鄉萬里滄波雖恨絕東來之信三冬愛日且歡迎南

松溪集卷之八
至之辰豈料尊慈別垂厚賜玉粒既資於同穎霜華乃
出於兩歧不勞大嚼之言卻懷中聖之慮莫識酬恩報
德唯知飽食醉吟下情無任兢懼之至謹狀

謝寒食節料狀

右伏蒙仁慈特賜前件節料米麪羊酒等者伏以缺人
舉令回祿沮威正吟化俗之仁風又對順時之甘雨仰
沾豐餼過瞻新炊况乃蟻慕芳羶蛆浮清醞捧恩光而
飽飲豈止三朝玩春色而醺酣可期千日祗知歌詠何
報陶鈞下情無任感戴之至謹奉狀陳謝謹狀

謝社日酒肉狀

右伏蒙恩慈特賜前件酒肉等者伏以候燕應期句龍
受祀一半之韶光欲老千般之旅思相攻只知吟樂國
之春豈料捧仙家之賜陵分甘臙淮減香醴想田夫醉
舞之場起海客狂歌之興敢效陳平壯志便發大言唯
尊徐邈前蹤畧持中聖其肉並酒謹跪頌訖下情無任
感戴之至謹狀

謝匹段狀

緋羅 紫綾 紫天淨紗 紫平紗 黃平紗

黃綾

黃絹

熟綿綾袴段

右伏蒙仁慈特賜前件匹段霞舒鳳縷雪疊鮫綃猥分
絳帳之餘俾換褐袍之飾不學王尼巧說遽叨盧志殊
榮唯慙蠅蟻之姿不稱蜉蝣之什但願勵食蘗飲冰之
節報披朱拖紫之恩下情無任感戴兢惕涕泣之至謹
奉狀陳謝謹狀

桂苑筆耕集卷十八終

南海譚瑩校

桂苑筆耕集卷十九

別紙狀書基二十首

別紙狀

別紙九首
狀一首

上座主尙書別紙

賀除吏部侍郎別紙


賀除禮部尙書別紙

濟源別紙

迎楚州行李別紙二首

五月一日別紙

謝降顧狀



與金部郎中別紙二首

書

十首

與客將書

謝宋綯侍御書

答裴拙庶子書

謝高祕書示長歌書

謝李琯書

謝元郎中書

謝周繁秀才以小山集見示書

與壽州張常侍書

賀楚州張義府尚書書

與假牧書

上座主尚書別紙

不審近日尊體寢膳何似道惟滌慮德以潤身致五福
之併臻迎百靈之所薦伏惟節宣無爽時望有歸某竊
窺曩史之傳芳備載達僚之晦跡疏太傅登其祖帳僅
涉沾名陶朱公泛彼柏舟未忘邀利豈若尚書中庸守
志大隱存神表獨見之能察未萌之事遂得高揚素節

夙避危時到處烟塵不污指鴻之目終年雲水能怡夢
蝶之心然而宸鑑屢回物情猶鬱欲作山中宰相其如
天下蒼生卽期大駕還京必赴上台虛位斯乃萬乘瞻
矚四方禱祈某海燕含泥忝棲雲屋池蛟得雨早脫塵
塗感恩自比於互鄉仰德但思於闕里唯願泥沙賤質
永資陶冶深恩卑情不任攀戀虔祝涕泣之至謹狀

賀除吏部侍郎別紙

某啓伏承榮膺寵命伏惟感慰張司空之一匡西晉則
藻鑑無倫謝太傅之忽起東山則烝黎是念苟欲幽棲

悅志獨處忘懷緘輝而耻耀秦臺蘊味而懶調殷鼎則
乃智者仁者止傳樂山水之名賢才俊才盡失脫塵泥
之望羣情久鬱美命遂行今者侍郎靜揖巖扉高提銓
管萬族仰清通之譽一時進寒素之徒致使關中之寇
孽災消海內之英雄道泰近又竊聆風議仰測天心必
謂文司再歸重德然則任賢得地旣叶五百年之期好
學趨門必盈七十子之數繼集仙遊於蓬島盛傳儒禮
於杏壇旣搜虹玉驪珠皆成國寶佇見臺鸞閣鳳永作
家禽某伏思萬里無依久勞漂蕩十年有遇幸遂奮飛

異鄉榮垂白之親達路泰披朱之飾昔名士爲李公御
者喜抃猶多今遠人稱尼父生徒光輝無比陳至懇而
喙輸三尺望深仁而腸結九回下情無任抃賀踴躍感
激之至伏惟俯賜念察謹狀

賀除禮部尙書別紙

伏承天恩榮膺寵命伏惟感慰昔子貢曰夫子之文章
可得而聞夫子之言性與天道不可得而聞也然則至
於四科弟子窺測尙難况是萬里遠人鑽仰何及固不
效尤於篆刻請益於琢磨強搜類鶩之詞是黷猶龍之

德今者遠聆美命俯切歡心望峻中臺迴冠鴛鷺之列
恩深大廈空傾燕雀之誠伏惟捨念雲泉拯民塗炭輔
弼契千年之運奸雄避七日之誅某跡忝諸生身拘倖
職末由陳賀下情無任抃躍兢惶禱祝之至伏惟俯賜
念察謹狀

濟源別紙

不審近日尊體何似伏想孟津別壤沁水清源風清而
歌枕泉聲雲曉而捲簾山色旣見境含秀麗固當道脫
沖和伏惟每慎寢興早歸變理顯驗月中之夢贊成天

下之春卑情無任攀戀禱祝之至謹狀

迎楚州行李別紙二首

不審近日利涉長淮尊體寢膳何似伏以源滋桐柏浪
接蓬萊雖慙臨鬱煥之期而宛對清虛之境開樂鏡而
真同月暎泛膺舟而况值風調誰言避地之行實叶濟
川之業伏惟緩飛仙棹靜運真筌庶納休禎每加遵護
卑情懇望謹狀

又

某啓今月某日專使至伏蒙恩慈特降尊誨跪讀欣抃

不任下情伏審尙書遠赴天庭將遵水道整蘭橈而思
郭泰指桂苑而訪劉安睹神仙則楚俗皆驚聞雅頌則
魯儒相賀况某材實慙於楛矢跡嘗列於蓬壺爲倚德
門獲棲候府今者佇迎鶴駕卽覲龍章旣知天幸遭逢
唯切日深踴躍且曾哲陳洛沂之志只見虛談仲由悅
浮海之言終非實事輒以管窺筵擊真爲古陋今榮卑
情無任攀戀欣抃兢惕之至云云

五月一日別紙

某啓伏以黃雀風高蒼龍星耀弄雨而梅雖應夏鋪煙

而麥已驚秋時定晏陰

缺

資全德伏惟尙書處身無躁

深守禮經視履考祥雅符易道恬澹則老聃讓美清虛
則周顗懷慙冰光長泛於玉壺豈須獨映天意久畱其
金鼎唯望親調方當鵠泛仙舟必見鳳銜睿筆入康帝
室永福寰區下情無任虔禱鬱戀激切之至謹狀

謝降顧狀

某啓某未遂山棲尙從塵役所居官舍深在軍營雖異
衡門實同陋巷旣乏君章之蘭菊可襲馨香空餘仲蔚
之蓬蒿偏資寂寞春日則蝶牽晝夢秋風則蛩助夜吟

以此爲娛無他所覲今者方經離亂再獲起居但喜攀
父母之恩却慙下兒女之淚况某叨榮秦爵就學漢儀
姜維之膽氣雖麤鄧艾之口詞甚訥唯深感激莫備啓
陳伏蒙尙書念以遠方察其獨立俯憐素志每煦溫顏
聽及階及席之言佇銘骨銘肌之懇早來又蒙降三清
之僊駕顧一畝之窮居方慙隨入室之賢豈料忝式廬
之念非所敢望將何自安莫不思光遠耀於殊鄉卑迹
永超於末路揣庸賤則華夷有隔較輝榮則古今無倫
數年乖豹隱之期常低俗眼此日覩鳳儀之後豁展愁

眉下情無任感戴欣抃兢惕之至謹祇候起居陳謝謹
狀

與金部郎中別紙二首

不審近日尊體寢膳何似旣明且哲則詩美賢人視履
考祥則易稱君子旣樂持盈之道固安養素之機况屬
遲日載陽光風遍煦燕歌鶯舞深資酌桂之歡智水仁
山靜悅據梧之興伏惟永資景福早副急徵擲元賞於
煙霞濟蒼生於塗炭羣情禱望天下幸甚謹狀

又

某啓某仰審格言側窺性行人能宏道賢臣以致壽域
爲先世實須才俊士以效巢由是恥古者只傳於方策
今也共仰於德門伏惟郎中大雅含清中庸處厚旣以
高名肅物能將全德鎮時挂清空而嶽頂無雲瑩秋色
而潭心有月比者蘭拋粉闌竹領朱轡出分天子之憂
來慰海人之望况彼郡也戶吞越水窗列吳山得袁宏
舉扇之風靈濤宿怒使謝運枉帆之路釣渚含春及其
五袴傳歌百錢流譽尋迎睿渥遙陟華資懷寶令名誰
發迷邦之間司珍正位佇成匡國之謀而乃得之若驚

直而不倨選勝於巖軒澗戶貪歡於酒賦琴歌久聆萬
乘虛懷忍見四方失望今者梟聲向息鳳紀重興晉傅
長才待示指南之制魏牟積變佇申拱北之誠入覲冀
階坐調梅鼎豈止應月中之夢必期成天下之春然則
致堯舜之大猷永匡宸展效巢由之小節不改尊襟某
遠賈鮫綃慙非重價仰趨馬帳忝預生徒下情無任攀
戀禱祝兢惕之至云云

與客將書

某腐芥無依斷蓬自役長走而未離塵土獨行而轉困

路歧昨者遠抱危誠專趨朗鑑竿聲恐濫琴調空悲伏
蒙將軍念某來自異鄉勤於儒道曲垂提挈得遂獻投
指喻情深師冕不爲瞽者獎知言重卞和兔作罪人荒
淺何堪輝榮已極但以某無媒進取有志退居以詩篇
爲養性之資以書卷爲立身之本卻緣離會食祿未免
憂貧趙囊則到處長空范甑則何時暫熱况乃家遙四
郡路隔十洲窮愁則終夜煎熬遠信則經年隔絕時情
冷澹俗態澆訛買笑金則易求讀書糧則難致天高莫
問日暮何歸始知學者之心須托至公之力今幸遇相

公山包海納雨潤風行有片言可獎者稱譽出羣有小
技可呈者隨材入用是以無一物不歸美化無一夫不
荷深恩然則舉中國之人咸承煦育豈可令外方之士
獨見棄遺某不揆庸才敢投清德豈料將軍許垂拯拔
每賜吹噓他人之得喪榮枯皆推命分小子之昇沉進
退只在恩私儻或特假重言終榮賤質唯托針能入線
則同錐得處囊某已倚宦途粗諳吏道如能驅策未必
踰藏終當富見室家豈憚職榮州縣實以流年易邁壯
氣難申唯望庇庥得期變化所冀燕棲雪屋永無巢幕

之危鶴出塵籠稍識乘軒之便今欲專修啓事再獻相
公少申感謝之懷預寫辭違之懇未知可否先取指麾
且某也姜維之膽氣雖麤鄧艾之口辭甚訥縱申拜謁
難具啓陳聊托牋臺代披肝膈未能患已先切求仁將
軍之心若鏡焉無幽不察小子之身猶箭也唯命是從
于浼旣頻慙惶益切伏惟終始俯賜念察謹狀

謝宋絢侍御書

伏蒙殊造俯念移居借賜官車得離旅館簪笈則免勞
自負簞瓢則各職所安如承命駕之恩但勵扶輪之志

今者卜鄰甚靜學殖可成惟局袁粲之門不掃陳蕃之
室雖乘機立事輸他附勢之榮而守道安貧贏得愛閒
之樂既諧素志但感深恩伏惟終始俯賜念察謹狀

答裴拙庶子書

某遠離海島旅宦江皋比者暫願退居稍期肄業來投
樂國冀濟窮塗本望少贍山資便諧答隱伏蒙太尉念
以雀有多病鶴自遠來特署職名俾趨恩化尋緣狂花
有失腐芥無依轉知山鹿野麋唯宜退縮永謂鴻鸞鵠
侶不合攀瞻况乃器比斗筭之人身隨刀筆之吏旅舍

旣拘於雉堞閒門可設其雀羅自前年伏承庶子暫阻
朝天偶來避地便欲托金牌之幸會敘玉李之獎憐專
候起居願搜誠懇蓋慮跡賤而動多悔吝才微而易見
棄捐強自微攀舊恩是爲玷浼清德以此跼藏形影綿
歷歲時雖知提籌有門唯恐負荆無路豈料庶子恕以
未陳禰刺先降劉賤閱溫言而楚纊覆身捧華翰而隋
珠耀掌兼蒙賢弟起居未移曩顧遠賜榮緘不遺異域
之人特辱同年之字金膏珠粉旣垂摩拂之恩驥尾龍
髯重有依攀之望莫不駑駘長價瓴甌生光不唯誇衒

於親朋實所輝榮於遠俗謹當占筮撰日齋沐拜塵壤
肝而盡漉卑誠擢髮而少逃厚責其他所奉尊旨謹具
別狀啓陳云云

謝高祕書示長歌書

伏蒙特飛榮誨寵示長歌玉海金山難測高深之本北
方南國徒觀美麗之姿贊詠無堦師資有路正如青蓮
居士唯誇散誕之詞白石山人只騁荒唐之作但以風
月琴樽爲勝槩不以君臣禮樂爲宏規遂使千年萬年
所流傳皆嗟大雅小雅之淪弊今覩四十三叔行出入

表言成世資弄才子之筆端寫忠臣之襟抱在今行古
既爲儒室之宗憂國如家固是德門之事天有耳而必
當悔禍雲無心而亦可銷兵一言自此興危邦六義於
斯歸正道則所謂陳平宰社爾曹何知鄧艾畫營其志
不小永言他日足驗前程某畏影雖迷偷光匪懈既知
閱寶直若發蒙唯願將鵬舉篇章傳於異域豈獨以伯
魚對答誇向同聲下情但增感戴欽仰嗟歎之至續專
祇候陳謝

謝李琯書

某啓某今月十日得祇候見太尉渤解風息蓬萊路通
慙非席上之珍謬作壺中之客伏蒙溫顏見煦陋質增
榮鳳翼龍鱗終容攀附癡鷹鈍犬特許指呼勉其檢慎
之心諭以獎憐之意此皆副使不遺薄藝累發重言始
當獨臥北窗如蛙跳井豈料榮趨東閣似鶴乘軒風雲
旣識於因依冰谷不遑於安處感唯以泣誠止無言伏
緣旣忝從軍難爲乞假不獲祇候陳謝

謝元郎中書

某啓伏蒙太尉恩慈特賜轉職不任歡慶某元菟微儒

焦螟瑣質早因慕善偶獲成名爾後客路多愁候門寡
援麻衣始染於藍色竹簡尋推其桂香伏自去年刺謁
燕臺職叨鄭驛皆蒙郎中推心獎念假力薦揚使孤根
無委地之虞短翮有凌雲之望今者忽忝非常之遇深
慙不稱之譏雖樂從軍安敢尸祿且鷄披隼翼已覺非
宜雞處鶴羣固當自責時日已具狀辭讓以此未敢祇
候陳謝伏蒙恩私特降榮誨奉讀欣抃不任下情

謝周繁秀才以小山集見示書

昨日早謁元成晚歸弊止覺戶庭之發光彩聞几案之

散馨香遂因驚訊僕夫果得捧承畱示溫辭一幅粲然
受益之規雅什九篇蔚矣患多之思莫不振紀綱於六
義飾冠冕於七言既宗大雅之基實播中和之響伏以
諸從事鴻儔鵠侶鳳翥鸞翔集桂苑之名都占蓮池之
雅望二十三官卽先輩備觀周樂深閱楚材各陳贊詠
之詞能展縱橫之作筆皆實錄機不虛張始窺八首之
前只謂衛多君子終覽九華之後方知魯出聖人某今
所以禱望者翠輦早遇東巡白環免勞西獻二十三官
百步穿葉一飛沖天姮娥則迎入桂宮王母則引歸蓬

島然後輟勝遊於御氣展長策於濟時來登郭隗之臺
坐弄陳琳之筆則乃今朝麗藻已掩八仙公之名他日
賓筵必盈^缺才子之數見邱門之請禱待陳榻之解懸
某便欲銜璧乞降樞衣請益但以志勤詞戰唯將築室
反耕道拙世塗僅類杜門却掃未獲面申感謝謹專修
狀啓陳云云

與壽州張常侍書

當今聖天子在上賢丞相在下然而宿德令望可推者
唯我上公暨滑臺中令兩地而已初常侍靜芟前弊權

握使符我上公以理狀聞請爲真守帝惟曰俞後常侍
撫安郡俗振肅兵威大元帥以雄才薦請貳前驅帝亦
唯曰俞是得弄印分榮剖符行化踰月報政盡活疲甿
實謂壽之人永居壽域矣則乃常待遇賢丞相之知入
聖天子之用乃武乃文多才多藝固以播在四海某豈
敢一二而談詠也今所禱願者碧幢紅旆高引前途相
幕將壇別張勝地謂予不信神之聽之

賀楚州張義府尙書書

國家自兵興以來爵賞旣多官榮甚峻然而常恐授受

之未能宜稱盡善盡美固當有待今則尙書以累世勳
望以數年戰功始假使符旋迎真命某將趨清德獲聽
好音欣抃之來雀躍而已則非獨喜尙書展龔黃之美
政實乃賀聖天子之得良二千石也伏惟云云

與假牧書

伏以近日俗尙書題言矜贊祝苟非全德多是愧辭某
執性近愚處身斯直以目所覩以耳所聆方敢詠歌固
無諂笑某自達仁境如歸故鄉見百姓之安則知三軍
之樂也見鄉閭之泰則知郡邑之肅也若非常侍寬猛

相濟恩威並行則何以至村落之居室家相慶自近及
遠嬉嬉然喜遇慈父然則政成一境名達九重卽計冠
聳豐貂旗翻建隼榮膺真拜大洽羣情某每聽謳謠深
增禱祝伏惟照察謹狀

桂苑筆耕集卷十九

南海譚瑩校

桂苑筆耕集卷二十

啓狀別紙祭文詩共四十首

啓 一首

謝許歸觀啓

狀 三首

謝行裝錢狀

謝再送月料錢狀

謝賜弟棲遠錢狀

別紙 五首

上太尉別紙五首

祭文

一首

祭嶸山神文

詩

三十首

陳情上太尉詩

奉和座主尙書絕句三首

歸燕吟獻太尉詩

酬楊贍秀才送別詩

行次謝太尉衣段詩

畱別女道士詩

酬進士楊贍送別絕句

楚州張尙書謝相迎詩

酬吳巒秀才絕句二首

石峯詩

潮浪詩

沙汀詩

野燒詩

杜鵑詩

海鷗詩

山頂危石詩

石上矮松詩

紅葉樹詩

石上流泉詩

和友人除夜見寄詩

東風絕句

海邊春望絕句

春曉閒望絕句

海邊閒步詩

將歸海東嶠山春望詩

和金員外贈嶠山清上人絕句

題海門蘭若柳絕句

謝許歸覲啓

某啓早來員外郎君傳奉尊旨伏蒙恩慈念以某久別
庭闈許令歸覲者仰銜金諾虔佩玉音雖尋海島以榮
歸古今無比且望烟波而感泣去住難安伏緣某自年
十二離家今已二九載矣百生天幸獲托德門驟忝官
榮仍叨命服一身遭遇萬里光輝是以遠親稍慰於倚

門遊子倍榮於得路唯仰趙衰之冬日深暖旅懷豈唯
張翰之秋風遽牽歸思且緣辭鄉歲久泛海程遙佳傷
鳥鳥之情去懷犬馬之戀唯願暫謀東返迎待西來仰
托仁封永安卑跡今卽將期理缺但切戀軒下情無任
感戴兢灼涕泣之至謹奉啓陳謝云云

謝行裝錢狀

伏蒙仁慈特賜錢二百貫又令辦行裝者謹依處分捧
領訖伏以某學虧力行事過心期燕觜銜泥點汚常慙
於廣廈鼇頭朴嶽低徊暗避於連鉤每慎行藏深規躁

靜豈謂謙而受益或希屈以求伸今者果逢尊慈令將
遠命榮歸故國免挈空囊比陸生南說之橐裝倍多輝
煥異孔氏東還之輜重豈慮焚燒且彼虞卿白璧郭隗
黃金徒欲耀名終非濟事是若念其就養愍以食貧減
二十日之堂封濟數千里之家信累載莫申其勞苦一
朝頓贍於旨甘寧親而旣佩銀章倍榮衣錦戀德而但
垂珠淚願效賣綃下情無任感恩榮抃涕戀兢惕之至
云云

謝再送月料錢狀

某啓昨日軍資庫送到館驛巡官八月料錢伏緣某將

命遠方已奉公牒暫離候館卽指歸程旣蒙別賜行裝

豈令缺缺職俸缺難領受遂便送還不知庫司具狀申

上上伏奉缺缺者筆飛雲鳳顯示深恩緡耀天龍仰資

厚缺缺遂還家之望實驚潤屋之言遠地賤微雖有慙

於缺缺故鄉親識必致敬於金多通神則益驗魯褒執

癖則缺缺缺缺伏以尊卑禮隔辭讓無由謹依處分跪

領訖下情無任感恩戀德激切徘徊兢灼之至云云

謝賜弟棲遠錢狀

某啓某堂弟棲遠比將家信迎接東歸遂假新羅國八
淮海使錄事職名獲詣雄藩將歸故國昨者伏蒙仁恩
特賜錢三十貫者伏以崔棲遠遠涉煙波大遭風浪僅
存微命唯有空身雖志切鵲鴿竊慕在原之義而譽慙
騏驎難期得路之秋銜蘆而但喜聯行泛梗而免虞失
所今者某以榮奉使得遂寧親貨泉沾潤之名實稱子
母歸路光榮之事皆屬善人下情無任感恩欣躍兢惕
之至

上太尉別紙五首

某啓昨以鄉使金仁圭員外已臨去路尙闕歸舟懇求
同行仰候尊旨伏蒙恩造俯允卑誠今則其別淮城齊
登海艦雖慙李郭之譽免涉胡越之言路遠無虞不假
琴高之術巨川能濟唯懷傳說之恩下情無任感戀之
至云云

又

某啓伏奉手筆批誨一行人並喜將息穩風濤者俯顧
微流仰窺尊念望淮海則陟遐自邇指風波則視險如
夷遍灑溫言盡叨恩於挾纊缺敷至懇願無愧於賣綃

下情無任感激攀戀兢灼之至云云

又

伏奉尊誨藥袋子懸於船頭不畏風浪慎勿開之者仰
掛青囊遠踰碧海必使天吳息浪水伯迎風旣無他慮
於葭津可訪仙遊於蓬島唯願往來無滯忠孝克全萬
里安流永缺濟川之力百年苦節不欺臨谷之心下情
無任感戴兢灼之至

又

某舟船行李自到乳山旬日候風已及冬節海師進難

懇請駐畱某方忝榮身唯憂辱命乘風破浪旣輸宗慤
之言長楫短篙實涉惠施之說雖仰資恩煦不憚險艱
然正信驚波難踰巨壑今則已依曲浦暫下飛廬結茅
茨以庇身糝藜藿而充腹候過殘臘決撰行期若及春
日載陽必無終風且暴便當直帆得遂榮歸謹具別狀
咨申伏惟云云

又

某啓自叨指使唯欲奮飛必期不讓秋鷹便能截海豈
料翻成跛鼃尙類曳泥雖慎三思而行且乖一舉之雋

既勞淹久合具啓陳某嘗讀國語見海鳥爰居止於魯
東門之外展禽曰今茲海有災乎夫廣川之鳥獸常知
而避其災是歲也海多大風冬暖伏見今年自十月之
交至於周正月畧無聲發倍覺溫燠必恐嘗修濫祀幽
改成詩靜思漢祖之興歌大風可懼遙想田橫之竄跡
絕島難依遂於登舟近浦止泊籠鵠無矢藩羊自安唯
願時然後行必當利有攸往泛艤艘而不滯指渤海而
非遙冀申專對之能早遂再來之望伏惟云云

祭嶠山神文

維年年日新羅國入淮南使檢校倉部員外郎守翰林
郎賜緋銀魚袋金仁圭淮南入新羅兼送國信等使前
都統巡官承務郎殿中侍御史內供奉賜緋魚袋崔致
遠等謹以清酌生牢之奠敬缺懸于嶢山大王之靈竊
以昔辨方圓始分清濁融作江海結爲山嶽石戴土而
土戴石小者礫而大者砢然而罕有威神靜無稜角與
堆阜而相接見邱陵之可學惟靈磊磊落落高臨鯁壑
嶢嶢崑崙俯壓鯨潭上則爲雲霧縈纏之骨下則爲波
濤激射之窟朝則迎金烏而前出夜則送銀蟾而後沒

是以峻德能彰乎東夏西夷元功不假乎南條北忽則
彼織女之機倚河漢秦帝之橋架溟渤徒銜其名莫勞
我形每謂蘊藏其片玉豈唯廁列於雙瓊遂使往來者
虔度英靈祈禱者盡寫精誠旣蘋蘩之可薦信黍稷之
非馨今者仁圭等久銜遠命致遠也始奉殷聘喜歸舟
之旣同佇遊轡之能竝不患胡越之意殊寧慙李郭之
名盛去歲初冬及東牟東屬以滄流尙遠元律將窮浪
形勾鋤而鷁難浮艦風響鸕鷀而鵠恐辭籠遂艤剡木
聊安斷蓬一昨雖迎端月猶懼俊風延頸而待逢候燕

同眸而送盡歸鴻方期利涉龜從筮叶直指雞林輕浮
芥葉豈輸馳馬之號願較秋鷹之捷遠詣靈峯難尋壽
官但覩其青蓮倒蘸於巨浸碧螺高挂於晴空仰威靈
之聳塵外想影響之飄雲中於是潔饋饌擇肥醲酒醴
斯醺牲牷粗豐謹賚薄禮敢覲陰功伏惟大王潛施呼
噏密降指蹤使波神拱手川后斂容楚師之南風且競
鄭伯之東道豁通照水鏡之心旣分妍醜擘土囊之口
無雜雌雄則可朝穿汗漫暮截鴻濛去採石華必同謝
運行吟肉脯免效張融加以某臨川自審登木增慙憶

昔雪作夜光冰爲夕飲幾年獨勵於鼓篋今日方期於
扇枕將問荊州之絹忝披會稽之錦見寵若驚心如捧
盈雖智有不逮而時然後行况賁御筆慮滯王程今則
裹裝旣飾儼有行色翫淑景以歌吟汎安流於瞬息唯
托大王之風早歸君子之國俾傳帝命無曠神職尙饗

陳情上太尉詩

海內誰憐海外人問津何處是通津本求食祿非求利
只爲榮親不爲身客路離愁江上雨故園歸夢日邊春
濟川幸遇恩波廣願濯凡纓十載塵

奉和座主尚書避難過維揚寵示絕句三首

年年荆棘侵儒苑處處煙塵滿戰場
豈料今朝覲宣父豁開凡眼睹文章

亂時無事不悲傷鸞鳳高飛出帝鄉
應念浴沂諸弟子每逢春色耿離腸

濟川終望拯湮沈喜捧清詞浣俗襟
唯恨吟歸滄海去泣珠何計報恩深

歸燕吟獻太守

秋去春來能守信暖風涼雨飽相諳
再依大廈須知許

久污雕梁却自慙深避鷹鷂投海島羨他鴛鴦戲江潭
只將名品齊黃雀獨讓銜環意未甘

酬楊贍秀才送別

海槎雖定隔年迴衣錦還鄉愧不才暫別蕪城富葉落
遠尋蓬島趁花開谷鶯遙想高飛去

時楊生有
隨行之計

遼豕寧

慙再獻來好把壯心謀後會廣陵風月待銜杯

行次山陽續家太尉寄賜衣段令充歸覲續壽信

物謹以詩謝

自古雖誇晝錦行長卿翁子占虛名既傳國信兼家信

不獨家榮亦國榮萬里始成歸去計一心先算卻來程
望中遙想深恩處三朶仙山月畔橫

畱別女道士

每恨塵中厄宦塗數年深喜識麻姑臨行爲與真心說
海水何時得盡枯

酬進士楊贍送別

海山遙望曉烟濃百幅帆張萬里風悲莫悲兮兒女事
不須怊悵別離中

楚州張尙書水郭相迎因以詩謝

楚天蕭瑟碧雲秋
旆隼高飛訪葉舟
萬里乘槎從此去
預愁魂斷謝公樓

酬吳巒秀才惜別二絕句

榮祿危時未及親
莫嗟歧路蹙勞身
今朝遠別無他語
一片心須不愧人

殘日塞鴻高的的
暮煙汀樹遠依依
此時回首情何恨
天際孤帆宰浪飛

石峯

中和甲辰季冬十月奉使東泛泊舟於大珠山下凡所入目命爲篇名嘯月吟風貯成十

首寄高

員外

嶢嶢絕頂欲摩天海日初開一朵蓮勢削不容凡樹木
格高唯惹好雲煙點酥寒影粧新雪戛玉清音噴細泉
靜想蓬萊只如此應當月夜會羣仙

潮浪

驟雪翻霜千萬重往來望躡前蹤見君終日能懷信
慙我趨時盡放慵石壁戰聲飛霹靂雲峯倒影撼芙蓉
因思宗慤長風語壯氣橫生憶臥龍

沙汀

遠看還似雪花飛弱質由來不自持聚散只憑潮浪簸

高低况被海風吹煙籠靜練人行絕日射凝霜鶴步遲
別恨滿懷吟到夜那堪又值月圓時

野燒

望中旌旆忽繽紛疑是橫行出塞軍猛焰燎空欺落日
狂煙遮野截歸雲莫嫌牛馬皆妨牧須喜狐狸盡喪羣
只恐風驅上山去虛教玉石一時焚

杜鵑

石罅根危葉易乾風霜偏覺見摧殘已饒野菊誇秋豔
應羨巖松保歲寒可惜含芳臨碧海誰能移植到朱欄

與凡草木還殊品只恐樵夫一例看

海鷗

慢隨花浪飄飄然輕擺毛衣真水仙出沒自由塵外境
往來缺缺洞中天稻梁滋味好不識風月性靈深可憐
想得漆園蝴蝶夢只應如我對君眠

山頂危石

萬古天成勝琢磨高高頂上立青螺永無飛潛侵凌得
唯有閒雲撥觸多峻影每先迎海日危形長恐墜潮波
縱饒蘊玉誰回顧舉世謀身笑下和

石上矮松

不林終得老煙霞澗底何如在海涯日引暮陰齊島樹
風敲夜子落潮沙自能盤石根長固豈恨凌雲路尙賒
莫訝低顏無所愧棟樑堪入晏嬰家

紅葉樹

白雲巖畔立仙姝一簇煙蘿倚畫圖麗色也知於世有
閒情長得似君無宿粧含露疑垂泣醉態迎風欲待扶
吟對寒林却惆悵山中猶自辨榮枯

石上流泉

琴曲雖誇妙手彈，遠輸雲底響珊珊。
靜無纖垢侵金鏡，時有輕颺觸玉盤。
嗚咽張良言未用，潺湲孫楚枕應寒。
尋思堪惜清冷色，流入滄溟便一般。

和友人除夜見寄

與君相見且歌吟，莫恨流年挫壯心。
幸得東風已迎路，好花時節到雞林。

東風

知爾新從海上來，曉窗吟坐思難裁。
堪憐時復撼書幌，似報故園花欲開。

海邊春望

鷗鷺分飛高復低
遠汀幽草欲萋萋
此時千里萬里意
目極暮雲翻自迷

春曉閒望

山面嬾雲風惱散
岸頭頑雪日欺銷
獨吟光景情何限
猶賴沙鷗伴寂寥

海邊閒步

潮波靜退步登沙
落日山頭簇暮霞
春色不應長惱我
看看卽醉故園花

將歸海東巉山春望

目極煙波浩渺間
曉鳥飛處認鄉關
旅愁從此休凋鬢
行色偏能助破顏
浪蹙沙頭花撲岸
雲粧石頂葉籠山
寄言來往鴟夷子
誰把千金解買閒

和金員外贈巉山清上人

海畔雲菴倚碧螺
遠離塵土稱僧家
勸君休問芭蕉喻
看取春風撼浪花


題海門蘭若柳


廣陵城畔別蛾眉
豈料相逢在海涯
只恐觀音菩薩惜

臨行不敢折纖枝


桂苑筆耕集卷二十

南海譚瑩校









道光己酉鑄

敬齋古今註

海山仙館叢書

無山翁書

齋古今譜

道溪子西齋

PL
2457
1P29
u35
四庫全書題要

臣等謹案敬齋古今註元李治撰治字仁卿自號敬齋真定欒城人金末登進士第辟知鈞州金亡後家于元氏世祖屢加禮聘最後以學士召就職朞月以老病辭去事蹟詳見元史本傳此書原目凡四十卷其以註名者案漢書東方朔傳註續充耳所以塞聰師古注謂示不外聽治蓋專精覃思穿穴今古以成是書故有取于不外聽之義元史本傳邵經邦宏簡錄黃虞稷千頃堂書目俱作古

今難當因字形相近傳寫致訛文淵閣書目題作
宋人則又其攷核之不審也治此書專爲攷訂而
作取載籍疑義一一詳辨其間偶疎者如以目擊
道存解孟子不下帶比擬頗爲失倫又論匈奴傳
單于乘騾遁逃淳化帖漢章帝書尙沿舊說又論
小雅每懷靡及一條禮記鄭注溫藉一條皆參雜
韻語成章亦不免涉文人狡獪之習然其記間淹
通于千古沿訛習謬之故實能夠深索隱而洞見
其所以然故其說經自漢唐諸儒傳疏以逮程朱

緒論皆折衷會通無所偏主其論史及子于司馬
遷班固范蔚宗司馬彪令狐德棻歐陽修等紀錄
之非楊倞李軌宋咸成元英王昶等注釋之誤無
不剖別是正其評詩文于訓詁之異同體製之正
變抉摘亦極爲精審在宋元說部中典核可比孫
奕王觀國博瞻可比洪邁王應麟其他實未有能
過之者也治著述最富今惟測圓海鏡尙有傳本
餘多亡佚此書散見于永樂大典中者雖不及什
之四五然菁華具在猶可藉以攷見崖略謹裒綴

排次依經史子集以類分輯各爲二卷編訂成帙
俾不致泯沒于讀書者旁參互證之功實不無裨
助云乾隆四十年二月恭校上

總纂官侍讀_臣紀昀

侍讀_臣陸錫熊

纂修官庶吉士_臣平恕

敬齋古今註目錄

卷一

經類三十三條

卷二

經類三十四條

卷三

史類四十六條

卷四

史類三十九條

卷五

子類三十三條

卷六

子類二十一條

卷七

集類四十二條

卷八

集類四十五條

敬齋古今艱卷一

元 李 冶 撰

卦有六爻初二三四五上也卦有六德剛柔仁義陽陰也自下而上以之相配則初爻剛二爻柔三爻仁四爻義五爻陽六爻陰也只以乾一卦推之便盡此理

天體正圓如彈丸地體未必正方令地正方則天之四遊之處定相窒礙竊謂地體大率雖方而其實周匝亦當圓渾如天但差小耳又地體凝然不動顯著直方之德亦得謂之方也故乾卦不言天圓而說卦則云爲天

爲園說卦不言地方而坤卦則云直方大

坎卦象辭水流而不盈第五爻辭坎不盈王輔嗣以前
爲險陷之極以後爲險難未盡雖彖爻各爲之說而中
間自有條貫不可亂也知此水流而不盈專指九二言
之

歐陽公不信周易繫辭而于序卦則未嘗置論豈于十
翼舉皆不信略摘其一二而言之歟將各有其說或間
有可否于其中也夫六十四卦固有伏見翻置者亦有
彼此對待者必以爲聖人一一而次第之則殆有牽強

之累必以爲後人所述特託孔子之名以取信于世則是輕以誣聖牘也與其誣之毋寧信之此蓋孔子見古之易書其諸卦前後相聯悉已如是因而次第之以爲目錄云耳初非大易之極致也或者欲以此爲義文之深旨則謬矣

郭兼山先生說乾之策二百一十有六六之則三十六又四之則九也坤之策百四十有四六之則二十四又四之則六也故曰九六乾坤之策此其言六者卦別六爻也所得則每爻之正策也言四者策以四揲也所得

則老陽老陰之正數也義固然矣然兼山先言大數而次言六之四之者皆非也正當云乾之策二百一十有六如卦別六爻而一則得三十六又以四揲而一則得九是謂老陽坤之策百四十有四如卦別六爻而一則得二十四又以四揲而一則得六是謂老陰如此則爲相應耳蓋算術凡言幾之者皆爲相乘非相除也陰陽相配之物而老少又必相當乾之策二百一十有六老陽也坤之策百四十有四老陰也老陰老陽相得爲三百六十則周蓍之日也乾之策一百六十有八少

陽也坤之策一百九十有二少陰也少陰少陽相得爲三百六十亦周蓍之日也借使老陰少陰爲耦則得四百有八課于周蓍之日爲多四十有八使少陽老陰爲耦則得三百一十有二課于周蓍之日爲少四十有八多亦不能成歲功少亦不能成歲功蓋陰陽不相當也然其過與不及皆適均于四十八者陰陽老少之數皆相隔者二而乾坤每爻之策皆二十四二之二十四計得四十八也以是推之老陽多于老陰之策七十二則陰不及陽者二爻也少陽少于少陰之策二十四則是

陽反不及陰者一爻也陰不可太過陽不可不及故于乾坤之策不取少陽少陰而專取老陽老陰三百八十四爻不取七八而獨取九六也

王弼既注易又作畧例上下二篇唐四門博士邢璣爲之序有云臣舞象之年鼓篋鱣序按禮記內則云十有三年學樂誦詩舞勺成童舞象學射御鄭元云成童十五以上又云擊鼓警衆乃發篋出所治經業又後漢楊震傳鸛雀銜三鱣魚

案鸛雀原本作冠雀今據後漢書改正

飛集講堂前

鱣音善然則璣自謂年十五始入學也

唐邢璣注王弼周易略例其自序云孔止三絕未臻區
奧劉安九師尙迷宗旨以劉安而齒孔子邢子可謂不
知類矣

伊川易傳曰下愚而能革面何也曰心雖絕于善道其
畏威而寡罪則與人同也惟其有與人同所以知其非
性之罪也李子曰下愚畏威而寡罪爲與人同而知其
非性之罪則聖人之生知賢人之克己亦非性之功也
由是言之性無與于賢愚惟盡性者有能與不能耳
晦庵語錄論周易多說占得此爻爲君子之行則吉爲

小人之行則凶是有近于兒童之說易三百八十四爻何者不然繫辭所謂吉凶者貞勝者也又云懼以終始其要无咎豈有爲小人之行而獲吉者耶晦庵議論必不出此此等直傳聞之誤

孔安國尙書序曰伏羲神農黃帝之書謂之三墳少昊顓頊高辛唐虞之書謂之五典是以三墳當三皇五典當五帝也然攷之司馬遷史記則云嫫力追反祖爲黃帝

正妃生二子其後皆有天下其一曰元囂是爲青陽青陽降居江水其二曰昌意降居若水昌意生高陽是爲

帝顓頊也顓頊崩而元囂之孫高辛立是爲帝嚳嚳父
曰蟠極蟠極父曰元囂元囂父曰黃帝自元囂至蟠極
皆不得在位至高辛卽帝位高辛子顓頊爲族子娶陳
鋒氏女生放勳娶嫫嫫氏女生摯帝嚳崩而摯代立摯
立不善崩而弟放勳立是爲帝堯又曰顓頊生窮蟬窮
蟬生敬康敬康生句望句望生橋牛橋牛生瞽叟瞽叟
生舜自窮蟬以至帝舜皆微爲庶人司馬遷所記止此
而所謂少昊者絕不稱道甚可疑也按帝繫本紀家語
五帝德皆云少昊卽黃帝子青陽是也又春秋左氏傳

文公十
八年

少昊有不才子天下之亂是也奇杜預注云
少昊金天氏之號次黃帝然則黃帝崩後少昊卽位爲
得其實故孔安國以黃帝爲三皇之末以少昊爲五帝
之首而次及高陽高辛氏也今司馬遷乃云黃帝崩葬
橋山其孫昌意之子高陽立是爲帝顓頊顓頊崩帝嚳
立帝嚳崩帝摯立帝摯崩而帝堯立帝堯崩而帝舜立
是黃帝歿後殊無名少昊者也則諸書何爲備數以爲
五帝乎蓋玄囂卽少昊氏而司馬遷謬誤不載錄耳司
馬遷又謂玄囂是爲青陽降居江水此又妄也當是昌

意先降江水後降若水司馬遷旣不以玄囂爲少昊謬
謂青陽降江水昌意降若水也皇甫謐云黃帝在位百
年而崩而通鑑舉要厯云黃帝在位六十五年謐又云
顓頊在位七十八年舉要厯云顓頊在位一十八年豈
少昊在位之年或在黃帝六十五年之後或在顓頊一
十八年之前也耶

西伯戡黎奔告于受孔安國傳云受紂也音相亂然黎
則今之黎城史記作者何也豈亦以音相亂乎皆不可
必也

五福六極皆指人事言之晉五行志說凶短折則謂人
殤曰凶禽獸曰短草木曰折推原箕子之意寧復有此
若福極之事兼飛走草木而言之則夫五福之中若富
與攸好德六極之中若憂與貧豈飛走草木亦有是耶
嚶嚶草蟲趨趨阜螽注云興也嚶嚶聲也草蟲常羊也
趨趨躍也阜螽蟻也箋云草蟲鳴阜螽躍而從之異種
同類猶男女嘉時以禮相求呼疏曰以興以禮求女者
大夫隨從君子者其妻也正義曰釋蟲云草蟲負蟻郭
璞曰常羊也陸璣云小大長短如蝗也奇音青色好在

茅草中釋蟲又云阜螽螬李巡曰蝗子也陸璣云今人

謂蝗子爲螽子兗州人謂之螽許慎云蝗螽也蔡邕云

螽蝗也明一物

案以興以禮求女者云云是經文下孔疏釋蟲云草蟲負螬至此是毛傳下孔

疏李治引之既稱疏曰又稱正義若兩人之說失于不檢李子曰草蟲正言草中蟲

耳阜螽卽蝗類草蟲啁啁而鳴阜螽躍而從之蓋以類

相求也說者旣以草蟲爲螽又以螽爲蝗又雜以常羊

負螬螬螽蝗子之屬卒無定名師說相承五經大抵如

此學者止可以意求之膠者不卓不膠則卓矣又中華

古今注曰結草蟲一名結葦好于草末折屈草葉以爲

巢窟處處有之

詩曰人涉卬否卬須我友書曰予恐來世以台爲口實
孟子曰我善養吾浩然之氣予台卬我吾五者一也而
于一二句之內言之各異者或指我身或指我心心身
從異輕重之辭

氓之蚩蚩毛以蚩蚩爲敦厚之貌此殊害義且此篇序
云宣公之時禮義消亡淫風大行男女無別遂相奔誘
華落色衰復相棄背攷其詩則氓之蚩蚩抱布貿絲匪
來貿絲來卽我謀及女也不爽士貳其行士也罔極二

三其德此皆指言奔誘棄背之事也夫其人也又豈有敦厚者哉若曰氓之始來也許爲是敦厚之貌而實相誑誘意或可通然按字書蚩蚩名亦輕侮也則蚩蚩者乃薄賤媮淫之態非敦樸謹厚之容也是故事之可鄙者曰嗤貌之至陋者曰媮又古無道之君有蚩尤者蓋以其蚩蚩之尤者而名之如渾敦窮奇檮杌饕餮之比毛氏乃以蚩蚩爲敦厚則真臆說耳不足據也

國風方秉蘭兮贈之以芍藥貽我握椒之類皆以爲外藉芳香可翫之物持贈所懷旣以盡其交結往來之懽

且以表其深相愛慕之情也

屋甚渠庭甚除拱兩手而閒居何樂如之顧無所事于閒乃伐屋而瀦之犁庭而茨之拍拍焉徹筋骨而胠手足我旣無廬人且無以途是人也是果何爲者也詩皇皇者華云每懷靡及每懷靡及止言常恐不及耳而毛以爲雖懷中和猶自以爲無所及鄭以爲每人懷私則于事無所及句之二先生者豈非無所事于閒而瀦屋茨庭者乎鄭雖引春秋外傳以爲說吾以爲外傳亦各自爲說耳

古者登車有和鑾之音謂馬動則鑾鳴車動則和應也
鑾或作鸞其義皆同鸞以其有聲鑾以其金爲之也杜
預左傳注云鸞在鑾和在衡而毛氏詩傳云在軾曰和
在鑾曰鸞軾乃車內所憑之物和在于軾車動未必能
鳴衡軛之間與馬相比動則有聲此當以杜說爲正

角弓無教猱升木如塗塗附君子有微猷小人與屬猱
之性善登教之登木則登必高塗之性善附以之附物
則附必固以喻小人之性善讒佞而幽王好之則讒佞
必愈甚故詩人曉之曰王其勿教猱猱之升木也若教

之升木是猶以塗塗物豈有不附著者乎言小人不可
昵近惟當信任君子耳今王不知其然于其九族之中
號爲君子有微美之道者可親而不親乃于讒諂邪佞
之小人與之連屬也鄭氏箋以爲人心皆有仁義教之
則進又謂君子得聲譽小人樂與連屬實所未喻

白華篇嘯歌傷懷念彼碩人實勞我心正指申后爲碩
人如碩人其頤衣錦絢衣皆指美者而言理明白而辭
婉順無一毫可疑而說者乃以爲褒姒一何所見之偏
耶

詩大明會朝清明毛云會甲也疏謂會值甲子之朝不終此一朝而伐殺虐紂天下乃大清明無復濁亂之政毛云會甲者非訓會爲甲以會朝爲會甲也以會朝爲會甲者謂共會于甲子之朝也泰誓曰惟十有三年春大會于孟津又曰羣后以師畢會皆會集之明文也會朝清明言所會甲子之朝不待前徒倒戈已剪殷殺紂天下翕然變濁亂而爲清明也疏謂甲子之朝則誠是而云會值則與毛傳悖矣

生民或簸或蹂毛云或簸糠者或蹂黍者箋云蹂之言

潤也春而杵出之簸之又潤濕之將復春之趨于鑿也
疏孫毓云詩之敘事率以其次旣簸糠矣而傳以蹂爲
蹂黍當先蹂乃得春不得先春而後蹂也旣蹂卽釋之
烝之是其次也箋義爲長李子曰孫毓之言非也蹂者
按抄之也今之春者旣已簸去其糠矣必須重爲蹂按
然後復投臼中而春之先蹂後簸自爲次第然今蹂字
次簸而言則是未簸以前將春之際蹂雖不舉其蹂自
明又旣簸且蹂必將復春再蹂春足以見趨鑿之意矣
孫取鄭說爲長則必以蹂爲潤濕當之以蹂爲潤匪治

攸聞

案鄭箋以蹂爲潤濕取柔字爲義孔疏以蹂爲蹂踐以本字爲義此以蹂爲按抄則蹂當改蹂矣于

義未當朱子集傳謂蹂禾取穀以繼之訓解既明于詩之敘事亦不失其次附識于此

卷阿篇似先公酋矣鄭云嗣先君之功而終成之說者曰成王之所繼嗣者先王也而云先公公是君之別名說者之言非也士事也公功也先達例有此解蓋先公卽是先王之功

釋文云錢鈹古田器世本云垂作鈹宋仲子注云鈹刈也然則鈹刈物之器也

長發受小球大球爲下國綴旒荷天之休傳云球玉綴

表旒章箋云小玉尺二寸圭也大玉珽也執圭搢珽以
與諸侯會同結定其心如旌旗之旒繆焉擔負天之美
譽爲衆所歸鄉疏云毛以爲湯受二玉以作天子爲下
國諸侯之表章鄭以爲湯受二玉與諸侯會同而諸侯
心繫天子如旌旗之旒綴著于繆釋文繆所銜切絳帛
韻書史炎切旗幅爲繆

古詩三百五篇皆可聲之琴瑟口詠其辭而以琴瑟和
之所謂絃歌也古人讀詩者皆然使今學者能彷彿于
古人則人心近正庶幾詩樂之猶可復也

莊公十一年宋大水公使弔焉曰天作淫雨害于粢盛
若之何不弔言若之何不弔所以致不敢不弔之意耳
以文勢觀之其旨自見杜注不弔乃云不爲天所愍弔
誤矣襄十四年衛獻公出奔齊公使厚成叔弔于衛曰
寡君使瘠聞君不撫社稷而越在他境若之何不弔曰
以同盟之故使瘠敢私于下執事有君不弔有臣不敏
君不赦宥臣亦不帥職增淫發洩其若之何厚成叔所
謂若之何不弔與弔宋之語其意一也杜于衛獻公無
所釋而于宋則遽謂不爲天所愍弔者豈以爲莊公之

傳已有此解而襄公之傳不煩複說歟以爲衛獻播越
乃其自取而宋之大水天實爲之故獨謂宋公不爲天
所弔歟求之二說俱不可得而通也跡夫弔宋之語至
于若之何一句則止容有天不愍弔之義而厚成叔旣
云若之何不弔而其下方致弔辭則不弔之語必不主
于天也且客弔主人必先指彼事次道己愆以相慰諭
然後弔禮成焉謂天作淫雨害于粢盛指彼事也謂若
之何不弔道己愆也今俱以爲指彼事無乃闕乎哉若
曰淫雨由天降災上天所當愍悼若之何天不弔宋播

越由人失德上天不當垂卹若之何魯不弔衛宜事異而辭同此又兒童之見也夫天降災害所以警人君也播越固由于失德而天作淫雨安知其不由于宋君之失德乎論事初不當如此但因天作淫雨輒以不弔主天徵之事則有窒審之文則不完故爲辨之左傳僖公六年許僖公見楚子面縛銜璧大夫衰絰士輿櫬楚子問諸逢伯逢伯對曰昔武王克殷微子啟如是武王親釋其縛受其璧而被之焚其櫬禮而命之使復其所又史記宋世家云武王克殷微子啟乃持其祭

器造于軍門肉袒面縛左牽羊右把茅膝行而前武王
乃釋微子復其位如故而孔穎達疏尙書于微子之命
不信史記以爲遷之書辭多錯謬面縛縛手于後故口
銜其璧又安得左牽羊右把茅也余以爲穎達之言未
必是遷之言未必非蓋大夫衰經非著衰經必齋持之
也許公使大夫齋衰經士輿櫬微子所以如是則齋而
輿之者必其從者也宋世家又謂持祭器造于軍門所
謂祭器者雖不必備計不一而足亦當令從者持之喪
服櫬柩簠簋之類皆屬諸從者則左牽羊右把茅亦從

者之事決非微子兩手牽把之穎達以手縛不能爲用
爲司馬遷之失此非遷之失乃孔氏之失也然史記與
左傳所載不同者蓋其所採錄有或詳或畧云耳

左傳鄭子家與晉趙宣子書曰鋌而走險急何能擇杜
注鋌急走貌孔疏云鋌文連故爲疾走貌冶曰鋌之爲
文安得爲疾走之貌乎孔說以連文言之曲矣鋌挺古
字通用挺挺勁捷也勁捷卽疾走之貌

昧爽丕顯後世猶怠解者以爲昧旦未明之時已大明
其德此說恐非蓋古先明主憂勞政治當其昧爽之時

曰茲已大明矣祖宗勤勞如此而子孫猶復怠惰今說
乃云未明之時能大明其德豈大明其德又有時乎
春秋左傳鄭人畏其又遷也承或以承爲語佐非也古
字通用蓋承卽懲也懲義雖近于畏然所畏者在後而
所懲者在前故兩言之讀者當以承一字爲句

國語楚觀射父爲昭王言祭祀云祀加于舉且曰百姓
千品萬官億醜兆民經入畎數以奉之又鄭史伯爲桓
公說和實生物同則不繼云合十數以訓百體出千品
具萬方計億事材兆物收經入行姦極韋昭注云計算

也材裁也賈唐說皆以萬萬爲億鄭後司農云十萬曰億十億曰兆從古數也經常也姦備也數極于姦萬萬兆曰姦自十等至千品萬方轉相生故有億事兆物王收其常入舉九姦之數也李子曰以定名論數宜從古率以攷數論數宜從今率蓋億萬之數今率必盈萬萬而古率祇以十之而已十之者一進位也是其循前後之名則順而其爲數則局促而易窮謂盈萬萬者所進之位又有二等一則萬之後億之前四進位而一改名一則凡億之後須八進位而一改名是其于前後之名

或若參差不齊而其爲數則廣大而爲用則不可以遽窮焉蓋數有通率有進率退率不可一槩論也自一二三四而至十此數之通率也自一十百千而至于萬此數之進率也自分釐毫絲而至于忽此數之退率也其進數無窮而退數亦無窮今且以進數言之自一至十爲通率固不必論自十至百自千至萬之類爲十進亦可爲一進亦可夫一與十不曰始終之極歟不曰相懸之甚歟然得爲一進而又得以爲十進者爲有進率而又有通率也然通率猶子而進率則猶父焉父統子業

故取一進位而不取夫十進位也自十至百猶不拘于通率而況自萬以上乎故自萬以前每進改名自萬以後雖用進率而其名或改或不改是以有古今之別也自萬至億一進而改名者古率也四進而改名者今率也自億至兆以上又與此不同矣自億以上依古率則一進而改名依今率則至八進位然後得改名也故今之算數自一至億凡八進位自億至兆亦八進位等而上之至于京垓秭壤溝澗正載皆若是而已矣韋昭注前已著賈唐之說後雖復引鄭司農古數之語而卒言

萬萬兆曰玆則昭之意實用賈唐說耳史伯論數云十
百千萬億兆經玆觀射父論數云百千萬億兆經咳玆
咳古字通用今作玆亦作咳皆同經亦數也今算術大
數曰億兆經玆邵堯夫皇極數于億兆之後卽繼之爲
京求之音義經正爲京耳而韋昭注云經常也經固訓
常而非史伯觀射父之意也詳國語本旨自十百而上
皆進一位以命數昭不及此而遺經誤解已爲背戾乃
復云萬萬兆曰玆則是于古今之數兩俱不得其說也
爲韋注者奚自而宜宜云萬萬兆曰經萬萬經曰玆則

得其正矣

公穀謂春秋日之者皆有事竊未敢必春秋雖經其實
史耳史固有應日而不得不日者有不應日而自不須
日之者亦有二事而俱在一日者有事大而非日所能
攝之者固不可一槩論之況年世寢遠簡編蠹壞不無
脫逸重複又安可盡以日與不日執爲春秋大旨乎

敬齋古今鞋卷一

終

敬齋古今艸卷二

元 李 治 撰

月令日在營室疏周天三百六十五度四分度之一辰
有三十度總三百六十度餘有五度四分度之一度別
爲九十六分總五度有四百八十分又四分度之一爲
二十四分并之爲五百四十二辰分之辰各得四十
二分案各得上今注
疏本無辰字則是每辰有三十度九十六分度
之四十二計之日月實行一會惟二十九分過半若通
均一歲會數則每會有三十度九十六分度之四十二

李子曰度不別爲一百分而別爲九十六者取分下之全數耳若以一度爲一百分則五度四分度之一通分內得五百二十五卻以十二辰分之則辰各得四十三分七釐五毫亦爲四十三分四分之三也歷法雖有小分小秒然此四分度之一本以零數難計故分割之時欲得全分今于分下又帶零數則無再分必欲再分則其數轉煩所以度別爲九十六分而于除之時每辰之下各得其全數也

禮記禮器云禮有禋詔樂有相步溫之至也溫止謂習

熟耳而鄭云皆爲溫藉重禮也。擯詔告道賓主者也。相步扶工者也。詔或爲紹。釋文溫紆運反。疏云皇氏云溫謂承藉凡玉以物溫裹承藉。君子亦以威儀擯相自爲承藉。案自爲今注疏本作以自又內則問所欲而敬進之柔色以溫之。溫止謂和洽耳。而鄭又云溫藉也。承尊者必和顏色。釋文溫於運反。疏云藉者所以承藉于物。言子承父母當和柔顏色承藉父母。若藻藉承玉然。鄭孔全以藉解溫。恐未盡善。蓋韞者櫝也。所以覆藏藉者薦也。所以承托韞藉乃涵養重厚不露圭角之意。故前史謂有局量。

不令人窺見淺深而風流閑雅者爲韞藉唐明皇陳樂
于勤政樓下垂簾觀之兵部侍郎盧綯謂上已起垂鞭
按轡橫過樓下絢風標清粹上目送之深歎其韞藉又
德宗好文雅韞藉而柳渾質直輕脫無威儀上不悅以
是罷相韞藉之說如此今乃以薦藉解韞藉于義何安
乎輕改音切理旣支離指溫爲藉益又可疑前人信之
不敢譏後人畏之不敢違其誰知千古之是非

內則馬黑瘠而般音班臂漏鄭注云漏當爲螻如螻蛄臭
也螻蛄之臭大抵爲土氣也居土者多以此爲名故以

蛙爲螻蛄蟻爲螻蛄

修身莫大乎事親事親莫大乎致養致養莫大乎養志
盡天地之精微竭水陸之多品而或不得其所欲者祇
以養口腹耳養之下也怡聲順色先意承志雖復菽水
之約而有以得其歡心是則養之至也孔孟言之詳矣
內則言事親則歷數饌醢酒醴棗栗飴蜜薑荳枌榆兔
薨滫瀡脂膏之屬及夫羹齊醬醢之目膳羞調和之宜
脫肉作魚膽桃攢柎之名麋苴豕軒辟雞宛脾之別其
事卑鄙煩猥大類世所傳食纂而辭費義贅則又若上

林子虛之誇甚非所以闡明禮經之旨也竊意漢儒雜

採周禮燕饗所用及當時飲食所尙適合曲禮王制拊

釀竹帛以射時取資耳

案拊釀原本作植攘不可解攷宋章衡編年運厯序云諸家淺

陋拊釀陳振孫因革禮跋云繁簡失中以

拊釀目之則拊攘當爲拊釀之訛今改正

禮少儀尊壺者面其鼻蓋推敬嚮仰之義卑者之于尊

者所當如是而今俚俗無問老幼無擇賓主悉以爲不

當然卑者輒爲尊者背之曰自有耳以來人以爲不當

然此甚可鄙也予每深求其故此亦有所自來尊壺者

面其鼻本以敬尊者然客有執謙者不敢擅居尊者之

禮因以爲之辭曰不敢當此盛意後生不悟轉相傳承
遂以面鼻爲不當焉

八音曰金石絲竹匏土革木若金石竹匏土革木七音
乃世間自有之物惟絲不然必蠶于桑者之手而後成
焉世本及桓譚許慎皆云神農作琴而蔡伯喈琴操云
伏羲作琴夫有琴則必有絃有絃則必有絲絲之爲用
當不專于絃索蓋以織縑帛製衣服而爲之主也易曰
黃帝堯舜垂衣裳而天下治說者曰軒轅以前衣皮其
制短小今衣絲麻布帛所作衣裳其制長大故云垂衣

裳也然則義農之世其無絲也審矣此時無絲又焉得
以爲絃索者乎吾謂蔡邕及世本諸家之說皆妄也絃
索之音必自夫黃帝時有之或者難予曰義農之世果
無絲則易胡云乎庖羲氏作結繩而爲網罟曰遼古悠
遠是之與非非我輩所能悉大槩曩之所爲繩非若今
之所爲繩也管蒯之類皆得爲之豈可以網罟而擬絃
索哉

子言之君子之道辟則坊與坊民之所不足者也鄭氏
曰民所不足謂仁義之道也鄭說恐非不足止是無厭

謂人欲無厭譬之大水奔放衝激必有以障之此坊記所由作也

中庸素隱行怪後世有述焉吾弗爲之矣鄭氏謂素讀

如攻城攻其所徭之徭

案讀如今注疏本作讀爲

徭猶鄉也言方鄉

辟害隱身而行俛譎以作後世名也班孟堅藝文志作索隱行怪顏師古注云求索隱暗之事石林先生以班鄭俱爲臆決云素當作素王之素謂無所爲而行怪也李子曰夫有所爲而行怪則固姦人也無所爲而行怪則直下愚耳安能使後世有述乎此素當同不素餐兮

之素孔子曰隱居求志未見其人舉逸民天下歸心又
曰作者七人說者以爲石門荷蕢之徒又曰逸民伯夷
叔齊虞仲夷逸朱張柳下惠少連則隱逸者初非孔子
之所擯也然而孔子之所與者非庸庸者也必也身有
其德而退藏于密始得謂之隱者也彼無一德之可取
而徒窮蹙于寒鄉凍谷之中是則素隱者耳素隱而行
怪僻之事庶乎後世之有傳焉宜吾夫子之弗爲也行
怪者不主于佞譎誕幻之屬凡怪僻崖異有不近于人
情者皆得以言之

中庸君子之道費而隱鄭云言可隱之節也費猶俛也

道不費則仕釋文云費本又作拂同扶佛反

案扶佛今注疏本作

弗猶俛也俛九委反鄭以費爲俛俛卽違拂之意謂世

道相違則君子隱而不仕過庭錄說費卽顯也讀如惠

而不費之費出而被乎外之名此所以爲闇然而日章

意謂雖隱而能顯云爾康成則全屬上文故獨明隱操

而改其字過庭則兩屬上下故推廣隱德而倒其語費

實費用今改讀拂音而訓之爲俛中庸本無此意義君

子之道費而隱不言隱而費又何以爲闇然而日章乎

二說俱不得其當晦庵謂費用之廣也隱體之微也以首下章而爲之說曰君子之道近自夫婦居室之間遠而至于聖人天地之所不能盡其大無外其小無內可謂費矣然其理之所以然則隱而莫之見也若晦庵之說是真得子思之旨者也易曰神无方而易无體

絜矩之道鄭云絜猶結也挈也矩法也君子有挈法之

道謂常執而行之

案常執今注疏本作當執

釋文絜音結其注中挈

也之挈苦結反晦庵則復援引莊子荀子之注云絜圍束也謂以物圍束爲之則也音戶結反李子曰鄭朱兩

說俱未爲得絜直當作挈字讀之矩者正方之具物有四隅吾挈矩以度之于此而得一隅則彼之三隅猶是也故曰所惡于上毋以使下所惡于下毋以事上所惡于前毋以先後所惡于後毋以從前所惡于右毋以交于左所惡于左毋以交于右此之謂絜矩之道也鄭說本甚明白而益以絜結矩法之說遂有蛇足之患晦庵乃引莊荀以絜爲圍束圍束其矩是何等語耶借曰以物圍束爲則而其則矩二字亦不可相屬借又曰絜爲則而矩爲法倒言之以爲法則而其法則之道亦不成

語也

王逸離騷章句本文雖復倒複較然迄不敢去取一語
鄭元注禮記刪竄改革惟意所如純于爲逸則似太拘
純于爲元則似不讓不讓則師也之過太拘則商也之
不及二子苟能抑所長而進所短則可以無憾矣

先行其言而後從之孔曰疾小人多言而行之不周疏
曰君子先行其言而後以行從之治曰孔注是邢疏非
此蓋謂先德行而後言語也先行斷句其言而後從之
者猶云而後其言從之邢乃謂先行其言而後以行從

之殊無義理

不有祝鮀之佞而有宋朝之美王滹南辨而有二字羨
文此說甚善然有此二字亦通蓋二有字皆繫上一不
字爲義鮀之佞巧言也朝之美令色也有無祝鮀之巧
言宋朝之令色在于今世必不能免蓋言時世濁亂莫
不惡君子而喜小人而邢昺云子魚有才故時世貴之
朝美人而善淫故時世疾之如是則苟有祝鮀之佞者
便可以爲子朝之淫矣因文攷事大害義理

子曰加我數年五十以學易可以無大過矣史記云孔

子晚而喜易序彖繫象說卦文言讀易韋編三絕曰假我數年若是我于易則彬彬矣或者以加假聲得相借或以五十作卒皆無然之說也大抵論語所載則是未繫易時語而司馬遷所記則作十翼時言之也言本不同乃欲強比而同之宜乎若是之紛紛也二說雖不同然而謙抑之詞則一焉耳夫聖人生知寧復有大過耶寧復有不至于彬彬者耶猶有是言者所以爲學者法也張籍書與韓退之曰吾子所論排釋老之說不若著書退之答曰化當時莫若口傳來世莫若書又懼吾力

之未至至之而不能也三十而立四十而不惑吾于聖人既過之猶懼不及矧今未至固有所不能耳請待五十然後爲之冀其少過也退之于二家攘斥之切曾不肯以暨舍而顧待五六十然後爲之其亦善學孔子者歟

子曰麻冕禮也今也純儉吾從衆孔穎達曰麻冕緇布冠也古者績麻三十升布以爲之純絲也絲易成故從儉按鄭注喪服云布八十縷爲升升三十計爲縷二千四百此布之極細者也古以此布爲冕故謂之麻冕當

孔子之時其冕務爲純質儉約而已所用之布不必如
古孔子尙純儉故違古而從衆也穎達以純爲絲不知
別有所出否

原壤夷俟謂其放蕩無禮也馬融說以夷俟爲踞待姑
見其無禮之狀爾至邢昺又以爲伸兩足箕踞以待孔
子故孔子以杖叩其脛令不踞此雖有理其實未必然
也

石林過庭錄經史辨疑云人而不爲周南召南其猶正
牆面而立也與牆所以扞外正牆面而立謂其背治內

之道反而面乎外也治曰此說非是牆面祇謂無所見耳又何限乎內外之間哉

孟子吾不惴焉者謂不使之恐懼我也古人爲文有此等語今詎能容爾耶

孟子且比化者無使土親膚于人心獨無較乎比固親比之比釋爲及亦通謂比及變化銷鑠晦庵解比爲爲竊所未喻

列子湯問帝命夸娥氏二子負二山一厝朔方一厝雍南自此冀之南漢之北無隴斷焉孟子公孫丑篇有賤

丈夫焉必求龍斷而登之趙云龍斷謂堦課斷而高者

丁云按龍與隆聲相近隆高也蓋古人之言耳如胥須之類是也張云斷如字或讀如斷割之斷非也陸云龍斷謂壘斷而高者詳審衆說張音陸解正與列子合今當從之斷則斷絕之處俯臨低下所以爲高也丁說雖通而于斷義稍疎

孟子兄戴蓋祿萬鍾戴蓋祇是乘軒

孟子云富歲子弟多賴賴者有所恃而爲善者之稱也漢高祖自言始大人常以臣亡賴張釋之傳言文帝謂

上林尉亡賴乃不善之稱然今人反以凶惡無所顧籍者詆其人爲賴子是又不知何說也五代史南平世家云荆南地狹兵弱介于吳楚爲小國自吳稱帝而南漢閩楚皆奉梁正朔歲時貢奉皆假道荆南高季興從誨父子常邀留其使掠取其物而諸道以書責誚或發兵加討卽復還之而無愧其後南漢與閩蜀皆稱帝從誨所嚮稱臣蓋利其賜予俚俗語謂苟得無愧恥者爲賴子猶言無賴也故諸國皆曰從誨爲高賴子卽歐公所論以無賴爲賴子者當是俚俗略言之耳非復本孟子

所謂多賴之賴也許慎又謂賴利也無利入于家故云
無賴此說予所不取

孟子曰萬物皆備于我矣反身而誠樂莫大焉又曰所
以動心忍性增益其所不能萬物皆備于我則焉知萬
物之中不有至惡者存乎動心忍性則焉知一性之內
不有不善者存乎此與性善之說殆若胡越焉者何也
蓋謂萬物皆有效善之質一心獨爲持性之主云耳不
深探孟子之旨而徒爲性善之說是誤父之而不知其
氏者雖終身學而吾以爲未嘗學也

孟子不下帶而道存焉趙臺卿以爲帶近于心意謂道
不離心心不離道云耳然而道之在人心也使孟氏而
雖不言其誰不知此乎禮凡視上于面則敖下于帶則
憂孟子雖獨舉不下帶而亦互明之蓋謂于其上下兩
間瞥而見之道已有所在矣此與孔子之見溫伯雪子
目擊而道存

案雪子原本作宣
子今據莊子改正

文則異而意則同彼所

謂目擊者不待言語而得之者也此所謂不下帶者不
待上下視而得之者也

左右二字從上聲則爲兩實從去聲則爲從己此甚易

辨者也今人皆混而爲一不惟不辨其聲音之當否至于禮數儀制亦復倒錯而世俗悠悠皆不恤也爲禮之家欲以左爲上則左之欲以右爲上則右之原其所以然亦從來遠矣

人文盡于六經今禮部韻略中俚俗字備載而六經中字遺闕者甚多此非有司之失自是我輩之過

晉郗超之郗則讀如絺音郗詵之郗則讀如綖音今人不復別白皆從綺逆反大謬也予兒時讀李翰蒙求先生傳授皆讀郗作卻長大來始悟其錯俗又讀郗作客

可笑

世俗有孤負之語孤謂無以酬對負謂有所虧欠而俚俗變孤爲辜辜自訓罪乃以同孤負之孤大無義理

一飛冲天志在冲天鸞鳳冲霄冲霄之舉冲本蟲音古今人悉用爲充音二字古必通用不然則前人旣誤後人不加省察狃而承之耳

如若一也然有時而爲異彼如是吾亦如是因之以如爲往如棠觀魚之類是也彼若是吾亦若是因之以若爲順欽若昊天之類是也是以讀書者貴反覆求之

決字俗皆作決蓋爲韻所誤此字正當作決而韻解決則謂水流行解決則謂決斷不知有何所據而別爲二義也易夬決也剛決柔也曲禮濡肉齒決乾肉不齒決決斷也乾肉堅宜用手不以齒決之古書中無有作決者顏元孫干祿字書分通正俗三等如決等字乃所謂俚俗相傳而非正者也學者不可不知

愆過尤皆甚之之辭事無美無惡甚之則皆爲過行無是無非甚之則皆爲尤尤與過皆甚之之辭也故老子去甚仲尼不爲已甚

爽之一字旣爲明又爲昏所以精爽爲魂魄之主介之一字旣爲大又爲小所以儉介成賓主之歡貴介公子則介爲大憂悔吝者存乎介則介爲小亂臣十人則亂爲治亂邦不居則亂爲危飲酒溫克則克爲良克伐怨欲則克爲狠擾兆民則擾爲安庸人擾之則擾爲煩必有忍其乃有濟則忍爲恕忍人殘忍則忍爲暴媚茲一人則媚爲忠取媚于上則媚爲佞父母昆弟則昆爲長垂裕後昆則昆爲後皇極則極爲大中至正之道六極則極爲貧病夭惡之稱

古人文字有極致之辭若以不敢爲敢以敢爲不敢以
不顯爲顯以無念爲念以無寧爲寧皆極致之辭也世
俗以可愛爲可憎以無賴爲賴以病差爲愈亦極致之
辭

敬齋古今藪卷三

元 李 冶 撰

后稷摯堯契四人同爲帝嚳高辛氏之子契則十三葉而得湯稷則十四葉而得文王然夏之世歷四五百年而商之世又歷五六百年計千餘年而文王始生若以代數較之文王之于湯但不及一葉耳是則殷之先一何天周之先一何壽乎此爲甚可疑者前志必有脫誤史記伊尹處士湯迎之五反然後往從湯以爲相李子曰君子之道或出或處然則必有道而不肯以輕出者

謂之處士可也中無所有而尸處士之名者索隱而行
怪者也故杜牧之送薛處士序云處士之名何哉潛山
隱市皆處士也其在山也非頑如木石也其在市也亦
非愚如市人也蓋有大智不得大用故羞恥不出寧與
市人木石爲伍也國有大智之人不能大用是國病也
故處士之名自負也謗國也非大君子其孰能當之論
人若牧之則可謂不失名實者矣而今也畫工鑷師人
人得而稱之人人得而與之彼其畫工鑷師果皆伊尹
之徒哉

史記載四凶事堯本紀云舜言于帝請流共工于幽陵以變北狄放驩兜于崇山以變南蠻遷三苗于三危以變西戎殛鯀于羽山以變東夷舜本紀則云流渾沌窮奇檮杌饕餮于四裔以禦魑魅全引左氏語或曰欲其事互見予以爲非是春秋左氏傳及國語皆丘明筆中間事同而語異者幾半蓋當纂集之時其文字重複不能具載或具于此而闕于彼或著于彼而没于此緝之爲春秋傳國語二書各自爲義所以一事二說爲互見也今史記一書而所載不同其意雖若互見然于文字

實爲冗複此在史筆最關利害不可不深察也倉公淳

于意傳

案倉公上原本有太字今據史記刪

詔召問所爲治病死生驗者

幾何人主名爲誰又問方伎所長及所能治病者有其

書無有皆安受學受學幾何歲而史記盡其所對史筆

不當如此正當云意所對凡數十條

案云意原本作意云今據史記改正

皆詣理可爲後人法則足矣自不必廣錄而備書之史

經之亞也煩猥則不足以傳久且事之有可簡者猶須

簡之況言乎其有文賦篇翰之富贍者亦當載其目而

畧其辭惟有切于天下國家之大利害者如董仲舒之

三策誼誼政事書過秦論之比文雖多亦不可以不盡
錄也屈原傳原勸楚懷王殺張儀其事纖悉備書然楚
世家載勸殺張儀者乃爲昭睢而屈原沒不復見若以
爲簡策繁多要使姓名互著則在左氏春秋傳有之在
遷史故無此例若以爲昭睢本主此事原特副之則屈
原傳畧無昭睢一言而原之事跡明白乃爾兩者皆無
所據何耶此蓋舊史去取失當司馬遷筆削時不暇前
後照顧隨其所載各自記之遂使世家與列傳異辭遷
又誤以燕簡公欲盡去諸大夫而立其寵人作寵姬又

以子我爲宰我載宰我與田常作亂以夷其族而李斯
上書二世云田常因取齊國殺宰子于庭是宜蘇子擣
遷之妄也史筆承疑一時誤錄容或有之然孔子弟子
傳與李斯傳所繫者大非若游俠貨殖之比自可審擇
而詳攷之而于一人之身旣以爲叛臣又以爲節士使
後人何所取信哉

奎十六星在西方天之武庫也一日天豕亦曰封豕主
以兵禁暴又主溝瀆其象與圖書文章等全不相干
家語本姓解云叔梁紇求婚于顏氏顏氏有三女其小

曰徵在顏父問三女二女莫對惟徵在曰從父所制己而生孔子孔子三歲而叔梁紇卒葬于防而史記孔子世家乃云叔梁紇與顏氏女野合而生孔子孔子聖人也紇則聖人之父也徵在則聖人之母也其始成婚家語載之如此其詳司馬遷輕以所聞誣之其罪大矣老子傳君子得時則駕不得其時則蓬累而行蓬累者謂逐隊而趨若蓬顆然隨風積聚而東西也一曰累平聲讀謂累累然累累亦積累之意說者或以爲戴笠而行亦何紕繆之甚

渭上翁公論史記子政說云邯鄲姬自匿有身至大期時生子政期音基大期者周歲十二月也太史公傳特著此者所以證諸侯之史之妄世傳之非李子曰大期之期止當如字讀不當音基期謂生產時限耳今音基而解作十二月甚與本文相戾渭上翁長于史學者也所著公論誠公不誣但此段可削去

史記載陶朱公中男殺人囚于楚長男往救之旣進金于莊生俄而聞赦以爲赦則弟固當出重千金虛棄復見莊生取之辭去莊生羞爲兒子所賣乃見楚王曰臣

前言某星事王言欲以修德報之今臣出道路皆言朱公之子殺人囚楚其家多持金賂王左右故有赦楚王大怒遂殺朱公子其長男持弟喪歸朱公笑曰吾固知必殺其弟也治謂此事不可信驗之史蓋朱公初欲使少男往長男以己家督不使慙欲自殺朱公不得已遣長男行且遺書所善莊生日至則千金聽其所爲莊生素以廉直聞于國自楚王以下皆師尊之乃以星變說王下赦令夫以陶朱公之智在父子間有性命之急審知少男可使長男固殺弟乃因長男奮激之故更無一

語以解譬之便爾捨棄中男是豈有父子之情哉此其不可信者也莊生以廉直名一國脫不廉直朱公必不與善國人必不師廉直如此而以孺子取金之故遽生褊心橫出詭辭以殺所善之兒則爲莊生者亦不仁矣且莊生誠愛人之金否乎誠婦勿動則誠不愛人之金也誠不欲殺人否乎勸王修德則誠欲救人之死也誠不愛金誠欲救人之死雖無所受書于朱公無所得金于長男猶將匍匐而前而今也有可以活人之術因金去己而致人于死又深負朱公所以附託之心是烏足

以語廉直哉此又不可以信者也有不可信者二而讀
史者皆信之以事奪理以辭奪事而已學者毋以事奪
理毋以辭奪事則其是非信否雖在百世之上當自有
以見之

廉頗三遺矢或謂所挾之箭三度遺之或謂矢陳也欲
有所陳三度遺忘或謂矢卽矢溺之矢一飯之中凡三
遺矢言在坐不能自禁其污穢狼藉三說皆謬廉頗智
將非鬪將也時方閒處兼同使者餐飯不應三遺箭也
臯陶矢厥謨矢雖訓陳要之史筆貴于辭達三遺陳已

不成語況以矢轉訓陳乎惟矢溺之說爲最近然非在
坐不能自禁也只是比及飯畢三次登溷耳誣其老而
氣弱臟腑虛滑云

父命子亦得謂公晁錯更令三十章諸侯誼譁錯父聞
之從潁川來謂錯曰上初卽位公爲政用事侵削諸侯
疏人骨肉口語多怨公何爲也

案口語漢書作口讓師
古注云讓責也此依史

記作口語
今仍原文錯曰固也不如此天子不尊宗廟不安父曰

劉氏安矣而晁氏危吾去公歸矣遂飲藥死曰吾不忍
見禍逮身後十餘日吳楚七國俱反以誅錯爲名錯時

爲御史大夫三公官也錯父謂錯爲公豈以子貴而呼之歟抑公亦而汝之類也

史記尉佗傳太史公曰甌駱相攻南越動搖漢兵臨境嬰齊入朝李子曰此誤也當云東閩興兵南越動搖按傳云初佗以兵威邊財物賂遺閩越西甌駱役屬焉又佗爲書謝漢曰南方卑濕蠻夷中間其東閩越千人衆號稱王其西甌駱裸國亦稱王又云建元四年佗卒其孫胡爲南越王此時閩越王郢興兵擊南越胡上書曰兩越俱爲藩臣毋得擅興兵相攻擊今閩越興兵侵臣

臣不敢興兵惟天子詔之于是天子多南越義守職約
爲興師遣兩將軍往討閩越兵未踰嶺閩越王弟餘善
殺郢以降于是罷兵天子使莊助往諭意南越王頓首
曰天子乃爲臣興兵討閩越死無以報德因遣太子嬰
齊入宿衛據此則其相攻者閩越與南越非甌駱也其
後呂嘉敗越桂林監居翁始諭甌駱屬漢跡甌駱始終
未嘗與諸國相攻擊何得云甌駱相攻也又閩越未攻
南越時嘗發兵圍東甌則是甌閩相攻亦不得爲甌駱
相攻也甌駱相攻乃在數年之前了無與于南越而嬰

齊何爲而入朝乎或曰南越也東甌也西甌也皆甌駱之屬故云甌駱相攻耳審如此說義亦未宏東閩乃大禹之後也南越乃趙佗之孫也各自割據何得併爲甌駱之屬乎或者又曰東閩南越皆甌駱之地二國雖殊亦可謂之甌駱相攻也此亦未爲通論借使壤地相接得以通稱而相攻之說亦無從發若東越先攻南越南越亦復報伐謂之相攻可矣今東越舉兵擅擊南越南越束手稟命天子謂之相攻不亦悖乎

尉佗傳犂旦皆降伏波徐廣曰呂靜曰犂結也音力奚

反結猶連及逮至也治曰犁開也取耕墾之意或以昏
明分色雜言之亦得今釋爲結意甚無謂徧討傳注初
無以犁訓結者又云結猶連及逮至則益又穿鑿矣漢
書作遲旦遲讀如緻待也犁旦或作黎明又或作遼明
遼則遲也書傳中又有詰朝質明之語詰朝猶問人曰
明未亦遲旦之意質明實明也又或爲交質之義

大宛傳黎軒條支在安息西數千里善眩後又云安息
國以黎軒善眩人獻于漢應劭曰眩相詐惑從應說則
眩字止當正讀然作幻音讀之亦通

史記貨殖傳富無經業則貨無常主能者輻輳不肖者
瓦解則字衍文

漢書注準音拙今韻中準字亦兩音果兩音俱通漢書
注自當並出而單發拙音是亦好異之蔽也譬如閉門
之閉本讀音算又方結切苟與人語專以閉門爲入聲
不惟他人不省亦未有不笑者矣字類此者甚多正可
隨俗呼之

前漢趙過始用牛耕石林援冉伯牛司馬牛皆名耕以
證過以前耕非用牛則名字何取以相配乎古蓋耕而

不犁後世變爲犁法耦用人犁用牛過特爲之增損其制非用牛自過始又云孔子言犁牛之子騂且角孔子時固已用犁李子曰石林說趙過以前已用牛耕誠是然方說冉伯牛司馬牛名字而復遽云犁牛之子云云何其說之不倫也犁自是雜文今呼貓犬之類毛色之雜者皆謂之鰲古字少凡音相近者皆得通用而石林以駁雜之犁同之耕犁之犁是真誤矣

漢元字前書一見後書三見前書則平帝元始五年詔曰宗室子自漢元至今十有餘萬人其令郡國各置宗

師以糾之致教訓焉後書則安帝時耿宋閻氏貴盛翟
酺上疏曰今外戚寵幸功均造化漢元以來未有等比
案等比原本作等此
今據後漢書改正

又桓帝時郭泰嘗舉有道不就同
郡宋冲素服其德以爲自漢元以來未見其匹常勸其
仕又靈帝時竇武白太后欲悉誅宦官太后曰漢元以
來故事世有宦官但當誅其有罪者豈可盡廢元始也
漢元以來謂漢始得天下以至于今也其後書三見畧
皆一時語其前書所見則予竊有少疑焉高祖卽位元
年乙未至元始五年乙丑總二百一十一年古今以三

十年爲世此纔七世耳而宗室子至十有餘萬人支庶
蕃衍一何如是之多耶豈天家子孫有異于凡人歟不
然何爲六七世之間而生息之夥至十有餘萬也物窮
則變數極則反新莽間起九服雲擾卯金之裔百不一
存蓋亦理勢之極焉耳

劉歆說三統厯術配合易與春秋此所謂言及于數吾
無取焉夫易載天地萬物之變以明著吉凶悔吝之象
春秋褒善貶惡代天子賞罰以垂法于後世至于章部
發斂之術則義和氏實掌之而歆乃一一相偶是亦好

異者矣且易有卦有爻其二篇之策當期之日猶得以
強論之夫所謂春秋者屬辭比事之書與數學了不相
干而亦胡爲妄取厯算一一而偶之哉班固不明此理
不敢削去千古而下又無爲辨之者深可恨也

周天十二次二十八宿有以兩宿爲一次者有以三宿
爲一次者或者謂四正之位其所據不得不大故占三
宿其餘各居一偏故止二焉此果有定論否前律厯志
云東方七十五度北方九十八度西方八十度南方一
百一十二度東方七宿至少較南方少三十七度又逐

宿較之觜宿不及井宿者三十二度雖其測望之時遠近疏密之不同上下旁側之有異亦不應相懸如是之甚也月令仲春之月日在奎昏弧中旦建星中按天文志弧星在輿鬼南建星在斗上

案輿鬼原本作與鬼今據晉書改正

今不取鬼斗而取弧建者孔穎達云弧星近井建星近斗以井斗度多其星體廣不可的指昏星之中故舉弧建定爲中也審如孔說則星有相近于正中者皆得與于四七之列也夫古先聖哲以天體本無可驗于是但視諸星運轉卽謂之天凡十二舍二十八宿三百六十五度

及九道之類率皆強名之故謂其術爲綴術所謂綴者
非實有物但以數強綴緝之使相聯絡可以求得其處
所而已故星之近乎赤道當乎正中取易見而可以指
名者而強名之曰此二十八宿也不如是無以考七緯
殷四時亦旣名之爲宿矣又從而分配四方爲鳥獸之
象焉此所以所占之度或以甚多而或以甚少也是則
天體可以強正天星可以強分其于二十八宿之內亦
可以減之而其外亦可以增之也設令今人有自我作
古者出分周天爲二十四宿方別居六定之爲九十度

有奇次別居二定之爲三十度有奇其誰曰不可若然則次舍乃更易分中星乃更易見弧建之類皆可以爲列宿而列宿之度數亦必不至于多寡之懸絕也然而聖人不爲是截然易曉之術而反立參糅難明之數何者蓋其妙達無方以神道設教奇耦錯綜中有深意于其測望之時畧取其易見者而強名之以詔後世耳

今古厯法所以參差不齊且不能以行遠者無他蓋由布算之時不論分秒之多寡悉翦棄之定位之時不察入宮之淺深遽強命之積微成著所以寢久而寢舛耳

前軌既差後車復繼而曾不之悟也乃更過求小巧以取捷七政何由而齊乎

漢書刑法志中刑用刀鋸其次用鑕鑿韋昭曰鑕牘刑也鑿黥刑也師古曰鑕鑕去其牘骨也鑕音子端反予謂鑕鑿二物皆施之于牘也韋以鑿爲黥刑誤矣黥復何事于鑿又顏讀鑕爲平聲亦誤志所陳刀鋸鑕鑿等莫非指器物而言鑕作平聲讀則非器也乃用器耳鑕去聲讀之爲是

溝洫志元光中河決瓠子後二十餘歲上自臨決河令

羣臣從官自將軍以下負薪填之是時東郡燒草以故薪柴少而下淇園之竹以爲撻晉灼曰淇園衛之苑也如淳曰樹竹塞水決之口稍稍布插按樹之水稍弱補令密謂之撻以草塞其裏乃以土填之有石以石爲之師古曰撻音其偃反志又云上旣臨河決悼功之不成乃作歌其末曰隤林竹兮撻石菑宣防塞兮萬福來師古曰隤林竹者卽上所說下淇園之竹以爲撻也石菑者謂石立之然後以土就填塞也菑亦雷耳音側其反義與插同又史記河渠書云頽林竹兮撻石菑如淳

曰河決榼不能禁故言菑韋昭曰榼柱也木立死曰菑
冶曰榼誠如如淳之注如復云有石以石爲之謂以石
爲榼也榼字前漢作榼史記作榼古字通用無所不可
然作榼者爲優按韻書榼闕鍵同音乃關閉之義今填
塞河決以竹爲榼正與此意相應故韋昭以榼爲柱也
菑有三說師古以爲菑韋昭以爲木立死如淳雖無說
而謂河決榼不能禁故言菑是作災字讀也如說亦長
顏韋俱短歌所謂林竹者卽上竹榼也所謂隕者卽竹
榼爲水所摧倒竹榼旣倒而石榼亦被災也來字又與

災字協此說爲長顏意以隕爲翦伐得此竹以爲槩
且畱石焉此意雖通而槩石畱之辭旣不可得而通兼
畱字實不訓畱韋意亦以爲伐竹作槩槩間著石如立
榴然案榴字前引韋昭注作畱字此又作榴字前後互異攷詩大雅其畱其翳毛傳云木立死曰畱作畱字爾雅釋木云立死榴實作榴字來字音离榴字亦得
李冶蓋兼用爾雅之文今仍之

爲協此義雖通而石字則贅矣故予以爲二說俱短
漢書陳涉傳曰藉第令無斬而戍死者固什六七注引
服虔曰藉猶借也第使也與史記服注不同史記服注
曰藉假也第次第也應劭曰藉吏士名藉也蘇林曰第

且也治曰服說藉假蘇說第且是也應說名藉服說次第非也第本訓但但亦且意此言藉第令無斬猶云假且使不殺

灌夫傳太后怒不食曰我在也而人皆藉吾弟令我百歲後皆魚肉之乎且帝寧能爲石人耶此特帝在卽礫礫設百歲後是屬寧有可信者乎師古曰石人徒有人形耳不知好惡也一曰石人者謂常存而不死也

張文潛書鄒陽傳云鄒陽傳稱梁孝王用羊勝公孫詭之說殺袁盎事覺孝王懼誅使陽入關內求解陽見齊

人王先生用其計說王長君長君入言之

案王長君原本作竇長君

攷鄒陽傳所說竇王長君卽蓋侯王信也竇長君乃竇太后之弟與此事無涉今改正

及韓安國

亦見長公主事果得不治此則陽與安國同救孝王殺
袁盎事也而韓安國傳所稱見長公主事自以孝王僭
天子游戲天子聞之心不喜太后乃怒梁使者弗見案
責梁王安國爲梁使見大長公主而泣長公主具以語
太后事乃解其後安國坐法久之復用爲梁內史乃有
勝詭說王殺袁盎等事安國諫王王乃殺勝詭漢使還
報梁事解無安國見長公主事此則安國見長公主自

以梁王遊戲事在前非勝詭事也明矣鄒陽傳中所載
誤記安國所解前事爲今事耳李子曰凡人行事有主
之者有筵從者有遂事者據二傳所載蓋安國兩見長
公主但所以見之者不同也其救遊戲事必主安國在
他人無所與故獨見于本傳其求解殺盜事必主鄒陽
而安國特遂事焉故安國之見長公主不具于本傳而
畧附于鄒陽傳中也宛丘以此爲班固之誤治以爲不
然二事較然明白班固良史不應遺忘至此

衛青父鄭季以縣吏給事平陽侯家平陽侯曹壽尙武

帝姊陽信長公主季與主家僮衛媼通生青青有同母
兄衛長君及姊子夫子夫自平陽公主家得幸武帝衛
媼長女君孺次女少兒次女則子夫霍去病青姊少兒
子也其父霍仲孺先與少兒通生去病及衛皇后尊少
兒更爲詹事陳掌妻史又云子夫幸有身少兒故與陳
掌通上召貴掌李子曰衛霍皆淫婦人所生夤緣中宮
爲侍中至封侯乃知功名之來初無分于君子小人而
恆在夫逢與不逢之間世之人有少才力輒抗志自負
必期一日攫取富貴于霄漢之表以致敗衄者多矣寧

知運有通塞數有奇偶者乎故孟堅備錄二子始終之事云青爲平陽侯家人少時歸其父父使牧羊先母之子皆奴畜之嘗至甘泉居室一鉗徒相青曰貴人也官至封侯去病所將常選然亦敢深入常與壯騎先其大軍軍亦天幸未嘗困絕觀史筆所著則二子之所遭遇槩可見矣

衛青傳斬輕銳之卒捕伏聽者三千一十七級師古曰本以斬敵一首拜爵一級故謂一首爲一級因復名生獲一人爲一級冶曰生獲不當言級此顧上斬字爲文

而顏顧捕字爲解誤也旣言斬復言捕者先捕得而後斬耳

師古曰最亦凡也此說不通下連言大將軍青凡七出則最不得爲凡最者功最之最言功之最大者也上文曰詔青尙平陽主與主合葬起冢象廬山云師古于此云字下發注又以最字獨爲一句恐不合班固意思以爲云字當下屬不當上屬云最者云功之最大者也故前最最大將軍後最最票騎將軍

師古曰孔道者穿山險而爲道猶今言穴徑耳此又誤

矣孔道止謂大道也

霍去病傳爲票姚校尉服虔曰音飄搖師古曰票音頻
妙反姚音羊召反票姚勁疾之貌也荀悅漢紀作票鵠
字去病後爲票騎將軍尙取票姚之字耳今讀者音飄
遙則不當其義也師古雖破服音然依服音讀其義亦
通而顏直不取者正用荀紀文耳此二字集韻亦皆收
入去聲蓋與顏意同也老杜詩悉作平聲則實用服注
也案杜詩如將軍獨數漢嫫姚恐是霍嫫姚皆作平聲
而王維詩漢家將賜霍嫫姚李白詩獨有霍嫫姚亦
俱作平聲不獨
票騎之騎今世皆作平聲讀又不作飄
杜詩爲然也

音而直作𩇑音則又異于服音矣

師古曰羸者驢種馬子堅忍單于自乘善走羸而壯騎隨之也治曰今回紇人善畜騾騾有日行七八百里不必驢種馬子乃自有騾種耳其騾生時須剖母腹亦有不剖而生者然其力不及殺母者單于所乘必此輩也以騾堅耐馬易乏故不乘馬而但乘騾也羸字按韻作羸或者羸與裸字同音羸羸聲又相近故借用之不爾乃印本之誤

案單于自乘善走羸云云恭讀

評鑒

聞要以騾并塞外所有單于不乘馬而乘騾乃必無之事實足破千古史家虛偽之說

李治此條尙未免囿于隅見謹附訂于此

約輕齎絕大幕冶曰絕字李廣傳南絕幕師古曰絕渡也

李陵曰吾士氣少衰而鼓不起者何也軍中豈有女子乎師古曰擊鼓進士而士氣不起也一曰士卒一有妻婦故聞鼓音而不時起也李子曰謂士氣不起及士身不時起皆非正謂鼓音不起耳不起不振起也李賀詩云霜重鼓寒聲不起蓋用此語

司馬長卿揚子雲皆蜀人能文而吃玉壘銅梁之氣于茲二人獨厚之以游夏之才而又咨于宰我子貢之舌

何歟美之所鍾吝于其際雖聖智無得而兼之卿雲而
有予賜之辨則造物必不復予之以言卜之學矣曰吾
爲游夏乎吾爲予賜乎曰其亦游夏而已矣晉世太叔
以辨洽稱摯仲以辭翰聞每至公坐叔談仲不能對退
著文難叔復不能答相與紛然然叔也無可紀而仲也
多所錄于是仲爲勝由叔仲論之卿雲之喃喃雖無取
于一時而黼黻河漢固無廢于千萬祀之文章也

案晉書摯

虞傳云東平太叔廣樞機清辨廣談虞不能對虞筆廣

不能答更相嗤笑紛然于世此書所引卽此事其稱摯

仲者蓋以虞字仲

洽故舉叔仲爲文

趙充國奏言羌本可五萬人軍定計遺脫與前輩黃犂

俱亡者不過四千人羌靡志等自詭必得

案羌靡志前漢書趙充國

傳作羌靡志

請罷屯兵奏可京房爲魏郡太守去至新豐因

郵上封事曰今臣得出守郡自詭效功恐未效而死惟

陛下毋使臣塞涌水之異當正先之死爲姚平所笑充

國房皆有自詭語自詭妄意也蓋謙辭

漢元帝時西域初置戊校尉已校尉說者或云戊已土
也土無正位或云土居中央校尉亦居西域之中以治
諸國李子曰前說非是後說近之而不得焉戊已居中

政取中國之象以制四夷耳何但居西域之中以治諸國乎

中山靖王勝傳每聞幼眇之聲不知涕泣之橫集也師古曰幼音一笑反眇音妙幼眇精微也治曰幼音窈眇如字幼眇猶言幽咽也

黃霸爲潁川太守吏民鄉于教化興于行誼可謂賢人君子張敞奏霸以爲挾詐于名霸又薦史高可太尉天子使尙書召問且令受丞相對霸自是後不敢復有所請李子曰聖賢不能違時而能順時苟非其時而強爲

之不仆必顛觀霸之始爲潁川也其用志亦遠矣旣爲
丞相蓋將使天下之廣爲一潁川之治也而宣帝之心
則有異于是焉宣帝爲政務欲使天下之人雖一毫髮
之細蔑敢有欺于我生殺予奪惟我所欲是則宣帝之
心也霸乃欲布教化一如潁川時則所謂東南兜而
西北矢也庸烏得而合乎若張敞之刻峭則真與宣帝
同之故出一言以劾霸而霸不復振亦理勢之常也敞
舍鵲雀飛集丞相府霸以爲神爵欲以聞而敞遽奏之
帝遽信之而霸以是疎何帝之不諦如是甚耶夫霸之

神鶚雀也此亦微瑕細類初不足咎況欲以聞之而實
未以聞乎帝乃以此罪霸至召上計吏使侍中臨飭如
敝指意則宣帝之于大臣恩亦薄矣蓋宣帝之心與霸
本殊雖以一時之譽而相之其論議大事必多有以忤
意特無以爲名誚之耳一聞敝言則謂霸之所爲皆無
事實張皇布濩祇以虛名撼我今又以鶚雀自爲治政
美應則其佞僞欺君其來審矣可不黜之乎此所以疎
霸而無疑也噫常人之情與已少同則親與已少異則
疎自古及今其孰不然何獨漢宣帝一人而已哉吾姑

借霸行事以明夫人情同異之別云

東坡論黃霸以鵠爲神爵云黃霸本尙教化乃復用烏
攫小數陋哉潁川鳳凰蓋可疑也治以爲不然夫兩漢
風俗經歷五霸之雜七雄之詐孤秦之暴仰望文武成
康之世猶之霄漢之邈況欲求如堯舜於變之時哉有
能以利和義以智行仁以權濟道者君子所不棄也班
固云南陽好商賈召父富以本業潁川好爭訟分異黃
韓化以篤厚漢世親民之吏以爲治若黃次公者蓋無
幾必謂化民成俗不應用小小之智數真過論矣蓋亦

思夫霸之時得爲稷契之時乎潁川之民得爲堯舜之
民乎以時則五霸七雄孤秦之後以民則率皆爭訟分
異猾亂之俗將以變而化之使人人而爲善人不用小
數以引以翼何以抑其獷驚之氣易其視聽之習哉小
數之假所以爲大道之歸也蘇子以此陋霸至以疑潁
川之鳳幾何其不爲洗垢求痕歟

經史意一而體二經可言命而史自不可言之史雖不
可言命至于家人相與之際一嘖一笑小或係于女氏
之貴賤大或係于邦國之盛衰是必有數存乎其間未

能遽以人事斷也如薄姬一遇而得子元后之享國六十餘年得非天歟史記外戚世家序及西漢外戚傳序論夫妃匹之合俱以爲在命則此誠爲得自餘皆不可以言命蓋作史之體務使聞之者知所勸戒而有以聳動之故前世謂史官權與宰相等苟一切以聽之命則褒貶之權輕褒貶之權輕則聳動之具去矣又安用夫史筆爲哉

范書論引易曰人之所助者順不誣矣順當作信此非蔚宗之誤後人傳寫者誤耳

俗語作不露樸此出馬援傳曰援三兄況余員並有才
能王莽時皆爲二千石援年十二而孤少有大志諸兄
奇之嘗受齊詩意不能守章句乃辭況欲就邊郡田牧
況曰汝大才良工不示人以樸且從所好不示人以樸
謂不令他人見其短長也況此語謂援齒雖少而才器
遠大不能窺其際今雖不好學而欲就田牧然將來或
不可測以故從所請

馬援傳騎款段馬注非是款段蓋連綿語猶今世俗言
骨董云耳

漢順帝時梁冀爲大將軍皇甫規對策曰夫君者舟也民者水也羣臣乘舟者也將軍兄弟操楫者也羣臣其楫櫂之具也如此言之則利害專繫于其君矣

後漢祭祀志云孝武帝欲求神仙以挾方者言黃帝由封禪而後仙于是欲封禪元封元年四月封泰山恐所施用非是乃秘其事語在漢書郊祀志司馬彪續漢志說武帝事而云語在漢書郊祀志似是牴牾旣舉漢書則前後并包之矣但謂在前書可也

案司馬彪續漢志原本云范蔚宗作

漢史殊誤攷蔚宗作志未成後漢書志皆出司馬彪續漢書中後人取以附入苑史者今改正

漢延禧三年所立孫叔敖碑云楚相孫君諱饒字叔敖
本是縣人也六國時期思屬楚楚都南郢南郢卽南郡
江寧縣也又云莊王欲加封其子子辭父有命如楚不
忘亡臣社稷案叔敖碑社稷下有畱而二字欲有賞必于潘國下濕堯
堯人所不貪遂封潘鄉卽固始也三九無嗣國絕嗣廢

固始令段君夢見孫君就其故祠爲架廟屋立石銘碑

春秋烝嘗明神報祚卽歲遷長後太守

案卽歲二字據碑文增入及

期思縣宰段君諱光字世賢魏郡鄴人庶慕先賢體德
允恭篤古遵舊奉履憲章欽翼天道五典興通攷籍祭

祀祇肅神明臨縣一載志在惠康葬枯廩乏愛育黎烝
討掃醜類鰥寡是矜杜偽養善顯忠表仁感想孫君乃
發嘉訓興祀立壇勤勤愛敬念意自然刻石銘碑又云
福祐期思縣興士熾如碑所言則是叔敖生于期思而
其子孫居于固始也按後漢郡國志期思固始皆屬汝
南郡志又日期思有蔣鄉故蔣國又云固始侯國故寢
也光武中興更名有寢丘注引史記曰楚莊王以封孫
叔敖子此自與碑相合然碑中前言卽其故祠架廟銘
碑後云福祐期思則此當在期思而不在固始也碑稱

段君以固始令遷某郡太守及期思縣宰段君云云語

句似不相貫

案古文苑載此碑期思縣宰下注云段君蓋假太守之名以重縣宰之權張掖未嘗

之任又顧藹吉隸辨云按碑固始令段君夢見孫君爲立石銘碑期思縣宰段光庶慕先賢又爲刻石則固始所刻者一碑期思所刻者又是一碑此碑乃期思所刻者兩令皆段姓一名光一不著其名非一人也攷水經注云碑在期思縣孫叔敖廟前天下碑錄云在固始縣本廟內則顧說爲近之集古錄目則第云在光州蓋宋時期思固始皆屬光州也

又碑載孫君諱饒按左傳叔敖乃爲賈伯

贏之子又謂之爲艾獵而此謂諱饒則必他有所據當

俟博雅君子問之

爲言不難而文爲難爲文不難而作史爲最難史有體

有要體要具而後史成焉體要不具而徒文之騁史乎
史乎而非千萬世之法也篇翰流傳鏘耳赫目可以入
文苑矣不可以入儒林經術粹精洞貫古今可以入儒
林矣不可以入儒行班固則凡有文字者悉載之本傳
之中別以明經者入儒林范蔚宗則旣傳儒林而後文
苑繼之皆得其體要者也雖然吾猶恨其不爲儒行一
傳以爲儒林文苑之首焉能尊其書而不能尊其身行
之人是信其名而不信其實也吾窮居陋處固不在筆
削之位而輒爲是說冀乎後之人知尊其爲儒之身有

愈于知尊其爲儒之書耳非故以爲夸也

敬齋古今註卷三

終

敬齋古今註卷四

元 李 冶 撰

魏文帝誅丁儀丁廙等魚豢以人心窺望勢使之然因論曰諺言貧不學儉卑不學恭非人性分殊也勢使然耳予謂周官位不期驕祿不期侈政好對前兩句蓋不期驕而驕不期侈而侈亦是事勢使然

魏明帝大修宮室至使公卿負土董尋上疏諫曰陛下既尊羣臣而使穿方負土面目垢黑沾體塗足衣冠了烏毀國之光以崇無益甚無謂也穿方者穿土爲方也

黃帝九章五曰商功以御功程積實其術皆以立方定率穿土爲方則穿空作立方以程功也又衣冠了鳥了鳥當竝音去聲今世俗人謂腰膂四支不相收拾者謂之了鳥卽此語也音料掉

魏杜恕爲散騎黃門侍郎在朝八年出爲宏農太守數歲轉趙相以疾去官起家爲河中太守又傳嘏爲黃門侍郎何晏等與嘏不平因微事以免嘏官起家拜滎陽太守父王基爲安豐太守以疾徵還起家爲河南尹起家者蓋在家中牽復而起爲此職也

士大夫大節不必觀其所爲但觀其所不爲足矣魏高
貴鄉公欲去司馬昭夜召王沈王業王經出懷中黃素
詔以示之戒嚴俟旦沈業馳告于昭昭召賈充等爲之
備遂弑高貴鄉公夫晉魏之賊也凡爲晉之忠臣者皆
魏之賊也當髦之圖昭之際使沈業如經之不言則髦
必當得志昭必先誅魏祚必不傾司馬氏亦無自而王
也成敗之機在于呼吸而沈業二鼠子背國佐賊賊因
得以肆其毒焉反覆變詐若沈業者真魏國之姦賊也
沈業以泄謀爲姦賊則王經之不泄信爲有魏之忠臣

矣昭是以恨經而殺之則是賊殺魏之忠臣也夫忠臣之死于賊則死于王事者也于斯時也魏之國如綴旒魏之主如委裘誠不暇于甄錄已死之人也然其秉董狐之筆者可不特爲一傳以勸後世之人乎或謂經之行蹟不多見自不足以立傳曰君子之爲己爲人爲天下必待世間之可稱美者載諸一身而無孑遺然後爲得哉雖聖人亦不能爾而謂君子者能之耶觀專車之骨則防風氏之長爲可知魏史不爲經傳過矣雖然魏史不傳王經晉史爲傳沈等而下終不能廢經

之美而沈等之臭惡借東海之波亦莫得而濯之

蜀志馬良與諸葛亮書曰此乃管弦之至牙曠之調也雖非鍾期敢不擊節晉書謝尙作鸛鵒舞王導令坐者撫掌擊節尙俯仰其中旁若無人又樂志云魏晉之世有孫氏善彈舊曲宋識善擊節唱和蓋節者節奏句讀也擊節猶今節樂拍手及用拍板也故樂家以拍板爲樂句馬良書稱敢不擊節謂敢不賞音也吳諸葛恪乞佃廬江皖口襲舒以圖壽春孫權以爲不可赤烏中魏司馬宣王謀欲攻恪權方發兵應之望氣者以爲不利

于是徙屯于柴桑恪與丞相陸遜書曰楊敬叔傳述清
論方今人物凋盡守德業者不能復幾宜相左右更爲
輔車上熙國事下相珍惜又疾世俗好相謗毀使已成
之器中有損累將進之徒意不歡笑聞此喟然誠獨擊
節恪意以楊所論述切中時病旣聞此語使已喟歎然
當時之人誠無知者已獨擊節以稱賞之耳

邵正釋譏云九方考精于至貴注引淮南子云秦穆公
謂伯樂曰子姓有可使求馬者乎對曰臣有所與共儋
繆采薪九方堙此其相馬非臣之下也

案九方堙原本
作九方禪考九

方之名莊子作歟桓譚新論作譚淮南子作
堙此所引淮南子之文當作堙今改正後同 凡注解文
字其所援據有重複者止當引用前人而其在後者略
之可也其或前後差池有須訂證則自不害兩舉而互
明之他無所發而併引之已屬冗長苟復舍先傳而取
後聞乃所謂不知其本者也九方相馬事具列子列子
前淮南子數百年但列子作九方臯淮南子作九方堙
耳今裴松之解釋郤文專據淮南子而不識列子非也
或曰乾陽物也稊于七而老于九坤陰物也反是稊于
八而老于六聞之北方人相馬之老稊不于其齒而于

其目人與目對視已之身自首見腰則二三歲之交自首見腹則五六歲之交自首見胸則七八歲之交止見其首則此馬十歲矣過是以往又加以溟滓焉則不可得而年矣

孫權傳黃龍元年注權告天文末云謹擇元日登壇燎祭卽皇帝位惟爾有神饗之爾汝后帝殆失文字之體豈吳無一人耶其後與漢爲盟文亦曰明神上帝是計是督山川百神是糾是殛俾墜其師無克胙國于爾大神其明鑒之此雖泛及山川終自先言上帝蓋與前告

文同出一手云或曰書武成云予小子其承厥志底商之罪告于皇天后土所過名山大川其下云惟其士女篚厥玄黃昭我周王天休震動用附我大邑周惟爾有神尙克相予以濟兆民無作神羞上併陳皇天后土名山大川後併舉惟爾有神則雖天亦得以爾之子何獨病于吳之文耶曰武成與此不同武成在前併數天地山川而其下先言天休震動乃復言惟爾有神則有神者正謂山川之屬不謂天也書又云無作神羞若以此神爲天天固不得以言羞況武成一篇先儒咸謂本經

脫誤文無次第又豈可全以爲據乎

吳志張昭子承能甄識人物勤于長進篤于物類凡在庶幾之流無不造門又顧雍子邵好樂人倫自州郡庶幾及四方人士往來相見或言議而去或結厚而別風聲流聞遠近稱之二傳中皆用庶幾字庶幾者所謂凡有可以成材者皆是也

邸閣者乃軍屯蹊要儲蓄資糧之所此二字他書無有見于漢末及三國志其所明著者凡十一董卓傳注獻帝紀曰帝出雜繒二萬匹與所賣廐馬百餘匹宣賜公

卿以下及貧民不能自存者

梁廐馬百餘匹今三國志董卓傳注作廐馬直蓋言

以馬谷曰直宣賜與此所引文異

李催曰我邸閣儲待少乃悉載置其

營又張旣傳酒泉蘇衡反旣擊破之遂上疏請治左城
築障塞置烽燧邸閣以備胡西羌恐率衆二萬餘落降
又王基擊吳別襲步協于夷陵協閉門自守基示以攻
形而實分兵取雄父邸閣收米三十餘萬斛又母丘儉
文欽作亂王基與司馬景王會于許昌基謂宜速進據
南頓南頓有大邸閣計足軍人四十日糧又蜀後主建
興十一年冬諸葛亮使諸軍運米集于斜谷口邸閣又

魏延傳注夏侯惇鎮長安諸葛亮于南鄭計議延曰云
云橫門邸閣與散民之穀足周食也又鄧芝傳先主定
益州芝爲鄆邸閣督先主出至鄆與語大奇之擢爲鄆
令又孫策傳注江表傳曰策渡江攻劉繇牛渚營盡得
邸閣糧穀戰具是歲興平二年也又孫權傳赤烏四年
夏遣衛將軍全琮略淮南決芍陂燒安城邸閣收其人
民又赤烏八年遣校尉陳勲將屯田兵及作士三萬人
鑿句容中道自小其至雲陽西城通會市作邸閣又周
魴傳譙曹休牋曰東主遣從弟孫奭治安陸城修立邸

閣輦貲運糧以爲軍儲

作文敘事爲最難揆挾辭旨兩須允愜杼思過當多遺
目前龐統傳云龐少時樸鈍未有識者潁川司馬徽有
知人鑒統弱冠往見徽徽採桑于樹上坐統在樹下共
語自晝至夜徽甚異之此坐統樹下時尙未識統旣共
與語必有以中徽心者徽雖高年便當下與統接而止
據樹上自晝至夜略無主客之禮爲統者固樸鈍而爲
徽者無乃樸鈍甚耶以人情度之殆爲乖戾吾以爲共
語之下宜云徽頗驚賞因延揖再與談論自晝至夜徽

甚異之若是則其言意始兩足矣或謂徽與統齒相懸不可以苛禮責徽曰此不然昔盛孝章爲臺郎路逢童子容貌非常孝章怪而問之答曰魯國孔融時年十餘歲孝章以爲異乃載歸與之言知其奇才便結爲兄弟夫融之遇孝章之時纔十餘歲兒耳而孝章與之爲雁行統之見徽時蓋已成人矣徽年雖高苟有知人之鑒則自不當倨傲如此故予疑以爲史家激昂太過云然也

晉天文志荊州占載妖星凡二十一其十九曰長庚如

一匹帛著天見則兵起詩大東云東有啟明西有長庚
毛傳云日旦出謂明星爲啟明日旣入謂明星爲長庚
庚續也毛不謂長庚爲妖星然則長庚自有二星也但
同名耳志又云瑞星有四其三曰含譽光曜似彗其四
曰格澤如炎火下大上銳然妖星中如火而下大上銳
者甚多今而格澤似之古今史書中所載星變爲凶災
者莫過于彗今而含譽似之諸若此類其果爲瑞耶其
果爲妖耶

草與木異種故邵堯夫以飛走草木爲四物晉五行志

以桃李華非其時梨根血出大樹自折桑生東宮桑樹

有聲葉莢相樛枯樹復生木如人面楊柳生松木仆反

立皆爲草妖不知何謂

案晉五行志載吳建興元年九月桃李華一事實在木沴金條

下未嘗歸入草妖惟條未別引一說謂桃李寒

此桃李

華爲草妖或屬孽爲存疑之詞此合併以辯之

華非其時正爲華孽餘皆木妖耳若草木之妖可以互

稱則交趾之稗化而爲稻鬼目苦賈生于江東宮牆馳

道悉生蒺藜之類亦得指以爲木妖也而又可乎是知

草當云草木當云木爲宜矣然則所謂木妖者又非木

不曲直惟金沴木之謂木不曲直惟金沴木者乃城門

自壞屋梁躍出牙竿不正之類是也

晉惠帝時劉頌上疏云法欲必奉故令主者守文理有窮塞故使大臣釋滯事有時宜故使人主權斷又熊遠上疏于琅邪王睿曰凡爲駁議者皆當引律令經傳若開塞隨宜權道制物此是人君之所得行非臣子所宜專用也二子之言相合爲人臣者不可不知故表而出之

晉書山簡傳襄陽人歌曰日暮倒載歸茗芋無所知復能騎駿馬倒著白接離

案茗芋山簡傳作酩酊世說作茗芋日暮傳作日夕復能騎駿

馬傳作時時能騎馬竝文
異而義可通今仍原本

人說倒載甚多俱不脫灑吾

以爲倒身于車中無疑也言倒卽倒臥言載則其車可知倒載來歸旣而復能騎駿馬也蓋始歸時以茗芋之故倒臥車中比入城酒稍解遂能騎馬雖能騎馬終被酒困故倒著白接離也上倒上聲下倒去聲著入聲

晉書索綝傳劉曜入長安時三秦人尹桓等數千家盜發漢霸杜二陵多獲珍寶帝問綝曰漢陵中物何乃多耶綝對曰漢天子卽位一年而爲陵天下貢賦三分之一供宗廟一供賓客一供山陵漢武帝享年久長比崩

而茂陵不復容物其樹皆已可拱赤眉取陵中物不能
減半于今猶朽帛委積珠玉未盡此二陵是儉者耳應
劭風俗通義載霸陵薄葬亦被發掘而其陵中物乃與
前書本紀絕不同據劭之言知霸陵所謂薄葬者特
比餘陵差少耳劭說與前書不同者前書蓋從史筆劭
說蓋從所聞見容有一誤然質諸晉書則劭說爲得其
實

晉書王獻之爲謝安長史太極殿新修成欲使獻之題
其榜難言之試謂曰魏時凌雲殿榜未題而匠者誤釘

之乃使韋仲將懸橙書之比訖鬚髮盡白裁餘氣息還
語子弟宜絕此法獻之揣知其旨正色曰仲將魏之大
臣寧有此事使其若此有以知魏德之不長也書法錄
云魏明帝凌雲臺初成令韋誕題榜高下異好就點正
之因危懼以戒子孫無爲大字楷法王僧虔名書錄云
魏明帝起凌雲臺誤先釘榜而未之題寵盛韋誕鹿盧
引上書之去地二十五丈誕甚危懼乃戒子孫絕此楷
法李子曰魏明帝之爲人人主中俊健者也興工造事
必不孟浪況凌雲殿非小小營構其爲匠氏者必極天

下之工其爲將作者亦必極當時之選樓觀題榜以人情度之宜必先定豈有大殿已成而使匠石輩遽掛白榜哉誤釘後書之說萬無此理而名書錄載之晉史又載之是皆好事者之過也名書錄又謂去地二十五丈以籠盛誕鹿盧引上書之事果可信耶晉書雖引此事而復著獻之語謂寧有此事則亦自不信也書法錄言高下異好令就點定誕因危懼以戒子孫則此說其或有之晉書又稱誕書比訖鬚髮盡白此尤不可信者前入記周興嗣一夕次千文成鬚髮變白已屬繆妄而誕

之書勝特茶頃耳危懼雖甚安能遽白乎

石勒救洛陽詭道兼行出于輦訾之間詭不正也詭道猶言斜徑也此蓋由捷徑而往或言此二字乃兵法所謂兵行詭道大段不識文勢

晉書王沈有四其一自有傳見列傳第九卷其一亦自有傳見文苑其一爲劉聰中常侍奢僭貪殘賊害良善與靳準同用事其一慕容寶將寶出奔沈降魏○孫秀有三其一權弟匡之孫而歸命侯皓之從弟也爲吳夏口督建衡二年皓遣何定將五千人至夏口獵秀驚將

妻子親兵數百人奔晉晉以秀爲驃騎將軍儀同三司

封會稽公時泰始六年也其一見潘岳傳初爲琅邪小

史

案小史原本作小吏今據晉書潘岳傳改正

趙王倫輔政時爲中書令倫

敗被誅其一伏波將軍孫秀以周處將死勸之曰卿有

老母可以此辭者○劉允有三其一爲江州刺史陶侃

郗鑒皆言允非方伯才而司徒導不從後爲郭默所殺

其一曜之子南陽王也侵石生次于雍爲石勒將石季

龍擊斬之其一與之子爲劉琨領兵路逢烏桓賊戰沒

○王鑒有三其一自有傳見列傳第四十一卷以文章

著稱其一爲劉聰尙書令其一爲苻堅將救袁瑾于壽春者○張茂有三其一涼州牧張軌之子而實之弟也其一載之丁潭傳中字偉康與孔愉字敬康丁潭字世康時人號曰會稽三康茂少單貧有志行爲鄉里所敬信起義兵討賊陳斌一郡用全元帝辟爲掾屬後爲吳興內史沈充反與三子並遇害其一見石季龍傳季龍殺其太子宣東宮衛士十餘萬人皆謫戍涼州季龍僭卽皇帝位大赦境內東宮謫卒高力等萬餘人行達雍城旣不在赦例又敕雍州刺史張茂送之茂皆奪其馬

令步推鹿車致糧戍所高力督定陽梁犢等因衆心之
怨謀起兵東還逼張茂爲大都督大司馬○張華有二
其一自有傳見列傳第六卷其一見慕容德傳德旣據
滑臺置百官慕容寶自龍城南奔至黎陽遣趙思召慕
容鍾來迎德欲具駕奉迎謝罪行闕其黃門侍郎張華
進曰陛下若蹈匹婦之仁舍天授之業威權一去則身
首不保又慕容超時姚興拘超母妻責超稱藩超遣羣
臣計議張華謂宜降大號以申至孝之情○徐邈有二
其一與宣帝同時其一見于簡文宣鄭太后傳其事在

孝武太元十九年○韓壽有二其一賈充壻其一爲慕容廆別駕○王渾有二其一自有傳見列傳第二十二卷其一爲涼州刺史貞陵亭侯卽戎之父也○李陽有二其一上黨武鄉人與石勒鄰居歲嘗與爭麻池迭相毆擊者其一爲幽州刺史京師大俠也王衍患妻郭剛愎貪戾不能禁因謂之曰非但我言卿不可李陽亦謂不可郭氏爲之少損衍傳又謂陽爲鄉人或當爲琅邪臨沂人其後溫嶠軍食盡貸于陶侃侃難之竟陵太守李陽說侃侃乃分米五萬石以餉嶠軍者卽此李陽也

○胡威有二其一見良吏傳字伯武壽春人武帝時爲
徐州刺史其一義熙二年秦王興徵王尙還長安涼州
人申屠英等遣主簿胡威詣長安留尙鎮姑臧○孫登
有二其一見隱逸傳字公和汲郡共人無家屬于郡北
山爲土窟居之又嘗往宜陽山不知所終其一見孫楚
傳楚之曾孫登少善名理注老子行于世仕至尙書郎
早終○解系有二其一自有傳見列傳第三十卷字少
連濟南著人與二弟結育竝清身潔已甚得聲譽歷豫
雍二州刺史揚烈將軍西戎校尉假節趙王倫討叛羌

與佞人孫秀爭軍事倫秀譖之系坐免官及張裴之誅也倫秀以宿憾收系兄弟皆害之倫所謂我于水中見蟹且惡之者其一見陶璜傳璜爲吳將破晉九真太守董元于交趾元有勇將解系同在城內璜誘其弟象使爲書與系又使象乘璜輶車鼓吹導從而行元等曰象尙若此系必有去志乃就殺之吳因用璜爲交州刺史○王興有二其一趙王倫欲篡位諸王公卿士咸勸進左衛王興入殿譬諭三部司馬示以威賞及三王舉義河北軍悉敗興乃收倫而殺許超士猗孫弼謝悛殷渾

孫秀等後與東萊王蕤謀殺齊王冏伏法死其一成都
王穎與張方伐京都時常山人王輿合衆萬餘欲襲穎
會長沙王乂被執其黨與斬輿降○劉毅有二其一自
有傳見列傳第一十五卷其一亦自有傳見列傳第五
十五卷○王愷有二其一見外戚傳恂之弟也卽與石
崇競侈靡者其一見簡文七子會稽王道子傳時有人
爲雲中詩以指斥朝廷曰王愷守常國寶馳競又桓元
殷仲堪等復至石頭元顯馳還京師遣丹陽尹王愷等
發京邑士庶數萬人據石頭以拒之者卽坦之之子也

○王濬有二其一自有傳見列傳第一十二卷其一在
王鑒傳堂邑人鑒之父也仕至御史中丞○王脩有二
其一濛之子也字敬仁明秀有美稱善隸書年十二作
賢全論爲琅邪王文學卒其一見石勒傳劉曜斬石勒
使王脩又劉裕克長安殺姚泓留子義真守長安使王
脩王鎮惡沈田子輔之而還○王祥有二其一自有傳
見列傳第三卷其一與郭鰲叛呂光者○石苞有二其
一自有傳在列傳第三卷其一季龍子○劉裕有二其
一元海之子也元海遷都平陽汾水中得玉璽改年河

瑞封裕爲齊王及爲顧託之計以爲大司徒後爲呼延

攸所殺其一討桓元者○王瑜有二其一爲李勢中書

監其一含之子也

案晉書載記李勢侍中有王嘏其中書監亦作王嘏攷桓溫傳勢降後溫

以其中書監王瑜爲參軍是載記誤瑜爲嘏附訂于此

○盧志有二其一欽之從

孫見欽傳其一爲劉聰弟父太師爲聰所誅○劉宣有

二其一元海從祖也元海卽王位皆宣之謀其一青州

刺史曹疑執建威劉宣而齊魯之間郡縣壘壁降者四

十餘所見劉聰傳○劉宏有二其一自有傳見列傳第

三十六卷爲鎮南將軍其一京兆人挾左道客居天梯

第五山然燈懸鏡于山穴中爲光明以惑百姓受道者
千餘人見張寔傳○王衍有二其一自有傳見列傳第
一十三卷其一石鑒時爲侍中冉閔僭位後誅之○王
敦有二其一自有傳見列傳第六十八卷其一見李特
傳特攻成都趙廞死惠帝以涼州刺史羅尙爲益州刺
史督牙門將王敦等七千餘人入蜀○周撫有二其一
訪之子破范賁斬蕭敬文者其一爲彭城內史殺周默
以降石勒詔劉遐蔡豹徐龕共討撫太元二年破斬于
寒山○苻宏有二其一堅之子其一桓元將

案晉書載
記苻堅子

宏出奔晉處于江州歷位輔國將軍桓玄以爲涼州刺史義熙初被誅與桓元傳所云發江陵使苻宏爲前鋒檀祗斬之湖東者當是一人○王皮有二其一劉聰時李冶分而爲二未詳所據

爲大將軍從事中郎其一秦丞相王猛之子○張平有二其一流民在譙爲塢主祖逖誘其部將使殺之其一苻堅所破者○文鴛有二其一欽之子年十八勇冠三軍欽叛敗同奔吳事在景帝末年其一姓段者鮮卑人匹磾之弟也永嘉四年石勒陷襄城遂至宛王浚遣鮮卑人文鴛帥騎救之勒退又元帝時救邵續于厭次擄勒三千餘家其後又嘗與匹磾攻敗勒于襄國及匹磾

殺劉琨夷晉兩怨叛遂帥其徒依邵續續既爲石季龍
所得匹磾等嬰城拒寇戰守疲苦不能自立匹磾及鴛
等悉見獲至襄國匹磾被害文鴛遇鴆而死事詳見段
匹磾傳○張駿有二其一涼州牧張駿卽軌之孫而實
之子也其一姚萇故將殺江州都護趙毗焚武昌畧府
藏以叛者爲江州刺史桓沖討斬之事在哀帝興寧元
年○王遐有二其一在外戚傳卽簡順皇后父驃騎將
軍述之從叔也少以華族仕至光祿勳其一睢陵公祥
之曾孫始平太守肇之孫永世侯俊之子也仕至鬱林

太守○高柔有二其一宣帝將誅曹爽假柔節行大將
軍事領爽營其一見王浚傳浚將僭號司馬掾高柔與
劉搏切諫浚怒誅之○王濟有二其一自有傳在列傳
第十一十二卷其一元帝時慕容廆遣其長史王濟浮海
勸進○段勤有二其一鮮卑人勤初附于慕容儁其後
復叛儁遣慕容垂討勤于繹幕及慕容恪進據常山勤
始懼而請降案常山原本作中山攷晉書載記慕容儁遣慕容恪討冉閔于安喜遣慕容垂討段
勤于繹幕儁如中山爲二軍聲勢聳恪進據常山勤始
懼而請降則恪實進據常山李治因儁如中山而誤今
改其一常山樹根下得珪璧慕容儁遣尙書郎段勤以
正

太牢祀之兩段勤俱見僞傳○郭敬有二其一見石勒

傳鄔人資給勒者其一見苻健傳

案苻健原本作苻堅今據晉書載記改正

下執健同永和十年桓溫率衆四萬趨長安遣別將攻上洛

執健荊州刺史郭敬○王述有二其一湛之孫承之子

而坦之之父也其一簡順皇后父遐之從子○郭文有

二其一見隱逸傳其一見呂光傳王穆單騎奔驛馬驛

馬令郭文斬首送之光○王澄有二其一字道深辯慧

有才藻歷位清顯卽京陵公渾之子而驃騎濟之弟也

其一字平子卽平北將軍父之子而太尉衍之弟衍使

澄爲荊州刺史族弟敦爲青州以備三窟

案平子以下原本有脫誤

今據王衍傳校正

○余讀史次錄其間不無謬誤尙冀博雅君

子見其遺佚者補之外錯者改之重複者削之

料理之語見于世說者三韓康伯母聞吳隱之兄弟居喪孝語康伯曰汝若爲選官當好料理此人王子猷爲桓溫車騎參軍溫謂子猷曰卿在府日久比當相料理衛展在江州知舊投之都不料理料理者蓋營護之義猶今俚俗所謂照顧當耳石林以爲料理猶言誰何料多作平音當作平音石林固是其言誰何則非也誰

何乃呵喝禁禦之謂

宋孝武大明六年策秀才于中堂揚州秀才顧法對策
曰源清則流潔神聖則形全神聖當作神勝

應奉讀書五行俱下宋孝武省讀書奏能七行俱下蓋
言其敏也五行七行俱下猶云一息讀竟耳

宋明帝好爲慘毒周顒不敢顯諫但誦因緣罪福事亦
爲之小止耶律德光入汴馮道見之且曰天下百姓佛
亦救不得惟皇帝救得故所賴全活者多破執化愚有
力也如此吾但懼其燎原耳

齊武帝孫鬱林王昭業太子長懋之子也武帝永明十一年七月立明年七月西昌侯鸞廢之鸞卽明帝也鬱林立者凡一年雖淫昏不道而正君臣之位者亦已期矣通鑑以前半年爲永明後半年爲建武沒不見鬱林之號恐未爲得前半年屬之永明固也後半年沒而不舉何哉鸞旣廢昭業復立其弟昭文而鸞又自改封宣城王冬十月鸞又廢昭文爲海陵王海陵王卽位厯四月于十一月鸞又廢之而自立跡齊明之廢立在此一年以此年稱爲建武元年者蓋鸞志耳然槩諸予奪之

權若此等類自當分其年爲上下但使紀年雙舉行事
並列雖繫諸建武之元亦無傷也今一徇鸞志而置踰
年之君于無人之地寧不爲史筆之累哉

高洋時能委任楊愔時人皆言主昏于上政清于下主
旣昏矣政安得而清乎吾但聞元首明股肱良庶事康
未聞主昏于上政清于下也此乃當時史官曲筆巧譽
柄臣後人信以爲然耳明主正當于此時察之

北齊高緯時穆提婆韓長鸞聞壽陽陷握槊不輟曰本
是彼物從其去所通鑑注云槊長矛也治曰槊雖得爲

長矛然言之齊事則非此蓋棊槩之槩長行局所用之馬也長行局卽今之雙陸

舊唐書武后問狄仁傑曰朕要一好漢任使有乎仁傑乃薦張柬之新史則云朕要一奇士通鑑則云朕要一佳士佳士則風流蘊藉者也奇士則懷材抱藝者也皆不盡好漢意然好漢字大爲涉俗非史書語但曰奇男子可也

唐藝文志次第絕無法式甲部經錄禮類中載周禮儀禮自可以類推而于樂類中乃載崔令欽教坊記南卓

羯鼓錄夫教坊羯鼓何得與雅樂同科乙部史錄雜傳
記類中載圈稱陳留風俗傳三卷而于地理類中亦載
之崔豹古今注于儀注類中言一卷于雜家類中言三
卷世說則小說之屬也劉義慶世說八卷劉孝標續世
說十卷既載之小說類中矣而王方慶續世說十卷復
載諸雜家類中是不可曉也丙部子錄道家類中既載
神仙三十五家又載釋氏二十五家無乃太泛濫歟此
等自合各立一類收之又道家類中既純載老子及列
莊文庚四輔等書以符呪修攝靈驗變化等爲神仙然

于神仙類中復載元景先生老子道德要義五卷賈參寥莊子通真論三卷此又雜之甚者也又道家類中載張志和元真子十二卷而于神仙類中載之則云二卷而已張志和一人之身也一人之口也豈十二卷者惟說清靜無爲而此二卷者多說金丹大藥飛昇隱化事皆不可得而攷之也

平價買物曰和買新唐書吳湊言宮市事曰宮市大抵強買民間物宜料中宮年高謹信者爲宮市令平價和售按韻書賣物出手曰售今云平價和售則卻是以平

價和賣非和買

五星聚非吉祥乃兵象故高祖入關五星聚于東井則爲秦亡之應攷之書傳五星之聚不獨漢世有之在唐時爲尤多武德元年七月鎮星太白辰星聚于東井二年三月復然是年關中分裂天寶九載八月五星聚于箕尾燕分也占曰無德則殃至德二載四月歲星熒惑太白辰星聚于鶉首元和十年六月四星復合于東井皆占中外相連以兵乾元元年四月熒惑鎮星太白聚于營室太史南宮沛奏其地戰不勝營室衛地大厯三

年七月壬申五星竝出東方占曰中國利中國利則四
夷被兵也貞元四年五月歲星熒惑鎮星聚于營室占
曰其國亡地在衛分元和十一年十二月鎮星太白辰
星聚于危危齊分又十四年八月歲星太白辰星聚于
軫軫楚分占曰兵喪開成四年正月熒惑大白辰星聚
于南斗推厯度在燕分占曰內外兵喪改立王公咸通
中熒惑鎮星太白辰星聚于畢昴在趙魏之分詔鎮州
王景崇被袞冕軍府稱臣以厭之文德元年八月歲星
鎮星太白聚于張張周分占曰內外有兵爲河內河東

地大約星聚少則其用兵少星聚多則其用兵多天變
人事有若符契焉或曰星變偶然耳隨變隨應未必然
也或者之言非也姑以唐事驗之其大者有徵則其餘
槩可見矣太宗貞觀年中天下太平不聞有星聚之異
天寶九年五星聚燕後數歲安史煽禍中國塗炭至累
世不息是何得爲偶然哉

李白子伯禽爲嘉興徐浦鹽官侮慢廟神以死伯禽之
狂悖有以哉白自一生蹇傲視禮法如木索任放浪爲
特達然氣豪才壯有所爲而然則尙可言也彼伯禽者

何爲者也狃習所見強吾之所無而亦爲是幾何其不自絕于天耶吾謂慢神而得死非神殛之其所以取之者蓋已久矣夫爲人之子也得爲白也後則人之大幸也不肖之子反以得大不幸悲夫

歐公五代史李存孝傳云康君立素與存信相善方二人之交惡也君立每左右存信以傾之事雖可見語殊不甚明蓋存信傳云存信與存孝俱爲養子材勇不及存孝而存信不爲之下由是交惡歐公因存信傳已用交惡二字故疊用之以爲間無他事但舉二人則知其

爲存信與存孝其實二人各自爲傳文勢不當如此

通鑑魏明帝太和三年改平望觀曰聽訟觀初魏文侯師李悝著法經六篇蕭何定律益爲九篇後稍增至六十篇又有令三百餘篇決事比九百六卷世有增損錯糅無常後人各爲章句以至于魏所當用者合二萬六千二百七十二條七百七十三萬餘言衛顗于是奏請置律博士從之此云蕭何定律爲九篇而前漢刑法志則云蕭何摭摭秦法作律九章按高祖紀高祖入關約法三章說者謂一條爲一章今何作律九章亦當爲九

條而已一則以爲九篇一則以爲九條則其數相懸遠矣豈當時所作律九章與所定法經九篇各自爲書耶決不得以一章爲一篇也

僕射職主僕御弓矢之事故稱僕射射舊音夜楊倞注荀子云射干藥名且引陶弘景注本草云射干花白莖長如射人之執干倞旣引陶說如此而音射干之射復從夜音據射人之射自當音麋而射干復從夜音者當是射御之射或音麋或音夜兩俱得通但今世俗流傳止從麋音耳若僕射與射干猶是從舊俗呼之爲夜音

也

勾當二字自唐有之德宗時神策軍又特置監勾當以寵宦者貞元十二年改監勾當爲護軍中尉以命竇文場霍仙鳴至炎宋過江後以避諱改勾當爲幹當則幾于吃口令矣

郡守官府亦得稱朝劉寵爲會稽守徵爲將作大匠山陰縣有五六老叟人齎百錢以送寵曰未嘗識郡朝又汝南太守宗資以范滂爲功曹南陽太守成瑨以岑暉爲功曹皆委心聽任使之褒善糾違肅清朝府夫朝者

天子諸侯王之所居也而郡守亦得以稱之者一郡之
守一郡之君主也有民人焉有社稷焉凡臣屬者謂守
寺爲朝無嫌也蓋古者不獨于府寺爲朝雖私家亦得
言之鄭伯有嗜酒爲窟室而夜飲酒擊鐘焉朝至未已
朝者曰公焉在其人曰吾公在壑谷皆自朝布路而罷
自朝而罷乃伯有私家之朝也

地里新書載三字姓宮音曰步六孤商音曰可足渾角
音曰侯莫陳羽音曰赤小豆郁久閭此等已不可攷而
又載三字闕五音者曰破六韓阿逸多等凡六十姓前

步六孤等皆有音而此悉闕之豈前步六孤等五姓可
配以五音而此六十姓俱無所屬乎夫有是姓則有是
言有是言則有是音而此六十姓無音者當是昔人以
五音姓氏相配時未始知之耳且三字姓其無音者尙
如此之多況自死獨膊并強六斤等以四字爲姓者耶
以是知音姓相屬真同戲論

自昔上衣下服皆有緣今皆無緣非其制也無緣則古
犯大辟者之服傳曰犯黥者皂其巾犯劓者丹其服犯
臙者墨其體犯宮者雜其屨大辟之罪殊刑之極布其


衣裾而無領緣

武珪燕北雜記云契丹行軍不擇日用艾和馬糞于白羊琵琶骨正灸破便出行不破卽不出李子曰灸琵琶骨不獨契丹凡蠻貊皆爲之番禺記載嶺表占卜甚多有骨卜田螺卜雞卵卜牛卜鼠米卜箸卜篋卜乃知四夷尙鬼遇物皆得以爲卜也今北方灸琵琶骨者與珪記特異所灸之法蓋有可入不可入者疾病飲食一動一止悉有條理珪則專謂灸破便出軍不破卽不出蓋當時所見適然自以爲說耳

名字之立一以成身一以辨等成身則貴乎美稱辨等則貴乎易別漢賈徽字元伯而其子逵字景伯晉王羲之生五之父子之嚴而如是其瀆則亦難乎兄弟矣近世搢紳之家多用一單一複使昭穆互見雖年世寢遠不相糅雜法似拘而意則通事似疎而理則密誠爲得也或者有以名繼姓若管鮑牛叶馬希驥殷獻臣之類案牛叶二字文不相屬當是牛斗之誤如倡優家兒此殊爲可鄙也


敬齋古今藪卷四

終









敬齋古今註卷五

元 李 冶 撰

三緘其口謂緘其口者凡三處也故今人多以三緘連言之或曰有金人焉三斷句則指三人也亦通

草可以爲木荀子曰西方有木焉名曰射干莖長四寸

射干草也獸可以爲禽易屯之六三象曰卽鹿無虞以

從禽也鹿自獸耳酒可以爲饌論語有酒食先生饌饌

食也佛可以爲僊故其書稱忍辱僊人及金僊草亦稱

林楚辭曰游蘭皋與蓮林

案蓮林楚辭作蕙林而此條下有蘭蓮皆草之語則李冶

實作蓮字未

又陸士衡招隱詩云結風佇蘭林

案結風佇蘭林

知所據何本

文選作激楚佇蘭林注引上林賦

蘭蓮皆草也

云激楚結風疑李冶因此致誤

蟹八足而二螯天下人無不識者而荀卿子謂蟹六跪而二螯楊倞云跪足也韓子以刖足爲刖跪螯蟹首上如鉞者許慎說文亦云蟹六足而二螯荀卿子趙人仕齊三爲祭酒後適楚爲蘭陵令趙齊皆有蟹而楚又蟹之鄉也荀子大儒而謂蟹六跪何耶許叔重嘗撰五經異義當時號爲博物而亦以蟹爲六足者非不識蟹蓋循荀子之說而忘其所以爲誤耳蟹之爲物甚賤而至

廣者也荀說之誤至損八足而六之乃知移符坊州而索杜若者未足多誚也

荀子修身篇凡治氣養心之術莫徑由禮莫要得師莫神一好楊氏說云一好謂好善不怒惡也楊說疏矣一好謂純一其好思慮不雜也用志不分乃凝于神此神

一好之說也

案楊倞注刊本不怒惡作不好惡卽純一之謂李治所見訛作不怒實非原本

荀子非十二子云

案非字上原本有正論二字攷正論篇雖有鬼瑣語但此條所引全係非

十二子篇之文今刪去正論二字

飾邪說文姦言以梟亂天下嚮宇鬼

瑣使天下泯然不知是非治亂之所存者有人矣注云

禍與譎同字大也放蕩恢大也

荀子儒效篇充虛之相移易也

案移荀子作於堅白同楊注云讀爲移

異之分隔也雖聖人之知未能僂指楊氏云僂疾也言雖聖亦不可疾速指陳僂力主反楊氏又引公羊傳曰夫人不僂何休曰僂疾也齊人言也李子曰楊說宛轉不著明大抵僂曲也未能僂指言未能曲指以一二數也或以僂縷古字通用謂不能顚縷而指數之也楊氏以僂指謂爲疾速指陳者特牽何休之說耳

楊倞解荀子非綦文理綦之而亡食五綦之具之類其

綦字皆訓爲極又于五綦之下云綦或爲甚其說固近然綦正當作期古文音同者其義悉通期爲要結止宿之處固爲人所同欲也亦猶孟子所謂天下期于師曠期于子都期于易牙無煩改字

揚子重黎篇或問淳于越曰伎曲請問曰始皇方虎掇而梟磔噬士猶腊肉也越與抗眉終無撓辭可謂伎矣仕无妄之國食无妄之粟分无妄之橈自令之間而不違可謂曲矣冶曰始皇之世是古非今者族而越所請之事援古證今可謂有才伎矣然而君子之出也必仕

无妄之國食无妄之粟然後始可以分无妄之橈也令
美也間際也違去也始皇自謂德兼三皇功備五帝所
謂自美者也于此之際越不違去之則亦不直矣自令
舊注李軌謂越自令與始皇並以爲無道宋咸謂秦無
道如是越自使令之間案間原本訛作聞今據宋咸法言注改正不能違去
于秦皆非

王符潛夫論曰小兒多病傷于飽又曰哺乳多則生癰
病良以小兒氣血未完其大腸如葱其小腸如筋食飲
稍過度易致病癖也然符之此言但知節食耳不知衣

食之豐亦受病之源也俗諺有之小兒欲得安無過飢
與寒飢寒之者非故以瘠而損之所以樽節之而已亦
非謂飢之寒之而保其無疾也但樽節之則疾必差少
也是故富家兒多病貧家兒多安豈富家之養不及于
貧素者哉正以所奉者病之耳近世一醫師謂貧兒誤
得安樂法此良言也貧兒誤安則是富兒故求病也慈
幼者可不知此言乎曲禮曰童子不衣裘裳鄭云裘太
溫消陰氣使不堪苦案堪原本訛作甚今衣不裘裳且
便易案衣不裘裳且便易禮記注疏作不衣內則曰子
裘裳便易無且字未知李治所據何本

十年出就外傳居宿于外學書計衣不帛襦袴鄭云不用帛爲襦袴爲太溫傷陰氣謂十歲則已踰于髻鬣矣謂童子則已望于成人矣猶不敢以成人之體畜之者凡以爲安樂法也必待二十而後聽與長者均焉慎之至也故內則云二十而冠始學禮可以衣裘帛孔穎達云二十成人血氣強盛無慮損傷故可以衣裘帛也古人之慈幼者如此魏明帝屢失皇子王朗上疏有云人少小時常恐被褥泰溫泰溫則不能便柔膚弱體是以難可防護而易用感慨若常令小小之縕袍

案之縕袍原本作兒

溫飽今據魏志

王朗傳改正

不至于甚厚則必咸保金玉之性

案金玉王

朗傳作金石

而比壽于南山矣夫朝廷之尊君臣之嚴獻替

之際猶且以此爲深慮則夫有子者徒知養之不知所
以安之是真愛子而賊之者也

聖人之心如日賢人之心如燭又其次煨燼中微明耳
日中照天下片雲翳之曖然以昏椽燭煌煌盲風滅之
離婁無所睹焉爲日而曖然以昏爲燭而無所睹其日
與燭之罪歟有物以賊之雖有六龍之駕十圍之炬顧
不如煨燼之中之微明也蘊微明于煨燼之中似有而

若無也似無而若有也是固無所取者有能推而廣之
或可以燎原或可以亘天此莊生所謂滑疑之曜聖人
之所圖者也聖人則知所以圖之衆人則惟有任之而
已任之之久必將以堅白之昧終吾如微明焉何哉

歐陽棐永叔第三子也永叔嘗書以教之曰藏精于晦
則明養神以靜則安晦所以蓄用靜所以應物善蓄則
不竭善應則無窮雖學則可至然性近則得之易也宣
仁后崩哲宗親政蘇子瞻知定州朝辭上書曰古之聖
人將以有爲也必先處晦而觀明處靜而觀動則萬物

之情畢陳于前陛下欲有爲也惟憂太蚤不患稍遲近
世趙禮部秉文周臣作平定湧雲樓記全用歐蘇語意
曰古之君子內淵靜而外昭曠昭曠則悔吝不生淵靜
則不蔽于物其于居室也亦然寔與之處淵如也高明
之居曠如也淵靜所以存神昭曠所以知政靜以養恬
動以應物萬變之來了然吾胸中而不惑茲曠也祇其
所以爲達也歟趙禮部語雖出于歐蘇然歐蘇大旨一
本于易易之明夷曰明入地中明夷君子以莅衆用晦
而明繫辭曰寂然不動感而遂通天下之故

大抵人不能常動亦不能常靜常動則膠于陽而有以失于陰常靜則膠于陰而有以失于陽陰陽偏勝則傷之者至矣流俗蚩蚩乃欲制動以求靜靜者未至而動者先與吾敵則其病又豈止于偏勝也耶吾將見百骸之不理四體之不舉也吾能持一靜于萬動之中寓萬動于一靜之中是終日動而未嘗動終日靜而未嘗靜也而又何病焉司馬子微有言曰束心太急令人發狂東坡題靜勝軒亦云鳥囚不忘飛馬繫常念馳靜若不自勝不如聽所之皆所以斥偏勝之患也然束心太急

則所謂樛苗者也聽其所之則所謂不耘苗者也若夫
交相爲養則所謂與時偕行者矣至其終日動靜而未
嘗動靜則又非時之所能囿也其乾道變化者乎其鼓
之舞之以盡神乎

讓幾于僞而非僞也然亦有僞爲者王安石辭修起居
注力自陳慤章七八上然後朝廷許之而司馬溫公亦
然一起居注非貴仕也而二公退避如此此果僞也而
非歟後之君子當必有辨之者

天下之病莫病于似然而實不然然則天下之病不病

不仁病在于似夫仁者之害吾仁不病不義病在于似夫義者之害吾義不仁不義人得而砭之似仁似義者既自不受和扁之砭而和扁之精亦未易以窺見置砭之處

世之勸人以學者動必誘之以道德之精微此可爲上性言之非所以語中下者也上性者常少中下者常多其誘之也非其所則彼之昧者日愈惑頑者日愈媮是其所以益之者乃所以損之也大抵今之學非古之學也今之學不過爲利而勤爲名而修爾因其所爲去聲而

引之則吾之勸之者易以入而聽之者易以進也求之
前賢蓋得二說焉齊顏之推家訓云有學藝者觸地而
安自荒亂以來雖百世小人知讀論語孝經者尙爲人
師雖千載冠冕不曉書記者莫不耕田養馬以此觀之
安可不自勉耶若能常保數百卷書千載終不爲小人
也

案此句上原本有脫誤
今據顏氏家訓校正

諺曰積財千萬不如薄技在

身則今人所謂良田千頃不如薄藝隨身者也韓退之
爲其姪符作讀書城南詩云金璧雖重寶費用難貯儲
學問藏之身身在卽有餘

案此詩刊本身在則有
餘攷異云則或作卽則今

世俗所謂一字直千金者也古今勸學者多矣是二說者最得其要爲人父兄者蓋不可以不知也

前人論三古各別者從所見者言之故不同然以吾身從今日觀之則洪荒太極也不得以古今命名大抵自羲農至堯舜爲上古三代之世爲中古自戰國至于今日以前皆下古也蓋吾目之所睹者今也古今相對爲辭自非吾身之所接莫非古矣不待千載之上始得謂之古也

今人以不達權變者爲慕古蓋謂古而不今也左氏傳

曰君子以爲古書無逸曰昔之人無聞知皆是意也
俗語有心避謗還招謗無意求名卻得名此孟子語也
孟子云有不虞之譽有求全之毀俗語有任真省氣力
弄巧費功夫此周官語也周官云作德心逸日休作僞
心勞日拙

黃太史莊子內篇論不取向郭以爲二子陷莊周爲齊
物之書其爲黃幾復墓誌亦云莊周雖名老氏訓傳其
斬伐俗學以尊黃帝堯舜孔子自揚雄不足以知之又
曰予嘗問以逍遙遊幾復曰嘗恨魏晉以來誤隨向郭

陷莊周爲齊物至謂尺鷃與海鵬

案尺鷃郭注莊子作斥鷃

之二蟲

又何知是則魯直之得莊旨者深矣然其內篇論首云
鷦鷯之小鷃鷃之細均爲有累于物則此言反與向郭
輩同之是又何耶蓋將取彼以證此舉麤以及精而用
意過差賓主不明遂使前後之辭自相爲戾耳讀者不
可以不審思之

莊子齊物論喜怒哀樂慮歎變熱姚佚啓態舊說茲十
有二者皆情性之異其理甚乖蓋慮歎則怒哀之類或
以變其常姚佚則喜樂之類或以作其態故其下繼之

曰樂出虛蒸成茵謂聲響出于虛寂茵草出于薰蒸亦
猶喜怒哀樂一出天機之自然爾故其下又繼之曰日
夜相代乎前而莫知其所萌懃字成玄英謂爲屈伏不
伸陸德明音釋云之涉反且曰司馬云不動貌按玉篇
此字凡五音二解其之涉切者引司馬彪莊子注云不
動貌其奴協切者義亦同上其之入秦入涉立三切者
怖也彪解之爲不動者亦對變而言之蓋與成玄英所
謂屈伏不伸爲性情十二之一者正同非也若依玉篇
作怖謂慮歎之甚則必變而爲憂怖其說雖通其意甚

狹今亦不用竊以爲此字從執從心當讀如執音蓋人心之所主謂其常情焉耳以慮歎而變其常豈止怖畏而已哉將爲狂爲癡而無所不至矣

莊子齊物論夫隨其成心而師之誰獨且無師乎奚必知代而心自取者有之愚者與有焉治曰知讀從智代交也而汝也謂人人各自有師何必智交于汝心然後自取而始有之故雖愚蒙之人亦有成心可隨而師之也成心者呂惠卿所謂吾所受于天而無所虧者也薦蓆也草亦得以言薦莊子齊物論麋鹿食薦薦卽草

也趙充國傳云今虜亡美地薦草此薦字意與莊子稍別薦草對美地爲言則薦者特以見其草之茂盛云耳謂草之盛一如所坐薦然

健羨健忘健倒健者敏速絕甚之謂莊生之屏健羨則孟子之寡欲老子之弱其志也健羨非必爲惡凡有所甚欲皆謂之健羨也

莊子養生篇爲善無近名爲惡無近刑猶云毋爲善以取名毋爲惡以取刑近親附之謂

德充符云狔子食于其死母者少焉眴若皆棄之而走

不見己焉爾不得類焉爾食字或音嗣或音飲邑錦反
皆非也食本如字讀食于其死母猶言就食于其死母
就食則就乳也不煩更發他音

胥易伎係于應帝王疏則云胥勞苦改易形容于天地
篇疏則云以是非更相易奪皆不得其說蓋胥易者以
才智妄易是非伎係者以技藝自爲拘係故其下文繼
以爲勞形怵心者也胥上聲

莊子天地篇漢陰丈人章下孔子曰彼假修渾沌氏之
術者也識其一不知其二治其內而不治其外夫明白

入素無爲復樸體性抱神以遊世俗之間者汝將固驚耶且渾沌氏之術予與汝何足以識之哉舊解及呂解皆以漢陰丈人背今向古不知因時任物之易爲非真修渾沌氏之術者故孔子有假修之語而且有不知其二不治其外之譏以予觀之理或不然顧前後問答皆深與漢陰之意初無奪之之辭蓋渾沌氏之術無得而修漢陰丈人特假之耳亦猶直寄焉與夫寓諸庸之謂也識其一抱一之謂不知其二無所于雜之謂治其內立乎本原之謂不治其外無所事事之謂豈以不知其

二便謂不通不治其外便謂偏枯耶古人之文不必以
勢拘所貴以情得語似相戾而意實相貫詩書中類此
者不可以概舉也讀者承上假修之語遂并其下文而
誤認之甚無謂也夫所謂明白入素至以遊世俗之間
者正所謂識其一不知其二治其內而不治其外也

案識

其一下原本有而
字今據莊子節去

夫所謂汝將固驚者正所謂渾沌氏

之術予與汝何足以識之也若別以明白入素至以遊
于世俗之間者以爲真修則前所謂全德之人果謂誰
哉治嘗謂世之讀書者往往用意太過而治莊老者爲

尤甚何者爲其說說而無窮也使說說而有窮夫又何
足以謂之道惟說說而無窮故終日言而未嘗言終日
不言而有若雷霆之號號也其知者由是而之其不知
者亦由是而之此道之所以難明也彼以漢陰爲假而
非真者必以爲一與二具舉內與外並行天人無際動
靜兩遂始可謂之真修也漢陰丈人僅能得其一而盡
迷其二僅能得其內而盡忘其外是烏足以爲渾沌氏
之術乎曰乃若所論益以知漢陰之爲至人矣夫天人
之無際動靜之兩遂謂之混同無間以併包內外聖王

之道固也亦盍以此章前後之旨明之此章本旨大率
不過以機械機事機心爲非道以德全形全神全爲至
道條條井井無他蹊徑之難覩也今而強爲誇大之說
無可爲而爲不可爲之爲無可言而言不可言之言鑿
之又鑿鑽之又鑽勞筋苦骨必待胸喘膚汗四體不能
運掉而後謂之得也不亦狂惑哉又況天人之無際非
以其機械機事機心屬之人也曰人者直對天而命之
人耳動靜之兩遂非以其機械機事機心屬之動也曰
動者直對靜而命之動耳乃今混而一之謂之爲天者

必參以機械機事機心之人謂之爲靜者必參以機械
機事機心之動始名真修則亦異夫混同無間以併包
內聖外王之道者矣

莊子說佝僂丈人承蜩嘗讀至此而疑之蜩蟬也佝僂
者承之則亦安用而取之耶後讀禮記及荀子始得其
說禮記內則數庶羞則有爵鶚蜩范等物鄭氏注云蜩
蟬也范蜂也又荀子致仕云耀蟬者務在明其火振其
樹而已火不明雖振其樹無益也楊倞注曰南方人照
蟬取而食之則知承蜩者所以取供食用耳

戰國策劇辛諫楚頃襄王曰

案劇辛今本戰國策作莊辛

黃鵠其小

者也蔡聖侯因是已

案聖侯今本戰國策作靈侯

蔡聖侯其小者也

君王之事因是已

案蔡聖侯因是已君王之事因是已二句攷今本戰國策蔡靈侯因是以

南遊乎高陂北陵乎巫山君王之事因是以左州侯右夏侯皆作以字連下爲句而此本皆作已字斷句且引莊子因是已爲證未知李治所據何本此與莊子山木篇觀彫陵異鵠其

說頗相類但立意殊別耳戰國時縱橫之學盛家自爲

師人自爲徒所趣雖各不一而于言語誤著之間遞相

仿託故其辭旨雷同者甚多不獨是事也此因是已三

字亦見之于莊子齊物論然語同而意二劇辛所謂因

是己者謂由此事遂至于如此延叔堅戰國策論曰因
是己因事已復有是也延論近之若莊子之所談則大
異于是矣莊子以爲道隱于小成言隱于榮華故有儒
墨之是非遂有因是因非之說又繼之以指馬之喻莛
楹厲施之譬且舉狙公之賦芋而以昭文之鼓琴師曠
之枝策惠子之據梧結之喻以指馬則無物不然無物
不可矣譬以莛楹厲施詼詭譎怪道通爲一矣舉狙公
之賦芋則以明夫聖人之所休終之以三子之無成以
明夫聖人之所圖則盡矣蔑有以加矣此其所以能齊

物乎秋水篇因其所大而大之則萬物莫不大因其所
小而小之則萬物莫不小因其所有而有之則萬物莫
不有因其所無而無之則萬物莫不無因其所然而然
之則萬物莫不然因其所非而非之則萬物莫不非正
與齊物論相爲表裏蓋皆究竟言之初非劇辛之所能
知也劇辛之徒徒借其語以簧鼓云耳

莊子徐無鬼心之于殉也殆凡能其于府也殆

案其于
今本莊

子或誤
作于其

殆之成也不給改禍之長也茲萃不給改者不

疾改也疾改則禍不至矣惟其不速改是以其禍滋多

故其下文云其反也緣功其果也待久而人以爲己寶
不亦悲乎其反也緣功謂一與道相戾緣以危殆爲功
能其果也待久謂果于迷繆其所由來非一日而人以
此爲己寶爲可悲也此皆覆說殆之成禍之萃也呂解
不給改以爲不暇給則其禍之長也茲萃一句贅矣茲
滋古字通

天下篇以禁攻寢兵爲外以情欲寡淺爲內其小大精
粗其行適至是而止此數句郭解以下屬彭蒙田駢慎
到呂解以上屬宋鉞尹文郭說爲失呂說爲得

管子齊國老人語曰

案齊字上原本脫管子二字今增

君不奪農時則

一國之人皆有餘食矣不奪蠶要則一國之人皆有餘衣矣註云蠶要者以蠶事為要非也上云農時則蠶要者亦切要之時也

商鞅為秦築冀闕宮庭于咸陽徙都之令父子兄弟同

室內息者有禁

案有史記作為

同室內息謂同居一家家中有

子息而無所務者有刑其所務者則必兵農二者而已

近觀商子之書則又得其詳焉商子賞刑篇曰

案賞刑原本訛

作刑賞今據商子改正

聖人為用也一賞一刑一教一教者雖曰

聖智巧倂厚樸皆不能以非功罔上利

案皆今本商子作則

然富

貴之門要存戰而已矣父子昆弟

案上今本商子作兄

知識婚姻

合同者皆曰務之所加戰而已矣故壯者務戰老弱務守死者不悔生者務勸此臣之所謂一教也然則商鞅之禁特主兵事言之兵事畢足然後及于農也

呂氏春秋荆有佽飛得寶劍於于越高誘註云吳邑也荀子勸學篇于越夷貊之子生而同聲長而異俗教使之然也楊倞注云于越猶言吳越且引高誘爲據予按春秋定公五年於越入吳杜預曰於發聲也孔穎達以

爲越是南夷夷言有此發聲史官或正其名或從其俗
史異辭無義例公羊傳則曰於越者未能以其名通也
越者能以其名通也何休注曰越人自名於越君子名
之曰越赤狄以赤進者狄于北方總名赤者其別與越
異也吳新憂中國士卒罷敝而入之疾罪重故謂之於
越范甯曰舊說於越夷言也春秋卽其所以自稱者書
之見其不能慕中國故以本俗名自通攷數家之說雖
有小異然皆以於越與越同爲一國呂氏及荀卿子所
言于越正指於越耳于於二字音聲小別義理無殊自

不得以于爲一國越爲一國也今高誘乃以于越爲吳
邑楊倞又以于越爲兩國何陋如之誘誤走者也若倞
者真類夫隨人誤走而又呼他人使隨已而東西也大
抵于越與句吳本皆夷語卽漸就簡而入于華耳此亦
豈有難曉之理哉于越之說錯謬已如此市本荀子書
又以于字作干魚魯虛虎之舛晚生後進何所適從

敬齋古今註卷五

終

敬齋古今藪卷六

元 李 治 撰

法帖載梁侍中蕭子雲所書列子之說云云又三年大穰穰字作壤古字或通用

梁周興嗣千文說者謂上得王羲之故書皆斷爛脫絕前後倒複不可讀今興嗣次之一夕書成而髮盡白然今法帖漢章帝所書已有千字文中百餘字何哉豈梁世所傳得羲之故書已先書漢章帝之書乎

西清詩話辨瘞鶴銘華陽真逸撰

案華陽原本作華陶今據瘞鶴銘原刻改

正爲陶隱居無疑而以爲歐陽公謂爲顧況道號及蘇子美謂爲右軍書皆非子美論其書爲右軍筆恐自出一時所見歐陽公博古謂華陽真逸顧況道號語必不妄古人名稱同者甚多豈陶顧二公偶同此號耶

予家舊蓄米帖四十有五裝爲大看策其中一幅載筍簡法甚妙大槩每一簡用筍葉兩片雜膠鰓髹漆等黏連其背復用漆押其邊又一幅前有圖書印章十餘枚皆古文或玉箸篆有曰天水米芾者有曰米芾元章者有曰火宋米芾者有曰米芾及單芾字者有曰辛卯者

有曰甲寅者有曰丙午丁未及癸酉者後有數十語云
正人端士名字皆正至于所紀歲時亦莫不正前有水
宋故有火宋別之

宣和畫譜載李公麟麟作畫以立意爲先布置緣飾爲次
蓋深得杜甫作詩體製甫作茅屋爲秋風所拔歎雖衣
破屋漏非所恤而欲大庇天下寒士俱歡顏公麟作陽
關圖以別離慘恨爲人之常情而設釣者于水濱忘形
塊坐哀樂不關于其意其他種種類此子姪壻張子敬
云公麟此筆當取杜牧齊安郡晚秋詩意蓋其詩末句

云可憐赤壁爭雄渡惟有蓑翁坐釣魚此論甚好

農家者流往往呼粟麥可食之類以爲物事此甚有理
蓋物乃實物謂非此無以生也事乃實事謂非此無以
成也此其言可與粒我烝民莫匪爾極烝民乃粒萬邦
作乂之語相爲表裏

世以三命推運行者謂遇值本命及相衝之宮則凶咎
不祥是不然相衝而凶固自其宜也我以木而處夫木
之位我以水而行夫水之時當有大來之吉又奚凶咎
爲哉究其大指亦所以儆戒乎太盛云耳夫憂喜相尋

吉凶同域福或基于危駁之中禍或胎于通達之會庸庸者誠不足以及此惟明智之士于是乎深致力焉夕惕若厲雖休勿休故能安而益安尊而益尊蔑有一之患也本命之說實出于此

日者李君顯道號稱鹿山人瞽而慧論人間事極有理致因歎風俗之偷乃曰吾欲使天下無目之人有靈識者略依往古皆習爲樂師伶人其少壯有力而不屑爲伶倫者可官給碓磴使自食其力不必如我輩以口舌爲衣食此亦正風俗之一端也

素問金匱真言論曰春善病鼽衄

案鼽衄原本作鼽衄今據素問原文改正

夏善病洞泄寒中秋善病風癰冬善病痺厥故冬不按

蹻春不鼽衄春不病頸項仲夏不病胸脅長夏不病洞

泄寒中秋不病風癰冬不病痺厥殄泄而汗出也故立

子王砭注云

案王砭原本作王冰今據杜甫詩題改正

按謂按摩蹻謂如蹻

捷者之舉動手足是所謂導引也然擾動筋骨則陽氣

不藏春陽氣上升重熱熏肺肺通于鼻病則形之故冬

不按蹻春不鼽衄鼽謂鼻中水出衄謂鼻中血出又于

冬不病痺厥下注云此上五句並為冬不按蹻之所致

也治曰王砮謂按蹻爲導引則然謂四時諸病皆由冬
月按蹻所致則不然冬不按蹻下必多有脫誤第後人
弗思耳且上文春善病𩑦𩑦至冬善病痺厥所謂善病
者謂每一時多有此證也繼云冬不按蹻春不𩑦𩑦至
冬不病痺厥文勢全不相屬而遽謂四時之病皆由冬
月按蹻而得無此理也夫按蹻之術以常人推之能知
者百一其能行者又百一果按蹻而病蓋萬一而有此
病也在萬人之中其九千九百九十有九由不解按蹻
悉獲安康其一人獨以按蹻之故遂得四時諸病則按

躄者非吉祥之道乃殺人之具也何爲古先賢達傳之天下後世耶夫戶樞之不朽以旦夕之開闔也流水之不腐以混混而常新也詘信俛仰以利形進退步趨以實下不云動作按摩有以傷生也故道家者流多說熊經鳥伸龍攫虎搏之效

案熊經原本作熊頸攷莊子及後漢書華佗傳有熊經乃道家

導引之術今改正

而華佗常以五禽之戲爲將攝之方初無冬

夏之別也又隋世巢氏作病源數十卷每論一證必處以導引一術亦未嘗以冬不按躄爲主也按本經血氣形志篇曰形苦志樂病生于筋治之以熨引形數驚恐

病生于不仁治之以按摩又奇病論曰息積不可灸刺
積須導引服藥藥物不能獨治此皆詳明按蹻之益亦
不說冬三月不得爲之也王砭作注輒立此說者必以
爲本經四時調神大論有曰冬三月是謂閉藏水冰地
坼無擾乎陽去寒就溫無泄皮膚使氣亟奪旣據此說
復見冬不按蹻春不勦衄之文故云擾動筋骨則陽氣
不藏春陽上升重熱熏肺肺通于鼻病則形之此真誤
矣且勦衄之證猶得以強言之若其下文春病頸項夏
病胃脇洞泄寒中秋病風瘧冬病痺厥豈盡爲重熱熏

肺而然乎而砭一主于冬月按蹻所致是決不可信者也按本經生氣通天論云春傷于風夏乃洞泄夏傷于暑秋爲咳瘧秋傷于濕冬爲痠厥冬傷于寒春必病瘟由是而言春夏秋冬無論啓閉政宜隨時導引以開通利導之但勿發泄使至于汗出耳竊疑本經當云冬不按蹻春不勦劬或病頸項春不按蹻仲夏必病胃脇長夏必病洞泄寒中夏不按蹻秋必風瘧秋不按蹻冬必痺厥其殮泄而汗出也一句殮字當析之爲勿令二字如此則辭旨俱暢可爲通論矣大抵導引四時皆可爲

之惟不得勞頓至于汗出而已苟勞頓至于汗出則非徒無益或以反致他疾不特于閉藏之時爲不可雖春夏發生長育之時亦不可王太僕不悟本經舛漏堅主冬不按蹻謂按蹻則四時俱病蓋爲紙上語所牽而肆爲臆說也利害所繫甚重予于是乎有辨

內經言腎者作強之官技巧出焉技雖不至于道亦游于藝者之所貴巧雖未至于神亦妙萬物而爲言不作強則何以得之故知作強者乃精力之謂

大論曰道者聖人行之愚者佩之王冰注云聖人心合

于道故勤而行之愚者性守于迷故佩服而已砵說非也佩服也古字通用果能佩服于道是亦聖人之徒也安得謂之愚哉

湧泉穴在足心之上濕氣皆從此入日夕之間常以兩足赤肉更次用一手握指一手摩擦數目多時覺足心熱卽將腳指畧畧動轉倦則少歇或令人擦之亦得終不若自擦爲佳先公每夜常自擦至數千所以晚年步履輕便僕性則懶每臥時只令人擦至睡熟卽止亦頗得力向來鄉人鄭彥和自太府丞出爲江東倉使足弱

不能陞辭樞筦黃繼道教以此法踰月卽能拜跪又見
雪人丁邵州致遠病足半年不能下床遇一道人亦授
此法久而卽愈偶記憶得因筆于冊用告病者豈曰小
補之哉

難經說老人寤而不寐少壯寐而不寤以謂少壯者血
氣盛榮衛之行不失其常故晝日精夜不寤也老人血
氣衰榮衛之道濇故晝日不能精夜不得寐也以予思
之不特如此大抵晝作夜息人之常也是在晝則當有
經營之事在夜則當無繫滯之慮精神資稟雖各不同

然用之得其常則于其不用之時亦得其常苟用之不得其常則一切反是矣衰老之人經事既多遭變不少筋骸疋骹目耗耳重一毫之營若負泰華度前揣後于利害之表商是摧非于與奪之間憂未朕而已憂患已銷而猶思衆人皆息已獨勿休所以正晝昏昏夜反無寐此蓋精神用反其常而寤寐亦反其常也而年少之人志剛氣銳神壯膽擗鬪力則膂力有餘角智則智思無勸劃然而動屹然而止事之未至也利害無所撓其慮事之既往也是非無所留其懷衆休而休衆作而作

所以晝日常精夜則常寐此蓋精神用得其常而寤寐亦得其常也故男女十四五以下纔得枕卽穩睡亦以其無情欲也白樂天司馬君實皆明哲過人而樂天有詩云年衰自無寐不是守庚申溫公有詩云蘇秦六國印力取鴻毛輕白圭黃金產運智立可營如何五更睡百方終不成此二公亦當是精神疲敝而然若夫子元圖爽臥內酣寐忠愍扞賊省中安寢軒轅畢詠倚牆熟睡涪翁削官投牀鼻鼾閤通照徹遇物了了又不當以老少論也子過五十來昔昔每苦無寐或者教以數息

倣而行之竟亦不能寐也近得閑閑公一說名速睡法
云但于當睡之時帖枕擁衾置身安穩然後平心定慮
存真氣如黃金細綫發兩踵自後而上過腰合而爲一
衝脊上頂至前髮際卻散而爲二繞黃庭聽會橫行相
交于人中環口貫下齦復合爲一下咽喉徑入太倉留
之不動勃然出氣四道當如火熱青者入肝紅者入心
白者入肺黑者入腎四氣俱滿然後真氣下臍入少府
陰交復散而爲二下膝下臙下跌前裏中指尖順行度
湧泉復至踵謂之一匝存想至五七匝已溟滓然人睡

鄉矣大段無睡之人行之不過十數匝亦自得睡或用
銅人脈絡法兼達兩手指更佳予按之其效一如所云
閑閑公又云此法乃金丹下手處也金丹大藥予未敢
議但使昔昔得好睡眠則其神通變化與夫所謂金丹
大藥者復何擇哉

政和本草盧會條下本經云俗呼爲象膽以其味苦如
膽故也雷公云凡使勿用雜膽其象膽乾了上有青竹
艾班此物是胡人殺得白象取膽乾入漢中是也而藥
譜云盧會樹脂也本草不細委之謂之象膽殊非也藥

譜破本草不細委謂盧會爲象膽爲非此說不明本草
正言俗以盧會味苦如膽故呼象膽則本草非指此物
是象膽特名象膽耳其言盧會本胡人殺象取膽爲之
凡使勿用雜膽者乃雷公之謬也而藥譜不專指雷公
之謬而但言本草之非無別白甚矣

江南野錄載韓熙載服朮食桃李瀉十數朮人長寸餘
而卒此未必然予友人張君耆服蒼朮幾三十年尤喜
食桃李未聞有此異也熙載之敗此自根本不固耳李
後主疑北人往往賜死韓縱酒多畜婢妾常隨後房歌

姬乞丐此其所以來术人也多食桃李何損于术耶嘉
祐本草蒼白二术不别出但于蒼术條下引藥性論云
白术忌桃李雀肉菰菜青魚豈熙載所服者乃白术非
蒼术而然歟

黃庭經含漱金醴吞玉英保灌玉廬以自償玉廬一身
也保保養也灌澆灌也言脾胃爲倉廩之宮能保灌一
身使之安樂而還以自償耳自償者謂養身亦所以自
養也

道家三一說上一中一下一是謂三丹田達道者能使

三復爲一一復爲三蓋三丹田精氣神之舍也曰下丹田關元精之舍中丹田絳宮神之舍則上丹田泥丸爲氣之舍也而上丹田果非氣之舍也曰下丹田爲氣海可爲氣之舍則精之舍安在哉以精舍諸中丹田固不可若以舍諸上丹田尤不可者也乃知下丹田雖名氣海實精舍也況下丹田不專在氣海蓋在脾臍與兩腎之間以臍腎爲人受命之始則下丹田爲精之舍可無疑也又氣海有二舊說氣海在臍下素問則謂膻中氣海也直兩乳間準素問所言則中丹田爲氣之舍可無

疑也精舍諸下丹田矣氣舍諸中丹田矣神不舍諸上丹田將安所寓乎此三一之正處也道家雖以三丹田爲精氣神之舍而不著所處故爲別白之

養生家有胎息之說息氣也息之爲義大矣哉脈訣以一呼一吸謂之一息者出入之義也俗以音問相通謂之消息者往來之義也以稱貸取贏謂之利息者增羨之義也以舍勞從逸謂之止息者停憩之義也人有嗣續謂之子息者生滋之義也人而物故謂之休息者了絕之義也息旣得謂之生而又得謂之死則息之爲義

不既大矣乎濂溪通書稱無極而太極晦庵云無極而太極祇是艮卦而已晦庵以艮卦當太極者政以終萬物始萬物莫盛乎艮者也艮止也止息也止息之地萬物之所終也誰知色色而形形者盡于止息中來乎且艮之爲卦也位則處丑寅之間時則當十二月正月之交此非萬物終始而何晦庵因之復論云息便是百穀之實初聞此語愍不能省徐徐以思乃大朗徹實旣爲種種復成實種實相仍種種無窮則云乎息者非百穀之種而何觀穀實之新新究萬物之芸芸吾然後知胎

息之不忘也夫息之爲文從鼻從心說者又謂自心爲
息胎息之驗觀文又可見矣自昔老子發谷神之機莊
周啓踵息之鑰玉匱則敷陳上假黃庭則演說琴心是
皆奪造化之權而挾天地之祕者也道大事重悠悠莫
知世之高亮之士雖有能言之者或隱之太深或衍之
太漫誇張詭怪無從致詰惟晁承旨明遠張太保安道
蘇端明子瞻黃太史魯直此四君子遂能曲盡要妙明
著其說晁則立合和之論張則出清微之語蘇則談隨
住之訣黃則述蓮燭之頌晁公之言曰心息相依息調

心靜靜調久久可成勝定神氣相合氣和神清清和久久可致長生張公之言曰身如蓮華及虛空中有習習清微風緜緜若存道乃通一來一往終無窮來無轍跡去無蹤散入八萬四千毛孔中蘇公之言曰數息數百此心寂然此身兀然與虛空等又有一法其名曰隨與息俱出復與俱入隨之不已一息自往或覺此息從毛孔中雲蒸霧散病除瘴滅自然明悟黃公之言曰蓮華合裏燭一寸牝馬海中燒百川糞掃堆頭親拾得道人云是元中元此四君子之言亦可謂知言之選者也予

少小多疾故常求所以攝養之方雖不得升堂濟馘亦
麤得近其藩籬曷寓崑山之同川嘗與李鼎之和論及
于此之和遂于性命者也似有印可意予因贈之以詩
云元牝機關不死根自消自息自氤氲暖于燄燄九微
火輕似飄飄三素雲白玉池心流曉潤紫金鑪口裊餘
熏未知與道相應否試作新詩一問君之和拊掌大笑
曰子得之矣不可以語非其人晁迥明遠說案晁迥原
本作晁迥
今據宋
史改正心息相依神氣相合張方平安道說身如蓮華
及虛空中有習習清微風此達摩胎息法也近世萬松

和尚著從容錄以爲達摩無胎息法人謂達摩行胎息者是其說出于曲學小智予謂萬松之說非也佛乘雖深密要不出性命二字故知胎息法祇是以性命爲一
致若謂胎息等皆妄則凡燈史所載機緣語句獨非繫
驢橛耶胎息雖不足以盡至理亦至理之所依也今一
切去之則正所謂性外求命命外求性耳性外求命命
外求性便是不識性命

靜生于動而復歸于動則所謂靜者特須臾之靜耳惟
動亦然昧者不知作力以止動刻意以求靜然後是非

相繆動靜兩失甚者或喪其心或亡其身孝義有某生者宗北劉學主太原城西一民家塊坐環堵者幾十年主氏翁媪奉事日益勤篤庚子春正月望有道人來乃舊識生者請生暫出生不可主氏強之生不得已出少間急求歸環堵中主人又強之生又不得已留坐一室既張燈道人者辭去獨翁與生坐坐久翁倒寢其傍丙夜生遽取案上菜刀亂斫翁死媪駭愕起救生又斫殺之有婢竊視噤不敢動生復瞑目端坐鄰者怪有爭鬪聲而尋復無聞噉問翁媪翁媪莫應踏門入視燈火煌

煌生坐兀然而翁媼二屍狼籍于血中矣鄰者縛生生始開目曰汝何事收我鄰者曰汝殺主氏翁媼復何言生曰我適夢中見一偷將害我主翁我倉卒以菜刀斫去又有一偷來我亦斫之仆便謂無事乃復坐靜殊不知有他鄰者執詣有司府掾范貞之給謂曰汝善人寧有害物心恐鄰者殺是翁媼而以汝當之可實語我我有以解釋汝生曰我固殺翁媼雖夢中不知所爲尙能記其彷彿此殆宿債豈可濫及無辜其亟刑我竟棄市其徒皆以爲生本非道者與媼前私冀再通故坐環

堵俟其便久而不得滿所欲遂怨媼殺之而及其翁或
曰先殺翁將逼媼媼不從故又殺之是皆非生之情也
蓋其徒恥其醜聲而故爲是說以誑外人耳此生雖愚
豈有苦心兀體如是之久而圖通一媼耶又豈有十年
之間略無斯須之隙而遽發惡意于此時耶又旣殺翁
媼時何爲不卽逃去顧乃瞑目端坐而待縛也又當有
司誘問之際何爲不妄抵冒而乃蘄速死也然則此生
竟何爲者耶就道家之說照此生之心則得其實矣此
生本自昏愚擇善不能了了癡坐成頑陰魔來舍強制

情欲常若夢寐乍出蔀屋恍若殊境既見燈火滿室精
爽交亂又驚人物在側猜忍百至及其妄動云滅妄靜
復來動靜往來總非由已揮刀袖手俱一妄中此與老
子致虛極守靜篤萬物並作吾以觀其復無異但老子
于動靜中知其所以來又知其所以去時動時靜莫不
在我故能觀萬物之復若生等輩罔罔然舍靜求動排
動索靜沈冥于妄動妄靜之坎雖未至于殺人也其去
殺人能較幾何又豈可以殺人爲有罪而以不殺人爲
無罪也哉

西方之書與中國之書往往更相假借以爲誇韓詩外傳曰人死曰鬼鬼者歸也精氣歸于天肉歸于土血歸于水脈歸于澤聲歸于雷動作歸于風眼歸于日月骨歸于木筋歸于山齒歸于石膏歸于露髮歸于草呼吸之氣復歸于人圓覺經四大之說大槩與此同之但韓傳所謂歸者一十有三而圓覺之所謂歸者止四而已顧韓說之繁重實不若圓覺之約且足也然不知韓傳竊彼書耶抑彼書之竊韓傳耶韓嬰在圓覺前不應掠取浮屠語吾意譯潤者盜嬰語耳

法華經說五欲曰淫欲曰睡眠曰飲食曰自恣曰貪欲
由此五欲遂生一切煩惱故維摩詰云汝等已發道意
有法樂可以自娛不應復樂五欲此言五欲可厭正法
可樂雖則云然終不能免愛著之病故佛說世間五欲
樂或復諸天樂比之愛盡樂萬分不及一一切愛盡雖
復正法亦不足樂況諸天樂乎況世間五欲樂乎

敬齋古今藪卷七

元 李 冶 撰

前輩論楚辭蕙肴蒸兮蘭藉奠桂酒兮椒漿及韓退之
羅池廟碑春與猿吟兮秋鶴與飛謂欲相錯成文則語
勢矯健又論韓詩淮之水舒舒楚山直叢叢謂之避對
格然子攷諸古文則不獨錯綜于對屬之間至于散語
亦多有之若荀子勸學篇云青出之藍而青于藍冰水
爲之而寒于水莊子徐無鬼篇市南宜僚弄丸而兩家
之難解孫叔敖甘寢秉羽而郢人投兵之類皆是也又

凡經史中辭倒者其義悉與此相近

相如上林賦曰丹水更其南紫淵徑其北終始灞澹出入涇渭豐鎬潦滴紆餘逶迤經營乎其內蕩蕩乎八川

分流相背而異態然後灝灝潢潢安翔徐回翯乎滈滈

東注太湖衍溢陂池李善曰太湖在吳縣案原本脫在字今據文選

李善注增入 尚書所謂震澤也沈存中駁之曰按八水皆入

大河如何得入震澤渭上老人蕭公復爲辨云此自賦

客誇大之辭廣張瑰瑋奇怪之說以動蕩人心然後列

其諷諷之言耳固非法度之言也安可以圖經地志責

其物產所生成山川所終始哉沈存中獨譏相如亦自強解事也李子曰沈存中雖似強作解事相如亦自強爲文蕭公亦與強出理文人誇誕固其常態然要不可以悖理賦雖主于華採何至使秦川之水曲折行數千里以入東南之震澤乎存中以正譏之而蕭公以權直之吾見直者之私而譏者之公也

兩都賦序道有夷隆學有麤密呂延濟曰夷平也隆盛也言代有平盛學者隨時精麤不可齊也李子曰平非對盛之辭夷言陵夷也

初齊書卷之七

二京賦天命不諂疇敢以渝

案不諂今文選刊本作不悁二字通

杜預注

左傳以諂爲疑今劉良以諂爲善誤矣賦謂高祖西都關中蓋天啟其心人基之謀天命在所不疑誰敢復變此議賦又云超殊榛櫟飛颺薛綜曰櫟捎取之也李善曰櫟大結切今人作墨竹者皆謂之櫟竹或是此字賦又云天子有道守在海外守位以仁不恃隘害薛綜曰淮南子曰天下無道守在四夷天下有道守在海外平子言狩薛綜引淮南言守其義亦同然左傳謂天子守在四夷而淮南謂天下無道守在四夷語不類者蓋淮

南子道家者流誇言之也

案李治謂平子言狩薛綜引淮南言守據今本文選皆作

守惟仁字薛綜作

人謂擇任賢臣也

文選云乘茵步輦惟所息宴善曰應劭漢官儀曰皇后
婕妤乘輦餘皆以茵四人輿以行劉良以爲後宮或行
于茵或載于輦如良所說則乘茵謂行茵褥之上如應
劭之說于餘皆以茵之下始云四人輿以行則茵亦輦
輦之屬詩文茵暢轂前漢周陽由傳同車未嘗敢均茵
憑茵蓋車中之物或因之以取名也吐茵亦同

魏文帝典論謂班固小傳毅而無所取也故載其與弟

書所云則其小之之驗也說者以武仲下筆不休爲文

章之美

案此出文選五臣注中張銑說

則旣非孟堅之意而又與魏文

之旨忤矣大抵謂毅下筆不能自休者正斥其文字汗漫而無所統云耳若果以下筆不休爲美之之辭則固之于毅乃推重之也魏文何爲而有小之之言乎

曹子建上責躬應詔詩表云晝分而食夜分而寢分音扶問反張銑曰晝分日中時也夜分夜半時也分字別無他義此語亦甚易解字旣不必發音語亦不必下注今加音注眞爲蛇畫足也若據此音則春秋二分亦合

作去聲讀之無乃太僻耶

子建之七哀主哀思婦仲宣之七哀主哀亂離孟陽之七哀主哀邱墓呂向爲之說曰七哀者謂痛而哀義而哀感而哀怨而哀耳目聞見而哀口歎而哀鼻酸而哀且哀之來也何者非感何者非怨何者非目見而耳聞何者不嗟歎而痛悼呂向之說可謂疎矣大抵人之七情有喜怒哀樂愛惡欲之殊今而哀戚太甚喜怒愛惡等悉皆無有情之所繫惟有一哀而已故謂之七哀也不然何不云六云八而必曰七哀乎

阮籍詠懷云李公悲東門蘇子狹三河張銑曰蘇秦本洛陽人洛陽三川之地則三河也沈約曰河南河東河北秦之三川郡古人呼水皆爲河耳故黃魯直送顧子敦爲河北轉運詩云西連魏三河東盡齊四履謂河南河東通爲三河也阮又云平生少年時輕薄好絃歌西遊咸陽市趙李相經過娛樂未終極白日忽蹉跎驅馬復來歸反顧望三河向日晉文王河內人故託稱三河又魯直劉明仲墨竹賦云三河少年稟生勁剛春服楚楚遊俠專場亦用阮語也是則河內洛陽河東河南河

北皆得稱之爲三河也然沈約注云河南河東河北秦之三川郡古人呼水皆爲河而張銑亦承沈說謂三川爲三河則謬矣凡近河者皆呼水爲河猶近江者皆呼水爲江固也今取三川以釋三河毋乃疎乎按史記秦惠王時司馬錯欲伐蜀張儀曰不如伐韓王問其說儀曰親魏善楚下兵三川以臨二周之郊據九鼎按圖籍挾天子以令于天下天下莫敢不聽此王業也又曰臣聞爭名者于朝爭利者于市今三川周室天下之市朝也迨至莊襄王之元年卒使蒙騫伐韓韓獻成臯鞏秦

界至大梁初置三川郡韋昭曰有河洛伊故曰三川如
史遷所記韋昭所解三川之與三河大不相類蓋三川
者謂伊水洛水竝河爲三耳

陸士衡君子有所思行末云宴安銷靈根酖毒不可恪
意謂宴安酖毒不可恪耶然不可恪三字太逕庭不似
詩家語不可當倒恪慎也可不恪則言不可不慎

皇甫士安三都賦序云二國之士各沐浴所聞家自以
爲我土樂人自以爲我民良皆非通方之論也張銑曰
二國吳蜀也沐浴洗滌也所聞謂聞其美也謂其所習

穢濁一聞美事若洗滌其耳也此說大謬沐浴所聞乃
浸漬乎本國所聞之語也吳蜀之人沐浴所聞不知中
區之大故家自以爲土樂人自以爲民良此甚易曉也
而銑說乃爾不亦謬乎大抵文選之註往往反累本文
李善指明出處中間雖有牴牾亦足以發而銑輩諸人
妄意箋釋乖背指意若是類者甚可厭也

左思三都賦其自序曰相如賦上林而引盧橘夏熟揚
雄賦甘泉而陳玉樹青葱班固賦西都而歎以出比目
張衡賦西京而述以游海若假稱珍怪以爲潤色又云

考之果木則生非其壤校之神物則出非其所于辭則
易爲藻飾于義則虛而無徵又自以爲所著其山川城
邑則稽之地圖鳥獸草木則驗之方志在序如此然自
今觀之亦未能免此弊也于蜀都則云試水客漾輕舟
娉江妃與神游又云吹洞簫發棹謳感驪魚動陽侯此
與甘泉之玉樹西京之海若復何所異至于談吳都之
賦則云巨鼇負首冠靈山大鵬嶺翻翼若垂天雖詞
人之語詭激誇大可以理貸亦其秉筆之際遐探雄擢
偶忘已之所稱也方之盧橘之誤比目之誕豈不更甚

矣乎

左思吳都賦猿父哀吟獬子長嘯李善曰山海經曰獄
法之山有獸狀如大人面見人則笑名獬冶曰山海經
曰獬見人則笑而賦言獬子長嘯當是常笑而賦作長
嘯者板本錯

左思詠史云金張藉舊業七葉珥漢貂善曰班固漢書
金日磾贊曰夷狄亡國羈虜漢庭七葉內侍何其盛也
七葉自武至平也又張湯傳贊曰張氏之子孫相繼自
宣元以來爲侍中中常侍者凡十餘人侍中中常侍固

珥貂矣然言七葉珥漢貂者乃金氏非張氏也舉其貴寵因連言之

傳咸長虞贈何劭王濟詩云雙鸞游蘭渚二離揚清暉李善曰漢書注長離靈鳥也善旣以離爲靈鳥而又以爲日月何也揣咸詩意靈鳥爲得

郭璞客傲云不塵不冥不驪不駢驪當作犁然莊子有牝馬驪牛三之語則驪字亦通又左芬離思賦親辰尋韻內尋字當作循

淵明歸去來辭或命巾車呂延濟云巾飾也周禮註云

巾猶衣也然則所謂巾車者命僕使巾其車也或者以爲小車非也

陶淵明讀書不求甚解又蓄素琴一張弦索不具曰但得琴中趣何勞弦上聲此二事正是此老得處俗子不知便謂淵明真不著意此亦何足與語不求解則如勿讀不用聲則如勿蓄蓋不求甚解者謂得意忘言不若老生腐儒爲章句細碎耳何勞弦上聲者謂當時弦索偶不具因之以爲得趣則初不在聲亦如孔子論樂于鐘鼓之外耳今觀其平生詩文槩可見矣答龐參軍云

衡門之下有琴有書載彈載詠爰得我娛豈無他好樂
是幽居歸去來辭云悅親戚之情話樂琴書以消憂與
子儼等疏云少學琴書偶愛閒靜開卷有得便欣然忘
食使果不求深解不取弦上之聲則何爲載彈載詠以
自娛耶何爲樂以消其憂耶何爲自少學之以至于欣
然而忘食耶癡人前不得說夢若俗子輩又烏知此老
之所自得者哉

東坡謂梁昭明不取淵明閑情賦以爲小兒強解事閑
情一賦雖可以見淵明所寓然昭明不取亦未足以損

淵明之高致東坡以昭明爲強解事予以東坡爲強生
事

顏延年五君詠阮步兵未云物故不可論塗窮能無慟
物故世故也一世之事舉不可論憤激之極理勢窘蹙
不能無慟或云物故卽古人也前書音義謂人死爲物
故顏以嗣宗謂古人不必論議所當論者惟在當世之
事而魏晉之交一時人物又皆不足論故託跡獨駕不
由逕路至于車迹所窮不能不慟哭也

顏延年答鄭尙書詩云何以銘嘉貺言樹絲與桐桐固

可以言樹也絲亦可以言樹乎

范蔚宗樂遊苑應詔詩末云聞道雖已積年力互頽侵

探已謝丹臚感事懷長林

案丹臚文選刊本作丹臠

又顏延年和謝

監詩云伊昔遭多幸秉筆侍兩閨雖慙丹臚施未謂元

素睽呂延濟呂向皆以丹臚爲榮祿而李善又以爲君

恩皆非也丹臚所以爲國家之光華也范意謂揣已空

疎不足以華國故感事思歸顏意謂雖無文章可以華

國爲慙亦未至始素終元如絲之改色也

徐悱敬業酬到漑詩云寄言封侯者數奇良可歎

案寄言原

本訛作何言今
據文選改正

數音所具反奇音居宜反按前漢書李
廣傳曰大將軍衛青陰受上指以爲李廣數奇毋令當
單于恐不得所欲孟康曰奇隻不耦也如淳曰數爲匈
奴所敗詳史所載此則天子語天子以廣連爲匈奴所
敗故不令獨當單于所以言數奇也若以數字爲去聲
則是運數不耦耳豈有天子于將帥以命運敕之耶當
從如說音爲所角反

鮑明遠擬古云兩說窮舌端五車摧筆鋒劉良以兩說
爲本末之說言舌端能摧折文士之筆端非也兩說者

兩可之說也謂兩可之說能窮舌端而五車之讀能摧
筆鋒云者猶言禿千兔之毫者也李善又以魯連說新
垣衍及下聊城爲兩說則益疎矣

開元間呂延祚苦愛文選以李善注解徵引載籍陷于
未學述作之由未嘗措翰乃求得呂延濟劉良張銑呂
向李周翰再爲集注然則凡善所援理自不當參舉今
而夷考重複者至居十七殆有數百字前後不易一語
者辭劄兩費果何益乎延祚始嗤善注祇謂攪心予竊
嗤延祚徒知李善之攪心而不知五臣之競攪也

王摩詰送元安西詩云渭城朝雨浥輕塵客舍青青柳
色新勸君更盡一盃酒西出陽關無故人其後送別者
多以此詩附腔作小秦王唱之亦名古陽關予在廣寧

時學唱此曲于一老樂工某乙云渭城朝雨

和刺里
離賴

浥

輕塵客舍青青

和刺里
離賴

柳色新勸君更盡一盃酒

和不

西

出陽關

和刺里
來離來

無故人當時予以爲樂天詩有聽唱陽

關第四聲必指西出陽關無故人一句耳又誤以所和

刺里離賴等聲便謂之疊舊稱陽關三疊今此曲前後

三和是疊與和一也後讀樂天集詩中自注云第四聲

謂勸君更盡一盃酒又東坡志林亦辨此云以樂天自
注驗之則一句不疊爲審然則勸君更盡一盃酒前兩
句中果有一句不疊此句及落句皆疊又疊者不指和
聲乃重其全句而歌之子始悟晁日某乙所教者未得
其正也因博訪諸譜或有取古今詞話中所載疊爲十
數句者或又有疊作八句而歌之者予謂詞話所載其
辭粗鄙重複旣不足采而疊作八句雖若近似而句句
皆疊非三疊本體且有違于白注蘇志亦不足徵乃與
知音者再譜之爲定其第一聲云渭城朝雨浥輕塵依

某乙中和而不疊第二聲云客舍青青柳色新直舉不
和第三聲云客舍青青柳色新依某乙中和之第四聲
云勸君更盡一盃酒直舉不和第五聲云勸君更盡一
盃酒依某乙中和之第六聲云西出陽關無故人及第
七聲云西出陽關無故人皆依某乙中和之止爲七句
然後聲諧意圓所謂三疊者與樂天之注合矣

李白詩堯祠送別云朝策羴眉騶舉鞭力不堪羴牛駮
也騶黃馬黑喙也然則羴眉騶者黃馬黑喙而眉斑駮
者耳

李太白送李女真歸廬山詩云一往屏風疊乘鸞著玉鞭謂其地形疊疊然也

杜子美秋雨歎云關風伏雨秋紛紛或者謂關風二字無出處偶讀文選詩謝靈運初發都云述職期關暑理棹變金素翰曰關暑夏末暑闌也關風當用此語謂薰風闌盡將變而爲涼風也一本闌作蘭古字通用

杜詩醉中往往愛逃禪或者云逃禪之逃卽逃楊逃墨之逃逃畔也杜詩此言謂逃禪而醉也或者之論非是逃固畔也而謂此詩爲畔禪而醉則誤矣逃禪者大抵

言破戒也子美意謂蘇晉尋常齋于繡佛之前及其既醉則往往盡破前日之戒蓋逃禪者又是醉後事耳若謂畔禪而醉何得先言醉中乎又有人說云逃禪者逃于禪謂竄投于禪也如其說則大與孟子逃楊逃墨之逃異矣

陶淵明夏日臥北牕下清風颯至自謂羲皇上人羲皇上人謂宓戲以上人杜子美陪鄭廣文遊何將軍山林詩云看君用幽意白日到羲皇蓋用陶語也杜詩本或作白日到羲黃謂伏羲黃帝時意亦同之近世劉過無

黨題歸去來圖云餘子風流空魏晉上人談笑自羲皇
劉所謂上人者果何等語耶又以羲皇對魏晉則亦疎
矣編纂時有如此者便可削去

詞人多用劃字杜甫詩久居夔府將適江陵云勞心依
憩息朗詠劃昭蘇荆甫述懷云得喪初雖失榮枯劃易
乖退之聽穎師彈琴云昵昵兒女語恩怨相爾汝劃然
變軒昂勇士赴敵場東坡後赤壁賦劃然長嘯草木振
動劃之一字蓋出于莊子內篇養生主內庖丁解牛砉
呼然嚮許然奏刀騞呼然騞劃雖不同而古字音聲相

近者皆通用

顏真卿放生池碑銘序云謹緣臯陶奚斯歌虞頌魯之義述天下放生池碑銘一章所用奚斯事蓋承班固之誤也班固兩都賦序云臯陶歌虞奚斯頌魯同見采于孔氏按魯頌閟宮云松桷有舄路寢孔碩新廟奕奕奚斯所作奚斯乃作新廟者也而非作頌之人也班固何得以與臯陶爲配乎此雖班固之失蓋又先承揚雄之誤也法言學行篇曰正考父常晞尹吉甫矣公子奚斯常晞正考父矣按大雅崧高云吉甫作誦其詩孔碩其

風肆好以贈申伯烝民詩云吉甫作誦穆如清風仲山甫永懷以慰其心又商頌那序云微子至于戴公其間禮樂廢壞有正考父者得商頌十二篇于周之太師以那爲首吉甫固作頌者若正考父但爲得頌之人奚斯則但爲頌中所稱之人三人了不相關揚雄所謂常晞者爲晞何事乎此雖揚雄之失蓋又先承太史公之誤也史記謂商頌爲正考父所作雄旣承馬遷之誤復誤以奚斯亦爲作詩之人也司馬遷揚雄班固號稱漢大儒而謬誤若此況後之學者乎

乖角猶言乖張蓋俗語也然唐人詩有之獨孤及酬于
逖畢曜問病云救物智所昧學仙願未從行藏兩乖角
蹭蹬風波中

退之論三子云孟氏醇乎醇者也荀與揚大醇而小疵
然卽韓之言而求韓之情所謂荀揚之疵亦自不免退
之平生挺特力以周孔之學爲學故著原道等篇觝排
異端至以諫迎佛骨雖獲戾一斥幾萬里而不悔斯亦
足以爲大醇矣奈何惡其爲人而日與之親又作爲歌
詩語言以光大其徒且示已所以相愛慕之深有是心

則有是言言既如是則與平生所素蓄者豈不大相反
耶若送惠師詩云惠師浮屠者乃是不羈人送靈師云
飲酒盡百錢嘲諧思愈鮮送文暢云已窮佛根源麤識
事輓輓送無本云老懶無關心久不事鉛槧欲以金帛
酬舉室常顧苦感反領聽穎師彈琴云嗟予有兩耳未省

聽絲簧自聞穎師彈起坐在一牀送澄觀云皆言澄觀
雖僧徒公才吏用當今無別盈土人云山僧愛山出無
期俗士牽俗來何時廣宣上人頻見過云久爲朝士無
裨補空愧高僧數往來又有送文暢高閑等序招大顛

三書皆情分綢繆丁寧反覆密于弟晁又其與孟簡書則若與人訟于有司別白是非過自緣飾以是而摘其疵何特荀揚已乎文公而猶若是自其下者蓋又不足道矣

神祠名之閼宮者謂嚴邃之宮也名之清宮者謂清淨之宮也而亦得以爲明宮韓愈南海神廟碑云明宮齋廬上雨旁風無所蓋障亦得以爲壽宮崔融啓母廟碑云壽宮澹兮不擾蓋明宮則神明之所宅壽宮則死而不亡之義也

柳子厚遊朝陽巖詩惜非吾鄉土得以蔭菁茆又禪室
云法地結菁茆團團抱虛白構屋用茆自是常事必言
菁茅者當是彼土所出別有名爲菁茆者也按尙書禹
貢荊州云包匭菁茅孔安國云匭匣也菁以爲菹茅以
縮酒疏云周禮醢人有菁菹鹿麇故知菁以爲菹鄭云
菁菁菁也菁菁處處皆有而令此州貢者蓋以其未善
也左傳僖四年齊桓公責楚云爾貢包茅不入王祭不
供無以縮酒是茅以縮酒也禮郊特牲云縮酒用茅明
酌也周禮甸師云祭祀供蕭茅鄭興云蕭字或爲蒿讀

爲縮束茅立之祭前沃酒其上酒滲下若神飲之故謂

之縮杜預解縮酒全用鄭興之說而安國言菁菹亦本

周禮也史記齊桓公欲封禪管仲知其不可窮以辭

案原

本知訛郤今據史因設以無然之事云古之封禪江淮

之間三脊茅以爲藉此乃拒桓公耳非荊州所有也鄭

元又以菁茅爲一物團猶纏結也菁茅茅之有毛刺者

案原本脫一茅字重之故既包裹而又纏結也據前諸

今據尙書疏增入

說孔安國以菁茅爲二物鄭康成以爲一物然鄭說菁

爲菁菁則不說茅說菁茅爲一物則不說菁其意亦以

菁與菁茅爲二物也是則子厚詩所用菁茅豈鄭玄所謂茅之有毛刺者歟

孟郊失志夜坐思歸楚江詩云死辱片時痛生辱長年

羞

案原本羞訛著今據孟郊詩改正

青桂無直枝碧江思舊遊又失意

歸吳寄劉侍郎云至寶非眼別至音非耳通因緘俗外

辭遠寄高天鴻夫窮通得失固自有命郊一躓踣便爾

忿懟欲死又自以至寶至音非人耳目所能及因之綴

緝語言布露當世則郊之爲丈夫也何其淺也人言郊

及第後有一日看盡長安花之句知其必不遠到然何

待已第時語但觀此未第時語已足以見其人矣

玉川子月蝕詩云歲星主福德官爵奉董秦忍使黔婁
生覆尸無衣巾東坡云詳味此詩則董秦當時無功而
享厚祿者董秦李忠臣也天寶末驍將屢立戰功雖麤
官亦頗知忠義代宗時吐蕃犯闕徵兵忠臣卽日赴難
歿其終始非無功而享厚祿者不知玉川何以有此句
李子曰盧仝以黔婁對董秦則初不論功但論其德之
何如耳東坡乃謂秦驍勇有戰功無乃失評甚歟忠臣
之節度淮西也貪殘好色將吏妻女美者多逼淫之悉

以軍政委妹婿節度副使張惠光惠光挾勢暴橫軍州
苦之忠臣復以惠光子爲牙將暴橫甚于其父都虞候
李希烈忠臣之族子也因衆心怨怒殺惠光父子而逐
忠臣忠臣之所爲如此歲星主福德乃以官爵奉之玉
川子所以涕泗而訟之天也玉川之詞直而東坡曲之
其亦誤矣然則有功如秦者不當官耶非也以有功而
官之爲當則國家之權也以無德而祿之爲不當則君
子不易之論也二者各自有道而妄欲一之則非其道
也東坡稱忠臣頗知忠義始終有功意以爲大厯中君

父在難不擇日而行爲可尙也此爲可尙獨不念建中之變乎建中末朱泚僭逆乘輿播越忠臣久懷缺望望風投泚其所謂知忠義而始終有功者果安在哉且舍功而論德德則殘賊矣舍德而議功功則叛人矣兩無所取而東坡猶深惜之殆見堞而不見空者也莫細于堞莫大于空見莫細而不見其莫大者有物蔽之而然耳歲星主福德舊作坐福德今改作主

牛僧孺守在四夷論曰夏捨淑德而嬖姝喜是色攻而亡也商捨德音而耽愔愔是聲攻而亡也按左傳子革

誦祁招之詩曰祁招之惓惓式昭德音杜預曰惓惓安
和貌又韻書惓字訓靖施之德音則誠然也故嵇康琴
賦其辭曰惓惓琴德不可測兮體清心遠邈難極兮李
周翰注云惓惓靜深也李善又引劉向雅琴賦云游子
心以廣觀兮聽德樂之惓惓然則惓惓者所以形容德
音之美也子政叔夜皆以此美琴德而僧孺乃謂商耽
惓惓而亡則是以惓惓同之靡靡也亦大誤矣

杜牧晚晴賦睹八九之紅芰芰菱屬也菱花色黃而不
紅杜旣言紅又以比美女則當指芙渠也杜誤以芰爲

蓮

張祜詠薔薇花云曉風抹盡燕支顰夜雨催成蜀錦機
當晝開時正明媚故鄉疑是買臣歸薔薇花正黃而此
詩專言紅蓋此花故有紅黃二種今則以黃者爲薔薇
紅紫者爲玫瑰云

敬齋古今薙卷七終

敬齋古今註卷八

元 李 冶 撰

司空表聖詩喜用韻字春晚云憑高憐酒韻引滿未能
已漫題云率怕人書謹閒宜酒韻高以韻與酒前人不
道也又光啓四年春云小欄花韻午晴初撫事寄同遊
云春添茶韻時過寺紅茶花云豈憐高韻說紅茶又王
宮云風荷似醉和風舞沙鳥無情伴客閒是物此中皆
有韻更堪微雨半遮山

皮日休鹿門隱書曰舟之有伧猶人之有道也伧不安

也舟之行匪伋不進是不安而安也人之行也猶舟之
有伋匪道不行是不行而行也夫秦氏伋于項項遺伋
于漢是聖人之道不安其所安小人之道安其所不安
也其自注云伋五勃反舟動貌按韻及尙書注釋皆云
伋伋爲壯勇貌伋許乞魚乙二切音訓俱與皮說不同
又徧尋字書並無音五勃反而解爲舟動貌者此必伋
字之誤詩云天之扝我如不我克傳曰扝動也五忽反
案扝字原本俱作机毛詩本
作机從手不從木今改正

按魏晉舊制三公黃閣廳事始得置鴟尾陳後主以蕭

摩訶爲侍中特詔開黃閣廳事寢室並置鴟尾然則黃
閣鴟尾皆宰相所居之制也自唐以來亡之矣今人舉
皮詩往往以黃閣作黃閣閣自館閣之閣徧攷書傳宰
相無有黃閣故事皮日休七愛詩房杜相國云骭髀無
敵才磊落不世遇美矣名公卿魁然真宰輔黃閣三十
年清風一萬古

唐羅鄴牡丹詩云可憐韓令功成後辜負濃華過一春
韓令謂韓宏也宏嘗除去所居牡丹故云濃華當作穠
華詩何彼穠矣穠如容切毛云穠猶戎戎也按廣韻穠

穠同音醲又而容切穠衣厚貌穠華多貌然詩旣言棠
棣杕杜桃李則自當作穠而作穠者蓋古字通用

韓偓詩安貧云牕裏日光飛野馬案頭筠管長蒲盧又
劉師道詩歎世云野馬飛牕日醯雞舞甕天所用野馬
字皆不當按莊子鵬之徙于南溟也水擊三千里搏扶
搖而上者九萬里去以六月息者也野馬也塵埃也生
物之以息相吹也野馬乃澤中之氣耳今二詩皆以野
馬爲飛塵誤矣

詩史云歐陽永叔謂河豚食楊花則肥韓偓詩云柳絮

覆溪魚正肥大抵魚食楊花則肥不必河豚治又以爲
不然魚未必食楊花而肥蓋此時魚之所食之物皆豐
美故魚自肥也今驗魚廣之處當其盛時莫不肥好豈
必其地悉有楊花耶

羅隱說石孝忠事李愬愬信任與家人伍元和中蔡人
不恭天子用裴丞相計以丞相征蔡若愬者光顏者重
允者皆受丞相指揮明年蔡平天子快之詔刑部侍郎
韓愈撰平蔡碑將所以大丞相功業于蔡州孝忠一旦
熟視其文大恚怒因作力推去其碑僅傾墜者再三吏

執詣節度使悉以聞天子方以東北事倚諸將聞是卒也甚訝之命具獄將斃于碑下孝忠伺吏隙舉枷尾拉一吏殺之天子怒使送闕下因召見孝忠頓首曰平蔡之日臣從在軍前吳秀琳蔡之姦賊也而愬降之李祐蔡之驍將也而愬擒之蔡之爪牙脫落于是矣及元濟縛雖丞相與二三輩不能先知也蔡平之後刻石紀功盡歸于丞相而愬第其名與光顏重允齒愬固無所言矣不幸更有一淮西其將畧如愬者復肯爲陛下用乎賞不當功罰不當罪非陛下所以勸人也臣所以推去

碑者非以明愬之功亦將爲陛下正賞罰也臣不推碑
無以爲吏擒不殺吏無以見陛下臣死不容時矣請就
刑憲宗多其意遂赦之因號曰烈士復召翰林段學士
撰淮西碑一如孝忠語今韓段二碑具在其敘李愬入
蔡事韓止三十餘字而段則近三百言蓋段承憲宗之
旨攄孝忠之憤不得不大爲鋪張誇詡也然細攷韓筆
其三十餘字與段之三百言者大畧亦不異但文昌所
作稍加絢麗而已李義山稱退之謂公之斯文若元氣
先時已入人肝脾宋世詩人亦有云千載斷碑人膾炙

祇今誰數段文昌

案此二句乃蘇軾所記臨江驛詩朱子韓文攷異引之作不知世有段文

昌與此稍異

則二公文字之優劣不難判也憲宗亦何爲以

卒隸之一言遽命剗磨舊作再更新製乎予以退之之平生攷之蓋有由焉李漢序昌黎先生文曰時人始而驚中而笑且排先生益堅終而翕然遂以定先生亦自以爲公不見信于人私不見助于友跋前疐後動輒得咎退之所爲每爲世所阻抑當淮西之平鴻功鉅業歌頌洋洋將貽千萬世而無斁事體之重譬之九鼎而先生獨以一手扛之當時必有以私意指摘者羣囂隊譟

踵之以孝忠之舌衆煦所漂太山一羽其勢無足怪者
然則爲憲宗者當如何哉要察所聞之言爲何如耳如
其言可諒韓筆不能以盡偏裨士卒之勞自應別錄名
氏列之碑陰足矣亦不可以輕信人語劃然而改章也
如其事無甚遺逸而孝忠以一介抗天子以殺人蔑王
法以暴狠求雄名曰吾欲勸天下之爲人下者是爲兄
尺寸之地而尊乃父乃祖之天也盍磔之獨柳之下與
元濟同尸顧義而赦之賞罪人爲烈士又用其騰口之
說以輕易星斗之文爲憲宗者不亦惑甚矣乎春秋書

齊豹爲盜說者曰爲惡求名而有名章徹則作難之士誰或不爲今羅隱次孝忠事惟恐不傳于後則于春秋之義乖矣

定風波曲凡有五唐歐陽炯定風波首云暖日閒牕映碧紗小池春水浸殘霞者詩句定風波也至今詞手多爲之此不可以備錄近世趙獻可作詞有曰芳心事事可可者定風波慢也俚俗又有定風波者所謂宮調者也又本事曲子載范文正公自前二府鎮穰下營百花洲親製定風波五詞其第一首云羅綺滿城春欲暮百

花洲上尋芳去浦映花花映浦無盡處恍然身入桃源
路莫怪山翁聊逸豫功名得喪歸時數鶯解新聲蝶解
舞天賦與爭教我輩無懽緒尋其聲律乃與漁家傲正
同又賀方回東山樂府別集有定風波異名醉瓊枝者
云檻外雨波新漲門前烟柳渾青寂寞文園淹卧久推
枕援琴涕自零無人著意聽緒緒風披雲幌駸駸月到
萱庭長記合懽東館夜與解香羅掩翠屏瓊枝半醉醒
尋其聲律乃與破陣子正同右五曲中前三腔固常聞
之其後二腔未有人歌者不知此二曲真爲漁家傲破

陣子而但爲改名定風波乎或別有聲調也予以爲但改其名耳不然何爲舉世無人歌之而又徧攷諸樂府中無有詞語類此而名之爲定風波者也

陶穀詩尖簷帽子卑凡廝短鞦韆兒末厥兵歐公云末厥亦當時語予景祐間已聞此語時去陶公未遠人皆莫曉其意王原叔博學多聞見稱于世最爲多識前言者亦云不知爲何說也第記之必有知者耳治曰末厥蓋俗語也歐公雖以此爲當時語亦自不知爲何義大抵末厥者猶今俚語俗言木厥云耳木厥者木強乃厥

之謂

王德用神道碑歐公所撰康邦頌人衛議皆同押又晏
元獻碑氏裔洛學詔後皆同押歐公去今纔百餘年其
文律寬簡猶有古人風氣今世作文稍涉此等便有譏
議乃知律度益嚴而其骨格益以弱也

歐陽永叔作詩少小時頗類李白中年全學退之至于
暮年則甚似樂天矣夫李白韓愈白居易之詩其詞句
格律各有體而歐公詩乃具之但歲時老少差不同故
其文字亦從而化之耳

六一翁茶歌云手持心愛不欲碾有類弄印幾成窠謂
印剗則可謂印窠則不可

石曼卿詩贈孫可久云閉戶斷蛛網折花移鳥聲或云
閉字不若作開予以爲不然戶開而有蛛網閉則斷之
見其無人往來也若云開戶斷蛛網則是閉門時有蛛
網而開則斷之又何足以盡幽閒之趣

蘇子瞻紀游五百言崢嶸依絕壁蒼茫瞰奔流按莊子
適莽蒼者三食而反腹猶果然莽蒼並側聲前人詩句
亦多有用此二字者蒼茫蓋本莽蒼但以茫易莽而倒

之耳此亦何足致疑

東坡詩妻孥真敝屣脫去何足惜注云史記封禪書漢武帝曰嗟乎吾誠得如黃帝吾視去妻子如脫躡耳按廣韻屣躡同音所綺切而屣乃不躡跟也躡乃步也二字皆無敝意然史記云爾者此本用孟子語也孟子曰舜視棄天下猶棄敝蹠也說者曰蹠草履也草履而可蹠者也音與前二字正同詳坡詩意孟子史記兩俱用之史記不云蹠而云躡者古人用字不類今體其聲相近者猶許借用其音切正同者爲相通無疑也

東坡雪詩欲浮大白追餘賞幸有回風驚落屑或以爲落屑亦體物語或者之言非也此蓋用陶侃竹頭木屑事耳

東坡書韓幹二馬云赤髯碧眼老鮮卑迴策如縈獨善騎按晉書王湛乘其姪濟馬姿容旣妙迴策如縈善騎者無以過之此善騎之騎自合作去聲讀之書傳中言善騎射者多矣今押作平聲定誤

東坡詩安得道人殷七七不論時節使花開按古今詩話云韋七七每醉歌云解醞逡巡酒能開頃刻花又詩

史載殷七七事云七七有異術嘗與客飲云某有藝成
賓主歡卽顧屏上畫婦人曰可唱陽春曲婦人應聲隨
歌曰愁見唱陽春令人離腸結郎去未歸家柳自飄香
雪如此者十餘曲然則使花開者乃韋七七非殷七七
也東坡此詩誤以韋爲殷耳不然二事所載果有一誤
也

東坡有老饕賦前後皆說飲食按左傳文十八年云縉
雲氏自不才子貪于飲食冒于貨賄天下之民謂之饕
餮說者皆曰貪財爲饕貪食爲餮然則東坡此賦當云

老饕不當云老饕

東坡赤壁賦此造物者之無盡藏也而吾與予之所共食一本作共樂當以食爲正賦本韻語此賦自以月色竭食籍白爲協若作樂字則是取下客喜而笑洗盞更酌爲協不特文勢萎蕤而又段絡叢雜東坡大筆必不應爾所謂食者乃自己之真味受用之正地非他人之所與知者也今蘇子有得乎此則其間至樂蓋不可以容聲矣又何必言樂而後始爲樂哉素問云精食氣形食味啓元子爲之說曰氣化則精生味和則形長又云

壯火食氣氣食少火啟元子爲之說曰氣生壯火故云
壯火食氣少火滋氣故云氣食少火東坡賦意正與此
同

東坡跋晁補之所藏與可畫竹云莊子世無有誰知此

疑神四注本載東坡自說云

案蘇軾詩注今所傳惟永嘉王十朋吳興施宿二本

此所云四注者未知何本檢王施二注內亦無此條所引之文疑元時有其書而後已佚之

孔子曰

吾猶及史之闕文也自予少時見前輩皆不敢輕改書

故蜀本大字書皆善本莊子曰用志不分乃疑于神此

與易陰疑于陽必戰禮使人疑汝于夫子同今四方本

皆作凝

案宋張湜雲谷雜紀載東坡說自孔子曰以下至此其文並同

又濁醪有妙理

賦云失憂心于昨夢信妙理之疑神四注本據此說一

斷以爲疑神又酒賦云游物初而神凝今反實際而形

開則注家無所說治曰四注所援東坡之說吾恐非蘇

子之言也信如蘇子之言則蘇子之見厥亦偏矣所謂

先輩不敢改書是固有理若斷凝神以爲疑神則吾不

知其說也莊子謂用志不分乃凝于神正如繫辭所謂

精義入神以致用也今東坡以爲與陰疑于陽使人疑

汝于夫子同殆非也

案張湜雲谷雜紀謂用志不分乃疑于神之語出于列子改作凝者

誤與此所
論有異

何者陰疑于陽乃見疑于陽使人疑汝于夫子乃見疑于人此用志不分亦見疑于神乎凡人之心以先入者爲主東坡蜀人先見蜀本因目生心承文立義皦如星日牢如膠漆久之又久心與理化忽覽別本如覩怪物予前盾後能無改乎東坡以蜀本爲善本而四方本皆後人所改又安知四方本不爲善本而蜀本獨非前人之誤乎

東坡漱茶帖云茶性暗中損人爲不少吾有一法每食已輒以濃茶漱口煩膩旣去而脾胃不知此說亦未盡

得茶性固多損漱茶則牙齒固利脾胃固不傷然不知
齒自屬腎茶入齒罅氣味之所蒸全歸腎經脾胃雖不
覺而腎則覺之消陽助陰漱啜無異或謂啜之與漱啜
之爲力甚多而漱之爲力甚少漱滌之損終輕于啜此
亦不然飲啜則氣先歸于脾胃而後始傳于餘臟今而
漱之則其氣獨歸于腎是其力多少適相等耳若脾胃
則漱實勝于啜也

東坡云治目如治民治齒如治軍治目如曹參之治齊
治齒如商鞅之治秦醫者韓義之曰東坡此語強爲說

爾其實不然治目治齒自當有緩急時不可必也且治
目者燒烙燐浸鉤割針鑱無所不用又其所用藥如石
膽石中黃雞子白銅青礪青礪砂白丁香之類性俱有
毒豈盡如東坡所言乎予竊謂韓說雖有理亦未敢以
爲至論也比見張鍊師幾道道及此因舉其里中一農
家叟病目已不治適有客來過旣去遺一銀藥餅子開
視其藥滿中或者試令病者點之或以爲不知何藥不
可點或又謂叟病已不治政復不效何傷遂試以少許
點之痛不可忍然二三日後目似見物叟因更點少許

痛亦如前又三五日見物頗明乃連點數日其患良愈
他日客還曰前別時遺一藥餅子曾收得否主人問是
何藥客云此射生藥箭所用蓋取生鳥頭汁雜諸毒物
熬成者他無所施乞以見付予聞張言始知韓子之言
爲可信

東坡水調歌頭我欲乘風歸去只恐瓊樓玉宇高處不
勝寒起舞弄清影何似在人間一時詞手多用此格如
魯直云我欲穿花尋路直入白雲深處浩氣展虹蜺祇
恐花深裏紅露濕人衣蓋效坡語也近世閑閑老亦云

我欲騎鯨歸去只恐神仙官府嫌我醉時真笑拍羣仙
手幾度夢中身

東坡蓄墨墨文有文公檜鼯臘墨六字者且自言不知
其所謂予以爲此亦易曉文公檜當是作者之姓名鼯
臘則所造之歲月耳鼯鼠也謂歲陽直子臘則十二月
也

東坡先生神仙中人也其篇什歌詠沖融浩翰庸何敢
議爲然其才大氣壯語太峻快故中間時時有少隍杌
者如牖厠厠牖之倒滹沱河蕪蕪亭之誤皆是也今聊

疏其一二可以爲峻健者之戒和劉貢父云數奇逢惡
歲計拙集枯梧按晉語優施歌曰暇豫之吾吾不如鳥
鳥人皆集于苑已獨集于枯東坡此詩意全用晉語事
而押韻處便加梧字豈非太峻快也次韻秦少章云山
圍故國城空在潮打西陵意未平此則全用劉禹錫石
頭城詩但改其下三五字耳亦是太峻快也桓魋墓云
縱令司馬能鑱石奈有中郎解摸金按陳琳爲袁紹檄
曹操云曹又特置發土中郎將摸金校尉則摸金乃校
尉非中郎也病起云何妨一笑千痾散絕勝倉公飲上

池按史記長桑君出藥與扁鵲飲以上池之水曰三十
日當知物矣坡則以爲倉公倉公淳于意也送陳六云
去年持節發倉廩到處賣刀收繭栗按王制祭天地之
牛角繭栗宗廟之牛角握賓客之牛角尺此用繭栗不
得便爲牛次韻張秉道云憐君嗜好更迂濶得我新詩
喜折屐按晉書折者屐齒而非屐也若云得我新詩齒
折屐則其爲喜不言可知石鼓歌云上蔡公子牽黃狗
本譽李斯善作篆而復引黃犬事殆似勉強次韻周長
官見寄云罔罔可憐真喪狗時時相觸是虛舟喪家之

狗而止用兩字似不甚妥又送客云鍾乳金釵十二行
樂天詩云鍾乳三千兩金釵十二行今便配合爲一句
恐非後輩楷式觀歐陽鈴轄刀劍戰袍云書生只肯坐
帷幄談笑毫端弄生殺叫呼擊鼓催上竿猛士應憐小
兒黠此語雖有激而出然使不知道者觀之能無失倫
之嫌乎

文叔通濟陽雜記云徐凝爲廬山瀑布詩云千古長如
白練垂一條界破青山色東坡笑之謂之惡詩及坡自
題則曰擘開蒼玉峽飛出兩白龍子謂東坡之擘開與

徐凝之界破其惡一也治近讀坡集其游瀟山詩

案瀟山原

本作泉山今據蘇軾集改正

又云擘開翠峽出雲雷裁破奔崖作潭

洞然則坡之峽凡兩度擘開矣

王詵晉卿建寶繪堂以前後所得法書名畫盡貯其中
東坡爲作記云桓靈寶之走舸王涯之覆壁皆留意之
禍也東坡又嘗謂其弟子由之達自幼而然每獲書畫
漠然不甚經意若坡所論真所謂寓物而不留物者也
然烏臺詩話所載款狀與晉卿往還者多以書畫爲累
是豈真能忘情者哉世所傳洪覺範燈蛾詞云也知愛

處實難拚覺範特指蟲蟻言耳人之逐欲而喪軀者抑有甚于此此深可以爲士君子之戒也

人情譽之則喜訾之則怒喜不于其譽于其榮也怒不于其訾于其辱也小人則不然反甘心于得惡聲旣不以爲辱而更自以爲榮焉夫小人亦人也亦人之心也榮辱與人同之而其美惡之間盡與人相反者何哉吾之所利者在此焉耳彼世之所謂榮辱者非吾所恤也唐穆宗時李逢吉之黨潛貶戶部侍郎李紳爲端州司馬逢吉仍率百官表賀旣退百官復詣中書賀逢吉方

與張又新語門者弗內良久又新揮汗而出旅揖百官
曰端溪之事又新不敢多讓衆駭愕辟易憚之夫衆之
所以憚又新者憚其惡聲也又新之所以獲衆憚者賣
其惡聲也吾方賣之惟恐惡聲之不四馳也利在于辱
辱吾榮也又何辱之云乎人君之所以理世人之所以
處世惟榮與辱兩端而已榮辱兩無所施則賊君戕父
無所不至矣人亦安得而不憚之哉頃有一人焉才而
甚案此下原稍親要路常于廣坐颺言曰吾之力薄誠
本缺一字不能與人爲福惟是朝夕議論之間或能與人爲禍吁

此又學爲又新而市惡聲者也賈者必珍其貨而後市
小人則惡其聲而後市一開之市厥有如此

人言山谷之于東坡常欲抗衡而常不及故其詩文字
畫別爲一家意若曰我爲汝所爲要在人後我不爲汝
所爲則必得以名世成不朽此其爲論也隘矣凡人才
之所得千萬而蔑有同之者是造物者之大恆也鳬自
爲短鶴自爲長鳬豈爲鶴而始短吾足鶴豈爲鳬而始
長吾脰也哉近世周戶部題魯直墨蹟云詩律如提十
萬兵東坡真欲避時名須知筆墨渾閒事猶與先生抵

死爭周深于文者此詩亦以世俗之口量前人之心也
間讀周集因爲此說以喻世之不知山谷者

魯直喜見八叔父詩云稍詢耆舊間大半歸山邨小兒
攜婦子襁褓皆裹頭東坡詩有云當時襁褓皆七尺而
我安得留康強

案蘇軾超然臺詩用十五刪韻作而我安得留朱顏此康強二字誤

蘇黃

所狀皆一類而黃不若蘇之簡而詣理也

黃魯直作東坡墨戲賦云筆力跌宕于風煙無人之境
蓋道人之所易而畫工之所難又其他詩多喜用跌宕
二字此出于蜀志簡雍傳云雍優游風儀性簡傲跌宕

風儀疑作風議

介甫詠韓退之詩云紛紛易盡百年身舉世無人識道
真力去陳言誇末俗可憐無補費精神又集唐百家選
其自序云廢目力于此良足惜此其爲言可以爲達矣
求其用心可以爲遠矣然撰著字說及三經新義前人
論議皆斥去不用一出新意必使天下學者皆吾之從
顧不知自謂費精神廢目力否也文字固不足道觀其
得君柄國專以財賦爲已任至謂天變不足畏祖宗不
足法人言不足恤卒以召朋黨相煽之禍此豈非言語

自爲一人而其事業又自爲一人乎吁可怪已

陳無已詩寄晁以道云十年作吏仍餬口兩地爲鄰闕

寄聲注云顏魯公帖曰闔門百口幾至餬口

案陳無已集此詩題

作答晁以道顏魯公帖以下十三字任淵所注

按左傳鄭莊公曰寡人有弟不

能和協而使餬其口于四方杜預云餬粥也粥乃貧家

所食陳詩自謂仕久而貧因用鄭莊公語而顏真卿謂

其家幾至餬口則其意與左氏異豈以餬口謂都無所

食乎

陳無已每登臨得句卽急歸臥一榻以被蒙首謂之吟

楊金國初張斛德容作詩亦以被蒙首須詩就乃起

米元章治第潤州有小軒面西山用王徽之朝來致有
爽氣語名致爽石林先生以爲世以致字爲學以致其
道之致非也魏晉以來多以致爲語助似是訓甚李子
曰以致爽之致爲致其道之致固謬又云似是訓甚則
其言義含糊模棱手耳致自爲甚致爽自得以名軒此
亦何必深論若以致爲語助則大段乖刺矣

楊誠齋詩句句入理予尤愛其送子一聯云好官難得
忙不得好人難做須著力著力處政是聖賢階級若夫

淺丈夫少有異于人必責十百之效于外一不我應悻悻然以舉世爲不知己方扼腕之不暇顧肯著力于仁矣乎故終身不能爲好人

張本孝叔爲孔毅夫雜說序云其言漢景免咎人背明皇親擇守令宣宗立太子不委宰相而屬宦官至言祥瑞風鑒不可憑議論甚躋其引父命亦得爲勅母亦可稱大人傳或有之不可爲後世法則近贅言焉孝叔謂後二事不可以爲後世法非也毅夫錄此者蓋見前史有此語因而表出之初不定以爲後世法也而孝叔以

此爲贅何不量己之贅邪

世傳筆詩使盡好心無所用只因閒管得人憎又蚤知
今日成閒管痛悔當時用好心又自從蒙管束轉覺用
心勞此三聯語雖不甚婉格雖不甚高而皆以心對管
其意各有所主亦可以見風人託物靡不至到

納紙投名媿已深更教門外久沈吟事窮計急燒牛尾
不是田單素有心此詩竟不知何人所作投謁固可恥
然士當窮困搖尾乞憐于人亦可愍也

近世宋九嘉自言平生有三恨一恨佛老之說不出于

孔氏前二恨詞學之士多好譯經潤文三恨大才而攻
異端佛老異端固所當恨至于學士大夫譯經潤文雖
有異于顏子之若愚曾子之一唯本諸故訓開釋奧義
是亦儒學之所先務又何足訾乎今飛卿一切以此爲
恨殆見世之爲文之士大章短篇略無自己一字第剝
削詩書中一二語重摹而複寫之以爲文之至則此誠
可恨耳所見有疑似所恨有當否吾恐後生輩泥飛卿
之說便以爲準繩則必有棄經之實而專從事于詞藻
之華者故爲別白之

詩二雅及頌前三卷題曰某詩之什陸德明釋云歌詩之作非止一人篇數既多故以十篇編爲一卷名之爲什今人以詩爲篇什或稱譽他人所作爲佳什非也古文用韻鄰傍上下凡聲音之近似者俱得相與爲協若東冬江爲協旨有語協歌麻陽庚哿馬屋角之類皆得通用至入聲則有兼用五六韻者蓋古人因事爲文不拘聲病而專以意爲主雖其音韻不諧不恤也後人則專以浮聲切響論文文之骨格安得不弱

鄰韻而協者詩家間用之謂之轆轤格又謂之出入格

或以爲宋人始非也此自有詩以來有之蓋古人文體寬簡不專以聲病爲工拙也


諸樂有拍惟琴無拍琴無節奏節奏雖似拍而非拍也前賢論今琴曲已是鄭衛若又作拍則淫哇之聲有甚于鄭衛者矣故琴家謂遲亦不妨疾亦不妨所最忌者惟其作拍而能改齋漫錄論胡笳十八拍引謝希逸琴論云平調明君三十六拍胡笳明君二十六拍清調明君十三拍間絃明君九拍蜀調明君十二拍吳調明君十四拍杜瓊明君二十一拍七曲皆言拍果是希逸語


否在琴操其實不當言拍止可言幾奏也今琴譜載大小胡笳十八拍或十九拍者乃後世琴工相傳云爾

鮑昭有井謎世傳東坡有賀資謎又黃庭堅有粥謎象碁謎近者伶官劉子才蓄才人隱語數十卷謎固小技倆然其諷詠比興固與詩人同義而在士大夫事中亦談笑一助也嘗擬作井謎云四十零八箇頭一頭還對一腳中間全無肚腸外面許多棱角此末聯亦借前人語也嘗聞用字謎既久止記一二句今爲足成之云三山自三山山山甘倒懸一月復一月月月還相連左右


排雙羽縱橫列二川闔家都六口兩口不團圓又聞墨
斗謎云我有一張琴一絃藏在腹莫笑墨如鴉正盡人
間曲染物瑕頭謎云在染何曾染無生得獨生有人來
解結見姓自分明

敬齋古今註卷八 終









道光丁未鐫

晁具茨詩集

海山仙館叢書

神武皇帝集

神武皇帝集

神武皇帝集

PL
2457
P29
v.571

晁具茨先生詩集序

予曩遊都城於晁用道爲同門生後三十六年識其子公武於涪陵又二年見之於武信愛其辯博英峙辭藻藹如也因與之善初不知其爲用道子也一日來謁曰先公平生多所論著自丙午之亂埃滅散亡今所存者特歌詩二百許篇涪陵太守孫仁宅旣爲鑱諸忠州鄠都觀眷然林水之間矣敢句先生一言以發之子亟聞其語謝曰願聞先君之所以含咏而獨游者公武於是出其家譜牒乃知其先君名冲之字叔用世所謂具茨

先生者也予於是聳然曰是必吾用道也耶第今字叔用爲小異耳已而追懷平昔周旋之舊益自京師之別絕不相聞今乃幸與其子遊又獲觀其所論著爲之慨嘆者久之嗟乎予安得不爲吾用道一言哉方紹聖之初天下偉異豪爽絕特之士離讒放逐晁氏羣從多在黨中叔用於是飄然遺形逝而去之宅幽阜廕茂林於具茨之下世之網羅不得而嬰也暨朝廷諸公謀欲起之廼復任心獨往高挹而不顧世之榮利不得而羈也至於疾革乃取平生所著書聚而焚之曰是不足以成

吾名世之言語文章不得而污也由是觀之叔用之所
以傳於後世者果於詩乎顧其胸中必有合章內奧而
渙於道者矣宋興五十載至咸平景德中儒學文章之
盛不歸之平棘宋氏則屬之澶淵晁氏二氏者天下甲
門也太子太傅文元公事章聖皇帝飛詞禁苑垂二十
年當是時甄明舊儀緒正禮樂一時詔令皆出其手於
是朝廷典章法度之事非六籍之英則三代之器也迨
其子文莊公繼踐西省是時文元公方請老家居也宋
宣獻以謂世掌書命者惟唐新昌楊氏及見其子而晁

氏繼之至慶厯中遂叅大政議論深博識者矐之然則
叔用以文莊爲曾大父以文元公爲高祖其家世風流
人物之美淵渟浚深蓄厚而發遠自王文獻李文正畢
文簡趙文定四三公富有百氏九流之書而晁氏尤瓌
富閎溢所藏至二萬卷故其子孫焯掌勵志錯綜而藻
績之皆以文學顯名當世子嘗從叔用商近朝人物嘉
言善行朝章國典禮文損益靡不貫洽由叔用之學而
達諸廊廟之上溫厚足以代言淵博足以顧問則以詩
鳴者豈叔用之志也哉雖然叔用旣以油然棲志於林

澗曠遠之中遇事寫物形於興屬味其風規淵雅踈亮
未嘗爲悽怨危憤激烈愁苦之音予於是有以見叔用
於晦明消長用捨得失之際未嘗不安而樂之者也嗚
呼所謂含章內奧而深於道者非耶秦漢以來士有抱
奇懷能留落不遇往往燥心汗筆有怨誹懔懔沈抑之
思氣候急刻不能閑遠古之詞人皆是也太史公作賈
誼傳益以屈原配之又裁錄其二賦焉至誼論三代之
陶世振俗固結天下之具與夫秦之所以暴興棘亡斬
艾天下之術則遷有所不錄也何哉豈遷之意謂誼一

不平於其中遂哀怨壹鬱泣涕以死借使文帝盡用其
言則諠亦安能有所建立於天下乎惟深於道者遺於
世而不怨發於詞而不怒君子是以知其必能有爲於
世者也嗟乎吾於叔用豈直以詩人命之哉紹興十一
年九月五日陵陽俞汝礪序

晁具茨先生詩集目錄

澶淵晁冲之叔用著

卷之一

古詩

六首

古樂府

雪效柳子厚

擬一上人懷山之什

題魯山溫泉

香山示孔處厚

田中行

卷之二

古詩

四首

同魯山韓丞觀女靈廟前險石

陸元鈞宰寄日注茶

送王敦素樸

次四兄以道韻答許下諸公

卷之三

古詩

六首

贈僧法一墨

法一以余所贈墨爲不佳

復以承晏墨贈之

紀愁

四兄諸人皆用屋字詩送一上人余獨留之

送一上人還滁州瑯琊山

卷之四

古詩

七首

和十二兄五首

夷門行贈秦夷仲

次四兄雪夜韻

卷之五

古詩

六首

書懷寄李相如

次韻集津兄會羣從王敦素宿王立之園明日

西征馬上寄示諸人

復至新鄉廨寄張穉

洗馬次十一兄之道韻

覽古

戲李相如攜婦還金鄉

卷之六

古詩

六首

次韻王立之雪中以酒見餉

東陽山人僻居

謝沈次律水枕

簡江子之求茶

贈張琪君章

效古別昭德羣從

卷之七

近體 十四首

睡起

送韓溫父

和四兄以道閑居感歎有作

復次韻

寄江子之

次四兄以道韻效李義山雪

寄江子我

戲成

和子我晚歸

懷蘇門山

二十一兄季此生女有詩次韻

決道念八弟得小金印以詩贈之

夜坐

和人遊李文和園

卷之八

近體

十五首

送僧

樂府二首

傷心

怡怡軒贈王次翁

亭成

至日

贈山人沈廣漢

龍興道中



敦素有以書局處之者作詩迎之

立春

和集津兄謝王立之紅絲花

又次韻謝王立之惠紅絲花

謝任伯久無書常子然寄茶謝之因簡任伯

客有驚馬不肯借作詩誚之

卷之九

近體

十五首

自然詩

并序

避暑普淨院

送惠純上人遊閩

道中

行泌水上

送王敦素樸

次韻江子我蠟梅二首

次韻集津兄懷嵩少示王立之

和王立之蠟梅二首

滎澤驛阻雪

秋雨感事

次二十一兄季此九日韻

問訊次九日韻

卷之十

近體

八首

積善堂詩

并序

春日二首

次二十一兄季此韻

別飭道二十弟

莫春

別息道二十二弟

和江子我竹夫人

卷之十一

近體

十四首

戲留次襄三十三弟

行武陟田中

懷濟北弟姪

王敦素許紙不至戲簡促之

別昭德第愴然傷懷

別飾道二十弟

和虞道二十三弟

和葉甥少蘊內翰重開西湖見寄二首

和寄葉甥少蘊內翰見招

次韻再答少蘊知府甥和四兄以道長句并見

寄寄二首

復和少蘊內翰甥兼謝伯蘊通判兄再贈

復用韻

卷之十二

近體 十五首

僧舍小山三首

挽十六叔父朝散

和二十二弟二首

題超化寺壁

夜行

和虞道二十三弟

留別江子之



寄王立之

讀陳平傳

次韻江子我見寄

朱少章曝麥爲雨所漂

過陳無已墓

卷之十三

近體 十六首

初來東里

至東里次前韻

都下追感往昔因成二首

次韻四兄蘆橋柳橋二首

次韻陳叔易恬蘆橋柳橋二首

次韻朱少章蘆橋柳橋二首

挽蔡晉如

夏室

謾興

過鴻儀寺

答韓君表

次君表韻答葉少蘊甥

卷之十四

近體

十七首

與秦少章題漢江遠帆五首

莫春書事

謝富蔡見過

范元章惠然相過見問奇章公服鍾乳三千兩
事因爲長句戲之

再至都城

春晚圃田道中三首

玉字黃庭經

重過鴻儀寺

贈江子我子之

贈江端本子我

送僧歸建州

卷之十五

近體

十八首

和新鄉二十一兄華嚴水亭五首

感梅憶王立之

送人遊江南

和顏伯武丈山寺

小魏買馬久不至以詩寄之

和四兄清泉香餅子

晝寢

過陳無已墓

懷王立之

以少炭寄江子之

梅

過王立之故居

再至徐州示諸弟

秋夜情

晁具茨先生詩集目錄終

晁具茨先生詩集卷之一

古詩

古樂府

韻會漢孝惠皇帝六年使樂府令備簫管始有樂府之名

大星何厯厯

前漢五行志大星天王也

小星爛如石

詩嘒彼小星

掖垣崔

嵬橫紫微

史記天官書太微宮垣十星東垣北上相名左掖門西垣北上將名右掖門與紫宮垣同

晉志紫微天帝之座

十二羽林森北極

天文志虛危南有衆星曰羽林天軍爾雅天樞亦曰

北辰居天之中以正四時

今夕何夕月欲沒虎抱空關龍厭直

張衡靈憲

蒼龍連蜷於左白虎猛據於右

崢嶸北斗著地垂

天官星占北斗爲帝車運於中央

手

去瓠瓜不盈尺

星占瓠瓜一名天雞明則歲大熟

嚴陵醉卧光武傍

隱逸

傳光武與嚴光同宿光足加於浮楂正值天孫織博物志天

帝腹明早太史奏客星犯帝座河與海通有人八月浮槎木實一年糧至一處見婦人

織丈夫牽牛渚頭飲之此人問何處丈夫曰可詣蜀嚴

君平問之君平曰某年月客星王良挾策飛上天史記

犯牛斗正是此人到天河時也

四星曰天駟旁一星曰王良相武丁奄

良王良策馬車騎滿野傳說空騎箕尾立

有天下乘東維騎君不見茂陵棄子欲登仙地輿志漢

箕尾而比於列星

陵通鑑元鼎四年上幸雍且郊齊人公孫卿曰漢興復

當黃帝之時鑄鼎黃帝可立致也於是上曰嗟乎誠得

如黃帝吾視去妻子如脫自將壯士終南邊三秦志終

屣耳遂拜公孫卿為郎

關中南面西起秦隴東徹藍田凡雍岐鄠長安萬

年相去八百里而連綿峙據其南者皆此一山也忽然

遭窘出璽綬歸來下詔除民田通鑑建元三年上始為

微行北至池陽西至黃

山南獵長楊東遊宜春與左右能騎射者期諸殿門常
以夜出自稱平陽侯旦明入南山下射鹿豕狐兔馳驚
禾稼之地民皆號呼罵詈鄠杜令欲執之示以乘輿物
乃得免又嘗夜至柏谷投逆旅宿就主人求漿主人翁
曰無漿正有溺耳且疑上爲姦盜聚少年欲攻之主人
嫗睹上狀貌而異之止翁曰客非常人也翁不聽嫗醉
翁而縛之少年散走嫗乃殺雞爲食以謝客明日上歸
召嫗賜金千斤拜其夫爲羽林郎後乃私置更衣從宜
曲以南十二所夜投宿長楊五柞等諸宮上以道遠勞
苦又爲百姓所患乃使大中大夫吾丘壽王舉籍阿城
以南盤屋以東宜春以西提封頃畝及其賈直除以爲
上林苑屬之南山又詔中尉左右內史表屬縣草田以
償鄠杜阿瞞急示乘輿物唐史明皇常自呼爲阿瞞撫
之民宅叙家人禮至於樂奏前後酒食沾賚上無自專皆令
稟於寧王教上曰大哥好作主人阿瞞但謹爲上客又
上自臨淄郡王爲潞州別駕乞假歸京師會春莫豪家
子數輩盛酒饌游於昆明池選勝方宴上戎服臂小鷹

於野次因疾驅直突會前諸子輩頗露難色忽一少年
持酒船唱令曰宜以門族官品備陳之酒及於上因大
聲曰曾祖天子父相王臨淄郡王某也諸少年驚走四
散不敢復視於車服上因聯飲三銀船盡一巨餽徐乘
馬而鮮卑仍棄珊瑚鞭晉紀王敦將舉兵內向明帝密
東去其營壘敦正晝寢夢日環其地驚起曰此必黃鬚鮮卑
奴來也即遣五騎追帝帝馳去馬有遺糞輒以水灌之
見逆旅賣食嫗以七寶鞭與之日後有騎來可以此示
俄而追者至問嫗嫗曰去已遠矣因以鞭示之五騎傳
玩稽留久又見馬糞又不見古來垂堂戒華屋敵國挾
冷以爲信遠而止

輒戎接轂

司馬相如諫獵書家累千金坐不垂堂蘇秦

孫闕與穎考叔爭車考叔挾輒以走子都拔棘以逐白

之又諫獵書

胡越起於轂下而羌夷接軫豈不殆哉

龍魚服誤網羅

說苑吳王欲從民飲酒子胥諫曰不可
昔日白龍下清冷之淵化爲魚漁者豫

且射中其目白龍上訴天帝天帝曰當是之時若安置而形對曰我化為魚天帝曰魚固人之所射也豫且何罪今君飲酒臣恐有豫且之患王乃止
孔雀金花被牛觸
杜甫孔雀未知泉逢抵觸赤霄玄圃須往來翠尾金花不辭辱

雪效柳子厚
原註一作贈一上人

月落雞聲寒曉色靜茅屋開門驚不知夜雪壓修竹
陰鏗

夾池一叢竹垂翠不驚寒葉醞宜城酒皮裁薛縣冠
湘川染別淚衡嶺拂仙壇欲見凌冬質當爲雪中看

牙生新冰鱗甲刻溪谷
西清詩話華州狂子張元咏雪詩云戰退玉龍三百萬敗鱗殘

甲滿
晶晶洲渚明
廣韻晶晶白貌
冽冽川原肅
說文冽冽氣寒也
孤蹲

天飛
雀不動
六書故曲肱坐日蹲
沈酣客猶宿呼童晨汲歸
地理志土狹而險山

居谷獨漱寒泉玉

擬一上人懷山之什

中夜雪打牕

晉史祖述中夜聞荒雞鳴蹴劉燈暗光照

屋袖手地鑪火

宋紀太祖雪夜叩趙普門已而大雪普

呼之帝曰吾睡不能著一榻之外 鉗聲起絲竹憶我故

山房松風韻崖谷

梁書陶宏景特愛松風庭院 山空牛

斗寒

王維夜靜春山空牛

寺靜魚鼓肅

集記魚木魚法

以誦經者樂書鼓羣音之長伊耆氏 西寨鹿不歸

造梁昭明掖影專高塔法鼓亂嚴更

東嶺鶴獨宿

杜甫劍閣星橋

作柴名義考凡別墅籬落

日柴王維朝川有鹿柴

北松州雪嶺東

更想醉翁亭兩峰高竝玉

歐陽修醉翁亭記環滁皆山也其西南諸峰林壑尤美望

之蔚然而深秀者琅琊也山行六七里漸聞水聲潺潺而瀉出於兩峯之間者醴泉也峯間路轉有亭翼然臨出於泉上者醉翁亭也作亭者誰山

之僧智仙也名之者誰太守自謂也

題魯山溫泉
寰宇記春秋鄭邑漢號魯陽後魏號魯州唐號魯山屬汝州孤峯秀

立山下有溫泉武后嘗幸此其側又有寒泉

平生耳熟聞驪山

寰宇記驪山在臨潼縣東南二里山海經云驪山其陽多寶玉其陰多黃

金溫泉水出焉漢武故事秦始皇於此砌石砌宇武帝遊幸加修飾焉雍錄溫泉在驪山秦漢隋唐皆嘗遊幸惟玄宗特修即山建立百司庶府各有寓止

夢寐不到

臨潼關

寰宇記臨潼關有潼關

當年太液金井碧

前漢記太液池在建章宮北周

迴十頃成帝嘗秋日攜趙飛燕遊此以沙棠木為舟以
紫桂為棹以雲母飾鷁首池中有蓬萊方丈瀛洲象三
神山也風俗通溫泉宛在關山間王建溫泉宮行十月
水清日金井

路無塵埃官前內裏湯各別每箇白玉芙蓉開朝元閣
向山上起城繞青山龍暖水夜開金殿看星河宮女知
更月明裏武王得仙王母去山鷄晝鳴宮中樹溫泉決
決出宮流宮使年年修玉樓禁兵去盡無射獵日西麋鹿登
城頭梨園弟子偷曲譜頭白人間教歌舞憶昔君來必十月騎玉花驄帶風

雪韻府唐明皇太真獨侍沐浴邊通鑑壽王妃楊氏色
馬名玉花驄美絕世無雙明皇見

而說之令妃自乞為女官號太鯨甲龍鱗影清絕西京
真潛納宮中幸之遂進為貴妃鯨甲龍鱗影清絕雜記

昆明池刻玉石為鯨每至風雨鯨常鳴吼鬣尾皆動初
學記前梁有閑豫池池有龍影五彩遂鑄銅龍於其上

五十年昇平一迷賈至為報延州來雅却驅萬騎出關
樂須知天下欲昇平

西幸蜀記潼關失守國忠倡幸蜀之策上命龍武將軍

陳元禮整六軍出延秋門行從皆饑上拂然有棄海

內意高力士抱上足泣諫乃止父老爭獻糲飯手刲而

食至馬嵬驛士卒憤怒誅國忠縊殺貴妃以徇眾心駕

將發眾議所之力士揣上意曰太原隣賊自爲前朝同

朔方近塞以臣所料蜀道可行遂幸西蜀

禍水外傳漢成帝微行過陽阿主家說歌舞者趙飛燕

右見之皆嘖嘖嗟賞有宣帝時披香博士

淖方成在帝後唾曰此禍水也滅火必矣

廉溪南宋明帝問范柏年貧泉答曰梁州唯有文州武

鄉廉泉讓水問卿宅何處曰臣處廉讓之間帝嗟

其善君不見汝海之南魯山左亦有此泉名不播征夫問

路說湯頭可憐是亦陳驚坐

陳遵傳遵字孟公時列侯有與公同姓氏者每至人

門莫不驚動因號爲陳驚坐

香山示孔處厚

寰宇記香山舊名火珠山大悲菩薩證道所也在汝州寶豐縣

東白居易詩六月灘聲如猛雨香山樓北暢師房夜深起凭欄千立滿耳潺湲滿面涼

我來南經幾山過馬行似衝山色破

李白波翻口口風影岸疊春山色

烟席卷巖穴開

陳後主楊柳春橋邊車馬飛風烟

澗花縈迴水流左懸

崖彷彿聞松聲

晉宋纖傳丹崖千丈青壁萬尋室邇人遠實勞我心

下瞰幽深鳥

飛墮

後漢馬援傳援擊交趾仰視飛鳶跼跼墮水中追念從弟少游平生語何可得也

老夫他

年有所歸定結白茅依紫邏

九域志紫邏山在汝州梁縣按梁縣即寶豐縣

日

高下馬古寺門魚鼓欣聞脫清餓

魚鼓詳見擬一上人

道人碧眼

照川谷

智度論得道者名為道人高僧傳維摩眼紺青色稱碧眼胡僧

雲起盤陀藉高

坐

杜甫星躔寶枝金盤陀注馬上餘也

殷勤勸我更莫歸
唳鶴啼猿亦相

和牕前笑喚那孔賓

晉書祁嘉年二十餘夜忽牕中有聲呼曰祁孔賓祁孔賓隱去來隱

去來修飾人世甚苦不可諧所得

世間安用招魂些

楚

未毛銖所喪如山崖旦而逃去
玉哀屈原魂魄散佚作招魂以復其精神杜甫易下楊朱淚難招楚客魂

田中行

落葉如流人

陸機鳴枯條之冷洽飛落葉之漠漠

遷徙不可收
嚴霜枯百

草

淮南子陰氣盛則凝而為霜

清泚山下溝
我行將涉之
脫屣笑復

休憮然顧籃輿

陶潛傳向承籃輿亦足自適

崎嶇反經邱
陶潛歸去來辭既窈

窈以尋壑亦崎嶇而經丘

天風吹我裳
彼亦難久留
晚過柳下門

晉書

陶潛門植五柳自號五柳先生鳥聲上啾啾父老四五輩向我如有求

邀我酌白酒談苑海東劉生善釀白酒曝日中經旬飲之醉不醒語云不畏張弓拔刀惟畏白

醪香酒酣語和柔指云此屋南頗有良田疇勸我耕其

中庶結同社遊吾母性慈儉老子我有三寶保而持之日慈日儉日不敢為天下

先慈故能勇儉故能廣不敢為天下先故能成器長此事誠易謀伯也久吏隱晉山

清傳孫綽謂清隱非史吏非隱又可以吾無憂請歸召

家室賣衣買肥牛史龔遂傳遂為渤海守郡人好佩劍帶刀遂合賣劍買牛賣刀買犢所

望上帝喜祈穀常有秋月令是月也天子乃以元日祈穀於上帝尚書若農服田力穡

乃亦有秋
晁具茨先生詩集卷之一終

晁具茨先生詩集卷之二

古詩

同魯山韓丞觀女靈廟前險石

君不見魯陽之西兩山麓

魯陽詳見卷一題魯山

十里連岡寫平

陸青林白晝暗古祠

楊雄續紛往來轆轤不絕若光若滅者布乎青林之下

崔暉

虛簷蛛網屋

杜甫暉雀爭枝墜張協蜘蛛網四壁

屋邊怪石何瑰奇鳳筋

虎骨連肌肉巉巖欲下落澗渚

淮南子未

有天地鴻濛瀕洞許慎注瀕讀作項周伯溫日氣瀕洞未分之貌

天匠惟知刻畫功

江淹

賦刻畫齒翠今

鬼力深憂護持哭前峯高蹇下如揖餘

山雲而碧峰

峯危慄皆俯伏披尋宿莽得佳趣楚詞朝搴阰之木蘭今夕攬洲之宿莽注

經冬不凋凋草也窪為溪壑呀為谷說文窪汚下也同窵西都賦呀周池而成淵字林呀大空

貌香爐佛迹不在外慧遠廬山記香爐山孤峯杳起游氣籠其上芬氲若烟裊宇記佛手

巖在廬山北巉生石壁形如佛手垂下故名仙掌蛾眉此其足前漢武帝紀鑄仙人掌以

承露蜀志眉州自岷山連岡疊嶂延袤三百餘里至此突起二峯對峙宛若蛾眉故名秀潤潛涵

夏木清空濛映帶春江綠我知此必蘊靈異何止懷藏

易城玉史記趙惠王得楚和氏璧秦昭王請以十五城易之趙使藺相如奉璧入秦相如見王無意償

城欲以璧擊柱秦王恐碎璧不敢逼視相如乃使人完璧歸趙不聞寂嗟來麋鹿遊孤峻

幸免牛羊躅自經千載禹刊鑿不逢萬里秦驅逐三齊畧秦

始皇欲作石橋過海觀日出處時有神人能驅石下海
石去不速神輒鞭之石皆流血至今悉赤陽城山石盡
起立巖巖東傾
狀如相隨行
踟躕三遶回高岡却立下視雲蒼蒼古

今誰爲好事者後有韓子前奇章

石譜牛僧孺封奇章公好蓄奇石以甲乙

丙丁爲品第

君不見玉川先生洛陽宅

唐盧仝號玉川子其莊在河南之濟源縣

仝詩云買得一片田濟源花洞前是也有寺曰玉泉寺仝嘗汲此寺泉煎茶有謝孟諫議茶歌

修竹蕭

蕭獨爲客它年如與鶴乘軒

左傳衛懿公好鶴有乘軒者

可來相見

銅駝陌

陸機洛陽記洛陽有銅駝街漢鑄銅駝二枚在宮南四會道相對俗語曰金馬門外集衆賢銅

駝陌上集少年

陸元鈞

宰

寄日注茶

歸田錄兩浙之茶日注爲第一會稽郡城南有日注

嶺

日北具涉先生詩集卷二

我昔不知風雅頌草木獨遺茶比風

經疏毛詩無茶字

陋哉徐

玄說茶苦

說文苦茶也徐鉉曰此卽今之茶字

欲與淇園竹同種

韻府漢武塞瓠

子河下淇園之竹以爲槌

又疑禹漏稅九州

唐書德宗時趙贊始興茶稅張滂繼之

橘

柚當年錯包貢

書厥包橘柚錫貢

腐儒妄測聖人意遠物勞民

亦安用含桃熟薦當在盤

禮記月令仲夏之月天子羞以含桃先薦寢廟注含桃卽

櫻桃爲鶯鳥所含故曰含桃

荔子生來枉飛鞚

漢本紀永元間嶺南獻生荔枝十里一置

五里一堠晝夜傳送唐羌上書言竊見交趾七郡獻生荔枝龍眼觸犯死亡之害此二物升殿未必延年益壽

詔敕大官勿復受獻羊殖異好亦何有

魏錄琅瑯王肅昔仕南朝好茗飲鯽魚羹及過北又

好羊肉酪漿嘗云羊陸產之宗魚水族之長羊比魯蚶
齊大邦魚比邾莒小國惟茗飲不中與酪漿作奴

菜殊珍要非奉爾雅蚶狀如小蛤而圓厚嶺表錄異南人名空慈子尚書盧鈞以其殼似瓦屋

之壟改爲屋瓦子屋壟子廣人重其君家季疵真禍首
肉炙以薦酒呼爲天爵亦謂之蜜丁

毀論徒勞世仍重唐書竟陵僧於水濱得一兒育爲弟子稍長因自筮而姓陸名羽字鴻漸

有才華茶術最精遊於湖海稱竟陵子著茶經三篇李

季卿至江南召羽煮茶羽衣野服挈具而入公心鄙之

命僕者取錢三十文酬煎茶博士爭新鬪試誇擊拂茶

羽愧之更著毀茶論羽別字季疵錄

建安鬪茶以茶之水痕先退者爲負耐風俗移人可深痛

久者爲勝名曰茗戰歐陽修有鬪茶歌

老夫病渴手自煎嗜好悠悠亦從眾西京雜記司馬相如有消渴病唐書

常魯使西番烹茶帳中謂番更煩小陸分日注密封細

人曰滌煩療渴所謂茶也

字蠻奴送槍旗却憶採擷初茶譜團黃有一旗二槍之號言一葉二芽也雪

花似是雲溪動晉張協七命右臨雲溪注雲所出之溪更期遣我但敲門

賈島鳥宿池邊樹僧敲月下門玉川無復周公夢玉川詳見前同魯山論語吾不復夢見周

公博物志飲真茶令人少眠睡

送王敦素橫

先君有六女所託皆高門于定國傳定國父于公其門間壤父老方與其治于公日

可高大其門令客駟馬高車我治獄多季也久擇壻晚

得與子婚子家望海內實惟謫仙孫唐史賀知章稱李白此天上謫仙也

筆也有家法晉王羲之父子以書法名世勢作風雷犇張九齡河津會日月天仗

役風

雷

結交多英豪坐致名譽喧

本事詩韓翃少負才名天寶末舉進士孤貞靜

默所與遊皆當時名士

憶昔識子初河流出崑崙

水經崑崙山在西北去嵩山五

萬里其山高萬一千

中間一再見騏驎始伏轅

楚詞寧與騏驎

里河水出其東北陬

抗輓乎將隨

去年接同居底裏見所存磊落忠義人

石勒

驚馬之跡乎

日大丈夫行事當磊磊落落如日月

愛國憂黎元

郊祀志大路所歷黎元不知注言無徭費不勞

於下使當元祐時密勿與討論

元祐宋哲宗年號杜甫君誠中興主經緯固密

勿上可參廊廟

文中子山澤有廊廟之志注廊殿下屋廟太廟國事先謀於廊廟之所

下

可裨諫垣

唐書元稹既居諫垣不欲碌碌自滯

惜哉不遇知白髮早已繁

卑官不可說感激猶主恩

虞世南緬懷古人芹思酬明主恩

爛漫有歸

期繫舟古槐根

異聞錄淳于芬飲古槐下醉卧夢二使曰槐安國奉邀指古槐入穴中槐安國

王曰南柯郡不理屈卿為守尋槐根下穴可容祖餞無

一榻

直上南枝即南柯郡也後果為南柯太守韓愈集二疏告老故人邑子贈遺請以言

酒食

設祖道供帳東都門外餞行人以言子家鍾山下

不若贈

寰宇記鍾山在秣陵城東北形勝志鍾山龍蟠石城虎踞長江天塹

人以言

隨事有田園

王氣

陶潛田園將無胡不歸竹徑背古寺

所鍾

徐稜竹徑齋結草堂面江村

構新

盧鴻終南草堂歌山為宅草為堂芝室今藥房高軒納翠微

阮籍

高軒飛觀廣廈閑房修筒引潺湲

爾雅

山木及上日翠微湯兮流

潺湲

杜甫色侵山色搖酒樽

盈

杜甫色侵風土記童謠云寧飲建業水不食時登

日飲建康水

武昌魚寰宇記建業晉改名建康

謝公整

寰宇記金陵謝公整在治城北以謝太傳名

沈酣左氏學

魏賈逵月讀左傳一

遍後魏張吾貴不能說左傳詰劉蘭講傳三句集生徒講之義例無窮

浩蕩極辭源

杜甫淒涼

憐筆勢浩蕩問詞源

客至勿多語欲吐且復吞書來無忽忽慰我

別後魂

江淹知離夢之躡躡意別魂之飛揚

次四兄

以道

韻答許下諸公

羣雄將風騷

魏繆襲芟夷鯨鯢驅羣雄唐村牧今代風騷將誰登李杜壇

敵若攻守

墨

通鑑齊田單守即墨燕將久攻不下單詐約降燕燕軍懈單乃以牛千頭為絳衣畫五采龍文束兵其角

灌脂束葦於尾燒其端夜縱牛奔燕營所觸盡死傷

公將百萬兵

通鑑絳侯周勃曰吾嘗將百萬

軍然安知獄吏之貴乎

如一劇孟足

前漢書劇孟博徒也袁盎善待之周亞夫得劇孟隱若一

敵間楚或揮金

通鑑陳平日項王骨鯁之臣不過數人王能捐數萬斤金行反間間其君臣以

疑其心破楚必矣漢王乃出黃金四萬斤恣平所為

伐虞還取玉

穀梁傳獻公亡號五年而後舉

虞荀息牽馬操璧而前曰璧則猶是也而馬齒加長矣

使我備偏裨

唐史唐制凡

大將營牙參

授書防敗辱

蘇秦傳士業已屈首受書而不能以取榮李陵書曹沫不辭三敗之

辱安敢凱旋歌

晉書裴行儉大破厥突振旅奏凱而旋

直可向師哭

左傳秦穆

公召孟明西乞白乙使出師於東門之外蹇叔哭之曰孟子吾見師之出而不見其入也

短兵不須

接杜甫狹巷短兵相接處殺人如草不聞聲

長城已完築

史秦築萬里長城

畏強我

但守用奇公自出

唐李華文文教失宣武臣用奇

入壘畏膝行

吳王濞傳王肉

袒詣漢軍頓首膝行

免冠謝頭禿

韓愈毛穎為人強記便敏上嘗呼為中書君後進見上將有任

使拂拭之免冠謝上見其髮禿論功穀可丹揚雄客欲

上笑曰中書君老不中書耶錫命綬當緣漢官儀二千石以上者顧我

赤吾族也錫命綬當緣銀印綬亦曰艾綬

老更癡晉吳衍老猛虎空手觸詩祖裼

癖癡漢

晁具茨先生詩集卷之二終

晁具茨先生詩集卷之三

古詩

贈僧法一墨

黃山之巔百尺松

寰宇記歙州黃山上有峯三十六溪二十四洞十八黃帝嘗與容成子浮

丘公煉丹於此古詩鬱鬱澗底松離

離山上苗愛彼徑寸莖蔭此百尺條

虬枝偃蓋連羣峯

酉陽雜俎世傳松千歲方傾平

偃蓋杜甫偃蓋反走虬龍形

山神守護魑魅避

說文魑老

精物也人面鬼身四足好惑人山林

異氣所生魑似山獸之形魅屬也

道人翦伐天爲容

詩勿翦

捫崖蹠蹠篝火遠

說文篝竹籠也史陳涉世家夜篝火

絕壁晻靄

勿伐

凝烟濃

曹植墨出青松烟筆出笈兔翰

玄霜霏霏玉杵下

墨經韋仲將墨法鐵臼中

搗三萬杵杵多益善案

墨名玄霜又名玄雲

捕麋煮角當嚴冬

膠十年已上强

陰房風日不可到律琯吹盡灰無蹤

杜甫

律吹葭管

小書細字著名姓黃金照耀圖雙龍

宋仁宗得李廷

珪父子墨以賜近臣皆圖

雙脊龍乃其墨之尤佳者

守臣再拜選進日九關有詔

開重重老儒偶得實天幸千金更買無由逢上人澹泊

何所好工書草穎如飛蓬

程邈作隸書杜操作草書

得一酬十載相過從君不見玉堂詞人紫垣客

宋太宗御書飛

白四字題於翰林院曰玉堂之署史天官書上垣太微

中垣紫微下垣天市晏公類要黃門省名紫垣給侍中

所禁賜舞蹈黃羅封長安紙價猶未貴

左思傳思字太冲造三都賦成

豪貴之家競相傳寫洛陽爲之紙貴世說庾
闡作揚都賦成人競傳寫都下爲之紙貴
江南江北

山皆童
廣韻山無草木曰童

法一以余所贈墨爲不佳

上人好事世莫當
圖覺要覽內有德智外有勝行在人之上曰上人
羅列四寶

如文房廣交往往得奇物有墨尺度如圭長秋麋折角

膠與力春麝入臍煤生香
墨法松烟二兩丁香麝香乾漆各少許以膠水搜作挺火

烟上薰之
已將雪覆輕羅帕更令花映紅紗囊草堂老

人不自料
杜甫卜居成都西郭浣花溪作草堂
亦藏一餅誇精妙自言和

壁持贈君
韓非子楚人和氏抱其璞哭於楚山之下王使玉人理其璞得寶焉遂名和氏璧梁史高

祖問陶宏景山中何所有嶺上多
白雲只可自怡悅不堪持贈君
反爲燕石遭譏誚

闕子

宋愚人得多石以爲大寶華篋十
重緹巾十襲視之者皆掩口而笑
嗚呼萬事孰不然古

今工拙那同調君不見當年諸李數不到庭寬只今賜

墨無老潘

墨經凡古人用墨多自製造故匠氏不顯唐之匠氏惟聞祖敏其後易水奚鼐奚鼎鼐之子超鼎之子起又有張遇陳斌江南則歙州李超超之子庭珪庭寬庭珪之子承浩庭寬之子承宴又有耿氏

兖州則陳氏宣州則盛氏皆世其家近世則京師潘谷歙州張谷

復以承晏墨贈之

我聞江南墨官有諸奚老超尙不如庭珪後來承晏復

秀出喧然父子名相齊

注詳見前

百年相傳文斷碎彷彿尙

見蛟龍背

說文龍鱗虫之長蛟龍屬無角

電光屬天星斗昏

謝眺驚電夜舒光

雨痕倒海風雲晦却憶當年清暑殿

宮殿簿晉清暑殿在洛宮劉禹錫團

扇復團扇奏君清暑殿

黃門侍立才人見

唐開元初改納言爲黃門

銀花灑落

金花牋

索靖草書狀婉若銀鈎飄若驚鴻杜甫灑翰銀鈎連唐明皇賞牡丹以金花牋賜李白令進新

詞

牙牀磨試紅絲研

拾遺記紅絲石產土中其質紅黃紋如刷絲縈繞石面爲唐彥獻所

寶

同時書畫三萬軸

唐李泌相肅宗代宗封鄴侯家積書至三萬軸次第甲乙皆懸以牙

籤

大徐小篆徐熙竹

書斷唐徐浩書多渴筆在書家爲難世狀其書曰怒貌抉石渴驤奔

泉注渴筆枯墨也畫譜江南徐熙先落筆以寫其枝葉蔬萼然後傳色故骨氣丰神爲古今絕筆所畫多在澄心堂紙上郭若虛云諺稱黃筌富貴徐熙野逸蓋熙爲處士志節高邁多狀江湖所有汀花野竹水鳥淵魚

御題四絕海內傳

李後主澄心堂紙李庭珪墨毛元銳筆龍尾石硯謂之四絕

祕府

毫芒惜如玉

漢書天下文籍悉在廣內祕府之室謂之祕書

君不見建隆天子

開國初

建隆宋太祖年號

曹公受詔行掃除

宋史帝遣曹彬伐江南克之振旅而

還舟中惟圖籍衣衾而已

王侯舊物人今得更寫西天貝葉書

釋典西域

無紙以貝多樹葉寫經文又稱經文爲梵莢曹子建遊魚山聞空中梵音摹其節寫爲梵唄

紀愁

北風吹我裳夏潦漂我屋

曲禮水潦降注雨水謂之潦

牛羊踐我稼

詩牛羊勿踐履

雀鼠耗我穀

戰國策黃雀俯啄白粒史李斯傳觀倉中鼠食積粟

雪寒墮

我指

前漢高帝紀帝擊韓信遂至樓煩會大寒士卒墮指者十之二三

雨淫疾我腹

左傳

天有六氣陰陽風雨晦明也分爲四時序爲五節過則
爲雷陰淫寒疾陽淫熱疾風淫末疾雨淫復疾晦淫惑
疾明淫朝行桑榆間後漢馮異傳失之秋序傷遠日莫
心疾

涉水之涯

書若涉大水其無津涯

含沙中兩足

博物志江南射工虫長一二尺含沙

射人影

攬轡馬病黃

詩我馬玄黃

伏軾輿脫輻

易小畜九三爻詞注不能

自進

陟山既見虎

說苑齊景公出獵上山見虎下澤見蛇以爲不祥晏子曰國有三不祥有

也

賢而不知一知而不用二用而不任三是不與焉

還舍乃對鵬

史賈誼傳誼爲長沙王傳三年

有鵬鳥集於舍止於

一沐三握髮

韓愈書周公之見賢也方一食三吐其哺

坐隅因作鵬鳥賦

方一沐三十飯九不肉

史孟嘗君傳彈鋏歸來兮食無肉

先生昔離垢

握其髮華嚴經國名離垢琉璃爲地有八交黃金爲繩南史劉
慧斐字宣文隱居匡山於山北構園名曰離垢晝夜行

道孜孜不怠人欽慕

居士今耐辱

唐史司空圖居中條山不出作休休亭日

之謂為離垢先生

飽聞戒畏塗

莊子畏塗者十殺一人則

量才一宜休揣分二宜休居

毫而贖三宜休號耐辱居士

莊子方且與世違而心不屑與之

父子兄

弟相戒

那知有沈陸

俱是陸沈者也儲光羲王屋嘗遠

遁伊川

復陸沈

四兄諸人皆用屋字詩送一上人余獨留之

狺狺犬護門

說文信狺犬吠聲

喔喔雞登屋

說文喔喔雞聲也

不疑故

人來但謂風敲竹孤僧雪中歸白馬度塹谷坐久飯食

訖

金剛經飯食訖收衣鉢洗足已趺坐而坐

尚說毛髮肅吹燈燃溼薪

晉書畢武

夜燃薪

我起子就宿

傳燈錄永嘉禪師謁六祖問答相契畱就一宿

明日且復

讀書

畱長安米如玉

李白白王換斗粟黃金買尺薪藊軾喜雨亭記使天而雨玉饑者不得以為粟

送一上人還滁州瑯琊山

一統志滁河在州城外源出廬州漢為全

椒阜陵建陽三邑地隋置滁州瑯琊山在城南十里

上人法一朝過我問我作詩三昧門

法華經如來知見廣大深遠無量無

碍力無所畏禪定解脫三昧深入無際成就一切未曾有法華嚴論鈔三之云正昧之云定亦云正受為正定

不藝能受諸法憶持簡澤故名正受亦云等持平等持心趨一境故我聞大士入詞海發

經淨名大士是不起宴坐澄心源指月錄須菩提宴坐空山禪波洞

徹百淵底法水蕩滌諸塵根圓覺經根塵虛妄注六根六塵文選頭陀碑眼耳鼻

舌身意謂之六塵心經眼所見處耳所聞處鼻所迅流

臭處舌所味處身所觸處意所思處謂之六根

速度超鬼國

寰宇記西南夷羅施鬼國漢屬牂牁郡禹貢荆梁二州之南境天文參井分野到

岸捨筏登崑崙

金剛經知我說法如筏喻者法尚應捨何況非法水經崑崙山在西北去嵩高

五萬里地之中也

無邊草木悉妙藥一切禽鳥皆能言化身八

萬四千臂神通轉物如乾坤山河大地悉自說是身口

意初不喧世間何事無妙理悟處不獨非風幡

傳燈錄六祖寓

法性寺風動幡一僧云幡動一云風動六祖云風幡非動動自心爾

羣鶯轉頸感王子

雜鈔

鶯項善旋轉古之學書者法以動腕王羲之好鶯以此

佳人舞劍驚公孫

法書苑顏魯公

與懷素同學草書於鄔兵曹嘗問師曰草書於師授之外須自得張長史觀孤蓬驚沙之外見公孫大娘舞劍始得低昂廻翔之狀兵曹有之乎杜甫昔有佳人公孫氏一舞劍器動四方

風飄素練有飛

勢世說羊欣年十二王獻之愛之嘗夏雨注破屋空留

痕法書苑懷素與鄒兵曹論書以古釵股對顏魯公曰何如屋漏痕注屋漏痕無起止之跡惜哉數

子枉立解但令筆畫空騰騫君看瑯琊釀泉上醉翁妙

語今猶存醉翁詳見卷一擬一上人向來溪壑不改色青嶂尙屬僧

家園君行到此知此意辨才第二文中尊語錄第二西

江一口盡可吸傳燈錄馬祖曰待汝一口雲夢八九何

勞吞子虛賦吞雲他年一辦爐中香宋陳思道字無已號後山詩日向來

一辦香敬爲曾南豐注會此老與有法乳恩

鞏號南豐後山之師也

易其茨先生詩集卷之三終

晁具茨先生詩集卷之四

古詩

和十二兄五首

一

淵明詩百篇無一不說酒四顧宇宙間獨與此物厚

晉陶

潛傳淵明去彭澤令隱居栗里哦詩飲酒自高其志顏延年謚曰靖節徵士

子雲苦家貧日

給或亡有艱難識奇字草玄至白首時時載酒來尙賴

好事友

漢書楊雄字子雲口吃而好沈思成帝時客有薦雄文似相如者獻甘泉長楊諸賦拜執戟郎

校書天祿閣家貧嗜酒好事者時時載酒問奇字鉅鹿侯芭嘗從雄學授法言又雄嘗草太玄經以擬易吾

兄斯人徒性亦嗜醇酎

西京雜記正月旦造酒八月成名曰九醞一名醇酎張載酒賦

中山夏啟醇酎秋發

寧知俗士嫌益覺兒女醜

杜甫願展丈夫雄得辭兒女醜孰

云醉無度婉婉

原註一作婉婉

春月柳

晉書王恭美姿儀或目之云濯濯如春月柳

區區布肉論遲速同一朽但看古聖賢得如飲者不

二

伯也今代豪

說文長曰伯

嗜詩如嗜酒賦多轉遒勁語老愈

深厚塵言刪不存妙句元自有白華忽補亡

詩序白華孝子之潔

白也注此笙詩也有聲無辭

關雎不為首

詩關關雎鳩在河之洲

壘簾起兄弟

詩伯氏吹壘仲氏吹簾

珠玉到朋友

梁簡文答新喻侯曰垂示三首風雲吐於行間珠玉生於

字吟詠九日菊菊譜韓琦在北門九日宴諸僚佐有詩咏菊云不羞老圃秋容澹猶有寒花晚

節香識者覩公有晚操焉沈酣八月耐搜剔發清新聯翩雜奇醜詳

味訐謨章用思過楊柳但使身愈窮歐陽修世謂詩人多窮非詩能窮殆

窮者而後工也未信名可朽劉向學者崇名立身之本也不知造物意令作

清廟不詩於穆清廟

三

崎嶇謫仙人豪放一寓酒杜甫李白斗酒詩百篇長安市上酒家眠天子呼來不上

船自稱臣是酒中仙平生韓荆州未識意已厚李白生不願封萬戶侯但願一識韓

荆幙府强辟召此例未見有書幣入吾廬鞍馬望隴首

出處計已熟不復訊交友南山別何時氣尙若酣耐籌

策屈大才談笑誅小醜戍角斷落梅杜甫老夫聞悲角注軍器制之以司

昏曉李白笑坐金鞭歌羌笛起折柳岑參屢聞羌兒笛李白誰家玉笛暗

落梅曲名有落梅花飛聲散入春風滿洛城此夜曲中聞折柳何人不起故園情笛曲有折楊柳將軍意未快戰

士骨已朽史記老子曰人與骨皆已朽矣請公入參謀可用和戎不左傳

晉侯欲伐戎魏絳言和戎有五利

四

先生翰墨英揮灑每被酒唐張旭善草書醉則狂呼而走乃下筆或以頭濡墨而書

既醒自視以為氣陵蒼柱穹勢壓坤軸厚易坤厚載物博物志地有神不可復得

三千六百軸
犬牙相制
俊拔今固無
墨藪褚遂良書字裏金生妙

絕古未有
筆法蔡邕工書得八分之精微體
驚鸞忽矯

翼
說書草書之為狀也婉若銀鈎
犇馬時驤首
蘇東坡

揮百紙盡駿馬倏忽踏九州王
高步褚薛流
褚遂良見

僧孺日中驅上駟驤首徧京宛
好事隨取之所至具

人善
下視鍾王友
鍾繇魏人王羲之晉人俱善書

名耐簡疎秦隸奇
書斷隸書者秦下邳人程邈所作也

雲陽獄中覃思十年益小篆方圓而得隸書三千字奏
之始皇善之用為御史以奏事繁多篆字難成乃用隸

字以為隸人佐書務
誦怪夏篆醜
字源夏后氏
么麼張

芝草
書斷漢張芝字伯英臨池學書池水盡黑
嫵媚元

和柳

元和漢章帝年號書法本象大篆之變為懸針為薤葉為柳葉為剪股為鵲頭出後漢扶風曹喜

載觀碑籍存

後漢書蔡邕以經籍去聖久遠文字多誤乃奏求正定六經文字帝許之邕自書丹

於碑使工鐫刻立於太學門外

始成觀視模寫者車日千餘輛

尙恐金石朽

墨明鬼子孫或恐其

腐蠹絕滅故琢之盤

未知太極成有請於公不

王獻之傳太元

孟鏤之金石以重之

中新起太極殿謝安欲使獻之題榜以為萬代寶而難

言之以魏韋仲將書凌雲殿榜諷之獻之曰仲將魏之

大臣豈

五

我家溱洧間

詩溱與洧方渙渙兮

春水色如酒

王昌齡金澗流春水

嵩少在

吾旁

西征記嵩山三十六峯東曰太室西曰少室相去十七里其下皆有石室嵩其總名也

日夕

意亦厚田園雖不廣幽興隨事有藥畦灌陳根蘇廣文陶公歸

隱白雲溪買得春泉灌芋區採駢首韓愈松果連南春

郊餉耕徒秋社接酒友歲時記立春後五戌日爲春社

事俗傳社日飽誦傳家書促釀供客酌益知簡易真未

媿疎拙醜邇來居東都寰宇記唐以洛陽爲東都物色不見柳後漢嚴光

傳光武以物色訪嚴造次遇摧折荏苒及衰朽潘岳荏苒冬夏

謝寒暑忽流易欲歸便可爾未知公果否

夷門行贈秦夷仲

君不見夷門客有侯嬴風史記侯嬴大梁人年七十隱夷門監者魏公子無忌虛左

以迎引爲上客竊符奪晉鄙兵救趙大破秦師皆嬴策
之也寰宇記夷門在汴州城內一名夷山卽侯嬴監守

處
殺人白晝紅塵中京兆知名不敢捕倚天長劍著崆

峒宋玉大言賦方地爲輿圓天爲蓋長劍耿耿倚天外
崆峒者在汝州西南六十里盧貞碑略禹跡之內山名
崆峒者有三其一在臨洮其一在安定彼人亦各於其
處立廣成子廟而莊生述黃帝問道崆峒遂言遊襄城
登具茨訪大騄皆與此山接壤則臨洮安定非問道之所明矣同時結交三數公聯翩

走馬幾青驄仰天一笑萬事空入門賓客不復通起家

簪笏

原註一作筆

明光宮

江總簪笏奉周行注冠簪手笏貴者之服漢武帝求仙起明光宮發

燕趙美女二千人充之高適畫圖麒麟閣入朝明光宮

嗚呼男兒名重太山身如

葉手犯龍鱗心莫懼

韓非傳龍喉下有逆鱗徑尺嬰之必殺人人主亦有逆鱗駭賓王歛

容辭豹尾緘

一生好色馬相如史記司馬相如蜀郡成都人字長卿以貨為郎

想度龍鱗

國病免居茂陵家貧客遊臨邛時卓王孫有女新寡好

音相如以琴心挑之文君夜亡奔相如相如與馳歸成

都家徒四壁立久之復如臨邛盡賣其車騎買一慷慨

酒舍酤酒而令文君當壚相如自滌器於市中

直辭猶諫獵漢書武帝好自擊熊豕馳逐野獸相如上諫獵書

次四兄雪夜韻

夏蟲不知冰

莊子夏蟲不可以語冰者篤於時也越犬不識雪柳宗元文庸蜀之南

恆雨少日日出則犬吠大雪被南越中數州

犬皆蒼黃吠噬狂走者累日至無雪乃止

我獨冰雪

間肘見冠纓絕

莊子曾子十年不製衣正冠而纓絕提衿而肘見

青燈挂長檠

韓愈長檠八尺空自

文字夜涉獵

前漢司馬遷傳其多疏略或有牴牾亦其

長短檠二尺便且光

涉獵者
廣博

問米米已無問酒酒已竭當時陶淵明

陶淵明
詳見卷

六東陽
山人

同日無此關置書忽不樂面壁臥嘔噎蟲犬兩

不如悲歌聊一發

地理志丈夫相聚
遊戲悲歌慷慨

晁具茨先生詩集卷之四終

晁具茨先生詩集卷之五

古詩

書懷寄李相如

秋風吹畦蔬

杜甫畦蔬繞茅屋

農事亦已闌黃黃杞下菊佳色

尸冢間

陶潛秋菊有佳色含露摘其英魏志禰衡言語悖逆曹操怒送與劉表臨發衆爲祖相戒曰

衡悖逆無禮今因其後至以不起折之衡至衆莫肯起衡大號衆問其故曰坐者爲冢卧者爲尸尸冢之間能不悲

我生復何如憔悴嘗照顏清晨戴星出

家語巫馬期爲單父

令戴星出入以理

薄莫及日還

廣雅日初出爲旭日在午曰亭午日將落日薄莫

二十載老髮羞儒冠

儒服志進賢冠古緇衣冠儒者之服也前高七寸後三寸長八寸有

五梁三梁兩梁一梁之別

天末有佳人

謝莊氣霽地表雲歛天末嵇康

博士則用兩梁崇儒也

伊誰之勞秀擢如芝蘭

家語與善人居如入芝蘭之室久而不聞其香與之俱化矣

憮然念夙昔風流得餘懽

南史顧愷之與簡文同年而早

白問其故答曰松柏之姿經冬愈茂蒲柳之質望秋先零

與君同歲寒

薛令之只可謀朝夕何由

保歲

一別事瓦裂令人氣如山

次韻集津兄會羣從王敦素宿王立之園明日

西征馬上寄示諸人

原註以道嘗監陝府及津倉

秋高訪幽居風急桑未落天寒雞犬靜地僻門巷濶主

人避世賢自說久棲泊

高適漁樵屢棲泊

呼兒出罇罍梨栗亦

不惡

陶潛責子白髮被兩鬢肌膚不復實雖有五男兒總不好紙筆阿舒已二八懶惰故無匹阿宣行志

學而不愛文術雍端年十三不識六與七通子賓客四垂九齡但覓梨與栗天運苟如此且盡杯中物

五人談笑動林薄

說文水曰林草曰薄

夜闌慘無懽離憂倏中作

伯也天下士千金輕一諾

史季布傳曹丘生曰楚諺曰得黃金百斤不如得季布一

諾足下何以得此聲名於梁楚間僕與足下俱楚人使僕游揚足下名於天下顧不美乎揮斥楊墨

徒正是鄒魯學如何但銀魚

杜甫碧山學士焚銀魚白馬却走身巖居

生事

了無託惜哉桃李姿

唐史狄仁傑嘗薦姚元崇數十人俱為名臣或謂仁傑曰天下桃李

盡在公門

見笑葵與藿

曹植表葵藿之傾葉太陽雖不同光然向之者誠也雞鳴驅車

行令人意參錯

復至新鄉解寄張程

新鄉漢河內地今屬衛輝府

驅車出吾廬

陶潛衆鳥欣有託吾亦愛吾廬

落月猶在樹我行欲何之

所以河源去

寰宇記黃河故道自新鄉南入界北行與胙城相接

去去益已遠炯

炯不可論羣語車鐸間尙想兒女喧稍涉原上路漸見

柳下村霧草結風露風林散朝暾

杜甫絕壁上朝暾

悠悠望蘧

廬

莊子仁義先王之蘧廬也止可以一宿而不可以久處注蘧廬傳舍也

我僕欣載犇昔

出日在畢

月令孟夏之月日在畢

今出壁中昏

尙書注冬至日在斗昏中壁

昔

如水上鷗

何遜可憐雙白鷗朝夕水上遊何言異栖鳥雌住雄不畱孤飛出浦淑獨宿下滄洲東西

從此去影

響絕無由今如檻中猿

韓非說林置猿於桺中則與豚同注桺檻也

所憂負

平生

嵇康絕交書時時與親舊叙離闊說平生

豈但感寒暄

晉書王獻之與兄徽之操之俱

詣謝安二兄多言俗事獻之寒暄而已客問王氏優劣安曰少者佳吉人之辭寡也

明濟十里黃

猗猗見淇園晚投伯氏廨拓落復何言

揚雄傳何爲官之拓落也注不

偶周覽故時居恂見松菊存

陶潛三徑就荒松菊猶存

故侶未易招

且自置肴罇

洗馬次十一兄之道韻

霸橋春水波鱗鱗

輿地志霸橋在長安城東霸水上漢時送行者多至此折柳相贈鄭縈嘗

曰詩思在霸橋風雪中驢背上

橋邊結束何圉人解鞍傍水入洗馬飛

龍九尺凌漪淪

唐史劉從諫鎮澤路獻九尺馬武宗不納周禮馬八尺以上爲龍七尺以上爲

駮六尺
為馬

風鬃霧鬣才一沐

梁元帝書風鬃霧鬣斷山快壑

玉花照影光

滿身

玉花詳見卷一題魯山

月題却貫黃金勒

莊子加之以衡扼齊之以月題注馬

額當顧如月形者周王褒謝資馬啟黃金作勒足度西河白玉為鐙方傳南國

更覺閃艷開精

神相馬經馬眼欲紫艷光社甫毛為

主人貴想不必問

特賜內廐天麒麟即今此物亦安用燕山萬里胡無塵

寶憲傳精騎萬餘與單于戰於稽莎山大破之遠登燕然山刻石勒名紀漢威德

嫖姚功高自

不出長鳴但踏城西春

前漢霍去病傳為嫖姚校尉

君不見少陵時

已無伯樂

杜臆長安城東有霸陵文帝所葬霸南五里即樂遊原宣帝築以為陵曰杜陵杜陵東南

十餘里又有一陵差小許后所葬謂之少陵其東即杜曲陵西即子美舊宅自稱少陵野老以此春秋後語蘇

代欲見齊王說淳于髡曰人有駿馬欲賣之見伯樂曰
比三旦立於市人莫與言願子還而視之去而顧之臣
請獻一朝之價伯樂如其言一旦而馬價十倍今臣欲
以駿馬見於王莫臣先後足下有意爲臣伯樂乎請獻
白璧一雙黃金十鎰以爲馬食髡言
於王而見之注馬食不欲斥言之
尚有曹將軍寫真
明皇雜錄曹將軍霸善繪畫時稱神妙杜甫在韋諷錄
事宅觀曹將軍畫馬作引云將軍得名三十載人間又
有真乘黃又天育驃騎歌故獨
寫真傳世人見之座右久更新

覽古

遙岑不娛人蒼莽頗愁絕東南有斷梁

國語澤不水寒

不可涉西園不欲往

李白蒹葭分聚落烟火傍城闌

且莫畏喋喋

說文喋多

言也史記作諜歸來坐北堂悠然理書策之人阿堵中

晉顧愷之傳傳

神寫照正在阿雖死情不隔周公徂東山
詩我徂仲尼

陳蔡厄大儒且不遇前漢酈食其傳酈生上謁沛公使

小子何足責南史王爽嘗與會稽王道子飲道子醉呼

呼小子衣交何得時命姑置之胡為常促迫

戲李相如攜婦還金鄉輿地志金鄉縣名

舍人固多奇奉璧登章臺奉璧詳見卷二同魯山舍人

生收功於章臺四皓采榮於南山注章臺秦君王擊缶

罷史記秦趙會於澠池秦王曰聞趙王好音請奏瑟趙

相如日聞秦王善為秦聲請奏盆缶秦王不許相如曰五步之內請以頸血濺大王矣左右欲刃相如相如張

目叱之左右皆靡秦王不憚爲一擊生相如將軍負荆
召趙御史書曰某年月日秦王爲趙王擊生相如將軍負荆
來通鑑趙王歸國以相如爲上卿位在廉頗右頗曰我
爲趙將攻城野戰相如素賤位居我上吾羞不忍爲
之下見必辱之相如不與爭列出望見避匿人皆以爲
恥相如曰子視廉將軍孰與秦王曰不若相如曰以秦
王之威相如叱之獨畏廉將軍哉顧秦不敢加兵於趙
以吾兩人在也今兩虎共鬪勢不俱存吾所以爲此者
先國家之急而後私讐也廉頗聞之肉袒負荆至門謝罪
長卿束髮時長卿詳見卷
亦復悅名字通鑑孫策謂虞翻曰華子魚自有名字注
華子魚名歆自有名字言其名聞當時也

一從臨邛遊心迹了不似茂陵未得仕要是才足依高

堂援哀琴月出載婦歸文君入成都乃復愧四壁晚見

負弩來良悔抱頸泣

前漢司馬相如傳拜相如爲中郎將馳四乘之傳因巴蜀吏幣物以

賂西南夷至蜀太守以下郊迎
縣令負弩矢先驅蜀人以爲寵

晁具茨先生詩集卷之五終

晁具茨先生詩集卷之六

古詩

次韻王立之雪中以酒見餉

朔雲慘慘驅朝暄

杜甫昨夜秋風入漢關朔雲邊雪滿西山陶潛慘慘寒日

龍沙一

尺人相憐

後漢班超贊咫尺龍沙注沙漠也梁裴子野飄飄千里雪倏忽度龍沙

寒猿哀

嘯失山木

淮南子猿狖失木而擒於狐狸非其處也

饑鶴仰喚空舞天

杜甫獨鶴

不知何處舞李白華亭唳鶴詎可聞曹毗玩雲間之舞鶴

當年補天真戲爾

淮南子女媧氏

鍊五色石以補天

不知修月何時已

西陽雜俎鄭本仁表弟遊嵩山見一

人枕幙呼之其人曰君知月乃七寶合成乎月勢如丸其影則日爍其凹處常有八萬二千戶修之因開幙有

斤斧盤數事

坐煩耆舊說辛卯

韓愈辛卯年雪詩元和六年春寒氣不肯歸河

南二月未雪花一尺

至遣兒童憂甲子

農圃春秋冬甲子雨雪飛千里

城中心價貴如玉

米如玉詳見卷三四兄諸人

舉家倒廩無斗粟

通鑑

王莽末天下旱連歲穀不成建

千金狐裘豈易得

叔孫通傳

武元年黃金一斤易粟一斗

千金之裘非

百結鶉衣不堪鬻

家語子夏之衣懸結為鶉逸士傳董威隱居白

一狐之腋也

社以殘絮縷帛為

我生但識茅與菅

詩英英白雲露彼菅茅

何曾

衣號日百結衣

過眼逢瑤璫

陸機金雀垂藻翹瓊瑤結瑤璫

辱君新詩問所似

李嘉祐蕭條吏

人散小謝有新詩世說謝安雪日內集兒女講論文義

俄而雪驟公欣然曰白雪紛紛何所似兄子胡兒曰撒

鹽空中差可擬兄女曰未若

欲辨不敢非忘言

陶潛此中有真

柳絮因風起公大笑為樂

意欲辨已忘言開壺酌酒澆我曹陶潛引壺觴以自酌世說王

如大曰阮籍晉中磊魄故須酒以澆之酒酣起舞顏爲紅史高帝紀帝過沛召故人父老

子弟縱酒酒酣爲大風歌會見東風掃冰雪月令東江楊惲奮袖低昂頓足起舞

梅塞柳煩春工劉禹錫家空歸海燕人老發江梅大戴禮正月柳梯注梯者發葉也

東陽山人僻居

我家京洛間寰宇記洛陽爲自古帝王建都之地故名京洛韓愈聲名動朝闕光寵耀京洛桂

玉資薄產戰國策蘇秦之楚三日乃得見王辭去曰楚國食貴於玉薪貴於桂謁者難得見如鬼王

難得見如天帝今臣食玉炊平生邱壑心晉書明帝謂謝鯤以君方

桂因鬼見帝王曰聞命矣庾亮何如曰端委廟堂使百僚準水竹不滿眼杜甫拾遺會奏

數行書懶性
從來水竹居
清晨有客吳中來
山川指授收奇才
蜀諸葛亮

傳亮天笑談長揖波浪下
後漢趙壹傳壹字元叔舉郡上計吏到京師司徒袁逢受

下奇才
計壹獨長揖逢讓之曰酈食其長揖
漢王今揖三公何遽怪也逢奇之
懷抱遠承
原註一作領來

崑穴開
前漢司馬遷傳次之不能
東陽山人高華隱
宋史

陳搏號希夷先生隱居華山宋太祖召之謝表曰九
重仙詔休教丹鳳脚來一片野心已被白雲畱住
豪

俠持身復修謹
前漢趙廣漢傳杜建素豪俠李林甫外

槐壇遊獵打毬馳逐鷹狗一日有道士見林甫徐言曰
此有何樂李怒明日又復言之林甫意其異人請自此
修謹不

傍山多闢黍稷田
晉左思夾江傍山月令仲夏

復爲
澤合田悉合種秫妻子固請種粳乃使一頃五十畝種
秫五十畝種粳說文黍爲五穀之先詩緝黍有二種黏

者爲秣不黏者爲黍碧溪東流及春醞杜甫碧溪遙艇潤風土記酒則星陳郡列春醞夏成

珠連波泛瀾澈神清溪南一畝當翠微翠微詳見卷二送王敦素秋風草熟菰

葉肥世說齊王同辟張翰爲大司馬東曹掾因秋風起思吳中菰葉蓴羹鱸魚膾曰人生貴適意何能羈

官數千里要名爵乎遂命駕歸俄而齊敗時人以爲知機龜魚上帶藻荇動鷗鷺下

拂芙蓉飛亭陰野塘亦新築謝元暉桑榆陰道周注陰去聲覆也溪山共

作窗中綠諸郎年少皆知書子夜哦詩動修竹劉賓客嘉話錄

絢曰五夜者甲乙丙丁戊更相送之今惟言乙夜與子夜何也公曰未詳歲時冠蓋如浮雲

擊鐘鼎食江淮間杜甫鐘鼎山林各天性濁醪麤飯任吾年注擊鐘而食列鼎而烹富貴人

之事也愛山自比謝康樂晉史謝元暉封康樂公孫靈運襲其封世稱謝康樂性喜遊覽

每尋山陟嶺必造幽峻巖嶂常着木屐
上山則去其前齒下山則去其後齒
好士不減春申

君史春申君傳楚黃歇封春申君好士門下
有客三千人其上客皆躡珠履以見趙使
我欲浚溪

揚小楫亭邊共醉藤蘿月杜甫請看石上藤蘿花
月已映洲前蘆荻花
叩門夜

訪君家時扁舟重載山陰雪晉書王子猷居山陰雪夜
眠覺開室酌酒忽憶戴安

道即乘船訪之於鄉溪經宿方至既造門便
反曰乘興而來興盡而反何必見安道耶

謝沈次律水枕

沈侯筆力鼎可扛韓愈文章自娛戲金石日擊
撞龍文百斛鼎筆力可獨扛
左手截

取吳淞江形勝志松江古名吳淞江
折流來此一只枕指麾巨鰐回

濤瀾史韓信傳雖有舜禹之智默而不言不如瘖聵之
指麾也異物志潮州惡溪之潭有鰐魚齒如刀鋸

大者長二三丈四足如守官韓愈有徒鰐魚文後徙於
西海六十里說文大波曰濤瀾奔湍也韓愈表濤瀾壯
猛平生性不好長物晉書王恭以簾送王沈曰吾平生

無長舉以遺我嗟無雙呼兒快取斬箇簾韓愈湘簾詩

物焉下知一府傳看黃琉璃卷送八尺含風漪掃除塵榻移當窗白帖褚淵詣虞

積塵埃有書數卷嘆曰虞君之清至於此拂榻塵而去隨眠置我丘壑裏丘壑詳

山始信孫郎真枕水世說晉孫楚字子荆少時謂王濟

曰流非可枕石非可漱楚曰枕日當枕石漱流誤云漱石枕流濟

流欲洗其耳漱石欲礪其齒我生不出長安城四十

二年塵駟耳領君此枕何瀟然水經瀟者睡起醒心如

一洗杜甫山驛醒心泉

簡江子之求茶

政和密雲不作團小夸寸許蒼龍蟠

括地志政和建州縣名宋史神宗詔

建州造密雲龍茶韻府茶之品莫貴於龍鳳團蔡君謨始造之進御南郊致齋中書樞密各賜一餅

金花

絳囊如截玉綠面彷彿松溪寒

括地志松溪建州縣名產茶

人間此

品那可得三年聞有終未識老夫於此百不忙飽食但

苦夏日長北牕無風睡不解

陶潛北窗高卧自謂羲皇上人

齒頰苦澀

思清涼

食論茗飲悅志有力解渴醒酒令人不眠

故人新除協律郎

談藪協律郎蕭

悅善畫竹工甚樂天有畫竹歌

交游多在白玉堂

玉堂詳見卷三贈法一墨

揀芽鬪

夸皆飫嘗

茶歌先春抽出黃金芽

幸為傳聲李太府煩渠折簡買

頭綱

茶錄福建貢茶計綱以進趙宋時第一綱團茶王卽賜羣臣

贈張琪君章

春風頗清識評議登草木燕麥與菟葵

劉禹錫集禹錫至京師詩曰紫

陌紅塵拂面來無人不道看花回立都觀裏桃千樹盡是劉郎去後栽後十四年復遊立都觀裏復一株惟燕麥菟葵動搖春風耳因復作詩云百畝庭中半是苔桃花淨盡菜花開種桃道士歸何處前度劉郎今又來注燕麥似稗稍長有兩米山陝有種之者菟葵一名天葵菟本作兔種種承標目如何桃

李姿結根滯空谷我將俎豆之

莊子畏壘之民欲俎豆子于賢人之間注畏壘

山折泄恐不欲君且爲此情吾亦未免俗

七賢論七夕俗多晒衣阮

咸曝大布犢鼻褌曰未能免俗聊復爾爾

効古別昭德羣從

十載一相逢相見無淡旬

左傳淡旬之間克楚三都注十二日也

一生能

幾別且復無此身

老子吾有大患者為吾有身及吾無身吾有何患

昔別尙可

惜此別重惜之兩髀跨鞍馬

三國志劉備不離鞍髀裏肉消今不復騎髀裏肉生

非復少壯時

杜甫可惜歡娛地都非少壯時

它人怪康強自覺筋力衰

所苦氣如縷

杜甫流汗卧江亭更深氣如縷

所憂命如絲死生亦大矣

莊子死生亦大矣而不得與之變

而乃常別離

楚詞悲莫悲兮生別離樂莫樂兮新相知

生一月間得笑無六七朝為衆狙喜

莊子狙公賦芋曰朝三而暮四衆狙

皆怒曰然則朝四而莫三衆狙皆喜

莫作枯魚泣

樂府枯魚過河泣何時還復入

已矣泉

下人杜甫借問宗黨優哉冢中骨

晁具茨先生詩集卷之六

終

晁具茨先生詩集卷之七

近體

睡起

素屏紋簟徹輕紗

魏史毛玠爲典選帝賜以素屏風素

之器晉東宮故事有赤花雙紋簟

睡起冰盤自削瓜

三

梁元帝穀衫廻廣袖團扇掩輕紗

黃圖董偃以水晶爲盤貯冰同色侍者謂冰無盤必融

濕席誤拂盤墜碎文天祥削瓜詩

援出金佩刀切斷蒼

玉瓶千點紅風箏微微開綠簾

落黃花

宋書槐樹秋曰開花正舉子應試之

經營薄產

初無意

唐張家貞不營家產有勸之者曰比見朝士廣

吾不補葺踈籬漸有涯

杜甫江上人家桃樹枝春風細雨出踈籬莊子吾生也有涯

待得高秋尋靖老臨流坐石問丹砂

道家言服九轉丹砂者爲地丹仙

送韓溫父

東風未曉放船行臥唱陽關出渭城

前漢西域傳匈奴東則接玉門陽關

西則限以葱嶺王維渭城曲願君更盡一杯酒西出陽關無故人崔湜那堪音信斷流涕出陽關漢書注渭城

故咸陽高帝元年更名新城武帝元鼎三年更名渭城括地志渭城在雍州東五十里

老去與人渾

惜別不知何處可忘情

晉王衍傳衍喪幼子悲甚謂山簡曰聖人忘情最下不及情情

之所鍾正在我輩簡亦爲之慟

和四兄

以道

閑居感歎有作

掩卷忽不樂捫心空浩嘆家聲畏淪墜

梁任昉傳四子並無術業墮其

家聲

世態屬艱難

江總集百王旣季運屬艱難

月倒迎門扉

後漢蔡邕見王粲而

奇之時邕才學顯著貴重朝廷當車騎墳巷賓客盈坐聞粲在門則倒屣迎之王陽與貢禹爲友陽爲益州刺史禹聞之彈其冠以待陽薦陽薦禹於成帝召爲大夫

蕭然對孤

竹一笑其衰殘

復次韻

出門吾所懶無客亦何嘆舉世遽如許孤風良獨難荒

蕪蔣詡徑

世說蔣詡歸杜陵於竹下開三徑惟故人求仲羊仲從之遊

破敝晏嬰冠

禮記晏子澣衣濯冠以朝難乎爲下

興發看山去

桓冲傳冲謂徽之曰卿在府日久比當相料理

微之不答直高視以手板柱
書籤記讀殘唐史李必為

頰云西山朝來致有爽氣
書用紅牙籤史書用綠牙籤子
書用青牙籤集書用白牙籤

寄江子之

平生江季子疎嬾近忘吾不啻三年別如何一字無燒

丹岫樓令

列仙傳葛洪字稚川求為岫樓令煉酒步丹砂食之尸解仙去岫樓一作句漏釀酒步

兵厨

晉書阮籍聞步兵厨營人善釀有貯酒三百斛乃求為步兵校尉

二者將安擇功

名莫浪圖

次四兄

以道

韻效李義山雪

莫冬一丈長安雪

縣道記長安縣故城今謂之苑城漢京兆府在故城內尚冠里長安蓋古

鄉聚名在渭水南隔渭水北對秦咸陽宮漢於壯士臨其地築未央宮謂大城曰長安城五年始置

風獨慨慷

謝莊臨風嘆

門巷豈無騎馬客

天寶遺事王仁裕每大雪

則自所居至坊巷門掃雪開徑迎

江湖猶有捕魚郎

柳宗

賓客至所居處飲宴謂之煖寒會

元千山鳥飛絕萬徑人踪滅

夜平蔡賊兵輕敵唐史吳元濟叛

孤舟蓑笠翁獨釣寒江雪

李愬用計夜襲之會大雪至城下

曉入梁園賦壇場

謝惠

連雪賦歲將暮時既昏寒風積愁雲繁梁王不悅遊於

兔園乃置有酒命賓友召鄒生延枚叟相如未至居客

之右俄而微霰零密雪下王乃歌北風於衛詩咏南山

於周雅援簡於司馬大夫曰抽子秘思騁子妍辭俾色

揣稱為寡

載酒欲尋誰與飲江梅頭白自悲傷

寄江子我

首缺
三字
秋日情親四海兄
只應常折柳何必更班荆
老把
缺一
字
爲活遙將月伴行
功名君莫嬾吾病負平生

戲成

長夏軒牕倚碧岑

杜甫自我登隴首十年經碧岑

人間塵土莫相侵

花不得春風力顏色何如桃杏潑

花史榴本出塗林安石國漢張騫使西域

得種以歸故名安石榴元微之何年安石國萬里貢榴花綠葉栽烟翠紅英動日華新簾裙透影疎牖燭籠紗委作金爐焰飄成玉砌瑕乍驚珠綴密終悞繡幃奢琥珀烘梳碎胭脂嫩頰搽風飈一樹火電轉五雲車

和子我晚歸

七里灣頭宿鳥飛
六家店上行
人稀渡口有船招
不得

歸來稚子候柴扉

懷蘇門山

輿地志蘇門在河南衛輝府孫登隱居於此阮籍訪之不答一語籍退聞

山巔有鸞鳳音乃登嘯聲也

昔在新中日蘇門歲一游石連沙鑿鑿詩白石鑿鑿水遶竹

悠悠

杜甫懶性從來水竹居

丘壑從茲得

丘壑詳見卷十二僧舍小山

江山及

此不吾衰思卜築城關恨淹留

詩在城關兮

二十一兄

季此

生女有詩次韻

金盤滿貯華清水

張謬岐王宅詩王女貴妃生嬰婉始發聲金盤浴未了綳子繡初成翡翠

雕芳褥真珠帖小纓何時學健步關取落花輕

看浴

蘭芽玉雪容

韓愈銘姆抱笏子立側睂眼如畫玉雪肌肉瑤環瑜珥蘭茁其芽稱其家兒也

自是廼翁懷直道還為健婦有家風

古樂府健婦持門戶勝一大丈夫

樹從此日栽成後酒到他年釀熟中

南史王敬宏女適孔淳之子遂以

烏羊繫所乘車轅提壺為禮至便飲酒盡歡訖莫而歸或怪其如此答曰固農夫田婦之禮也乘買嫁

資揮百萬不愁婚與貴人通

唐史山東士人多世族後雖衰其子孫猶負世望凡

嫁娶必多邀錢幣故人謂之賣婚

决道念八弟得小金印以詩贈之

决之

季也獲金印籀文秦不如

書斷周宣王太史籀作大篆漢書藝文志載史籀十五篇

是也世因謂之籀書凡九千字至秦情知非鬼篆恨不李斯增損大篆異同籀文謂之小篆

識天書

岑參音翻四句
偈字譯五天書

池靜龜遊罷

會稽錄孔愉嘗至
吳興縣餘不亭見

人籠龜

於路愉求買放之至水反顧及愉封此亭侯鑄

印龜首

迴曲三鑄不正有似昔所放龜愉悟乃取佩焉

注列侯印

庭閑鵲闌餘搜神記後漢張顥為梁州刺史

黃金龜鈕

庭閑鵲闌餘搜神記後漢張顥為梁州刺史

之得金印文

有山鵲飛翔化為圓石顥椎破

曰忠孝侯印

春風還舊物疎俊獨憐渠

夜坐

入夜暑氣薄輝輝星滿空鈎簾倚新月却扇受微風瘡

渴幾時愈

西京雜記相如素有消渴
疾悅文君色遂發錮疾

浮楂何處通

浮槎
詳見

卷一古

樂府

輕生一快意波浪五湖中

和人遊李文和園

北李園池推甲第

前漢霍光傳宣帝賜霍光甲第一區

西岡人物復諸生

史叔孫通傳通朝儀成因進曰諸弟子儒生隨臣久矣與臣共為儀願陛下官之

乘鸞此地回

緱嶺

列仙傳王子晉好吹笙作鳳鳴遊伊洛間遇浮丘公接以上嵩山後於緱氏山頭乘白鶴舉手謝世

人去又梅福棄妻子結廬飛鴻山修煉丹成乘青鸞飛昇而去

走馬何人出大明

唐書貞觀

八年營大明宮為

六月火雲無復暑

呂氏春秋山雲草莽水雲魚鱗旱雲

上皇清暑之所

烟火雨雲水氣無不比類其所生以示人慮思道納涼賦火雲赫而四舉

百年水木有餘清

敢陪賓客追前輩知子能詩近得聲

晁具茨先生詩集卷之七

終

晁具茨先生詩集卷之八

近體

送僧

無端伏枕日

詩寤寐無爲
輾轉伏枕

不見放舟時晚得平安報

西陽

雜俎李衛公守北都惟童子寺有竹一窠纔長數尺相傳令其寺綱維每日報竹平安

初成送別

詩山濠歸履急

傳燈錄二十八祖達摩自天竺國泛海見梁帝不芥潛上嵩山少林寺面壁九年端居而逝葬熊耳山魏宋雲使西域回遇師於葱嶺

見手攜隻履翩翩而逝雲問師曰西天去又謂雲曰汝王已厭世矣雲聞之茫然別師東歸暨復命明帝已升遐迫孝莊卽位雲具奏其事帝令起塋棺中惟一隻革履存焉
江濶度杯遲
高僧傳杯度僧不知其姓名常乘木杯度河不修細行不甚精持飲酒食

肉與俗人不異
定許同香火終參慧遠師
高僧傳慧遠雁門人杖錫廬山東林寺與

劉遺民輩十八人結白蓮社惟淵明至則許飲酒

樂府二首

病來飲不敵羣豪
李白英風陵四豪吳志潘璋好
笑岸

紗巾卸錦袍
後漢光武紀岸幘迎笑又晉謝奕在桓溫座岸幘笑詠無異常日隋唐嘉話武后遊

龍門命羣官賦詩先成者賞錦袍
左史東方虬既拜賜坐未安宋之間詩復成文理兼美左右莫不稱善乃就

奪袍一座空煩春筍手
王安石春筍緩催鴈
玉盃乳酪貯櫻桃
史微

衣之
子世家箕子嘆曰彼為象箸必為玉楮栢與盃同
說文酪乳漿也白樂天櫻桃樊素口楊柳小蠻腰

自摘酴醿滿架空

歲時記酴醿本酒名以花色似之故名俗又作荼蘼

擬將豪氣

敵春風欲知蓋面玻璃潤

西寶國玻璃千年冰化稱曰冰玉

看照紅顏

在酒中

傷心

原註時籍路公宅

沙路朱轡想馭車

唐故事凡拜相禮絕班行府縣載沙填路自私第至子城東街名曰沙堤

白帖皂蓋朱轡注漢二千石車朱兩轂千石至六百石朱左轡增韻車箱曰軒

傷心歲月似星

奔

杜甫西南失大將商族自星奔

平泉有墅空流水

賈氏談錄李衛公德裕平星莊周圍

十里堂榭百餘奇花異草珍松怪石靡不畢致

綠野無人但繞垣

唐書裴度居東都作綠野

堂與劉白諸公樂飲其中

九老畫圖傳盛事

洛陽故事白居易晚節自稱香山居士嘗與胡

身具步外生言集卷之州二

杲吉收劉真台鄭據盧慎張渾李元爽僧如滿九人結香山社人慕之為繪九老圖文彥博傳公留守西都時富鄭公以司徒致仕公慕香山九老會乃集洛中年德高者為耆英會就資聖院建耆英堂命閩人鄭奐繪像堂中凡十三人文富二公暨席汝言王尚恭趙丙劉幾馮行已楚建中王慎言張問張燾王君貺司馬光朝書史載殊恩宋史文彥博字寬夫介休人進士及第累仕四朝出入將相五十餘年再相時與富弼並命士夫相賀於庭公立朝端重顧盼有威契丹使望見改容拱手曰天下異人也官至太師封潞國公年九十二諡忠烈入子皆歷要官如何巧者持饒過已向比隣問子孫韓愈巧者王承福傳曰吾操饒以入富貴之家有年矣有一至者焉又往過之則為墟矣有再至三至者焉而往過之則為墟矣問之其隣或曰刑戮也或曰身既死而其子孫不能有也或曰死而歸之官也

怡怡軒贈王次翁

先生骨老勁如松柴米辛勤只自供每笑燃萁何太急

魏志文帝嘗令東阿王植七步中作詩不成者應大法植應聲曰煮豆燃豆其豆在釜中泣本是同根生相煎何太急應憐春粟不相容前漢淮南王厲高祖少子也有罪文帝徙之於蜀在道不食而死

死民歌謠云一尺布尚可縫一斗粟尚可舂兄弟二人不相容雖能有弟同斯樂忍使

無兒繼此蹤原註次翁不娶已約伯兄同卜築連牆投老願相

從列子與南郭子連牆二十年不相謂後漢仇覽守寡養孤苦身投老

亭成

故里佗年隱新亭此日成江山俱有助草木盡知名原缺

十三
字
與便願許從諸生

至日

短晷催長至

晉潘岳何微陽之短晷覺長夜之方永禮記日長至陰陽爭死生分君子齋戒處必

掩新晴改故陰風霜游子鬢節序異鄉心合坐呼盧轉

晉劉毅傳毅擣蒲大擲數百萬餘人並黑犢惟毅得雉

大喜褰衣繞床呼曰非不能盧不事此耳劉裕因授五

木曰老兄試為鄉答既而四子俱黑一子轉躍未定裕

厲聲喝之即成盧毅殊不快注古者烏曹作博以五木

為子有梟盧雉分曹舉白深漢食貨志廼分遣御史廷

犢為勝負之采尉正監為曹敘傳引滿舉

白百年家魏闕莊子身在江湖之下存沒一沾襟孟浩然

字在讀罷

淚沾襟

贈山人沈廣漢

禪房白几靜無塵

李白心垢都已滅永言題禪房白几詳見卷七睡起

野服黃冠

意甚真

禮記野夫黃冠而草服

避世全生淡得策

前漢東方朔為郎酒酣據地歌

日陸沈於俗金馬門宮殿中可以避世全生何必淡山之中蒿蘆之下註陸沈言人中隱者譬如無水而沈也

閉門謝客亦高人

通鑑李靖以甌生之証自是閉門謝絕賓客雖親戚不得妄見也

忍

情斷酒非關病

晉吳衍好飲酒忤權貴遂成飲阮宣命飲衍曰近斷酒宜以拳歐其背曰看看

老癖癡漢忍斷杯中物耶梁沈約字休文性不嗜飲善病

隨意收書不計貧

呂崑白酒釀來

緣好客黃金散盡為收書

近約嵩陽陳叔易趁移丹竈過殘春

江淹守丹

竈而不顧煉金鼎而方堅杜甫故園猶得見殘春

龍興道中

輿地志唐證聖中分郾城東南地置武興縣神龍元年改為龍興宋易為

寶豐縣

屬汝州

澗道垂黃花山城擁紅葉人爭小舟渡馬就平沙涉杜甫

地澗平

沙岸

敦素有以書局處之者作詩迎之

君王側席訪詞臣會要宋太祖常諭蘇易簡曰詞臣清美朕恨不得為之萬里江

湖賀季真唐史賀知章字季真四明人陸象先嘗曰季真清韻風流吾一日不見則鄙吝生矣官集

賢學士善行草書好事者每具筆研以從即十數字世傳為尺璧也天寶初夢遊帝居數日寤乞歸賜鑑湖剡

川一曲詔令供帳都門百僚祖餞上作詩贈之自號四明狂客翰苑向來非此老道山

何處得斯人朝回金馬門前曉史託金馬門者宦官署門也門旁有銅馬故名

楊雄待詔
金馬門

宴罷銅駝陌上春

銅駝陌詳見卷二
同魯山觀險石

底事年

年最如意春風還試綵衣新

綵衣詳見卷
十積善堂詩

立春

巧勝金花真樂事

夢華錄立春日剪綵爲幡勝賜百官
士庶家俱以絲幡綴於首飾花枝之

上或剪爲春
蝶等以贈遺

堆盤細菜亦宜人

四時寶鏡立春日春餅
生菜號春盤杜甫春日

春盤細生菜忽憶兩京梅發時盤
出高門行白玉菜傳纖手送青絲

自慚白髮嘲吾老

錄蘇東坡立春日亦簪幡勝過子由諸
子姪笑指云伯伯老人亦簪幡勝耶

不上譙門看打

春

夢華錄立春前五日並造土牛耕夫犁具於大門之
外是日黎明有司爲壇以祭先農官吏各具絲杖擊

牛者三以示勸耕又開封府進春牛入禁中
鞭春又府僚打春府前百姓皆買小春牛

身集卷之五

和集津兄謝王立之紅絲花

故園桃李秋搖落掃地無花可惱公唐李賀昌谷集詩題有惱公注當作

惱天近說城南王子妓亦持紅拂劇西風唐史李靖謁楊素一妓執

紅拂侍側目靖靖歸夜有紫衣戴帽人叩門延入乃一美女也告曰妾楊家紅拂妓絲蘿願託喬木乃與俱適

太原

又次韻謝王立之惠紅絲花

老來嗜酒無賓主我醉應眠不遣卿如許此花同九日

爲君採掇笑淵明原註九日採菊花未免俗爾

謝任伯久無書常子然寄茶謝之因簡任伯

諫議茶猶送郎官迹已疎斜封三道印不奉一行書唐盧

仝謝孟諫議寄新茶日高文五睡正濃軍將打門驚周公口傳諫議送書信白絹斜封三道印

客有驚馬不肯借作詩誚之

胡兒少欲立奇功

劉長卿三十擁旄誰不羨周郎少小立奇功

貴買西宛王

面驄

史記大宛有善馬在貳師城匿不肯與漢使天子既好宛馬使壯士持千金以請宛王善馬宛國不

與漢使怒妄言雄金馬而去宛貴人怒攻漢使天子大怒拜李廣利爲貳師將軍發屬國騎及郡國惡少年數萬人以伐宛期至貳師城取善馬詔金躑躅微鳴躑躅影府唐明皇六馬滾塵圖最愛玉面驄

錦連錢

一作錦連乾

不動追風

吳均蹀躞青驪馬往戰城南畿古今注秦始皇有七名馬

一追風二白兔三躑躅影四追電五飛翾六銅雀七晨鳧樂府鐵驄金面青連錢梁元帝長安美少年金絡飾連

晁具茨先生詩集卷之八終

錢施轉青絲鞍
照曜珊瑚鞭

庭槐洗立清陰下
沙路調行返照中出

郭借人乘豈肯自誇騎入大明宮

地理志大明宮在禁苑東南本永安宮貞

觀入年改曰大明宮
以備太上皇清暑

晁具茨先生詩集卷之八終

晁具茨先生詩集卷之九

近體

自然詩 并序

七里先生江子我築土三尺名曰自然亭余謂先生不獨有亭亦有自然箕斗自然絲麥凡亭之內服食器用無不自然者先生可謂自足者也雖然無乃多虛少實乎子我掀髯大笑余欣然賦之

先生手不廢經營

詩經之營之注量度也東西爲經週迴爲營

白屋憑虛結

此亭

前漢蕭望之傳今一見者皆先露索挾持恐非周公躬吐握之禮致白屋之意注白屋賤者所居也

蘇軾文憑

燕麥莧絲侵密坐

燕麥詳見卷六贈張琪本
草蘇頌曰莧絲草名夏生

苗初如細絲遍地不能自
起附他草梗則纏繞而生

南箕北斗挂疎櫺

詩維南有
箕不可以

簸揚維北有斗
不可以挹酒漿

青松夾日交傾蓋

玉策記千載松樹枝
葉四邊披起上杪不

長望而視之
有加偃蓋

翠柏分風倚列屏莫道君家無長物

長物
詳見

卷六謝沈
次律水枕

案頭燈火有流螢

續晉陽秋車九字武子學
而不倦家貧不常得油用

練囊盛數十螢
火以夜繼日

避暑普淨院

天矯栢如龍

南齊書東陽徐伯珍宅南九崑山
多龍鬚栢蘇軾拏雲濯雨屈虬枝

清幽闕

一宮庭無御史雨

唐顏真卿傳真卿為御史
辨獄而雨人呼為御史雨

門有大王

風宋王楚襄王遊於蘭臺之宮曰壯哉此風此寡人與庶人共者也宋王曰此獨大王之雄風耳庶人安得

共之徜徉中庭上玉堂清清洽洽發明耳目此大王之雄風也傲溷鬱邑歐溫致濕此庶人之雌風也

日名天下羣公坐此中阿戎相就語晉王戎傳王渾子戎年十五阮籍謂

渾曰濬仲清爽非卿倫也歷歷見元豐元豐宋神宗年號

共卿言不如共阿戎談

送惠純上人遊閩閩中漢封無諸為閩越王都此

蚤聽閩人說土風此身常欲到閩中春溝原註一作春甌水動

茶花白茶譜建安武夷山產茶最佳蔡君謨有茶錄花史茶花色白氣清香夏谷雲生荔

子紅圖經荔枝閩中第一名狀元紅杜甫輕紅擘荔枝襟帶九江原註一作山樹接楚天

不斷

後漢杜篤傳關山之險多所襟帶注襟帶衣帶之要故以喻之韻會自廬江潯陽分九道為九江

梯航百粵

原註一作波連越嶺

海相通

文選梯山航海職方記廣東西古百粵地

北窗

夜展圖經看

陶潛高卧北窗自謂羲皇上人左思名載於山經形鏤於夏鼎

手自題書

寄

原註一作索筆題詩送

遠公

遠公詳見卷八送僧

道中

北風吹雨不能晴
羸病人騎瘦馬行
鬚髮向來渾白盡
半緣憂患半多情

行泌水上

輿地記泌水源出銅山流經南陽泌州北與清水合詩云泌之洋洋可以

樂飢
卽此

肅肅郊原靜牛羊草樹間石磯寒不掃水閣靜常關故
里無消息孤城絕往還多愁獨來此缺一字得見河山

送王敦素樸

龍蟠山色引衡廬名勝志鍾山龍蟠石城虎踞霜落江

清影碧虛鼓枻厭騎沙苑馬屈原文漁父莞爾而笑鼓枻而去寰宇記沙苑一名

沙阜在馮翊縣南十二里卽西魏文帝大統三年周太祖爲相國與高歡戰於沙苑以其戰處宜六畜置沙苑

多植柳於行廚欲食武昌魚瑱言修道功深自然享六甲行廚隨所須舉意卽至

苦泉側通鑑吳主遷都武昌童謠云緩歌玉樹翻新曲陳書後

寧飲建康水不食武昌魚遊宴使諸貴人女學士與狎客共賦新詩互相贈答采

其尤豔麗者以爲曲調被以新聲選宮女千百令習而

歌之其曲有玉樹後庭花臨春樂等
大抵皆美張貴妃孔貴嬪之容色也
趣入金鑾續舊書
兩京記大明宮紫宸殿北曰蓬萊殿其西曰還周殿還
周西北曰金鑾殿殿旁坡名金鸞坡續翰林志唐制駕
在大內則明福門內置學士院駕在興慶官則金門
內置院德宗移院於金鸞坡上藝文志雜史類韓偓金
鸞密記五卷書曰一卷
李白著書獨在金鸞殿
官達故人稀會面君來相見肯
如初

次韻江子我蠟梅二首

步屨穿花醉曉風

南史袁粲步屨白楊郊野間遇一士人便與酣飲杜甫步屨隨春風村村

自花

柳翻枝摘葉興何窮他年上苑求佳種

王維閑道迴看土苑花

越白江紅掃地空

杜甫越女天下白又江上紅梅先放春

江城仍似錦城無

成都記孟後主視於成都羅城上偏植芙蓉每至秋四十里皆如錦繡高

下相照謂左右

曰此真錦城

半額輕黃笑越姝

溫庭筠豹尾竿前趙飛燕柳風吹盡眉間

黃王安石漢宮嬌額半塗黃注額上圖黃制起於漢

我亦少花如杜老舍南為乞

兩三株

原註此花吳蜀所無

次韻集津兄懷嵩少示王立之

嵩少詳見卷四和十二兄之五

早聞三十六峯前願寄茅茨一澗邊谷轉馬蹄山繚繞

崑開虎口樹嬋娟陽坡日暖宜瓜地

茶譜宣州宣城縣有塢如山其東為

朝日所燭號曰陽坡阮籍苦日東陵瓜今在青門外五色曜朝日子母相鉤帶

陰嶺天寒熟芋

田杜甫紫收岷嶺芋白種陸家蓮便好與公相隱去不宜相對尙茫然

和王立之蠟梅二首

茅簷竹塢兩幽奇岸幘尋花醉亦知

岸幘詳見卷六樂府

崖蜜已

成蜂去盡

博物志諸方山郡僻處出蜜蠟蜜蠟所著皆絕巖石壁惟於山頂以籃輿自上懸下乃得

之蜂遂去不還餘窠及蠟著石者有鳥形小於雀羣飛千數來啄之比冬都盡其處皆如磨洗至春蜂皆還洗處結窠如故年年如此初無錯亂者人亦各古其平處謂之蠟塞鳥謂之靈雀捕之終不可得

夜塞惟

有露房垂

本草露蜂房蜂窠作於林中木上者

二

老去攀翻興奇招攜風月作新知但令春釀皆如此百

罰深杯亦倒垂

杜甫百罰深杯辭不辭

滎澤驛阻雪

寰宇記滎澤驛卽廣武驛在汴梁滎澤縣

去年冬不雪今雪太忽忽輕薄愁兼雨歆斜怯受風雁
依寒浦靜鴉噪暮林空憔悴西征客惟應白髮同

秋雨感事

苦雨荒秋宅

爾雅久雨曰苦雨李白悲秋宋王宅失路武陵源

寒生木葉悲

謝莊

洞庭始波木葉微脫

半垂藤護壁中缺蔓穿籬書校時開帙

前漢劉向

傳向校書天祿閣

壺提日繫絲

劉伶酒德頌止則探卮執觚動則挈榼提壺

儒冠吾

已悞何責五男兒

詳見卷五次韻集津

身身先生詩集卷九

次二十一兄

季此

九日韻

清秋九日至晚菊兩三開

王勃九日重陽節開門有菊花不知來送酒若個是陶家

愁把酒思登故國臺

齊民月令重陽日必以糕酒登高眺迴以暢秋志採茱萸

甘菊泛酒續齊諧記汝南桓景隨費長房遊學累年長房謂之曰九月九日汝家當有災厄急宜去令家人作

絳囊盛茱萸以繫臂登高飲菊酒婦人帶茱萸囊是也南齊書宋武帝為宋公時在彭城九日登項羽戲馬臺

遂相承賜懷朝士寵詩想從臣才

孫瑞奏事興平二年秋朝廷以九月九日

賜公卿近臣飲宴齊竟陵王九日侍宴詩月殿風轉層臺氣寒高雲斂色遙露已團沈約邱遲任昉庾肩吾劉

苞各有九向晚能無淚飄飄雁影來

日侍宴詩

問訊次九日韻

問訊西南戌

杜甫南尋禹穴見李白道甫問訊今何如說文戌守邊也陳勝傳奉發間左成漁陽

提封莫遠開

提封詳見卷一古樂府

休傳通蜀道

後漢司馬相如傳是時邛荊之

君長聞南夷與漢通得賞賜多多欲願為內臣妾請吏比南夷上問相如相如曰邛荊冉駹者近蜀道易通異

時嘗通為郡縣矣至漢興而罷今誠復通為置縣愈於南夷上以為然乃拜相如為中郎將

端可棄

輪臺

大事記續編漢武帝征和四年六月還幸甘泉以千秋為丞相先是搜粟都尉桑宏羊與丞相御史

請田輪臺帝乃下哀痛之詔不復出軍輿地記輪臺國名西去卑師國千餘里

擬上平戎策

禮記

西方曰戎通鑑唐中宗景龍元年制以突厥默啜寇邊令內外官各進平突厥之策右補闕盧備上疏略云邊州刺史宜精擇其人使之蒐卒乘積資糧來則禦之去則備之去歲四方旱災未易興師當理內以及外綏近以來遠俟倉廩實士卒練然後大舉以討之中宗善之

慙無屬國才

通典秦有典屬國官掌蠻

夷降者漢升大鴻臚蘇武常爲之

何須千里馬

前漢文帝時有獻千里馬者詔曰鸞旗在前屬

車在後吉行日五十里朕乘千里馬獨先安之韓子伯樂教其憎者相千里馬教其愛者相驚馬以千里馬世一有其利少驚馬多其利多也

遠自渥洼來

漢書元鼎四年馬生渥洼水中上作天馬之歌

晁具茨先生詩集卷之九終

晁具茨先生詩集卷之十

近體

積善堂詩

并序

皇帝卽位之五年改元大觀

宋徽宗年號

赦天下詔

文武吏親年九十已上者未應封咸賜封之于時
吾任城曾叔祖母九十一論當如詔而有司以子
無見仕者輒抑之於是叔祖入告於朝旣俟命於
京師凡若干日天子聞之詔錫命婦服封壽光縣
太君制下姪曾孫中廬令帥昭德族人詣堂賀

金石

略昭德里宋太子少傅龜文元公廵所居公字明遠以天禧四年請老杜門習靜所著有法藏碎金昭德新編等書叔祖顧而喜曰吾歸築堂於任城第以奉壽光汝爲我名之中廬令讀制因請名曰積善蓋取制中所謂蘊仁積善以侈上賜也是年秋堂成迺命姪曾孫太史爲之記越某日大會諸族賓客合樂以落之姪孫莘令作慶壽光曲以獻東州之人相傳爲耆老之榮冲之時以事自昭德來徐徐府通守叔父一日召冲之語且曰吾家由慶國夫人已來七世矣以夫若子受爵者不可勝數然未

有以耆德自致如壽光者亦一盛事也不可以無
詩吾將賦之汝其同賦冲之謹再拜稽首而言曰
惟天子仁故貴老以勸四海之心惟壽光賢故介
此綰壽以膺封惟叔祖孝故不旬日感動天子屈
有司議而特封之是三者皆宜歌詠其事以示天
下後世抑冲之小子也固願以文列名父兄之末
况叔父命哉謹撰成積善堂詩十五韻上呈

星次朝當赦

星占天雞星動主有大赦

龍符夜改元

唐車服志高祖頒給東方青龍

符南方朱雀符西方
騶虞符北方元武符

忽傳優老詔周及庶臣門細札頒

殊禮陪封錫異恩大酺堪一笑

後漢顯宗紀今天下大酺五日注酺布也言天

子布恩於天下

束帛不須論

易束帛羹羹湖山野錄韓詩外傳諸儒所解束帛皆謂卷其帛為二

端五匹為十端乃束帛也

緬想吾宗盛恭惟母德尊孝忠兼仲子辭

翰競諸孫掖誥金鸞潤

詩話唐含元殿後曰宣政宣政左右中書門下二省如左右掖

張九齡既起南宮草復掌西掖制注中書省在西樊退朝錄官誥院敕郡夫人使金花羅紙七張錦縹袋杜甫

紫誥鸞回紙清朝燕賀人注謂紫錦誥之字有回鸞勢

官衣翠翟溫

詩翟第以朝注翟翟車夫

人以翟羽飾車弗蔽也又揄翟后服刻繒為翟蓋翟交有時別有倫守匹而不犯分婦德所宜也

萬錢

賓客賀五色帝王言諼草開新夏

詩焉得諼草言樹之背

蟠桃屬

舊樽

吳都賦注東海度索山桃蟠屈三千里穆天子傳西王母降周穆王開宴獻萬歲冰桃千年碧藕

曲迎團扇度

翰林志唐試翰林初選者內庫給青綺被紫絲履之類端午賜青團扇

舞接

絲衣翻

孝子傳老萊子孝養二親行年七十作嬰兒自娛著五采斑斕衣嘗取水上堂跌仆因臥地為

小兒啼或弄

冰下看魚尾

晉書王祥母欲得魚時天寒祥剖冰求之冰忽開有鯉躍

雛鳥於親側

霜邊見笋根

孝子傳吳孟宗母嗜笋冬節將至宗入林哀泣筍為之生

英聲彤管

在

後漢后紀君史彤管記功書過

繪事畫屏存

太平御覽竇皇后父毅嘗謂妻曰此女有奇相

何可妄與人因繪二孔雀於屏間請昏者射二矢陰約中目則得之唐高祖最後射各中一目遂歸之

有

客依同姓逢人問故園淹留驚伏臘

郊祀志夏至後第三庚為初伏四庚

中伏立秋後初庚未伏說

俛仰媿晨昏

禮記冬溫而夏清昏定而晨省

文冬至後三戌臘祭百神

西望浮雲合

伏仁傑傳仁傑登泰山反顧白雲似飛謂左右曰吾親舍其下

巾車擬載

奔原註冲之母承嘉郡君年六十六居昭德陶潛日莫巾柴車又辭載欣載奔

春日二首

男兒更老氣如虹禮記君子於玉比德氣如白虹短鬢何嫌似斷蓬隋魯

范草如拔心草還逐斷根蓬欲問桃花借顏色未甘著笑向春風

二

陰陰溪曲綠交加小雨翻萍上淺沙驚鴨不知春去盡杜甫不教驚鴨惱比隣爭隨流水趁桃花原註一本春色不堪流水送雙浮鴨鴨趁桃花

次二十一兄季此韻

憶在長安最少年長安詳見卷七次四兄酒酣到處一欣然獵回

漢苑秋高夜

漢舊儀上林苑中廣長三百里置令丞右左尉苑中養百獸天子春秋獵射苑中取

禽無數其中離官七十所容千乘馬騎

飲罷秦臺雪作天

三秦志關令尹喜迎老聃說道

德經築臺其處晉惠帝植木萬株連亘七里蘇軾此臺一覽秦川小不待傳經意已空

不擬伊優

陪殿下

趙壹伊優北堂上駢聯倚門邊注伊優屈曲佞媚猶唐武平一傳中宗宴兩儀殿令朝人唱合

笙平一上書諫曰兩儀承慶殿者陛下受朝聽訟之所比大饗羣臣不宜以倡優蝶狎

相隨于薦

過樓前

唐元德秀傳德秀為魯山令玄宗在東都酺五鳳樓下令三百里內刺史縣令各以聲樂集且

第勝負加賞黜河內太守輦倡伎數百被錦繡環譎光麗德秀惟遣樂工數十人聯袂歌于薦于薦者德秀所

為歌也帝聞異之嘆曰賢人之言哉謂宰相曰河內人其塗炭乎乃黜太守德秀益知名

如今白髮

山城裏宴坐觀空習斷緣

宴坐詳見卷三送一上人詩語錄外斷塵緣可以入道

別飾道二十弟賁之

少傅三朝老

詳見前積善堂詩序

文章壯九州賦詩資政殿

玉海宋真

宗景德二年宴近臣於資政殿餞種放大中祥符三年宴資政殿帝作七言詩從臣皆賦

賜字太清

樓

玉海宋仁宗天聖九年召近臣觀書太清樓召大子少傅晁迥預

拔燭辭軒陛

長編蘇軾

召對宣入內殿對罷命撤

簪花近冕旒

韻府溫公不喜華靡二十登科

御前金蓮燭送歸翰林院

簪花近冕旒

西陽雜俎楊

赴聞喜宴獨不簪花同年曰

慶門吾老矣

嗣復入歲能

屬文韓滉撫背謂曰名與位皆喻其父楊氏之慶也因字曰慶門

華國汝能不

左傳仲孫它謂

季文子曰子為魯卿相二君矣妾不衣帛馬不食粟人其以子為愛且不華國乎

暮春

濺濺流水曲穿沙林葉深深不過鴉自恨春來渾不識

慇懃着地拾殘花

原註一作溪流
淺淺曲穿沙

別息道二十二弟

允之

中令有清德風流二百年舉家惟食粥

法帖顏魯公乞米於魯大夫帖

云拙於生事舉家食粥已數月今又罄矣實用憂煎

絕口不言錢

世說王夷甫口未嘗言錢字婦

欲試之令婢以錢繞牀不得行夷甫呼婢曰舉却阿堵物

里閑容吾老庭闈賴汝賢

陶丘過范蠡莫泛五湖船

吳越春秋范蠡既佐吳滅吳遂辭於王乘扁舟出入三江

五湖人莫知其所適後變姓名入齊齊聘為相却之寓居陶丘曰陶朱公三致千金悉散與貧交諸昆季注陶

丘今定

陶縣

和江子我竹夫人

黃藤白簟倦呼盧

呼盧詳見卷八至日

高卧南窗示楷模

陶潛辭倚南窗

以寄傲後漢黨錮傳學中語曰天下模楷李元禮

郭芍藥情元最密

仙媛傳郭芍藥漢度

遼將軍東平郭謩女少好道

鄭櫻桃迹近相疎

樂府集石季龍

飛形往來倏忽千里後尸解鄭櫻桃迹近相疎

寵優童鄭櫻桃而殺郭氏更納清河崔氏櫻桃又諧下而殺之櫻桃美麗擅寵官掖樂府由是有鄭櫻桃歌

帷度日甘同夢

史記董仲舒為博士下帷講誦三年不窺園舍詩甘與子同夢

隱几終

年俱異書

莊子南郭子綦隱几而坐仰天而嘘嗒焉似喪其耦抱朴子人疑蔡邕得異書搜其帳中

果得王充論衡

晚向禪房陪杖屨

杜甫興來

清秋霜霰意何如

陶潛常恐

霜霰至

晁具茨先生詩集卷之十終

晁具茨先生詩集卷之十一

近體

戲畱次褒三十三弟頌之

白下春泥尙未乾輿地志江寧縣唐名白下汴流更待小潺湲輿地志汴

河在滎陽縣西至中牟不知汝定成行不寒食今無數日間荆楚歲時

記去冬至一百五日謂之寒食禁火三日亦名冷節

行武陟田中輿地志武陟縣名屬河南

慣習兒童喜從容父老懽桔槔看俯仰莊子不見桔槔乎引之則俯舍

之則仰故俯仰而不得罪稼穡愧艱難書先知稼穡之艱難乃逸則知

小人荷葉生池岸蒲萄落井幹前漢張騫傳騫使西域得蒲萄以歸漢說文井

上木欄又曰銀牀上官儀岑求田如得此當為駐征鞍岑

寂寂琴臺晚秋陰入井幹青門須醉別少為解征鞍

懷濟北弟姪寰宇記兗州北界濟南故曰濟北

久客思吾子生涯滯故鄉生涯詳見卷七睡起史高帝本紀高祖曰遊子悲故鄉

獨攜高士傳李白我等高士傳君與古人齊翻憶紫香囊晉書謝元少好珮紫羅香

囊叔父安患之不欲傷其意因戲賭取焚之合榻言猶在同堂樂未央翩翩

春草夢隨意遶池塘南史宋謝惠連七歲能屬文靈運詩思不就忽夢見惠連即得池塘

生春草之句以為神助

王敦素許紙不至戲簡促之

摩娑垢面戲陶泓拂拭蒼髯笑管城已與陳元俱絕倒

從君更召楮先生

韓愈毛穎傳秦皇帝封穎於管城號管城子與絳人陳元宏農陶泓會稽

楮先生

相友善

別昭德第愴然傷懷

昭德第詳見卷十積善堂詩序

吾廬去汝到何期

司空曙雲根禪客居皆說舊吾廬

四十年間此別離

合抱樹元從舊種

老子合抱之木生於毫末

幾叢菊始自新移

張協飛雨

灑朝蘭輕露棲叢菊

老無兄弟飄零日

李密表旣無叔伯終鮮兄弟

遠有公卿

曠絕時

李白因之出寥廓揮手謝公卿

努力不辭勤負米

家語子路曰由事二親之

時食藜藿之食爲親負米百里之外親沒南遊於楚欲
從車日乘積粟萬鐘欲食藜藿爲親負米不可得也
求三徑可從誰陶潛聊欲弦歌以爲三徑之資可乎

別飭道二十弟

飄零南北一衰門知是澶淵五世孫

左襄二十年諸侯會於澶淵有故頓

丘臨河濮陽三縣本宋之開德府也今屬大名府

嗟我獨無兄弟在憐君尙有

典刑存

詩雖無老成人尙有典刑

老身素苦貧常瘦病目仍緣哭轉

昏它日汝歸馳駟馬

成都記司馬相如初西去過昇仙橋題柱曰不乘高車駟馬不過此

橋後果然訪吾肯過浣花村

杜甫奉乞桃栽一百根春前爲送浣花村

和虞道二十三弟

千載風流賀祕書也知今有此人無吾家父子真相似

不愧朝廷乞鑑湖

祕書鑑湖詳見卷八敦素有以書局處之

和葉甥少蘊內翰重開西湖見寄二首

詩話杭有西湖

穎亦有西湖皆為遊賞之勝按穎西二里有湖袤十里廣二里翳然林木為一邦之勝歐陽修自揚移穎有都將二十四橋月換得西湖十頃秋之句公樂其風土築空湖上

使君重鑿西湖罷

後漢周惇傳耿况謂寇恂曰使君建節御命以臨四方注君者尊稱故曰

使君也復封詩寄我來洲上新題花鳥處苑中舊體柏梁

臺

古文苑漢武帝元封三年作柏梁臺詔羣臣二千石有能為七言詩者乃得上座

風烟直覺

鍾山近

鍾山詳見卷二送王敦素

魚鳥渾疑澗水開

詩話蘇軾穎州到任謝表略云

覽几席之溪湖
輕簿書於魚鳥
揮翰玉堂還有日
玉堂詳見卷二贈法一墨
行春停

騎且畱杯

二

一麾偃蹇江湖去
顏延之一
五馬侵尋觀闕來

詩話太守駟馬

其加秩中二千石乃加右驂故以五馬為太守美稱杜南蓬來官闕對南山說文闕門觀也爾雅觀謂之闕郭註宮門雙闕釋名闕在門兩旁中央闕然也
就日金坡通漢苑
史贊帝堯就之如日望之

如雲金坡詳見卷九送王敦素

望雲玉澗斷蘇臺

望雲見上

括地志玉澗在長安玉山下又蘇臺在姑蘇山上
一名胥臺吳王闔閭築五年乃成高見三百里

自迎

檝立看時渡

原註近聞買妾古今樂錄晉王獻之愛妾名桃葉獻之嘗臨渡作歌以送之曰桃葉

復桃葉渡江不用楫但手種花行到處開晉書潘岳爲河陽令手種

桃李笑語風流韓別駕通典州之佐史有別駕唐改郡丞爲別駕注別駕者從刺史行

部別乘傳車故謂之別莫令鸚鵡訴餘杯西陽雜俎梁魏使魏肇

駕唐韓愈嘗爲州別駕師舉勸鸚鵡杯徐君房飲不盡肇師曰海蠡蠅
蜋尾翅皆張非以爲玩亦以爲罰今日不得辭

和寄葉甥少蘊內翰見招

翰林赫奕今如此文獻通考唐元宗初置翰林待詔掌四方表疏批答應和文章前漢何武

爲濠州郡守好獎士類士多歸之莫道人惟舊雨來杜甫

所居無赫赫名去後常見思也龐老終身遠州府後漢龐德公居

集卧病長安旅次多雨尋常車馬之客舊雨來今雨不來德公居

峴山南未嘗入城府荊州刺史劉表數延劉郎何面向

請不屈後攜妻子隱鹿門山因採藥不返

春臺

原註八兄嘗言少蘊亦欲見招老子衆人熙熙如享太牢如登春臺

園宜杏子非時

結溪澗梅花過日開兩地聲聞無百里相望一覆手中

杯

次韻再答少蘊知府甥和四兄

以道

長句并見

寄二首

錦袍昔是詩成得

錦袍詳見卷八樂府

別墅今非棋賭來

晉書符堅率衆

百萬次於淮肥謝安命駕出山墅與元圍碁賭別墅安常某劣於元是日元懼便爲敵手而又不勝安顧謂其甥羊曇曰以墅乞汝定遂游涉至夜乃還指授將帥各當其任元等遂破堅

山蔚藍光交抱

舍

杜甫上有蔚藍天注青色

水桃花色合圍臺

薄洳志河決而桃花水洋溢注三月水漲

名
通人竹塢深深入謝客松扉遠遠開定與西湖爭勝
負只應惟欠使君杯

二

塵埃自與青雲斷

史伯夷傳閭巷之人欲砥行立名非附青雲之士惡能聲施於後世哉

歲月誰令白髮來數口無歸同作

一作關外

客一春多病幾

登

一作望中

臺常閑水上鷗從遠

水上鷗詳見卷五復至新鄉

只老籠中

鶴任開

鷗冠子籠中之鳥空籠不出

日日避愁無處脫直須到手不

停杯

復和少蘊內翰甥兼謝伯蘊通判兄再贈

西湖波浪還佳色風物悲人老可驚游接竹林公對叔

世說稽康阮籍阮咸等七人常集於竹林之下世謂之竹林七賢咸籍之姪也夢迷春色我思

兄夢迷春色用謝靈運事詳酒沾鸚鵡杯行盡原註前與伯蘊

兄詩常有鸚鵡杯之戲詩傍蟾蜍研立成西京雜記昔人盜發晉靈

公塚獲玉蟾蜍一枚大如拳腹容壯思不逢韓吏部唐史

韓愈字退之歷官吏部侍郎為文粹高名誰伴謝宣城

然一出於正學者仰之如太山北斗南史謝眺字元暉好學有美名文章清麗長五言詩沈

約嘗云三百年來無此詩為宣城守遷尚書吏部郎好

獎人才又好登覽多題句人稱之為謝宣城

復用韻

史奏德星今復聚

後漢陳寔字仲弓桓帝時太丘令以德化民嘗詣荀淑使子元方將車季

方執杖孫孝先長文尚幼坐車中既至荀使叔慈應門慈明行酒餘六龍下食文若尚幼坐膝前是夜德星聚太史奏五百里內有賢人聚輿地志歐陽修於潁州治起聚星堂與候官王回深父臨江劉敏貢父州人常秩夷甫六安焦千之伯彊鄉評月旦昔何驚
後漢許劭字子將汝南平輿人少峻名節嘗到潁川多長者之遊唯不侯陳實又陳蕃喪妻還葬鄉人畢至而劭獨不往或問其故劭曰太丘道廣廣則難周仲舉性峻峻則少通故不造也居常好覈論鄉黨人物每月輒更其品題故汝南俗有月旦評潁川人望須臾公守
陳寔爲太丘長鍾皓爲林慮長皆以仁信化民皆潁川人號潁川四長荀氏家聲付此兄
後漢荀爽兄弟八人歌曰荀氏八龍慈明無雙
人並有才名潁川

湖影龜魚同聚散棠陰燕雀半生成若

爲修禊無絲竹

王羲之蘭亭詩敘永和九年歲在癸丑會於會稽山陰之蘭亭修禊事也又曰

雖無絲竹管絃之盛一觴

古調新詩唱渭城

原註少蘊新作木蘭

一咏亦足以暢敘幽情

花詩奇絕隋唐嘉話劉伯芻巷口有鬻餅者當爐謳歌憐其貧貸以萬錢自是不聞謳歌鬻餅者曰本領既大

心計轉麗不

復歌渭城矣

晁具茨先生詩集卷之十一終

晁具茨先生詩集卷之十二

近體

僧舍小山三首

此老絕瀟灑久參曹洞禪

傳燈錄梁天監元年有僧智藥泛舶至韶州曹溪水口聞

其香嘗其味曰此水上流有勝地遂開山立名寶林乃云此去一百七十年當有無上法寶在此演法今六祖

南華

曾中有丘壑

黃廷堅題東坡畫枯木詩曾中元自有丘壑故作老木蟠風霜

左手

取山川

宋曹彬生周歲父母以百玩羅於前彬左手取干戈右手取俎豆人異之畫鑑范寬遊秦中遍

觀奇勝落筆雄偉老硬真得山水之骨

樹小風聲細巖深日影圓江湖不

歸客相對一茫然

二

愛此聚沙戲

金地藏懶於金地聚金沙

知自法王孫

岑參况值廬山遠抽簪歸法王

一運郢斤手

莊子郢人堊墁其鼻端若蠅翼使匠石斲之運斤成風盡堊而鼻不傷匠石曰臣能

斲之而臣質死久矣

都無禹鑿痕

秦二世本紀禹鑿龍門通大夏決河亭水

壁荷葉欲生盆笈問山陰道

世說王子敬云山陰道上行山川自相映發使人應

接不暇 潛通何處村

三

爛石有佳色

拾遺記爛石色紅似柿 禪房疊更幽九疑

峯不斷

寰宇記九疑山在永州晉郭璞云其山九溪皆相似或云九峯互相隱映望而疑之故名舜嘗

登十字水長流枕簟日逃暑開元遺事長安富家子爭

此亭中植畫柱以錦結棚軒窗時卧遊世說宗少文好山

召名姝間坐為避暑會衡嶽因結室衡山以疾還嘆曰老病俱至名山恐難徧

觀惟當澄懷觀道卧以遊之凡所遊歷皆圖之於室語

人曰撫琴動操欲令衆山皆響吾衰更何往只此對湯休高僧傳唐僧

氏欲令衆山皆響

氏

氏

挽十六叔父朝散祖禹

慘淡魚山路公歸應獲麟原缺車送逾千兩人哀備百

身傷心蒿里夜揮淚竹林春

翰墨傳名教公深有世風斯文今乃喪吾道亦何窮埋

玉嗟何及揮金樂未終子孫知必盛斷獄有陰功

原註叔父

倅徐州治道士高冲誣鄆之大姓孫守真變事

和二十二弟二首

靜處偷看肘後書

晉書葛洪字稚川自號抱朴子抄金匱方書百卷肘後要急方書四卷

幽棲古有此人無綠蕢青蕢非吾事

張志和西塞山前白鷺飛桃花流水

鰕魚肥青蕢笠綠衰衣斜風細雨不須歸

白浪狂風滿太湖

書震澤底定注震澤太湖也

二

襟抱恢疎老更寬笑談終夕盡君歡主人更有桃花面

病眼其如隔霧看

齊史盧士深妻崔氏有才學春日以桃花和雪醺面祝曰取紅花取白雪

與兒洗面作光悅取白雪取紅花與兒洗面作顏容杜甫老年花似霧中看

題超化寺壁

曲池風定碧瀾平

晉陶潛宰彭澤時濬九曲池暇日與陸修靜周續之流觴而飲

小白

魚如鏡裏行

博物志小白魚卽鯀魚亦曰參條魚小而長時浮水面

水竹再來應

識我壁間不用更題名

唐韋肇及第偶題名於慈恩寺雁塔遂爲故事

夜行

老去功名意轉疎獨騎瘦馬取長途孤村到曉猶燈火
知有人家夜讀書

和虞道二十三弟

豫之

向別已復久此懷誰與明書來慰吾意詩重識君情放

鶴惜未到筆談林逋隱孤山蓄兩鶴縱之則飛入雲霄

子延客坐開籠縱鶴飛鴻今尚橫揚子鴻飛冥冥何由

一隨汝端為薄浮名

畱別江子之

零去上都六典京兆河南太原為三都寶應元年詔以京兆為上都河南為京都大

原為北都又鳳翔為試於溱洧卜幽居不從刺史求彭

澤晉書陶淵明為彭澤令吏請東帶見督郵敢向君王

乞鏡湖韻府賀知章請為道士平日甚豪今潦倒嵇康

還鄉賜鏡湖剡川一曲

吾潦倒不切事情少年最樂晚崎嶇潘岳賦倦狹路之迫故人

鼎貴甘相絕劉峻論鼎貴高門則曰惟人所召別後君須寄一書郎士元別

後天涯何所寄故交惟有袖中書

寄王立之

臘雨城南宅撫遺朝符讀書城南衝寒憶屢陪拊憐庭下石間訊

竹間梅諸子詹門立詹門詳見卷十一復用韻羣公跋馬回說文草行曰跋

水行不知多病後誰與倒樽壘日涉

讀陳平傳

劉郎白首尚多疑通鑑漢高祖姓劉氏名邦字季沛人也又六年楚王信初之國陳兵出入

人有告信反者帝問陳平平曰古者天子有巡狩會諸侯陛下第出偽遊雲夢會諸侯於陳陳楚之西界信必郊迎因擒之特一力士之事耳帝以爲然乃發使告諸侯會陳信謁上上令武士縛載後車尋赦封爲淮陰侯百戰功臣迹轉危致使文城謝封邑通鑑帝剖符封功臣使張良自擇齊三萬戶良曰臣始起下邳與上會畱臣願封畱足矣不敢當三萬戶乃封張良爲畱侯卒謚文成未如還薦魏無知通鑑封陳平爲戶牖侯平辭曰此非臣之功也上曰吾用先生謀戰勝克敵非功而何平曰非魏無知臣安得進上曰若子不背本乃復賞魏無知

次韻江子我見寄

敢恨新居僻深懷故國尊耕耘得遺物版築尙頽垣溪隔城南寺崖通市北門它時如訪我但認語音存

朱少章曝麥爲雨所漂

看書不覺雨如澠稚子驚呼妻怒嗔豈意持竿護雞者

東觀漢記高鳳妻曝麥於庭令鳳持竿護雞誦讀如故忽雷雨漂麥去不知

飜同挾策牧羊

莊子臧與穀二人相與牧羊而俱亡其羊問臧奚事則挾策讀書問穀奚事則博塞以遊二人事業不同

其亡羊均也

過陳無已墓

鎖門脫落封將盡題壁污漫字不分我亦嘗參諸弟子
往來徒步拜公墳

晁具茨先生詩集卷之十二終

晁具茨先生詩集卷之十三

近體

初來東里

地志在河南新鄭

乘流從此去河漢失清都

列子周穆王執化人之裾騰而上天實為清都紫府鈞天

廣樂帝之所居既寤王問所從來左右曰王默然爾

送騎沙邊散征帆雨外孤挾

雌栖隴雉

琴操齊牧犢子年七十無妻朝日見飛雉雌雄相隨感之撫琴而歌曰雉朝飛鳴相和雉

雌羣遊於山阿

生子哺巢鳥

春秋斗運樞飛翔羽翮為陽陽氣仁故鳥反哺也

宇宙將

焉往飄飄盡畏途

畏途詳見卷三紀愁

至東里次前韻

茂陵家四壁不比在成都

四壁詳見卷四夷門行

老矣招魂苦

招魂

詳見卷一香山

傷哉問影孤

魏陳思王傳形影相弔五情愧赧

市中寧有虎

韓子

魏龐共與太子質於邯鄲共謂王曰一人言市有虎王

信乎曰否共曰二人言市有虎王信乎曰否共曰三人

言市有虎王信之乎王曰信矣共曰夫市無虎明矣而

三人則成今邯鄲之去魏也遠於市議臣者過於三人

願王

屋上豈無鳥

六韜武王登夏臺以臨殷民周公旦曰愛其人者愛其屋上之鳥憎其人

者憎其胥餘注

四海皆行路吾何必此途

胥餘蟹醢也

都下追感往昔因成二首

少年使酒走京華

前漢文帝紀文帝召季布復有言其勇使酒難近雷邸一月見罷

步會遊小小家

吳地訛嘉興縣前有晉伎蘇小小墓按小小錢唐名倡也南齊時人白居易濤

聲夜入伍員廟柳

色春藏蘇小家

看舞霓裳羽衣曲

開元遺事元宗時河西節度使楊敬

述獻霓裳羽衣曲十二遍凡曲終必遽惟此曲將終引

聲益緩上每酺宴以山車陸船載樂器往來出宮人舞

霓裳聽歌玉樹後庭花

玉樹詳見卷九送王敦素又舊唐志玉樹後庭花太簇商曲也

陳後主所作其曲云妖姬臉門侵楊柳重珠箔

似花含露玉樹流光照後庭

起神室以白珠繒

窗對櫻桃卷碧紗

李嶠月宇臨丹地雲窗網碧紗

客半驚隨逝水主人星散落天涯

二

春風踏月過章華

楚語靈王為章華之臺伍舉諫之

青鳥雙邀阿母家

漢武故事七月七日忽有青鳥飛集殿前東方朔曰此西王母欲來有頃王母至三青鳥夾侍王母傍

馬柳低當戶葉迎人桃出隔牆花鬢深釵暖雲侵臉

詩鬢

髮如雲

臂薄衫寒玉映紗

杜甫香霧雲鬢濕清輝玉臂寒

莫作一生惆悵

事鄰州不在海西涯

十洲記四海之一中有鳳麟洲弱水繞之鴻毛不浮不可越也

次韻四兄蘆

公如柳柳州

唐書柳宗元貶柳州刺史有云柳州柳刺史種柳柳江邊柳橋如柳浪

惱殺涉潦人

詩褰裳涉潦

望望不可上

二

碧蘆自愁絕黃蘆正枯折宵征雁影孤

梁簡文帝夜望單飛雁詩天霜

河白夜星稀一雁聲嘶何處歸早知半路應相失不如從來本獨飛

墮此橋下月

次韻陳叔易恬蘆橋柳橋二首

落日河梁上遲留客去時近隣無遠送莫說最長枝

二

橋濶狹如馬蘆高低似人白蘋洲上客輿地志洲在枉
雪溪東南

恨洞庭春

地志洞庭湖名
在岳州城西南

次韻朱少章蘆橋柳橋二首

蘆橋復柳橋蘆枯柳可愛不厭春與秋主人客有待

二

洞庭生白波隴首起黃雲漁舟霧裏見羌笛月中聞

挽蔡晉如

南部清笳咽

沈遼集大笳十八拍世號沈家聲小笳十九拍號祝家聲杜甫天風隨柳斷客淚墮

清東門素旐飛

說文郭璞曰帛全幅長八尺爲旐

如何一老沒

詩不憇遺一老

俾守

不及二疏歸

前漢大傳疏廣謂少傳受曰吾聞知我王不足辱知止不殆今仕宦至二千石

官成名立如此不去懼有後悔卽日同受俱移病上疏乞骸骨上許之加賜黃金二十斤公卿故人設祖道供帳都門外送者車數百兩道路觀者宇宙那復見死生

皆曰賢哉二大夫或歎息爲之泣下

從此違吾年未四十已嘆故人稀

夏室

夏室不禦暑竹陰新未交幽花時結子晚燕續開巢午

夢還高枕晨炊出近庖此生吾自了客至莫相嘲

謾興

苻郎傳檄度江南

晉書秦王苻堅會羣臣於太極殿議曰吾承業垂三十載四方畧定惟東

南一隅未沾王化今吾欲自將伐之何如諸臣皆以爲不可堅弗聽且曰以吾擊晉猶疾風掃秋葉耳乃大舉入寇戎卒六十餘萬騎二十

七萬旗鼓相望前後千里

謝老風流倚翠嵐但自圍

碁君莫問顧輸別墅乞羊曇

謝老詳見卷十一次韻再答少蘊

過鴻儀寺

折葦枯荷倒浦風黑雲垂雨挂長虹山僧生養池魚看不許遊人學釣翁

答韓君表

百年鄠杜家相近鄠杜地名詳見卷一古樂府人物凋零我獨驚但

見少陵能繼祖唐杜甫傳祖審言為膳部員外郎有詩名不聞小陸可優兄

晉書陸雲字士龍機弟弱冠與兄齊名尚書閔鴻奇之曰此兄若非龍駒當是鳳雛終朝詩賦道

仍鬱老去原註亦作去老文章健更成敢擬濟河輕一戰左傳濟河

焚舟隱然望已原註亦作望望怯長城唐劉長卿與秦系為詩相贈答權德輿曰長卿自語

五言長城系以偏師攻之

次君表韻答葉少蘊甥

老去幽棲誰比數傳君詩一邑人驚敢叨禮亦推甥舅

借問年猶媿弟兄今日蒼龜真有望終身木雁兩無成
凡才那可供缺一字去目送飛霞向赤城

易具茨先生詩集卷之十三終

晁具茨先生詩集卷之十四

近體

與秦少章題漢江遠帆五首

地志漢江在襄陽城北禹貢蟠冢導

漾東流為

漢即此

楚山全控蜀

杜甫山連粵
舊蟠三蜀

漢水半吞吳

李白江流石不轉遺恨失吞吳

老眼知佳處曾看八景圖

輿地志八境臺在贛州城上東望七閩南眺五嶺蘇軾嘗

賦詩

八章

二

江山起暮色草木歛餘昏誰感離騷賦丹青弔屈原

史記

屈原爲上官大夫所讒憂愁幽思而作離騷注騷遭也
言遭憂也又自屈原沉汨羅後百餘年漢有賈生爲長
沙王太傅過湘水
投書以弔屈原

三

雲埋鳳林寺浪打鹿門山

地志鹿門山在襄陽城東南
龐德公孟浩然皮日休皆隱

此今日江風惡郎船勸不還

四

江濶雁不到山深猿自迷傳聞杜陵老

杜陵詳見
卷五洗馬只在

灤東西

地志杜甫居灤西復居灤東乃巴
東縣東西灤溪也今草堂基尙存

五

石似浣紗石

會稽錄苧蘿山下有浣紗江相傳西施浣紗處

江如濯錦江

蜀志錦江

在成都城南織錦濯於此則鮮麗故名

征帆向何處雲霧晦逢窗

說文逢窗編竹

覆舟也

莫春書事

少年猶在老書生酒後思家夜起程
自佩弓刀防不測獨隨騾馱雨中行

謝富蔡見過

飯蔬君莫厭瓜菓我時須自可隨
豐儉誰能問有無墮

蜂衝博局

說文博局戲用六箸十二棊故名六博古者烏曹作博

驚燕避投壺

禮記

投壺之禮主人請曰某有枉矢哨壺請以樂賓不憚過從遠頻來訪老夫

范元章惠然相過見問奇章公服鍾乳三千兩

事因為長句戲之

君家文物

原註一作清節

冠先朝

文中子衣冠文物之舊

破甑生塵久寂

寥

循史傳范丹字史雲桓帝時為萊蕪令清貧人歌之曰甌中生塵范史雲釜中生魚范萊蕪

借有

三千兩種乳定無八百石胡椒

唐書代宗賜程子自盡妻子皆伏誅有司籍

載家財有鍾乳五百兩胡椒八百石他物稱是

湘妃暗鼓江邊瑟

曹植樂府使湘靈鼓瑟兮

合海若舞馮夷南部新書錢起寓宿驛舍外有人咏曰曲終人不見江上數峯青起識之及殷試湘靈鼓瑟落

句久不屬遂以此

秦女高吹月下簫

列仙傳簫史者秦穆公時人喜吹簫

能致孔雀白鶴穆公以女妻之乃教弄玉吹簫作鳳鳴
有鳳凰來止其屋公爲作鳳臺居之一日夫婦同乘鳳
凰去不待青春行樂了纂要春日青春芳春陽春九春晉書向秀欲注莊子嵇康曰此書詎
須注正自妨直持玉檢上宸霄前漢武帝紀中元元年泰山尚書令奉玉牒檢
人行樂爾注封禪有金策石函金泥玉檢謂以玉爲檢束道書天
有九霄赤霄碧霄青霄元霄絳霄黃霄紫霄練霄縉霄
說文宸帝居也

再至都城

崢嶸花萼西

唐書元宗性友愛兄弟五人製長枕大被同卧起於宮南造花萼相輝之樓時召諸

王宴集

清曉望猶迷御路紅塵合

西都賦披三條之廣路立十二之通門祖

賦詩

詠停車傍明月

宮槐碧瓦齊

庾肩吾井梧生水合宮槐卷復稀劉駒餘縹碧以爲

走馬入紅塵

夾城知輦過

開元遺事開元中於長安築夾城至芙蓉苑詩我任我輦說文輦車也六書故

輓者也復道覺香低

史叔孫通傳孝惠為東朝長樂宮及閒往來數蹕煩人乃作復道

中使傳宣入千門避馬蹄

三輔黃圖漢武帝作建章宮周迴三十里度為千門萬戶

春晚圃田道中三首

周禮職方氏辨九州之國河南曰豫州其澤藪曰圃

田郡縣志中牟縣圃田澤南北二十六里東西五十里

度柳穿橋聽午雞

劉禹錫楓林社日鼓茅屋午時雞

一溝春水國門西

韓愈賦排國門而東

行人不用傷新別看取塵間萬馬

出今嗟余行之舒舒
蹄史記牧馬二萬蹄韓翃駿馬錦障泥紅塵撲四蹄

酒酣馳馬笑彎弓便擬長驅向虜中但恐老儒無骨相
杜甫朝廷半老儒注太宗之時朝廷多老儒碩學不堪劍履畫南宮
史蕭何傳劍履上殿漢制建尚書百官府曰南宮通鑑漢明帝圖畫功臣鄧禹等二十八將於南宮雲臺

三

君王重老降褒書特賜宣陽宅一區聞說會稽人不識

鑑湖還肯借臣無

鑑湖詳見卷十
二畱別江子之

玉字黃庭經

寶氣宵纏北斗間

史鄭世家新垣平日臣望東北汾陰直有寶氣

仙書自把下

天壇

郊祀志圓壇入陛注祭天

誤緣不是凡心起月戶雲窗讀字難

紀聞韓魏公知揚州王介甫以新進僉書判官事魏公不以吏事許之秩滿去會有上書者多用古字魏公笑曰惜介甫不在其人頗能讀難字

重過鴻儀寺

秋色遽如許寒花奈若何客行傷老大野次記經過廢圃猶殘菊枯池但折荷吾生與物態天意豈蹉跎

贈江子我子之

江郎淮海秀

書淮海惟揚州

經術古同師

唐史太宗銳情經術引納學士更直討論

古溫潤無前輩

孔融與曹操書今之少年喜謗前輩

清新有近詩一邱須

早計

晉書謝鯤曰端委廟堂鯤不

五斗莫堅辭

晉書陶潛嘆曰

如亮一丘一壑自謂過之

吾不能爲五斗米
折腰事鄉里小人
獻賦修竿牘杜甫憶獻三賦蓬萊宮
荳竿牘傲精神乎塞
知君定不爲
淺注以竹簡相問訊

贈江端本子我

譚免雞豚今日債
斷除妻子宿生緣
豐登便是人天供
努力東臯自種田

送僧歸建州

建寧志城東安泰門有古城相傳
閩王審知遷城於此至今呼其地

爲黨城又城南三里有郊壇在昇山上乃僞
殷僭築城北有大沙洲舊富沙驛設焉廷政
之封富沙王以此宋端拱元年改爲建寧軍
南渡孝宗以紹興五年封建國公三十年進
封建王登極之
後陞爲建寧府

清秋頽汝歸時晚寰宇記西楚潁州秦潁川地與淮康郡汝陽縣隣界秦屬潁川不及

羣公送惠休史略唐僧惠休善屬文作碧雲之什曲几數行題字別晉王羲之

諸門生家不遇見裴几滑淨因書扁舟幾日為詩畱王真草相半其父誤刮去驚懊累日

齡武陵谿口住扁舟東吳楊柳雲中渚寰宇記江東南谿水隨君向北流

越梅花雪外洲通志夏少康封少子無餘於會稽禹祀號曰於越淮南傳南越賓服萬

里故鄉聊一到江山風物往來遊杜甫風物悲遊子登臨憶侍郎

晁具茨先生詩集卷之十四終

晁其茨先生詩集卷之十五

近體

和新鄉二十一兄華嚴水亭五首

近市危樓通野寺，隔溪高柳接京華。
蕩舟不怕風波急，

看盡芙蓉十里花。

芙蓉十里詳見卷力
次韻江子我蠟梅

二

池水泠泠淥未深，叢篁低草背庭陰。
晚來欲別龜魚去，更向軒西獨瞰臨。

三

嗜酒不知淹歲月好閑久欲棄簪纓暫遊蓮社同陶令

蓮社詳見卷八送僧

終向瓜田學邵平

史記邵平故秦東陵侯秦滅後爲布衣種瓜長安城

東瓜有五
色甚美

四

渚蒲淅淅風猶急岸柳纖纖雨尙餘
栖鷺宿鷗渾去盡
派溪還有兩三魚

五

荷蓋點溪二數葉藤梢遶樹幾千層
投閑更與高人約

重抱琴來聽廣陵

世說會稽賀思令善彈琴嘗夜坐月中臨風鳴絃忽有一人形貌甚偉著

械有慘色在中庭稱善便與交語自云是藉中散請賀
日卿手下極快但於古法未備因授以廣陵散賀遂傳
之於今
不絕

感梅憶王立之

王子已仙去梅花空自新江山餘此物海岱失斯人賓

客他鄉老園林幾度春城南載酒地

城南詳見卷十二
寄王立之載酒詳

見卷四和
十二兄

生死一沾巾

送人游江南

湧金門外斷紅塵

輿地志杭州西城三門曰清
波曰湧金曰錢塘皆臨西湖

衣錦城

邊著白蘋

梅聖俞西湖泛舟誰念
滄江上風柔採白蘋

不到西湖看山色

地

志湖州長城有西湖溉田三千頃其後堙廢正元十三年刺史于頔復之人賴其利定應未可作

詩人

和顏伯武文山寺

松門石磴隱山家鍾鼓蕭然一院花齋罷老僧來施食

堦前馴雀趁饑雅

小魏買馬久不至以詩寄之

聞說黃金廐五代史漢主劉晏與周世宗戰敗乘黃曉馳歸以金銀飾廐食以三品號白在將軍

騏驎惜別羣說文騏驎青驪文騏言毛色深淺班駁隱鄰也猶來果下馬東夷傳朝

鮮出果下馬注高杜甫蕭蕭千里馬個個五花紋不必五花紋杜甫蕭蕭千里馬個個五花紋駿骨愁

時晚史記郭陶謂燕昭王曰古人遣使者實千金市駿馬未至馬已死買其骨五百金而歸期年千里之

馬至禮說文薌其念夕曛說文薌同香穀氣也曲禮黍曰薌合梁曰薌其老夫慵杖屨

待汝入嵩雲說文中嶽嵩高山詳見卷四和十二兄之五

和四兄清泉香餅子

清絕端因柏子香風流特可付文房如何石火須臾頃

杜甫蝸牛角上爭何事石火光中寄此身選詩歛如敲石火得盡人間一日長

晝寢

聞說齊州路遙通古睡鄉雲崑迷傳說史記武丁夜夢得賢人名曰說

以夢所見示羣臣百吏皆非也於是使百工營求之野得說於傳崑中武丁曰是也得而與之語果聖人舉以

爲相殷國大治故遂風峽宴襄王高唐賦序楚襄王與宋玉遊雲夢之臺高

以傳姓之號曰傳說唐之觀上有雲氣須臾之間變化無窮王曰此何氣也

玉曰朝雲也昔者先王嘗遊高唐晝寢夢婦人曰妾巫山之女也爲高唐之客聞君遊高唐願薦枕席王因幸

之去而辭曰妾在巫山之陽高唐之側朝爲行雲暮爲行雨朝朝暮暮陽臺之下旦朝

視之如言故爲立廟號曰朝雲日月星辰靜周禮占夢辰占六夢山川草木長醫經肝實則夢山林大不知三

代貴何似一張牀

過陳無已墓

以我懷公意知公待我情五年三過客九歲一門生近訪遺文錄重經故里行寄書無鄭尹誰爲葬彭城

懷王立之

不到城南久

城南詳見卷十
二寄王立之

黃梅幾度新

梅譜蠟梅與
梅同時原名

黃梅詳見後過

忽看人日作

荆楚歲時記正月七日爲
人日高適人日題詩寄草

王立之故居

堂遙憐故人思故鄉柳條弄色不忍見梅花滿地堪斷

腸身在遠藩無所豫心懷百憂復千處今年人日空相

憶明年人

淚盡大和春

揚雄大和其在
唐虞成周乎

翰墨猶如在壺

日知何處

觴不復陳常思醉風度花底岸綸巾

後漢光武紀岸幘
笑迎晉謝萬春著

白綸巾披

鶴髦裘

以少炭寄江子之

金籍曾通玉虛殿

李白謬題金閨
籍得與銀臺通

仙曹擬拜翠微郎莫

嫌薄上溫磨火

李商隱漸近火溫磨注磨香也

猶得濃薰篤耨香

泊宅編市

舶張苑進篤耨得學士按篤耨出真臘國樹似松老則脂液溢出色白者名白篤耨香夏融冬結以瓠瓢盛之置陰處則夏不融雜以樹皮則色黑名黑篤耨

梅

素月清溪上臨風不自勝影寒垂積雪枝薄帶春冰香近行猶遠人來折未曾江山正蕭瑟玉色照松藤

過王立之故居

酴醾架倒花仍發

原註一作花無主格物論酴醾花藤身青莖每一穎著三葉品字盤曲青

跗紅萼及開變白香微而清范蜀公居許下作長嘯堂宴客酴醾架下約曰有飛英墮酒杯者飲一大白微風

過之滿座無遺

時號飛英會

薜荔牆推石亦移

原註一作客有誰清

蔓生依岩石者如織在石曰石黠在地曰地錦繞叢木

曰長春藤曰扶芳藤曰龍鱗薜荔柳宗元驚風亂飈笑

蓉水密雨斜此地與君凡幾醉年年同賦蠟梅詩

梅譜

侵薜荔牆本非梅類以其與梅同時香又相近色酷似蜜脾故名

蠟梅蠟梅原名黃梅故王安國熙寧間尚有咏黃梅詩

至元祐間蘇黃

門命為蠟梅

再至徐州示諸弟

一統志秦始置彭城縣屬泗水郡項羽稱西楚霸王實都

之漢高改泗水為沛郡隸豫州又分沛郡立

楚國因置徐州後漢十三州徐治鄉鄉下邳

也三國十二州晉十

九州徐皆治彭城

去年客徐得范子今年客徐不得人斷無草木與同味

左傳晉范宣子來聘且拜公之辱告將用師於鄭公享
之宣子賦標有梅季武子曰誰敢哉今譬於草木寡君
在君君之臭味也欽宛有魚鳥來相親世說簡文在華
林園曰會心處
以承命何時之有
不必在遠翛然林水
南等白門傍山麓輿地志白門者
州南門也三國
覺魚鳥便來親人
志呂布死西望黃樓行水濱輿地志黃樓者城東門樓
也宋熙寧十年河決蘇軾
於白門樓
爲守每先事隄防卒全徐城明年元豐正月朝廷下詔
獎諭乃卽城東門起大樓樓成堊以黃土取尅水之義
子瞻十五夜黃樓觀月詩中秋天氣未應殊不用紅紗
照坐隅山下白雲橫匹素水中明月卧浮圖未成短棹
還三峽已約輕舟泛五湖爲問登臨好風景明年還憶
使君無自註云郡治有廳事俗呼爲霸王廳相傳不可
坐軾在郡拆還家作詩示羣從早晚一遊攜二陳二陳
指元
之以蓋黃樓
方季方詳見卷
十一復用韻

秋夜情

獨眠百感秋夜情孤城急雨中聞更明朝覽鏡視鬢原註


一作鬚


髮不知白從何處生


晁具茨先生詩集卷十五終

右宋晁具茨先生古今詩一百六十七首涪陵孫君壽
諸梓陵陽俞君爲之序迄今六百年矣先生生於南北
治亂之交而羣從復羅元祐黨禍故其發於詩歌者類
多憂讒畏譏以至疾革時取所著書聚而焚之曰是不
足以成吾名嗚呼豈真謂不足以成名哉客至勿多語
欲吐且復吞送王敦素云爾此先生之微旨也此先生
之詩之所以可傳傳而不貴多也余向藏有繕本愛其
取材宏博富有百家而又惜其字多魚豕吟咏之餘猝
難解會因別購善本與西亭先生讐校數過譌者是正

疑者是闕而加箋焉讀者庶可藉以尋其義之所在乎
若夫詩之淵雅踈亮容濶寬餘前輩論之詳矣不復贅
亮圃書於一卷一勾之間







道光丁未鐫

卷之一

揭曼碩詩集

海山仙館叢書

新集

歐陽文忠公集

新集

揭曼碩詩目錄

卷之一

臨川女

夏五月武昌舟中觸目

張君壽先生鵠山隱居

送趙履道虞叔常還江右

寄題九江義門陳氏壽安堂

正月十二日尋盧學士船至漢口畱詩爲別

黃尊師高軒觀鵝因畱宿

衡山縣曉渡

題王山仲所藏瀟湘入景圖卷走筆作八首

以事暫如武昌發臨川

女兒浦歌

送尹十六善叟謁告歸茶陵會葬賢兄處士十韻
送黃五舅得武陵校官還辰州寓居省侍

貧交行

曉坐張先生朝陽軒

別武昌

南康夜泊聞廬阜鐘聲

春日雜言七首

夢兩雛

夢武昌

遊麻姑山五首

并序

盧學士奉旨南祀海嶽繇鍾陵相別聞尙畱會稽
有懷奉寄

病夜

得程翰林揚州消息

歸故園新居落成後作

山行

寄題馮掾東臯園亭

宿梁安峽夢故室有感時還盱江

送趙仲遠赴甌寧

山莊晚立有懷舍姪沆督穫臨川

哭王十良仲

雨述三篇

春莫閒居寄城西程漢翁十五韻

長風沙夜泊

何郎失鏡詞

贈青城侯尊師次人韻

贈友

曉出順承門有懷太虛

京城閒居雜言八首

去婦詞

四友詩

賦雙陸

泊安慶時再北游

漁父

高郵城

濟州初度

楊柳青謠

雜詩四首寄彭通復

柏堂詩

卷之二

獻張平章

題祝道士龍虎山先天觀

二貞詩

史館獨坐

周待制致樂堂詩


馬氏巖溪圖

山水圖

送道士薛元卿歸江東

大明殿退朝和周待制

祖生詩



孤雌行爲鄆城節婦作

燕氏救兄詩

送華尊師以天壽節奉詔祀武當

送馬雍古御史撫諭河西

送周山人之遼東

李宮人琵琶引

題上都崇真宮陳真人屋壁李學士所畫墨竹走

筆作

集賢大學士趙國公王開府慶八十應制

陵陽牟景陽以名祖父之子孫負奇材勁氣而與
世抹掇自台州教授入掾翰林一語不合竟棄
去不顧以詩爲別

結羊腸詞

劉承旨父大司徒邢國公慶九十應制

小孤山次韻

贈別曾編修歸廬陵葬學士兄

寄題臨川西礪范氏寓居

尋舍弟將至東牢宿野店

贈王郎

沈逸人東觀招飲山館

畫鴨

題聶氏陶軒

送涂雲章訪舊武昌卻入京師

歸舟

小孤山曉發和蔡思敬韻

大信晚泊呈舟中諸公

白楊河看月

歌風臺和李提舉韻

題嚴陵獨釣圖

題鼯鼠食瓜圖

哭信州仙源觀徐尊師乃元教大宗師張開府之

弟子也

送蔡思敬還豫章有懷遼陽李提舉

孔林圖詩

壽櫟山詩一首爲吳真人公生朝作壽櫟山其里

山名

壽王副樞

李將軍歌一首送李天民赴邵武軍口巡檢

題桃源圖

送人歸豫章

送王畱守宣慰荆湖

題張尊師畫

送播州楊宣慰歸藩

寄題括蒼王氏東野二亭

畊雨 心遠

寒夜作

送唐尊師祠武當

送詹尊師歸廬山

贈淳真子


孤松篇壽王大學士

過何得之故居五首

送譚仲章歸長沙

我我亭詩

送鄭司獄歸衢州却赴調京師



題山水

題御馬圖

題山暉圖爲劉尊師作

題臨江同知問流民事蹟


寄題朱氏真村堂

送人從軍

題淵明歸去來圖

卷之三

題明皇出遊圖應制



送孔學文赴大庾巡檢

送李都事赴湖廣省幕

畫鷹

題張使君棄官學道詩卷

送戶曹掾于孔昭赴南臺掾

寄題胡氏園趣亭

題文瑞圖

題南頓孔氏復明詩卷

奉同柯博士甘內掾下直賦

賦得海上雲送良上人歸徑山

吳子高悼亡歸岳陽

秋夜作

進士張于高得邛州判官歸成都

題陶淵明歸圖

寄題傳尊師兄弟所作寧壽道院

二月朔日雪中題歐陽少監所藏宋好古畫竹

雲錦溪棹歌七首

御書雪林二字賜趙中丞應制

題胡虔汲水蕃部圖應制

題辛澄蓮華觀音像應制

杜節婦詩

題內府畫四首應制

韓滉土星像 曹將軍下槽馬圖

韓幹馬 宋徽宗成平殿曲宴蔡京圖

送秘書李道濟赴峽州幕

奉送全平章赴江西

題青山白雲圖

桃華鸚鵡

趙孝子

題姑蘇陸友仁所藏衛青印

廬山連尊師求真陽詩久諾而未作也一夕夢中
得之因書以贈

贈項鍊師

送鄉人祐上人從師歸當陽

送蘇尊師歸茅山

寄題張齊公廟

題李安中白翎雀

寄題楊教授菊莊

番禺蕭性困攜其祖將領所愛唐琴號霜鍾者還

自和林求詩六月三日五門宣赦後作

送王伯循編修赴南臺御史

寄題鄴下樊氏鍾秀園

題廖氏皆春堂

大駕既幸上都率奎章諸生之畱京者讀書宮南
史館中得大熱疾勢危甚項君子虛視之一藥

而起爲賦五言一首爲謝

周氏敖山驛水木清華亭

題趙照磨虛舟

送毛真人還龍虎山

故中憲大夫嶺北行省左右司郎中蘇公志道哀

詩

題羅稚川所畫臨川羅益謙溪居圖

寄題武寬則湖山堂

十月十八日夜南郊齋宿夢先帝召見便殿手賜

橘花一枝有感而作

寄題上饒鄭氏菊莊

題四清圖

題新安許氏蘭秀軒

夢題墨梅

寄題永豐劉氏暖翠亭

寄題信州德元觀何真人林園長春亭

題信上人春蘭秋蕙四首

蔡七祖真人得朱文公所書讀書二字以名其齋

請賦

送陰陽蕭教授赴瀏陽


賦得春雁送張郎中省覲揚州

送聶大祝赴潮州錄事

題俞氏看雨軒

題江道士清虛館

賦得吳歌送人歸吳中



揭曼碩詩卷一

虞山 毛晉子晉 訂

臨川女

我本朱氏女住在臨川城家世事趙氏業惟食農耕五
歲父乃死天復令我盲莫知朝與昏所依母與兄母兄
日困窮何以資我身一朝聞密言與盲出東門阿母送
我出阿兄抱我行不見所向途佢聞風雨聲行行五里
餘忽有呼兄名兄乃棄我走客前撫我言我與趙世親
復與汝居鄰聞汝卽赴死扶服到河濱我身盡沾濡不

復知我身汝但與我歸養汝不記年涔涔遵旋路咽咽
還入城城中盡驚問戚促不能言望門喚易衣恐我身
致患再呼我母來汝勿憂饑寒汝但與盲居保汝母女
全我母爲之泣我鄰爲之歎喜我生來歸疑我能再明
況得與母居不異吾父存我今已十三溫飽兩無營我
母幸康彊不知兄何行我母本慈愛我兄亦艱勤所驅
病與貧遂使移中情當日不知死今日豈料生我死何
足憾我生何足榮所恨天地生不如主翁仁誰能爲此

德婁公名起莘

夏五月武昌舟中觸目

兩髯背立鳴雙橈短簑開合滄江雨青山如龍入雲去
白髮何人竝沙語船頭放歌船尾和篷上雨鳴篷下坐
推篷不省是何鄉但見雙雙白鷗過

張君壽先生鵠山隱居

當日自期顏果卿莫年羞見魯諸生
膝兼多病終難屈身爲長愁視轉輕
日晏典衣畱客醉雨餘開戶看兒耕
淮雲楚樹晴如埽卧送年年江水聲

送趙履道虞叔常還江右

趙子我同里虞郎我同年手折武昌柳送上西江船買
魚沽酒燒荻鞭夜下西塞寒山前西塞山碧如苔君今
去幾時來東風花開春水漲待君黃鸝磯頭望君庾公
樓上

寄題九江義門陳氏壽安堂

匡廬之陰彭蠡涯七百餘載真良家

宋御書表其門曰真良家冲和

鬱勃吹不散飛落南山萱草花往時冠蓋如流水撞鐘
鼎食三萬指詔書十度復租庸每歲朝廷仍貸米父慈
子孝則四方紀淨綱明照閭里蓬萊水淺昆明空天開

地闢元氣通張公百忍澤未竭王母千年桃始紅南山
築堂三百步翠竹屯雲森玉樹忠厚必有神明扶淳樸
自是期頤具方瞳綠鬢紅氍毹春酒搖蕩香扶疎公侯
子孫始必復日爲大夫人起居

正月十二日尋盧學士船至漢口畱詩爲別

晴江澹微瀾曳雲在曾巘參差連舫出散漫羣鷗遠始
知遵漢廣遙睇高旆卷懷賢每忘賤臨流亦忘蹇蒼茫
景將人窈眇春猶淺新知遽相違餘棕何由展

黃尊師高軒觀鵝因畱宿

開軒南嶽下世事未曾聞
落葉常疑雨方池半是雲
偶
尋騎鶴侶來此看鵝羣
一夜潺湲裏秋光得細分

衡山縣曉渡

古縣依江次輕輿落岸隈
鳥衝行客過山向野船開
近
嶽皆雲氣中流忽雨來
何時還到此明月照沿洄

題王山仲所藏瀟湘八景圖卷走筆作

瀟湘夜雨

泠泠暗江樹荒荒楚天路
穩繫渡頭船莫放流下去

遠浦歸帆

冥冥何處來小樓江上開長恨風帆色日日誤郎回

煙寺晚鐘

朝送山僧去莫喚山僧歸相喚復相送山露濕人衣

洞庭秋月

顥氣自澄穆碧波還蕩漾應有凌風人吹笛君山上

平沙落雁

天寒關塞遠水落洲渚濶已逐夕陽低還向黃蘆沒

漁村晚照

定從海底出且向平沙照漁網未全收漁舟還下釣

山市晴嵐

近樹參差出行人取次多板橋雙路口此世幾迴過

江天暮雪

孤舟三日住不見有人家昏昏竹籬處卻恐是梅華

以事暫如武昌發臨川

江轉欲無路山迴忽似圍客程秋共遠物色晚多疑稍
稍沙鷗集忽忽野樹稀武昌今夜夢定有故人知

女兒浦歌

女兒浦前湖水流女兒浦前過湖舟湖中日日多風浪

湖邊人人還白頭

又

大孤山前女兒灣大孤山下浪如山山前日日風和雨
山下舟船自往還

送尹十六善叟謁告歸茶陵會葬賢兄處士十韻
八歲賴賢兄未理猶望生旋聞日下葬敢戀世間榮得
告如無及嚴期况有程意長看路短義重覺身輕鄉樹
迎船出江雲入墓橫望山占驛堠聽雁作城更但使能
臨穴猶堪略慰情死生今古異去住別離并尙足酬知

已非貪美俗評匆匆不可盡迴首各沾纓

送黃五舅得武陵校官還辰州寓居省侍

寧上山頭種禾黍莫向他鄉作羈旅山田得雨尙有年
他鄉顛顚何人憐一身千里家何在全家更在沅湘外
獨樹雞鳴楓葉飛荒村雁沒蘆花碎親在窮邊望子還
子在長途衣復單居無寸田出無僕明年作音官當食
祿

貧交行

驅車涉廣川揚帆陟崇丘結交四海內中道多愆尤朔

風厲苦節獨鶴橫九州朝拂三島樹夕過五城樓雨翅
偶寒影曠然何所求登高臨大江日莫萬里流時哉疏
鑿人八年忘外畱出必益稷俱歸與夔龍儔進退兩不
疑功成垂千秋萬事日相斂恩情若雲浮吾心苟不渝
反覆安足仇自非天地外何能獨忘憂

曉坐張先生朝陽軒

朝日照高樹幽人方啓關蕭寥塵外事風葉滿窓間

別武昌

欲歸常恨遲將行反愁遽殘年念骨肉久客多親故佇

立望江波江波正東注

南康夜泊聞廬阜鐘聲

廬山三百寺何處扣曾雲宿鳥月中起歸人湖上聞入
空應更迴近瀑正難分遙想諸僧定香爐上夕熏

春日雜言七首

日月朝朝新何物能獨久常恐天與地變化習已朽東
風闐然來茫茫浩無首起視桃李樹睽豔一非舊如何
揚子雲泯默空自守

又

朝出城西門孤墳何宮窿雄狐竄其西脩蛇出其東云
昔有狂士七尺才且雄平生無所賴屠狗涉春冬一朝
際風塵身貴位益崇死生好惡間咄嗟生秋風氣驕日
憑陵家國兩蒿蓬子孫分散盡空有牛羊蹤

又

翳歷楊柳枝蒙茸春草齊天天誰家婦采桑臨路岐零
露沾其裳蛛絲卷其衣樹高身苦弱蠶飢行復遲辛苦
事姑嫜宿昔減容輝見者皆歎息此心知獨誰良人日
莫至醉問爾何爲

又

啁啁田間雀啄啄常不給春水日已深網羅復相及既
無養生具日夕湯火急多謝雲間禽無爲自羈紲

又

祝融九千丈瀟湘地底流洶湧洞庭野崩騰江漢秋上
有飛仙人身披紫雲裘昔者嘗相遇渺若乘丹邱同歌
黃鶴渚共醉岳陽樓思之忽不見獨立悵悠悠

又

我有琅玕草欲贈江東客出門道路長卷袂空歎息靈

苗世所尙良士余所惜神仙無千年耿耿誰復識

又

五歲能讀書十歲能賦詩十五事遠遊三十無所爲
既乖俯仰責復爲隣里欺生計日已疎世態多瑕疵
煌煌金張門徒隸皆光輝日晏賓客集軒車如風馳
一笑擲千金片言委黃泥齊生獨抱瑟來往何逶迤

夢兩雛

阿英十二能辟纊阿牛五歲貪讀書辟纊成縷無人織
讀書有志令人惜汝父飄零汝母休吾親雖健俱白頭

雨聲斷道風驚屋阿婆獨抱諸孫哭

夢武昌

黃鸝樓前鸚鵡洲夢中渾似昔時遊
蒼山斜入三湘路落日平鋪七澤流
鼓角沉雄遙動地帆檣高下亂維舟
故人雖在多分散獨向南池看白鷗

遊麻姑山五首

并序

湖北憲使程公間居盱上二年矣五月二十日
詔拜翰林學士又十日公與使者及諸客同遊
麻姑山輒以覽歷所止賦詩五首

雲關

君子荷初服恩至若無榮穆穆芳雨散悠悠蒼山行危
關擁霧黑飛術緣雲青苔蘚滑如積杉松宵冥冥時逢
負苓翁忽聞流水聲舉足向益高矯然欲遐征徒隸各
忘倦矧彼高人情

飛練亭

神工擲天紳挂之兩崖間萬古輸不盡誰能測其端勢
割山石愁氣挾草木寒安得天風吹繫彼日月還麻姑
綠雲髮黝黝長不殘

湧雪亭

泉源出地底仰向雲中行
擘厓瀉千丈亂石皆騰淖風
霧日夜急雨雪虛空明不有神物扶茲山應久傾噴薄
側飛鳥砵鎗愁百靈僊家信爲好喧聒何由平

三峽橋

兩山東飛橋下塹不測淵誰開萬尋鐵逗此無窮泉淙
淙輓空曲洶洶投奔川陽光下照之忽作龍騰天常恐
桑田變中有瞿塘船

麻姑壇

嵯峨僊都觀遙望丹霞天後有千歲松前有百頃田風
日夏颯颯烟雲晝蔥芊羣彥一時集安知非列仙持觴
起相醕罷琴抗高言天道信悠邈人情何拘攣靈君不
可致落景詎少延仰雖慙冥冥俯實憂元元主人顧坐
客此中可忘年

盧學士奉旨南祀海嶽繇鍾陵相別聞尚宿畱會
稽有懷奉寄

鍾陵一分手幾日過錢唐五日山陰路千峰海上涼烟
霞含景氣草木識天香夙昔經行處風流轉不忘

病夜

素壁深窻獨客身
桃枝薑肸只爲鄰
極慙供給煩賢友
尙恐傳聞及老親
蜚響戒寒相應起
燭花連夜爲誰新
多情造物真豪縱
盡力相驅病與貧

得程翰林揚州消息

皇明屬休期側席佇貞良
游麟旣集藪鳴鳳亦在岡
君子乘時興出餞何輝光
車馬塞江介笳鼓凝羽觴
時秋風雨交四顧野茫茫
晨鉦激中流飛旆忽異方
蓄思遵旋軌浮雲紛北翔
道路間邦畿草木隕寒霜
曷景條易

流悲來但徊徨君懷經綸憂余負災疾妨騫沉固異趣
情誼結中腸居下衆所夷在賤誰不忘宛廬廣陵翰胡
獨置我傍鬱悵增愁思投袂睎莽蒼自顧匪茅茹委跡
任空墻淵淵賢達心悵悵情內傷

歸故園新居落成後作

親老身仍苦家貧歲更凶掄材斤斧後發地草萊中面
執看前跡歡呼集衆功聊存今日意敢望昔時同

又

漂轉何多歲艱難且定居隣人供菜果穉子進詩書稍

覺牛羊遠兼知蔓草除此園三百載亦復返吾初

山行

稍出羣山復涉溪溪光山色冷相輝青裙獨踞溪邊石
不顧行人自濯衣

寄題馮掾東臯園亭

時雨散繁綠緒風滿平原興言慕君子退食在邱園出
應當世務入詠幽人言池流澹無聲畦蔬蔚蔥芊高林
麗陽景羣山若浮烟好鳥應候鳴新音和且閒時與文
士俱消搖農圃春理達自知簡情忘可避喧庶云保貞

和歲莫委周旋

宿梁安峽夢故室有感時還盱江

梁安峽裏杜鵑啼絕壁蒼蒼北斗低雲氣倒連山影合
石稜斜鬪浪聲齊南風盡日迎歸客落月空江夢故妻
一室十人分數郡百年幾處候晨雞

送趙仲遠赴甌寧

仍爲令尹去如送武夷仙舊政閩人說新詩海客傳度
關風撤暑下瀨月依船不奪循良意應知幕府賢

山莊晚立有懷舍姪沆督獲臨川

歎歎黃桑葉蒼蒼白竹峰居人爭野碓歸客背村鐘路
暗緣溪湓山寒著霧濃阿咸收稻未辛苦闕相從

哭王十良仲

深谷可爲陵大海可爲田唯有死者窮無由覩青天千
古黃壤間萬古黃泉下精神與時息形質隨日化日落
朝復生月缺望已盈不知死者別何時見形聲悲哉復
悲哉已矣復已矣我友初五人今焉忽成四死者不復
見生者長別離人生如春花美好知幾何欲爲生者歡
復念死者苦死生日相尋歡樂如糞土

雨述三篇

江南臘月天未雪居者單衣行苦熱連山郡邑瘴盡行
豈獨領南與閩越通民穰穰度閩山十人不見一人還
明知地惡去未已可憐生死相追攀

又

近聞閩中瘴大作不間村原與城郭全家十口一朝空
忍飢種稻無人穫其言海上列城好地冷風清若蓬島
不見前年東海頭一夜潮來跡如埽

又

冬來一晴四十日三日南風當有雪不知閩嶺今何如
念我故人書斷絕劍南判官心所親甌寧大夫政有神
腐儒多事浪憂喜安得貽書兩故人

春莫間居寄城西程漢翁十五韻

迢迢曾城阿窈窕鳳皇山下有隱淪士能爲淮漢言兩
日一寓音五日一承顏每談經濟事恒及離亂間言辭
多忼慨文字少凋殘不歎東逝川但憶南山田寧與無
心遊不受衆目憐褰衣必峻嶢散步亦名園舒卷信在
襟蕭寂固所安經春僭疾痾撫時增懦孱羣書亂藥裹

高臥掩荆關。寒余屬久。要朝詣常莫還。醜劣愧高情焉。
知君所觀。日出衆鳥語。蒼岑滿樓端。申章寫深誼。謗薄
何由宣。

長風沙夜泊

長風沙風沙不斷。行人嗟行人。嗟奈君何。南風正高北
風起。大船初灣。小船喜移船。更近大船頭。不獨風沙夜
可憂。但祝行人好。心事長江何處是。安流茅屋參差數
株柳。時平尙置官軍守。青裙老嫗詫鮮魚。白髮殘兵賣
私酒。魚賤可買酒。可沽他人。心事知如何。

何郎失鏡詞

團團如月不曾虧
家人親置枕中時
朝朝將正頭上幘
時時攜鑷鬢邊絲
古文宛轉何人造
失來始覺今難討
街頭不直半緡錢
古銅終較今銅好
向人不敢再三尋
客裏空疑同舍心
萬里相隨一朝別
夜夜還瞻天上月
贈青城侯尊師次人韻

聞說名山采藥蹤
多從雲去少人逢
蜀江春老歸難定
燕谷寒來望轉濃
案上僊經新長蠹
匣中雄劍舊降龍
不知少日尋真處
還在青城第幾峯

贈友

天道有恒運君子蹈其常時物自熙洽庶心亦惟康鄙
人寡慮思殊氣冒陰陽霜霰中夏零焉得不摧傷先聖
有遺訓血氣戒方剛懿彼老氏言舌齒示存亡反躬實
明哲撫已增忼慷正德詎云割率欲乃非祥勿謂壘空
明不足輸景光勿謂徑寸莖不足載春芳推餘暨所闕
懷哉安能忘

曉出順承門有懷太虛

步出城南門悵望江南路前日風雪中故人從此去

京城閒居雜言八首

都城列萬雉樓觀切飛霞太液深蕩潏廣寒高嵯峨重
譯踰萬國流聲竟四遐旣寵瑰異才復保勛舊家忠厚
跂行葦明照徹羲娥永惟皇上德世世襲亨嘉

又

冀北多良馬漁陽多壯士馬休伏槽櫪壯士習農器桑
棗竟中州朝貢四方至外無烽燧警內有耳目寄消搖
放良時歡樂永不替

又

濟濟從臣內赫赫公與侯伊昔從我皇守邊瀚海頭荷
戈十餘載力戰如已憂寸策無遺用長智少淹畱勞多
必重賞功大靡輕酬意氣相傾動恩深身若浮天子乘
六龍垂衣臨九州茅土亘河山甲第隘莊堧四海仰光
耀出入擁華騶富貴歟如此寵祿信難侔從軍亦云苦
眷言享斯邱

又

朝從獵城南暮從獵城北白馬喻飛翰輕裘如膏澤塵
起知獸駭風高驗鳥疾隻箭落雙鶩千金出俄刻歸來

拜恩寵樂飲過一石僮奴增意氣賓客改顏色常恐文
法士輕薄多瑕擿高門臨廣衢秋風上荆棘

又

朔土高且厚民生勁而彊榆柳雖弱質生植益繁昌桃
李大於拳棗栗充餽糧誰謂苦寒地百物莫得傷青青
雲夢竹宿昔傲雪霜移植於此庭不如芥與楊竹性豈
有改繇來非本鄉

又

耿耿寒門士客遊燕薊城上無公卿故下無舊友朋裘

褐不自蔽舊食空營營四顧裁沴餘但聞號哭聲日負
道德懿敢懷軒冕榮節食慎所欲聊以厚我生

又

高步覽九州誰獨無與親同室不相喻矧彼途路人誘
詘更驅迫巧詐日眩真其美爲善樂莫知與善鄰未足
保厥躬已謂貽子孫一言易爲義一恩易爲仁世無魯
東叟何以慰心神

又

哀飈驚野草日夜委鮮萋嗟哉白楊樹高高凌元虛朝

遊車馬中夕息思故廬塵今難爲潔野性非京都貧賤
不自保焉能戀簪裾賴有死與生可齊賢與愚

去婦詞

江東有一士子畱都下三年適娶一貴人女爲
妻久乃知其已有妻子矣一夕逃去因託去婦
爲之詩非徒欲傳其事抑以示風戒云爾

輕合鮮義終苟容希禮遇遠結萬里昏多爲才名誤始
與君結好不知君有婦有女嫁他人俱懷託遲莫青青
牆下草生死牆下路娟娟道傍華零落無處所女子失

其身何以保貞素既乖百年意百年誰能度對鏡空悲
暗中心良難訴浮萍難爲託一木無兩附棄舊屬新歡
新歡漸成故寧當中路析莫被他人去寧老阿母傍不
受他人妬騰身出房闥兩絕無復顧所願嫁他人甘心
西山樹

四友詩

四友者廣信王庭鈺良仲臨川李商弼良佐武
昌廬廷鸞子儀同里熊坦從正也李亡已七年
餘亦亡二三年余索居京師每夕夢寐與四友

相接傷其皆賢而無壽又與余篤好迺作四友
詩一以志余哀一以槩見其平生云李得年二
十二盧二十九熊三十四王四十有九

三兄負奇偉十四已應門倉卒遘閔凶盜賊蔽邱原衰
經從伯父慷慨安其人豪橫劇狼虎瞋目莫敢干降心
相款密共稱孺子賢時應州縣役調笑官長尊酬接雖
靡鹽講習日多聞激烈忠憤際委曲禮法間時平俗益
康放志農圃言有集曰浮湖感龍變管汎彭蠡見龍見
圖課遂肆意墨龍悟解
絕負陟巘思鳶鵞古笛振哀鐵清琴繁素絃每傷古人逝

送淚尊酒前與我初識面已誓爲弟昆誰謂天不仁中
路遂離分寥寥昂山阿黝黝硯井泉賓客一以散託夢
與招魂嘉木不叢生猶爲造化欺繁霜凋其葉震風蕩
其枝利蟲齧其根飢禽啄其皮豈無雨露滋不得干雲
霓李氏年弱冠博通三氏詞援毫捷飛電吐氣裂豹螭
信如海上潮直若琴上絲朗如九秋月溫比三春暉志
在躋聖賢寧復顧所私一悟生滅理天地忽若遺君卒時一
日晨興有數道人叩門謁求作白蓮菴記君援筆而就
大爲得意有頃忽奄然坐逝父母聞而趨哭之迎謂父
母曰某兄弟幸多死生命也勿以爲憂旣瞑一道人撫
其背曰檀越檀越生好處生好處復瞪目視道人厲聲

日佛法本無生滅遂卒癸卯二月也
葬時衆輿出城初不能勝忽輕如羽
顏回蚤聞道短折
非所悲茫茫後死者中夜獨漣漣

又

武昌故舊中盧生亦奇傑雄才傲當世高誼凌白日貧
賤有相知富貴莫能折冠蓋如雲霧而獨與余密大德
七年夏予有長沙役臨河與余分攬袂久嗚咽知心託
生死誰能此離別千里竟相從風波復炎熱青天入杯
酒歌嘯中夜激便欲乘滄溟迢遙送華髮行行亦云至
終當與君折捨棹卽長途惆悵如永訣謂余平生懷時

俗莫能達學不追古人終不願有室還聞起分教小邑
傍蕭瑟始爲賢者哀那知遽淪沒樊山罷歡讌赤壁空
流月佇立想音形音形一何濶

又

親友日凋謝況我情所鍾熊子三十餘亦在九原中高
才祇促齡積善適爲凶天道不可依人命如飛蓬夢寐
常相見炯若生相從亦知心不異矧復里閭同始君掾
韶學我心實忉忉歸來已三年微疾竟永終薄祿不救
飢一官非高崇獨令君子亡碧血冷秋風鄰曲恩愛絕

山川談笑空名家失金匱樗櫟入公宮誰復繼粹溫徒
用想春容千秋瓘山路繚繞劍池東

賦雙陸

三五對參差高呼得采時猶疑雙出早每恨獨歸遲散
地偏難入全功或誤奇極知妨目力聊足審安危

泊安慶時再北遊

夜泊淮西郡寒生客子衣酒家臨岸閑野燒映江飛雲
盡月初出潮平風漸微前年城下路此際正南歸

漁父

夫前撒網如飛輪婦後搖艫青衣裙全家託命烟波裏
扁舟爲屋鷗爲隣生男已解安貧賤生女已得供炊爨
天生網罟作田園不教衣食看人面男大還娶戲家女
女大還作戲家婦朝朝骨肉在眼前年年生計大江邊
更願官中減征賦有錢沽酒供醉眠雖無餘羨無不足
何用世上千鍾祿

高郵城

高郵城城何長城上種麥城下種桑昔日鐵不如今爲
耕種塲但願千萬年盡四海外爲封疆桑陰陰麥茫茫

終古不用城與隍

濟州初度

辭家計日逢初度
遲日暄風在帝京
曉起慈親望天北
行人初泊濟州城

楊柳青謠

楊柳青青河水黃
河流兩岸葦籬長
河東女嫁河西郎
河西燒燭河東光
日日相迎葦檐下
朝朝相送葦籬傍
河邊病叟長回首
送兒北去還南走
昨日臨清賣葦回
今日販魚桃花口
連年水旱更無蠶
丁力夫徭百不堪

惟有河邊守墳墓數株高樹曉相參

雜詩四首寄彭通復

日月麗中天列宿爛昭昭河漢高且深烏鵲以爲橋寒
霜昨夜降時菊委嘉苗地勢西北雄終歲皆風飈元工
宰萬物時至有榮消常恐光景馳不得與消搖

又

區區九州內橫從數千里誰設山與河愚者分表裏京
師天下本萬國赴如水珠犀從南來狗馬繇西止浩浩
荆吳船日夜行不已生材無定所一物孰非已皇天仁

且廣君道亦如此我思古唐虞當日誰共理

又

巢由伏箕潁園綺居商顏洗耳甘自潔茹芝竟不還三
傑足爲理五臣安可攀高尙誠所貴孔轍奚獨環吾聞
有隱淪多在衡霍間飯牛腹長飢百結淒以寒懷寶羞
自獻邈然老空山

又

脈脈我所思彭氏躡遐踪婉婉若處子未曾出房櫳相
望四千里踰年闕相從五月君寄書九月達京中我書


欲報君書到歲已窮豈不懷繾綣無繇覲君容參差天
際雲縹緲乘朔風羽翼不吾施翩彼南飛鴻君有高世
行我無適時功天命人得違出處諒非同

柏堂詩

柏堂爲劉母熊夫人作也夫人有淑德年二十
五而寡守志不嫁有子曰觀又賢作堂以奉其
母請名於太史氏謂之柏堂而作是頌

鬱彼北堂言樹其柏其柏嶷嶷維木之特柏之始生于
彼高陵雨露其凝金石其貞柏之旣成鳳臆鸞膺言樹

斯庭霜雪是憑雪霜浩浩其柏矯矯有美君子而弗偕
老其葉欒欒其節桓桓其居安安永世式觀我堂旣構
我柏旣茂天錫眉壽保艾爾後



揭曼碩詩卷一終

番禺孟鴻光校

揭曼碩詩卷二

虞山 毛晉子晉 訂

獻張平章

天厯肇元朔坤輿集皇靈汴蔡旣榛夷南海淪炎精圖
書入天府將帥功業成寶玉被親懿茅土列公卿庶類
奮休祥羣賢基太平明公紹鴻烈文采敵華聲出入三
十年惕然心靡寧論兵體安危攬轡思澄清矧宅股肱
地夙夜在王庭名高德益難位隆責匪輕聖心誠宏裕
臣節美戰兢唐虞登夔臯堯舜猶日升周召竭師保成

補景石詩卷二
康措王刑昌明願同濟拔筆播芳馨

題祝道士龍虎山先天觀圖

聞說先天觀重重絕壁環鳥啼青澗裏花落白雲間樵
子能長嘯居人識大還洞門無處認唯有水潺湲

二貞詩

關右有姬氏者父子皆蚤世姑趙婦張皆以年
二十五而寡守節不嫁作二貞詩

關右有姬氏父子蚤棄捐孀婦奉寡姑誓死各芳年膏
沐誰復理羅襦委篋間辛苦事蠶繅祭祀亦靡愆父母

既莫奪媒妁徒空言鳬雁安所施幣玉視如烟寧與枯
瘁沒不爲歡樂存婉婉桃李花春鳥何翩翩萬物各知
時姑婦獨纍然

史館獨坐

地寬天逾近風高午尚寒虛庭松子落歌檻菊花乾撫
卷俱千古憂時有萬端寂寥麟父筆才薄欲辭官

周待制致樂堂詩

有堂渠渠在番之區維周壽母式燕以娛渠渠有堂在
番之陽維周壽母式燕以康斯堂何有有蘭有芷垂佩

樂樂維周之子斯堂何有有蘭有蓀垂佩申申維周之
孫曰烝曰嘗孔時且具維甘維旨承于壽母母曰寧只
福祿凝只升斯堂只我心平只母曰嘉只福祿遐只升
斯堂只我心和只

馬氏巖溪圖

何處幽巖下復有清溪瀉霧氣散長林湍聲落平野石
宜白鳥憩樹想元猿把誰獨此安居居人云姓馬

山水圖

幽人無世事高卧謝浮名山崦晴時出溪流盡處行還

聞有漁釣相問扣柴荆不掃門前路莓苔滿地生

送道士薛元卿歸江東

知君此去漸難招只在人間已廓寥市上有時逢賣藥
山頭何處覓吹簫仙巖華落溪流滿鬼谷雲開對影遙
未必故山安隱逸海天涼月夜蕭蕭

大明殿退朝和周待制

巍巍道德拱羲皇濟濟威儀陋漢光日射龍文宮女扇
風傳雞舌侍臣香中霄景氣浮雙闕下界歡謠動八荒
詞館小臣何以報皇圖聖壽與天長

祖生詩

浦城孝子身姓祖自憐性命如糞土生纔五歲遭亂離
有母更被官軍虜零丁二十八春秋母縱得生何處求
天地茫茫明月恨江山漠漠白雲愁忽得母書驚母在
看書未盡淚先流書云流落河南縣河南踢遍無由見
唐州境上忽相逢白髮蕭蕭霜滿面誰知喜極情轉悲
旁人更問初別時千生萬死到今日始爲母子東南歸
東南迢遞閩山路入門猶記階前樹居人傳說盡相看
雞黍提攜竟朝暮祖生母子真可憐少壯離別老大還

同時鄉井被兵者幾人骨肉能生全願生母子長壽考
四海升平永相保

孤雌行爲鄆城節婦作

有鳥有鳥雌雄相追哺雛未飽鳴且飛雛未長雄乃死
子亦隨朝朝暮暮唯孤雌長林廣野風日美步步不敢
離故棲燕雀搖颺差復池迴身側腦遞相欺誰憐孤雌
心到死終不移更有許州鄆城徐氏母一生抱恨守空

閨

燕氏救兄書

千金之子不死市楚人竟殺陶朱子生者可殺死可生
千金爲重骨肉輕誰謂平陽有燕氏傾家乃出而兄死
弟再有兄兄見弟里閭驚嗟官吏喜嗚呼安得天下之
吏廉且循庶政如水無冤民

送華尊師以天壽節奉詔祀武當

靈時嚴漢祠神峰標楚甸羽人丹丘伯承詔馳嘉薦華
渚曜玉虹條風舞元燕長淮雨中瀉喬嶽雲間獻涉旬
厯峻趾梯空蒼宏願授簡香始升揭虔帝如眷天清翼
軫動地肅元武見飛響迴更聞奇祥靜逾絢是中有真

侶蚤接諸方援胼胝負畚鍤鑿翠蓄雷電金芝產齋房
靄雲冠巖殿祈禱無歲年會節方紛衍旣協時君降又
樂明祀徧聖厯齊堪輿豐澤周寓縣還歸報天子獨往

奚所羨

眞侶謂張眞
人有道行

送馬雍古御史撫諭河西

我皇屬憂顧君子得安居孟春風且寒遺子以修途四
牡何翩翩廻首睇神都我懷正紆鬱殽函忽已踰積雪
被長轡奏者何時蘇歸彼蓮花峰上出浮雲衢白日皦
以縣下視若元墟煙塵起西北原野無定株行者中顧

懷居者念其廬黃河洶東流乃自崑崙渠四海豈不曠
切若肌與膚親賢遠讓入古以致康娛君子誠多材乃
用在馳驅秦隴阻關塞歲月浩已徂鞠躬盡明義足爲
世所模

送周山人之遼東

物變風已暄庭虛雪猶在每與君子違偏驚歲年改名
山先夢到靈藥隨方采明日望行人雲槎隔遼海

李宮人琵琶引

鄴縣亢主簿言有李宮人者善琵琶至元十九

年以良家子入宮得幸上比之昭君至大中入
事興聖宮比以足疾乃得賜歸侍母給內俸如
故因亢且乞詩于余遂作李宮人琵琶引其辭
曰

茫茫青塚春風裏歲歲春風吹不起傳得琵琶馬上聲
古今只有王與李李氏昔在至元中少小辭家來入宮
一見世皇稱藝絕珠歌翠舞忽如空君王豈爲紅顏惜
自是衆人彈不得玉觴未舉樂未停一曲便覺千金直
廣寒殿裏月流輝太液池頭花發時舊曲半存猶解譜

新聲萬變總相宜三十六年如一日長得君王賜顏色
形容漸改病相尋獨抱琵琶空歎息興聖宮中愛更深
承恩始得遂歸心時時尙被宮中召強理琵琶絃上音
琵琶轉調聲轉澁堂上慈親還佇立回看舊賜滿床頭
落花飛絮春風急

題上都崇真宮陳真人屋壁李學士所畫墨竹走
筆作

玉京灤水上仙館白雲鄉虛壁數竿竹清風生滿堂微
吟弄寒影靜坐佇幽香有客仍無事澹然方爾忘

集賢大學士趙國公王開府慶八十應制

昭代雍熙日詞林賦頌時紫宸丹詔出甲第五雲垂裕
廟青宮裏王公玉樹枝朝趨倍綺角夕侍接龍夔際會
真難及飛騰已在茲暴公初繡斧方叔更藩維霜簡驚
風采天官肅羽儀還迎代邸入竟被漢文知位望躋三
少權衡俯百司每蒙天黼黻直許國著龜鳳歛庶寒殿
龍舟太液池羽觴春侍宴玉座夜觀基德業前賢繼辭
華後進推高情希廣受餘事擬徵珪全道山河富瀛洲
日月遲九卿看綵服八表表龐眉皇覽逢初度殊恩介

壽祺黃封中使出玉食尙饗移國老陳嘉慶

李韓公作序

羣

工播盛辭禮非前代有施及老臣宜福祿何人竝忠貞
百歲期聖心誠念舊政用作臣規

陵陽牟景陽以名祖父之子孫負奇材勁氣而與
世抹掇自合州教授入掾翰林一語不合竟棄
不顧以詩爲別

奇璞別之媒娥眉妬之具悄悄君子心皇皇百王度高
風集大木日夜如吼怒不畏枝葉殘但恐本根蠹曉登
崇臺上天地一何巨白日光未吐羣星爛無數仙人五

雲車縹緲玉清路區區陰陽忠可望那可遇忽聞金鑾
客歲暮仍南去不得與之同頓足毛髮豎

結羊腸詞

正月十六好風光京師女兒結羊腸焚香再拜禮神畢
剪紙九道尺許長撚成對綰雙雙結心有所祈口難說
爲輪爲鐙恆苦多忽作羊腸心自別鄰家女兒聞總至
未辦吉凶憂且畏須臾結罷起送神滿座懽忻雜顚顚
但願年年逢此日兒結羊腸神降吉

劉承旨父大司徒邢國公慶九十應制

楊長石詩卷二

聖主尊賢遂及親
邢公盛事更無倫
身躋九表瞳方碧
兒過耆年鬢未銀
鳩杖乍頒寧畏噎
龍章洊拜欲忘身
上公建土山河富
光祿分壺雨露頻
析木天清雲五色
梁園花發月重輪

錫宴梁氏園

三宮寵錫驚殊數
四座稱觴

半老臣瑞錦爛熳迎
化日兼金條脫照
芳春素烟冉冉
晴熏上白雪冷冷
豔曲新先世勲庸
歸琬琰名家父子
映冠紳三槐已驗
移居日五柳翻如
寄傲人澗底桃花
曾閱世枕中鴻寶
自顧神詞臣欲繼
莊生作才薄何堪

論大椿

小孤山次韻

小孤山前一廻盼蒼然始識孤山面隔江疊嶂開翠屏
絕壁浮雲飄素練憶昔初蒙翰林聘艤棹探奇不知倦
捫蘿涉級至絕頂目極神開氣爲變大江東匯彭蠡來
晝夜崩騰犇海甸笳鼓遙聞日月動帆檣忽度乾坤轉
舟人不識造物奇但趣急趁南風便蚤悟微官七載縛
底用區區厭貧賤深窻冷壁守編摩何異揚雄困雕篆
重來勝地歲云暮短景催人疾于箭天昏一火明山半
石底猶疑有雷電彭郎磯下寒浪湧坐客正說龍君傳

人生可喜還可憐世事堪違不堪戀明朝匡廬復入眼
雖有此境何由羨武城先生獨好事名山每恨遊難徧
豐城客子無一錢但當作詩乞如願

贈別曾編修歸廬陵塋學士兄

孟冬涼風厲謁告歸廬陵阿兄在九原歲暮豈遑寧兄
昔事武皇海內希英聲意氣動人主文采何從橫時事
一朝異長揖去躬耕令弟紹芳猷策足在承明如何奄
忽間南北隔死生方舟發京國日落烟霧青萬感緣中
來惕焉如有懲羈臣戀魏闕一夕魂九升君子恩義重

况此骨肉情情深不可忘悠悠道路長山川日夕改我行殊未央稍出燕冀都已涉齊魯疆高天圍四野悵望但茫茫道傍多古墳塋域遞相當荒草吹北風日夕下牛羊不知何代人于此閱興亡自古既有死誰獨免摧傷死者雖所同私懷詎能已塗路猶感傷况我兄與弟世俗日衰謝常懼莫能起生者忽若遺誰復哀其死念昔賢哲人一一去爲鬼詩書捐篋笥采采當路子採藻廁明庭幸與君子同矧在弱冠年已獲承其風家本聖門後孝友世所隆何意手足親一別曠音容及我南歸

日舟楫復相從。皦皦寒日高。冥冥厲征鴻。落帆滄江際。
渺然忽西東。努力慎所託。無爲謬勞躬。

寄題臨川西礪范氏寓居

蟾塘塘更西。幽澗總堪題。流水花間住。孤禽竹裏啼。石
稜苔自合。山徑樹相齊。久客成真隱。故園應已迷。

尋舍弟將至東牢宿野店

歲暮尋吾弟。山行兩舍餘。入雲攀磴道。落日及村墟。茅
店溪邊冷。松林石上疎。如逢武陵客。風景未應殊。

贈王郎

王郎楚狂士意氣飛秋霜讀書一萬卷下筆數千行富
貴視浮雲况肯矜文章十五恥閭里掉臂辭故鄉夜宿
東海月朝買西州航瞋目王公前結客少年場一飲或
一石一醉或一觴寧揖屠狗人不與俗士當千金不易
笑歲暮單衣裳阮籍在窮途英聲連四方鸞鵠有時鍛
反愧燕雀翔世無劇孟交不及青樓倡燕趙如花人翠
袂黃金璫不識豪俊士空媚癡與狂王郎遠過我坐我
枯藜床終夕無酒飲撫髀歌慨慷平明別我去極目空
茫茫

沈逸人東觀招飲山館

野館青山下晴軒積雨餘
招尋蒙遠客寂寞愧閒居
空翠沾盃冷殘雲度谷虛
從茲結朋好隨處問何如

畫鴨

春草細還生春雛養漸成
茸茸毛色起應解自呼名

題聶氏陶軒

開軒南山下日對南山雲
青松俯前楹秋菊被中園
翳翳修竹林清泉出其間
歲晏農務息銜盃樂餘閒
時從隣曲游共稱稼穡難
達人貴知己俗士多所牽
以茲謝

簪紱委心此南軒列植旣敷榮佳興日以繁讀書教兒
子餘事焉足言

送涂雲章訪舊武昌卻入京師

垂雲厲驚風萬里摩高圓蟠泥鼓巨浪豈顧九重淵毛
生入楚庭穎脫俄頃間粲粲一公子長嘯起邱樊朝辭
豫章臺暮過匡廬山大帆割鸚鵡極目空波瀾黃鵠錦
袍仙吹笙紫霞端相顧一笑粲青春滿南天黃金築高
臺更覺郭隗賢聯翩樂劇輩相逐入幽燕平明九門開
劍佩踰五千豈無一字薦傾倒平生言東風杏花開待

我薊門前

歸舟

汀洲春草徧風雨獨歸時
大舸中流下青山兩岸移
啼木郎廟人祭水神祠
波浪爭掀舞艱難久自知

小孤山曉發和蔡思敬韻

日落霞明錦浪翻
崖傾石峭白雲間
乾坤上下雄孤柱
瓜蜀東南壯此關
神物夜移風動地
仙舟曉度月漫山
回瞻絕頂登臨處
空翠冥濛杳靄間

大信晚泊呈舟中諸公

千家楊柳江當門東梁西梁兩岸蹲連檣大艦集日昏
縱金伐鼓海上聞小江更出采石後前人立功後人守
大信花采石酒陌上相逢莫迴首

白楊河看月

白楊河上看明月昔人曾見今人別茅屋數家河上村
化作三山白銀闕波平風靜棹歌來萬頃沖融鏡面開
今夜江南憶遊子空瞻雲漢上昭回茫茫萬里燕齊路
北斗從橫泰階曙黃河東逝月西流明日南風過洪去
歌風臺和李提舉韻

萬乘東歸火德開
漢皇曾此宴高臺
沛中父老謳歌入
海內英雄倒載回
湯沐空餘清泗在
風雲猶是翠華來
穹碑立斷蒼烟上
靜閱人間幾劫灰

題嚴陵獨釣圖

何事元纁入里閭
羊裘暫脫就安車
空令太史驚同寢
猶把狂奴視報書
一出聊爲天子重
諸公莫道故人疎
朝廷自足中興士
且放桐江著老漁

題鼯鼠食瓜圖

種瓜中園予亦勤
止瓜長而實汝則殘
止雖則殘止予

敢汝仇天實汝生予將何仇汝食之甘既肆既閑實之
食矣無傷予根根存而微惟予之窮根盛而實惟乃之
功

坐信州僊源觀徐尊師乃元教大宗師張開府之
弟子也

元霜搗罷世都遺葛屨蕉衫太古姿天上真人開府日
山中僊子閉門時空林雨過金芝老深谷雲寒白鶴飢
萬里馳書爲永別盧敖何處定相期

送蔡思敬還豫章有懷遼陽李提舉

來日能同去不同獨攜別恨向秋風眼看亂葉渾無定
心與浮雲併一空黃獨山中歸自斲玉梅溪上夢先通
莫嗤畱滯京華者更有遼陽送斷鴻

孔林圖詩

集賢待制周侯能修禮于孔林侍讀學士商公
圖之史官揭傒斯詩之

峩峩尼山蔽于魯邦篤生聖人維民之綱尼山之下有
洙有泗有蔚孔林在泗之浹維彼聖人教之誘之凡厥
有民則而倣之維彼聖人覆之載之凡厥有民敬而愛

之既誦其言亦被其服孰秣其馬于林之側既誦其言
亦履其武孰秣其馬于林之下六轡既同周侯之東薦
之侑之聖人之宮其音洋洋其趨蹌蹌其臨皇皇聖人
允臧商氏圖之式昭其敬載瞻載思罔不由聖

壽櫟山詩一首爲吳真人生朝作壽櫟山其里山
名

峩峩壽櫟山瀕洞雲錦溪百里空翠合諸峯南斗齊卧
斲月窟桂坐聽搏桑雞臨深測地軸升高徑天倪陰厓
覆瓊藥陽岡敷紫萸縣泉聒空響飛樹凌風嘶側畏援

鳥墮幽恐漁人迷茲山不自高與人作丹梯赤松棲其
東王喬憇其西浮邱前捧擁安期後提攜神君領天官
出入黃金閨梅花照羽袂天書函紫泥歸期指松欒千
歲猶未稽餐和養靈源伏智掃荒蹊木公與金母大笑
彭鏗低

壽王副樞

七袞懸車兩府稀五朝遺老百僚師寒梅看足行吟處
舊史評來坐歎時身退已將心共遠名高轉覺世堪遺
且陪嘉客霑春酒政待武公歌抑詩

李將軍歌一首送李天民赴邵武軍口巡檢

李將軍材且武儒冠換得兜鍪去身疑南極老人星氣
食陰山雪毛虎雕弧白馬金僕姑天地昂昂此丈夫五
十方爲求盜使人生何用苦詩書寄言邵武諸官長不
是尋常一腐儒時中書以吏部儒選員多有十年不得
調者奏以爲閩廣諸道巡檢然多非其
人而天民式稱是選
老人星其常自喻

題桃源圖

江左龍虎山南十里有桃源者劉王二尊師所
闢也臨江范亨父爲之記余爲賦五言詩十七

韻

桃源非一處龍虎畫難同內外關踰鐵高低石作叢黃
旂青劍北紫蓋白雲東蟾影當霄迴蛾眉抱月弓

六峯名

千重藏曲折四面削虛空地戶吟風黑天池浴日紅雪
霜翻濺瀑雷雨瀉崩洪暗識猿啼遠晴聞鳥語工危龕
三井秘絕澗九橋通江合仙巖怒山連鬼谷雄劉王開
關後秦晉有無中時見看桃侶頻逢採藥翁丹臺寒漠
漠琳宇氣熊熊濟勝非無具緣源恐莫窮烟霞俄變滅
草樹杳龍葱四序何勞誌羣愚倘擊蒙誰言武陵近十

里上清宮

送人歸豫章

積雨霽徂夏故人今日歸手持毛生檄身著萊公衣玉
樹挂秋月丹萸楊曉暉東湖徐孺子應怪久相違

送王畱守宣慰荆湖

舟楫連檣出薊邱弓刀千騎入荊州歌翻郢雪寒暄變
恩逐岷波日夜流雲雨暝連神女宅山川晴繞仲宣樓
豈無賢士堪招隱應向鹿門深處求

題張尊師畫

晨登翠微天氣穆清白雲覆谷飛露垂纓孤後遠響衆
鳥嚶鳴牽蘿涉澗穿石度陁半巖華氣萬壑松聲神宮
漠漠靈戶熒熒投陰迹影叩寂求膺素髮老人笑而相
迎弗問弗承悟彼長生元玉流液瑤草結英浩浩奔泉
出與川平宛彼下人望我巖扃

送播州楊宣慰歸藩

祇奉綸言出夜郎恭陳壤奠入明光嘉名宜賜黃麾外
大宴恩陪玉座傍天仗影移低日月宮懸聲動下鸞皇
三呼拜舞君王德永共藩臣守四方

又

雙旌遙指洞庭西十乘聯翩度五溪
龍虎親軍兼使節犬狼諸獠入封提
光昭廟祐恩波遠風動藩維禮秩躋
北望五雲高魏闕亦知憂顧在黔黎

寄題拈蒼王氏東野二亭

畊雨

時雨布嘉澤羣物盡欣豫晨興集童僕
東野從所務鵠鷄應候鳴鸚黃翔高樹
衆草萋以出流潦被行路黽勉勤微躬
寧復當世慮義農不我侍沮溺諧所慕
食力隨

齊民常恐負空素眷言徇茲道卒此年歲莫

心遠

窮居豈余志無營得長閒翳翳三畝宅顧樂彼南山灌
木何蒼蒼雲鳥相往還已絕嬰世念况接仁里歡但願
黍稷登春酒恆慰顏羲和緩其轡萬物悠然安

寒夜作

疎星凍霜空流月濕林薄虛館人不眠時聞一葉落

送唐尊師祠武當

龍袞分香下絳霄羽衣承詔出清朝星臨翼軫南垂潤

神降虛危北極遙金殿壓雲開紫氣玉臺和月合笙簫
蕃釐更爲吾皇祝下國時豐雨露饒

送詹尊師歸廬山

香爐峰色紫生烟一入京華路杳然雲碓秋閒春藥水
雨犁春卧種芝田書憑海鶴來時寄劍自潭蛟去後懸
忽報歸期驚倦客獨淹微祿負中年

贈淳真子

蕩蕩白玉京超超淳真子十一求神仙服事邱與李嵩
洛二十載結茅白雲裏餐是暘谷霞飲是玉池水鬼神

莫能識百念吹不起一朝忽騰化徑去不可遮飛駟服
五龍角巾搖三花朝發扶桑國暮宿河漢槎朝食千歲
桃暮食五色瓜長揖青牛君高歌渡流沙還憩金陵邸
調笑許史家日食五侯鯖安得厭胡麻春風長安陌落
日邯鄲道迎人上青天送人入秋草竦身入極外天地
忽亦老寄謝區中人全真以爲寶

孤松篇壽王大學士

大地凍欲裂孤松高穆清橫睨泰華嵩俯察蓬與瀛天
風四浩蕩身與元氣并根深本自固霜雪空崢嶸白晝

甘露降半夜朝陽升飛枝蔭扶桑勁氣摩橈槍羣鳳所
託命百鳥徒嘲鳴冥冥廣寒宮丹桂亦虛生八萬四千
人何時月常盈維此天一柱千歲所養成自非堯舜君
工垂焉敢徵漢武作建章千門照西京掄材當此時餘
柯了棟楹天地既有此未必終無情蒼蒼歲寒心永世
仰堅貞

過何得之先生故居

五首

可憐古井門外依舊鐘樓屋西何處高吟痛飲黃華翠
竹都迷

先生有詩云一井當門凍寒光照
四隣又我住東街北鐘樓在屋西

又

心事巢由以上文章陶阮之間千古高墳保下白雲明

月青山

又

軋軋機聲日莫依依楊柳春柔膝下中郎小女曾聽唱

我高郵

先生常喜余高郵城詩相見卽呼高郵城來每相對酒酣則朗誦數過

又

頭上烏紗分贈篋中縞楮相驕不道別時長別誰知愁

是真愁

延祐五年冬十月余南歸以巾材一段見贈予以白楮被報之別時殊黯然也且手書其三代

名字授予若
有所屬然也

又

屋上青天未老門前白日常新他日咎夔稷卨安知不
是斯人

送譚仲章歸長沙

君家雲陽下忽向雲陽歸行路有南北看山無是非三
湘迴雁盡孤劍白虹飛亦欲投簪去從君采薜薇

我我亭詩

殷仲堪答桓溫曰我與我周旋久寧作我宜春

黃元瑜取以名其亭曰我我爲賦詩一首

我游于袁于龍之干有闢閑閑有環言言有構桓桓維
集之安我居我處我笑我語有翼其所而敢予侮我植
孔嘉我構孔華曾莫之迎而莫我多彼馳者子亦孔勞
矣旣我覲矣亦莫我述矣嗟殷氏之老猶弗桓是友我
不我友將誰歸咎溫溫其和瀏瀏其清藹藹其芳煥煥
其明嗟維古之人尙或予聽

送鄭司獄歸衢州却赴調京師

壯年執戟事明君一日上書天下聞不恨棲遲百僚底

猶堪激烈萬人羣
爛柯山遠迥孤棹
析木天清望五雲
盡說于公有陰德
掉頭相別大江濱

題山水

野艇來無數
山橋度有三
寒雲依古寺
落木帶羸驂
迴首重重變
幽尋處處堪
平生雙眼力
江北復江南

題御馬圖

朱纓金絡轡
黃帕錦鞍韉
神閑意更逸
初下赤墀前

題山暉圖爲劉尊師作

陵岑毓神秀
草木咸光晶
每覽靈景異
變態如有情
閑

掩乍如羃飄浮忽相縈熊熊轉空曲奕奕連增城中有
幽人居燕坐朝玉京窮陰亦朝徹無月恆夜明碧桃千
歲花金芝四時榮猶疑地愛寶隨物弄華英

題臨江同知問流民事蹟

江北流民七十口三十餘年在江表朋凶結惡四百餘
白刃差差厯村保崩騰所向如投空白晝攫金都市中
頃由南昌入豐邑反賂守者爲先容長官坐堂寇入室
妻子莫逃况金帛豈無鄉民敢相敵長官一揮翻辟易
臨江貳守廉且武手縛其渠散其伍豈惟鄉民得安堵

鄰境聞之皆鼓舞其渠在獄伍放歸大府上功民俗熙
乃知一念敬厥職萬事至難皆可爲人民社稷我所有
安得坐視如雞狗人在雞狗猶愛之民社豈在雞狗後
請君看取臨江守

寄題朱氏真村堂

深居魏亭北悃悃自無華風俗似太古生涯如小家飲
醇猶恐過衣帛尙疑奢相與鄰人異詩書有五車

送人從軍

妙年好文仍好武一旦從軍氣如虎彎弓已作滿月圓

拔劍更逐迴風舞悲笳四起旌旆愁蒼山偃蹇黃雲浮
陣前手繫降王頸馬上仍懸猛將頭復誓義大身命小
順天將軍古來少一戰功成六合清不用黃金印如斗

題淵明歸去來圖

清江皮使君治南恩有惠政一日自免去而歸
老焉廬陵王實初賞其高節以淵明歸去來圖
求中朝學士大夫賦詩還以爲壽僕用其意賦
五言一首

吏事久見牽山澤曠游盤茲辰理還策乃得從所歡悠

悠川塗迥忽已造郊園風景一不異鄰曲皆奮觀童稚
識人情奔走向我前荒草雖誕漫松菊了不干睠焉循
初服常恐負昔言入室多美酒步庭嘉樹繁曠然心神
舒誰謂世路艱出處各有道旣倦當知還方春農事興
念之每忘餐貴賤豈不殊樂此農圃安堯舜垂衣裳巢
許箕潁間漢祖除暴秦黃綺在商顏彼皆賢達士今古
胡不然永與簪組辭婆娑養餘年昔聞陶彭澤今見皮
南恩千歲仰高軌茲圖良足歎

揭曼碩詩卷二終

番禺孟鴻光校

揭曼碩詩卷三

虞山 毛晉子晉 訂

題明皇出遊圖應制

明皇入駿爭馳道還是開元是天寶
長安花發萬年枝不識韶華醉中老
奎章閣下文書靜袞衣高拱唐虞聖
莫言此畫徒爾爲千載君王作金鏡

送孔學文赴大庾巡檢

三孔諸孫紫綺袍俄辭俎豆事弓刀
舟行揚子金山淺路入梅華庾嶺高
正爲凶年憂盜賊仍嗟微祿誤英髦

乘田委吏唯求稱一命猶堪愧彼曹

送李都事赴湖廣省幕

堂堂李通甫起家掌邦憲直氣橫九秋神明激雷電再
登蘭臺上愛國心靡轉時當至治未有位日兢戰崩騰
五華山鑿翠起臺殿執筆佐御史力諫明且辨斧質已
在前獨立目不眴駸尋國多故災異周八埏君復贊宣
政赤手握銓選守法踰天宮反得官長怨我皇奮江漢
撥亂啟天眷乾坤再開闢日月重昭絢磊落收羣材疎
戚共登薦君名一朝起亦作丞相掾丹心益傾竭婉畫

勤替獻好惡古難同禍福巧相禪天子憂南紀藩宣必
時彥下逮曹屬微簡選亦精練君得南省佐聞者盡驚
羨偃僂辭闕庭飄搖出畿甸餞送盈路衢懇款陳志願
去年天下旱窮蹙無貴賤賑卹當及時本末須竝見方
春農事興不廢乃爲善又聞南中賊憑陵及州縣黎獠
本吾民撫綏在方面恩信足以懷逼迫使生變况我聖
天子轍迹昔所徧勗哉籌策良無使空蹂踐京城雨初
過草樹鬱蔥舊喬木多蚤鸞高堂有新燕煩辭君勿誚
君歌我其抃

畫鷹

文梁五色條秋高意氣豪怒張兩目直霄漢豈與短翮
翔蓬蒿妖狐畫作猛虎嗥騶虞并與神麟逃嗟爾飽食
心空勞

題張使君棄官學道詩卷

至元天子朝萬國任邱使君謝病歸門前未罷車馬客
身上已著朝真衣致君堯舜在豪傑洗耳巢由何是非
棲雲觀裏青松樹唯有白雲終日飛

送戶曹掾于孔昭赴南臺掾

于君高材世難遇東曹未滿南臺去風雲在足那得辭
天地生人豈無故乃翁十年佐臺省一心用法惟平恕
君今豈必求多聞過庭一一皆可度南臺所臨十憲府
可詰寧惟在臧汙五方之俗有淳漓萬事無憑生愛惡
莫令水鏡惑妍醜長使陽春伏霜露扶綱樹紀須自治
護惡含姦適爲蠹況當海內歲大侵父子相殘莫之顧
郡縣非無賢守宰貪卽爲能廉卽妒願君努力事匡贊
臺端鶚立皆碩輔多言欲悔已莫追白髮蕭蕭歲年暮

寄題胡氏園趣亭

日與世情遠學人聊治生畦蔬多品類樹果各生成野
老過偏數山禽近不驚詩書吾所好農圃也須明

題文瑞圖

常德之龍陽居多蜀士祠事梓潼君甚嚴祠前
有池曰景星咸淳癸酉蓮兩葉竝蒂者六劉初
登進士第延祐甲寅兩花竝蒂孫以忠登第天
曆己巳華如甲寅城東三雅湖蓮復三華竝蒂
海魯丁獲獨步丁馮天澤聯貢而獲獨步丁登
第好事者寫以爲圖邀余賦詩

蓮華復蓮葉竝蒂更連莖竝葉已不見三花兩花更有
情如何與人作佳瑞偏向龍陽水底生龍陽家事梓潼
君華華葉葉梓潼神好語龍陽士汝但讀書更績文爲
華爲葉汝莫論

題南頓孔氏復明詩卷

失明非有故復明還自然方其失明時萬事俱棄捐外
雖無所睹內則常淵淵如未嘗有目不喜亦不憐如明
入地中明未嘗不全逍遙天地內如在天地先不助亦
不忘一氣自周旋不敢計此生敢計時序遷剝乃復之

始自坤還至乾忽如浮雲散還我蒼蒼天昔非果失之
今亦固有焉如何孔氏家母子仁且賢先後俱失明其
復皆十年十者數之終如月晦必圓養之苟有道何疾
非所痊願言永保之母或忽此篇

奉同柯博士甘內掾下直賦

暮出閭闔門解鞍坐前庭泠泠草露白華月隔林生蟀
蟋奮哀響鴻雁流遺聲常恐芳景晏不知寒節并萬物
肅將斂孤懷徒自盈捉衿激長謠淒烟涼難聽

賦得海上雲送良上人歸徑山

蕩蕩無邊涯悠悠何所之孤飛若有意羣往更無疑稍
拂樽桑樹還經若木枝迎陽成五色乘陰忽四垂作態
離仍合多情去卻追因風過別島和月下蓬池且任從
龍去寧知到岸時惟應學空者澹泊與相期

吳子高悼亡歸岳陽

都門落葉滿遊子去京畿忍聽離鸞採遙逐秋鴻飛愁
霜曉入鏡淚雨夕沾衣烟樹黃河岸風帆采石磯平沙
迴渺漫寒雨暖熹微客心閑轉切鄉書近却稀夢聞兒
女泣行將童僕依竊慕漆園放誰云潘岳非乘濤慣不

險迴江望若圍武昌未易到更向岳陽歸

秋夜作

露下氣逾肅月高寒欲流落葉階前樹疎鐘城北樓衰
年對急景歸心臨暮秋當世非無意才薄徒淹留

進士張于高得邛州判官歸成都

邛竹山前負弩迎去年曾是一書生天寒劍閣猶車馬
雪滿繩橋正甲兵卽恐徵求民力竭莫將憂患客心并
六千餘里關河路不盡深期遠別情

題陶淵明歸興圖

家貧無酒飲聊欲試弦歌去家百餘里貌若異山河江
上日多風浩浩冰增波門前五柳樹繁蔭空婆娑林田
已收成歸計當如何

寄題傅尊師兄弟所作寧壽道院

鍾榮之山千萬峰琵琶塵湖相疊重雨翁入谷起臺殿
半夜空山聞鼓鐘猛虎如逢澗邊石飛龍却是雲間松
黃庭書罷人難見鴻寶披殘手自封度壑采芝隨鹿跡
登厓望日躡雲蹤已知塵世惟堪笑不是神人定少逢
辟穀有方桃更美園基無地橘相容但餘一念封人祝

未與人間萬事慵

二月朔日雪中題歐陽少監所藏宋好古畫竹

晨朝下延閣貽我翠琅玕微霜著節勁細霧入林寒欹
枝偏稱遠壓葉更宜攢孤石覆逾潤橫坡晴不乾況茲
春雪裏相對五雲端誤當裁汗簡誰擬截漁竿惟應湘
浦上歸共幽人觀

雲錦溪棹歌七首

雲錦溪中雲錦鮮好在高秋八月天西蜀錦江那得似
西湖綠水更須憐

又

纔過浮石是藍溪溪上青山高復低山中泉是溪中水
尋源直到華山西

又

藍溪南去到藍洲水底蘄蘄石不流迴望朱宮雲霧裏
白雲深處更高樓

又

宮前梨浦白茫茫岸上人家不似牆能到此中還有幾
行人莫一棹歌長

又

楊金橋望玉真臺臺下橋頭人往來崇文宮裏看華去
安仁縣裏賣薪回

又

挹僊亭下薛公橋紛紛抵暮更連朝唯有橋西楊與柳
無情長繫木蘭橈

又

溪上層層雲錦山垂楊盡處是龍灘不是孤舟來逆上
何人知道世途難

御書雪林二字賜趙中丞應制

聖主揮毫臨祕閣親臣執法坐崇臺祥雲五色從天下
彩鳳雙飛映日來政欲清如林上雪已聞聲奮地中雷
君臣千載明良會咫尺薇垣接上台

題胡虔汲水蕃部圖應制

沙磧茫茫塞草平沙泉下馬滿囊盛會於王會圖中見
真向天山雪外行聖德只今包宇宙邊庭隨處樂農畊
生綃半幅唐人筆畱與君王駐遠情

題辛澄蓮華觀音像應制

至人不可測，宴坐青蓮華。珠纓被玉體，白豪貫彤霞。從
何得此相，來置玉皇家。

杜節婦詩

結髮事夫子，白首以相期。諸宴方婉孌，生死遽分離。室
中無長男，堂上無老姑。生計日蕭條，誰分心不渝。良馬
不食羣，仁鳥不亂行。昔者爲夫婦，今忍遂相忘。生爲董
家女，死作杜家婦。安能若流水，東流復西注。春秋陳時
祀，蘋藻宿所供。一朝祭無主，焉得不忡忡。灼灼庭中花，
落落俱爲實。賤妾在空閨，志願從此畢。

題內府畫四首應制

韓滉土星像

五行土居中百獸牛有功土行降爲神騎牛髮翁翁有
土復有牛惟神賜年豐遙知韓滉意政與星心同

曹將軍下槽馬圖

曹霸畫馬真是馬宛頸相摩槽櫪下卓犖權奇果如此
豈有世上無知者朱絲不是凡馬韁天閑十二皆龍驤
曾從天子平四方畫圖仿佛餘驪黃華山之陽春草長

韓幹馬

韓幹畫出曹將軍幹惟畫肉尤逼真昂藏四顧欲飛去
老奚安知馬有神想當此馬未畫時朝刷吳越暮燕秦
頓轡長鳴風動地不數驂騑與騏驎當時用舍那知許
粉墨蕭條尙雄武千金駿骨何足論萬世長留羣玉府
宋徽宗成平殿曲宴蔡京圖御畫御記

東京諸蔡滿周行延福成平樂未央千畝松篁籠玉殿
九霄風露溼霓裳君臣契合同堯舜禮樂光華邁漢唐
明日圖成仍作記千秋畱與監興亡

送秘書李道濟赴峽州幕

蓬萊道山芸閣裏赤甲白鹽蓮幕中十載同朝君獨去
三年佐政我難同大河水滿中宵雨鉅野樹涼清曉風
夷陵江頭幾日到迎親應先南飛鴻

奉送全平章赴江西

聖主思南土明公起集賢直期凋瘵後其致太平年金
虎分符重文龍賜服鮮權綱兼將相標格近神仙天地
三江外星辰北極邊丹心齊出處素志在陶甄請述江
南事都非大德全但徼扶弱美竟坐抑強偏無復同憂
樂徒令舞智權平疇吹渤澥暗室伏戈鋌貪黷明相訓

忠良默自憐民心隨日壞世態與時遷况復兵饑接仍
聞疫癘纏誅求殊未已蝨賊轉相挺若擬寬憂顧先須
解倒縣久飢寧擇食多病但求痊一語堪懲勸微機足
轉旋已知平似水更道直于弦遙想聞公至渾如望歲
然九重天上別百丈霧中牽日月明金節山河入畫船
四方初息馬五月正鳴蟬豐樂田多黍生香灤有蓮岱
宗標魯地廬嶽壓湖天水恠收崩浪山靈掃瘴烟歡呼
麟鳳出踴躍吏民先笳鼓趨雄鎮旌旗覆廣川下車和
氣應袖手頌聲延膏雨侵淮甸仁風扇海壖忠貞真世

篤調變有家傳赤子皆同體蒼生且息肩龔黃須警策
方召在蕃宣

題青山白雲圖

蕭寥青山曉迢遞白雲生衆樹春已暗高原人未耕方
思看桃去復擬采苓行深谷無機事白髮枕松聲

桃華鸚鵡

嶺外經年別花前得意飛客來呼每慣主愛食偏肥才
子憐紅觜佳人學綠衣狸奴亦可怕莫自戀芳菲

趙孝子

廬陵趙孝子四歲父行賈一去三十年家惟大母母大
母已云沒而父行不歸兒長亦有婦母子聊相依從父
自北來汝父久已死母子哭且問父死何鄉里聞汝父
死時不知汝父處汝但欲往問京師多舊故再拜別阿
母行多至京師自念不見父兒死無歸時乃有曾老者
往昔與父善言汝父死處濱州利津縣徒跣二千里薄
言至利津朱琪張文輩一一陳所因死以某年月塋以
某木棺姓名某所題近在城南端城南冢累累翳然榛
莽中極目千萬冢誰能識其蹤行哭七日餘欲死不得

所生者無由知死者豈能語解髮繫馬鞍負之墳墳過
吾父倘有知髮解鞍自墮俄至一墳前鞍墮髮自解開
墳見前和題字宛猶在旣見父姓名痛絕心始安函骨
陳野祭禽鳥聲爲酸隣老四面來驚歎未曾有相帥報
縣官縣官駭之久卽日上大府大府咸異之次第聞中
朝行子正南馳行子行且傷哭踴如初喪路遙山川阻
何時至故鄉故鄉旣云至塋祭無遲禮母子永不離萬
事若流水聞者盡稱孝見者皆感泣期爾百世昌望爾
百祿集兒今一無願願母長不老歲歲父墳前灑飯墳

上草

題姑蘇陸友仁所藏衛青印

白玉蟠螭小篆文姓名識得衛將軍
衛將軍今何在白草茫茫古時塞
將軍功業漢山河江南陸郎古意多

廬山連尊師求真陽詩久諾而未作也
一夕夢中得之因書以贈

稽天之浸不可滅焦石之烈不可絕
香爐峯頭按羽節滿山桃華滿湖月

贈項鍊師

吾聞有一士邈在吳越間騎虎滄海上茹芝天台山年
約四十餘七星布其冠燕趙雖曠絕倏忽一往還樵子
常見之徑去不可攀又聞好賣藥往往在市闔疾者得
寸七立欲生羽翰吾常慕其人只尺限河關道書讀萬
過不如一承顏弱志揜昏氣卑卑逐王官何爲浪自苦
食息于人寰

送鄉人祐上人從師歸當陽

學道玉泉寺從師天子都流年春事半歸路客帆孤山
勢遙連蜀江聲不入吳故園如可到種芋有遺區

送蘇尊師歸茅山

華陽隱居者聞復有蘇仙時向梅花下高枕石頭眠劍匣出飛電琴心流暗泉閑來京闕下夜夜夢雲邊

寄題張齊公廟

東安猛將張齊公十八奪父軍囚中至元召募起亡命父子南伐收奇功酒酣一躍馬上立拔劍四顧奔雷風十年轉戰江漢上萬里直挽安南弓乾清坤夷四海一勲在旂常心帝室身封萬戶傳子孫誓不偷生汙天秩天下豐盛大德年天子明聖宰相賢小臣劉深射功利

上疏自薦能開邊鬼方寡婦號八百嫂叔操戈自爭國
劉深一言取大官遠帥官軍陵險阨五溪運糧數萬家
哭聲震動湖南北發徒開道徑折節旣勤其民大求索
斗量金珠谷量馬谿壑之欲安可塞此時張公亦在行
捐軀力諫皆莫克折節薄險伏四起劉深夜遁張公死
鳥飛不度山川愁坐看英雄化爲鬼乃知自古守邊鄙
大忌邀功貴寧救張公廟食東海頭劉深梟首蠻烟裏
張公世爲忠孝門劉深萬年穢青史兩家同死不同心
試與題詩作臣軌

題李安中白翎雀

白翎雀白翎雀每見灤河河上飛平生未識百禽性不
敢籠向江南歸

寄題楊教授菊莊

歸人種菊處乃在東海涯幽香發清真正色間奇葩百
種猶未愜千株寧足多寒分石橋月晴通赤城霞特起
表陰圯羅生騁陽阿門巷掩蒿萊荒徑絕經過飲露咀
其英孰知年歲遐

番易蕭性淵攜其祖將領所愛唐琴號霜鍾者還

自和林求詩六月三日五門宣赦後作

嵩州昔有蕭將軍讀書學劍天下聞南隨龍馬渡江去
尙有孤琴傳子孫孤琴云是唐人斲昔日軍中自行樂
至今猶存殺伐聲一鼓哀風振寥廓將軍之孫才且良
文能作賦武蹶張秦皇城下飲白馬祁連山中射白狼
時平好文不好武抱琴却歎儒衣誤昭王臺上看青春
彭郎磯頭夢歸路日長史館幽且閒正冠拂琴爲我彈
京城六月日如火霜鍾半夜鳴空山南風自有虞廷操
可惜同心不同調捐琴決眼望青天今日天門有新詔

送王伯循編修赴南臺御史

朝辭禁苑暮南臺
驄馬翩翩道路開
佐邑已知爲治最
經邦正賴濟時才
人情好惡非相遠
民力凋殘實可哀
鵬鶚秋天須搏擊
郊原恐有鳳麟來

寄題鄴下樊氏鍾秀園

鄴都雄地理樊氏好園林
庭戶花陰合池臺樹色深
佳時惟飲酒永日自彈琴
車馬如相訪流泉可洗心

題廖氏皆春堂

時清日月明心和
寒暑平東風扇萬物
花間語流鶯農

興水泉動蠶起桑柘榮牛羊被原隰麟鳳在郊坰少者
擊壤歌老者鼓腹行不知天壤內何物異吾生常願天
子聖四海無苛征夔龍滿廊廟簫韶歌九成

大駕旣幸上都率奎章諸生之留京者讀書宮南
史館中得大熱疾勢危甚項君子虛視之一藥
而起爲賦五言一首爲謝

天台項子虛乃是列仙僞賣藥都市中疑是韓伯休欲
見不可得不見忽相求神清骨秀聳蒼松倚丹邱又如
霜空月下照千丈流時有揭子者卧病城南陬馳往施

寸七大暑生清秋人言死復生仰視行雲浮長揖忽不見思之生白頭

周氏敖山驛水木清華亭

周家亭子敖山上斷隴連岡紫翠開晴日捲簾幽鳥下微風倚柱白雲來松間漁艇時俱放竹外樵歌晚獨回咫尺紅塵車馬地已如弱水限蓬萊

題趙照磨虛舟

剡木作孤舟乘風到處遊寧求觸無怒政用載能浮歸共唯明月行隨只白鷗浩然江海上何懼復何憂

送毛真人還龍虎山

手綰銀章主秘祠，翩然歸去忽如遺。
塵湖龍井雲間上，鳳曲鸞歌月下歛。
香逐蘅薇深更入，氣交梨棗靜偏宜。
南屏風雨平坡雪，爭似山中夢覺時。
南屏山在上都南
七十里，歲扈從至
上都，夏秋居焉。
平坡在大都西四
十里西山上，冬
春居焉。蓋皆所
掌秘祠所在。

故中憲大夫嶺北行省左右司郎中蘇公志道哀

詩

蘇公廊廟姿，推擇起爲吏。
論議動引經，舉措必由義。
惟時方大旱，謂咎在冤滯。
決獄天乃雨，凶年化豐歲。
流聲

滿山西憲府立羅致慷慨平生懷遂佐直指使受命按
邊鄙正色行使事邊臣既威服使亦免顛躓六曹收雄
材兩府資遠器激昂天下事往往見謀議十載拘掾曹
彌年困文字雖云富匡贊豈足盡材藝一命廁省僚勾
稽得深弊銓選班爵冗出入錢穀細竝緣出多門穿冗
肆姦利有如水上市驅去還復至因風一披蕩覓得免
蒙翳再命主賊曹持平獨不蔽恆求情中實動究法外
意功罪必誅賞善惡俱惕厲二命參宥密令聞益昭晰
和林跨大漠肇造此根柢東際瀚海頭西控流沙裔北

窮陰山外南倚兩都勢連營列萬里倉庾千萬計鎖以
磐石宗重以分省寄憶昔大德未成廟方厭世桓桓忠
獻王功大更多智武皇旣踐阼宮闕始清閼越邸矜微
勞寵極心乃異國有社稷臣讒乃惑聰睿遂輟股肱任
往重藩屏繫有威如雷霆有恩若元氣畊鑿比中土什
五相錯置士忘遠戍苦民見太平治道路無拾遺商旅
畢懷惠忠獻一朝沒武皇亦遐棄駿奔延祐中權相擢
天位磨牙吮人血掉尾恣狂獬戕賊骨肉親迫逐見危
墜天人共震怒降災及茲地大雪深丈餘人馬相枕斃

重爲朝廷憂夙夜靡寧志除吏超五等聞者盡驚避蘇
公拜郎中卽日辭九陞厚祿非所榮高爵非所貴彼民
亦天民安得皆坐視兼程到官所發廩急周濟死者何
嗟及存者再生遂閭閻漸蘇息竭力補黥劓飛書九重
天請爲兵民備募粟實塞下慎勿憚勞費天子賜問勞
名王致金幣至今賴長策當時已多忌如何方賜環及
國竟長逝都人走相哭行子爲歔歔崩騰朔風迅慘澹
浮雲曳蒼松拔其根黃鵠鍛其翅幸哉有令子名已注
簡記千秋常山下豪傑一揮涕

題羅稚川所畫臨川羅益謙溪居圖

遙遙臨川郡泱泱元獻里
溪上君子廬閉戶青林裏
連山烟景晏斷岸寒沙靡
日暮孤舟還荒村隔流水

寄題武寬則湖山堂

祝融九千七百丈六月飛雪灑洞庭
攸輿學者武寬則石鼓齋中窮六經
氣橫瀟湘波浪白思入嵩華烟雲青
四千餘里到京國倒插五色鳳皇翎
河西猛將今太尉一見握手坐廣庭
立呼愛子俾受業豈獨汝學我亦聽
猿肩虎頭日侍側長刀大劍羅青熒
動陳忠義破肝膽

衆目睽睽開心局丈夫乖遇豈偶爾縱不我聽我則寧
嗟予官冷材力薄每辱奇俊哀矜屢天晴風靜輒過我
如病得瘥醉得醒不爲湖山勞夢寐不爲富貴疲心形
始知卓識出天性豈彼狗苟蠅營營方今夔臯滿廊廟
洪恩婁降無濫刑長材用世何不可大夫列卿如拾瑩
君如得位立行志慎勿學我空星星我今老矣何所稱
白雲深谷寒烟汀

十月十八日夜南郊齋宿夢先帝召見便殿手賜
橘花一枝有感而作

淚盡烏號不可攀傳宣忽降白雲間人華拜舞君王賜
夢斷齋廬月滿壇

寄題上饒鄭氏菊莊

上饒多隱者鄭氏善爲方移居倪陽里種菊今成莊近
取徧吳楚遠求至帝鄉品類百十餘顏色不可常漑以
玉井泉樊以柳與楊晨興卽造之不憂露沾裳有時忘
飢渴餐之以爲糧門無催租吏家有白玉郎華前撫鳴
琴華下列壺觴興至輒痛飲飲罷卧其傍自謂得菊趣
不知與菊忘但恐秋景晏繁露結爲霜盆盛虛室中虛

室仍面陽重簾護夕氣疎牖逗朝光亂以青青蒲水石
儼成行重得隱者心不辱桃李場玩物焉足計歲晚託
餘芳

題四清圖

一清曰王右軍平生富事業獨以能書聞遂令吳越士
至今學者猶紛紛于嗟乎王右軍

又

二清曰軒轅彌明偶然吟石鼎狂怪使人驚遂令韓吏
部至今妄得狂怪名于嗟乎軒轅彌明

又

三清曰玉川子忍窮吟月蝕天高叫欲死獨對烹茶婢
白頭赤腳老無齒于嗟乎玉川子

又

四清曰林和靖周程明聖學韓范輔王政獨對玉梅花
山色湖光耿相映于嗟乎林和靖

題新安許氏蘭秀軒

蘭生兮深谷漱流泉兮蔭嘉木綠葉兮披披玉幹兮紫
蕤植之兮堂下播芳馨兮菲菲菲菲兮揚揚思君子兮

高堂絃琴瑟兮會友嘉有苾兮薦芳襲芳兮佩秀宜君
子兮多壽

夢題墨梅

霜空冥冥江水暮江上梅花千萬樹無端折得一枝歸
一雙蝴蝶相隨飛

寄題永豐劉氏暖翠亭

孤亭萬竹中危坐自生風近與山光合遙連野氣通鳥
啼深不見泉響靜偏聰束帛休相汙先生道未窮

又

雞山俯鶯溪亭子畫堂西流水芟蒲合陽林竹樹齊耕
桑烟外集賓客雨中攜萬事俱塵土詩成手自題

寄題信州德元觀何真人林園長春亭

長春亭榭倚雲開百里湖山入座來流水繞階時自照
好花如幄手親栽青雲每指尋真路白髮頻登望母臺
墓在
前山六月神龍起潭井人間幾處待風雷

題信上人春蘭秋蕙四首

深谷暖雲飛重巖花發時非因采樵者那得外人知

又

孤芳不作榦奕葉自含滋白石蒼苔路落花流水時

又

山深風露冷何處有華開直入雲林去香泂石澗來

又

幽叢不盈尺空谷爲誰芳一徑寒雲色滿林秋露香

蔡七祖真人得朱文公所書讀書二字以名其齋

請賦

今人題扁古人書孔李通家意未疏萬箇猶嫌栽竹晚
百圍曾見種松初黃庭義密從心得白髮身閒對客梳

近有方平消息否紅蓮成碧藕成車

送陰陽蕭教授赴瀏陽

青草茫茫接洞庭瀏陽江上好談經遙瞻紫蓋爲南嶽
仰見長沙是壽星日晏投書招楚客夜闌鼓瑟感湘靈
下簾高坐金錢滿賸買鹽梅寄在廷

賦得春雁送張郎中省覲揚州

東風吹歸雁離離翔天側朝發衡陽浦夕過陰山磧嘹
唳浮雲中萬里才一息眷言思親者相望有南北

送聶太祝赴潮州錄事聶天歷潛邸舊人

三載從容禮樂間，
糾曹新拜度梅關。
春風忍過金陵道，
夜月重經黃木灣。
盜賊數州相應起，
甲兵諸道幾時還。
憑君細講安民策，
莫遣邊防一日閒。

題俞氏看雨軒

慘澹來何處，崩騰忽滿城。
遙連四山黑，近灑半江明。
可愛華間溼，偏宜竹上聲。
中宵未可住，高枕寄餘情。

題江道士清虛館

遺紛極元覽，宴坐白玉京。
日月朗朝夕，河漢流無聲。
冉冉兩玉童，雙吹紫鸞笙。
下視九九州，浮以四大瀛。
萬劫

猶一瞬逍遙樂泰清

賦得吳歌送人歸吳中

三月酒如澠高堂絲竹停繡筵雙鳳影珠箔亂鶯聲疊
應紅牙拍辭傳金縷名絲雲低不度芳塵暗自驚花發
長洲苑日照闔閭城且奉千金壽寧忘萬里情


揭文安公少時撰功臣列傳見推於平章李君晚年以遼金宋三史爲已任詳論作史之法未卒業而告殂會稽楊鍊崖作文偕張伯兩李孝光輩祭之于孤山之巔同控天靳斯文之歎謂史筆不再


見也至其父子自爲師友君臣相爲親重及以蠲
俸金一事見德於富州本傳已具載矣海隅毛晉
識

揭曼碩詩卷三

終

番禺孟鴻光校







道光丙午鐫

青藤書屋集

海山僊館叢書

燕山劉韻書

青藜書室集

卷之四

PL
2451
P29
459

徐文長集序

元美于鱗文苑之南面王也文無二王則元美獨矣余
衣青衿揖王李於藩李長鬚而修下王短鬚而豐下體
貌無奇異而囊括無遺士所不能包者兩人頗偉之徐
文長小銳之湯若士也徐自詭江淹遺湯藻筆意欲包
湯湯不應徵余牘余亦不應囊空無士而晚乃包瓠肥
之袁中郎所謂桓譚者矣往余開龍月玉文之館中郎
與陶周望偕來啖以珥食有楊家果中郎揉梅染珥其
章赤白因問袁世文章誰爲第一陶睨袁匿笑曰將無

語長孺徐文長第一耶袁曰如君言豈第二人乎且讓
元美家鈍賊第一耶偶諸生耳屬壁衣各駭詫聲稍稍
出衣外袁起大索此有賊黨可急逐之令僵死中原白
雪中余始知文長囊有此士奉文長居然南面王矣當
是時文苑東坡臨御東坡者天西奎宿也自天墮地分
身者四一爲元美身得其斗背一爲若士身得其燦眉
一爲文長身得其韻之風流命之磨蝸袁郎晚降得其
滑稽之口而已借光壁府散煒布寶四子之文章元美
得燔豕用膠之法若士得供石作字之法文長得模書

雙雕並搏之法而中郎得醞釀真乙酒之法取以調劑
諸子獨推文長文長遂爲第一迨評選傳真爲第一矣
無聞而駭詫者矣第燒猪了元和墨潘衡不甘僵死藉
令展天屏遮天溷接文長之末光亦十六星之分身也
異日穎出於囊有利無鈍人各媚其主耳不乃有南北
朝乎是余之調劑諸子也奎形似履隻履不良於行文
行遠者也萬歷甲寅孟秋錢塘虞淳熙長孺父書於山
館

青藤書屋文集目錄

卷之一

賦

涉江賦

牡丹賦

鞠賦

荷賦

梅賦

前破械賦

後破械賦

畫鶴賦

緹芝賦

十白賦

有序

鹿二隻

兔

鵲

猴

鸛鵒

鸚鵡

龜四

鹿

鼠

黃頭

卷之二

樂府

張家槐

悲饗歌

歌風臺

四首

予嘗夢晝所決不爲事心惡之後讀唐書李堅

貞傳稍解焉

六昔

卷之三

四言古詩

鴈臺詩

土魯番貢獅

卷之四

五言古詩

與林玉兩上人登會稽最高山山出秦望上率
可五里玉公早有來歸之意因賦以止之
來晨憩廣孝寺

登秦望山

沿秦望溪水

秦望山東南下折有峰紫鐵色錯豎似花蕊土
人呼雄鵝突余贈名花蕊峰

海樵山人新構

二首

與楊子完步浣紗溪梁有懷西施之鄉

讀莊子

海上曲 二首

日暮進帆富春山

發嚴州舍舟登陸縱步十五里憩山麓叢榛遠

眺江中怪石

將至蘭溪夜宿沙浦

早發仙霞嶺

自浦城進延平

夜宿邱園喬木蔽天大者幾十抱復有修藤數

十尋縣絡溪渚

湑澹灘

泛舟九曲

武夷道士示予魏王子騫蛻首見紫氣

丙辰八月十七日與肖甫侍師季長沙公閱龕
山戰地遂登岡背觀潮

十八日再觀潮於黨山

蕭荷花祠

送明教往上海

寄善畫葛君

入燕

古山篇贈余君

贈陳君

戒舞智

寄彬中

答和公旦

雪

寄王子心葵

寄陶工部

筠石篇

蔣扶溝公詩

并序

柳浪堤楚頌亭爲溧陽史氏題

二首

昨見

偶也

狐粉

補屋

作松棚

理葡萄

刈圃

鼉磯研

問軍中之系於國用

避暑豁然堂大雨

哀駱懷遠公驗詞

野蠶

范母詩

白鵬

越王崢寺有僧歐兕蛻

子效索贈其兩叔

送章蒲圻之官

柳元穀以所得晉太康間冢中杯及瓦券來易
余手繪二首券文云大男楊紹從土公買冢
地一坵東極闕澤西極黃滕南極山背北極
於湖直錢四百萬卽日交畢日月爲證四時
爲伍太康五年九月廿六日對共破剪民有

私約如律令詳玩右文似買於神若今祀后
土義非從人間買也二物在會稽倪光簡冢
地中於萬歷元年掘得之地在山陰二十七
都應家頭之西尙有一白磁獅子及諸銅器
銅器出則腐敗矣獅尙藏光簡冢 聞有黃

兔窰

二首

送蘭公子

夜雨偕友人進舟雲門

天目獅子巖

燕子磯觀音閣

野火

鷹

馬

犬

狸

俠客

麗人

才子

酒徒

游大尖

空上人常住少林索作於菊下

宗孫有別字柱南者索賦

上冢

鸛攫鵲雛鷹黨翻然來救

感鷹活鵲雛事因憶曩衛衙梓巢鸛父死於弩

頃之衆擁一雄來匹其母母哀鳴百拒之雄

却盡啄殺其四雛母益哀頓以死羣凶乃挾

其雄逸去

設爲魚蝦所詰

天竺僧

煩吳伯子治墓堂

旱禱十七韻次陳長公

陳長公餉曰鑄茶瓦窰港銀魚白下法炮巨鼈
夜酌深談次其韻

修拄杖首修髮網膠漏磁壺及哥窰甌某亦病
隻耳聾次前韻

旱甚久不應禱再追前韻

送友人

送王雪漁北上

吳季子餉我細腰壺蘆石上芝

二首

大寒嶺啖新胡桃頻婆諸果

往馬水口宿煙麓陀庵

湘竹一妙管付截壞其頂文

口中

騶虞

曇陽 十首

卷之五

七言古詩

贈呂正賓長篇

三茅觀觀潮

陰風吹火篇呈錢刑部君

附書

楊妃春睡圖

雪

萬里比鄰篇贈嘉則

述夢 二首

今日歌

二馬行

送蘭應可之湖州

觀獵篇 并序

題侄子家所藏雙鳳鳴陽畫

畫鷹

贈歌者

對明篇

繼溪篇

北雲篇

賦得百歲萱花爲某母壽

楚宗室雞將啄蟻畫

沈刑部善梅花却付紙三丈索我雜畫

送陳君會試

天壇

十六夜踏燈與璩仲玉王新甫飲於大中橋之

西樓

六月七日之夕與梅君客生及諸鄉里趨涼於

長安街醉而稱韻得片字

摩訶庵拈子松下聽弦上人彈琴

謔雪

白鷗詩

握錐郎

星渚篇

無題

廿八日雪

題畫

鄭本白兔

沈叔子解番刀爲贈

客強予畫十六種花因憶徐陵雜曲中二八年
時不憂度之句作一歌因爲十六花姨歌舞
纏頭亦便戲效陵體用陵韻

予作花十二種多風勢中有榴花題其卷首曰

石醋醋罵座

蠅

王鷺亭鴈圖

畫百花卷與史甥題曰漱老謔墨

又圖卉應史甥之索

九馬圉人圖二圉醉瀕墮

完淳篇

閩工某摹伯時昭君下嫁圖單于親近之隨騎
士胡姬姬嬌而騎與單于竝獐健可畏鞞衣
結束文馬華旌及姬之靴帽竝妍絢可愛而
掌琵琶者尤勝胡决不辦此李蓋以意爲之

取悅人目馬三兄投賦賦之

朱次公讀書飛來山羣諺過訪攜飲塔顛方拈
六韻擬賦雨至踉蹌而下漫聞次之

崧臺醋

張旭觀公孫大娘舞劍器

書茅氏畫

附畫風竹於筆送子甘題此

漁圖

壽王生

沈將軍詩

春野圖

劉雪湖梅花大幅

洞巖入鼈口有石枰石橋及石池諸景

蘭泉篇

卷之六

五言律詩

銅雀妓

出塞

琉球刀 二首

西北 三首

桃花堤上看美人走馬

春日過宋諸陵 二首

孟后怨

竹月篇爲易道士賦

寄尙賓因借石磬

宛轉詞

湖巖氏有二女其翁以長者許渭繼室渭自憊

盟頃聞爲海寇斷其翁臂二女俱被執旋復
放還便已作宛轉詞憐之後知其長女被執
時卽自奮墮橋死幼女放還亦死因復賦此
宛轉詞中覆水句正悔愆盟也

順昌道中新晴

十六夜宿葉坊玩月

杜鵑花

古鏡

陳女度尼

金客

贈相士

分賦得吳山送俞君還巔

芸閣校書篇

飲雲居松下眺城南

送內兄潘伯海謁選

聚法師將往天台止其徒玉公庵中余爲留信

宿

省試周大夫贈篇罷歸賦此

豐吏部公邀泛西湖觀荷明日寄作令與嘉則

敘父追和

賦得戰袍紅

巖先生祠

白鵬

初入京瞻宮闕

來青亭

元旦與肖甫較射

季長沙公哀詞

懷陳將軍同甫

鈕大夫園林

送高叟入燕

背樹

賦得看劍引杯長

賦得暗塵隨馬去

賦得芹芽

鎮江

王山人丹房

仲春李子遂季子牙史叔考坐雨禹跡寺景賢
祠中醉餘賦詩並用街字子遂來自建陽一
別數載

法相寺看活石

侶琴篇爲趙子賦

寶刀詩

答謝上谷諸公

書箴贈顧鴻臚

王口北見遺貂帽因往

納妾詩

駿霞篇爲天台黃子賦

梨

杏

李

頻婆

胡桃

白櫻桃

土豆

薯蕷

鐵腳

黃鼠

半癡

酒三品

荔支
二首

熊

黃羊

河豚

送薛鴻臚左官袁州

雨

夕霞

三首

送某子北上

某君中貢選送之

人言鳳尾蕉花於某縣庭命作

壽葛貞母

乙亥元日雪酌梅花館

二首

初夏送某客入廣

賦得風入四蹄輕

四首

雨舟載鶴詩

元夕之辰偕友人集九里之天瓦寒泉二庵各

賦

并序

擬壽長春祠何老

京中送友人南歸

送蔡安父之黃州

與葛景文

畫紅梅

畫竹

筵中漫贈王良秀筆史

吳門逢孔將軍於塾

書倪元鎮畫

無題

賦得草窻篇爲周衛卿之號

食虎眼

蠨
五首

胡市歸

客餉我笋脯一小筐穉而甘澹擬謝

聞人賞給事園白牡丹

三首

化城寺

明日至古博嶺雨

京邸贈沈刑部

哀周鄭州浦

二首

曉發句容

送沈叔子南都迎母

送馮叔系之南都訪舊

景文至其舅劉所過園中

送俞生之入楚

張子錫往訪其弟長治

與任生話舊

送張君會試

挽上虞葛翁

授經館中懷江東諸同志

蠟屐

題雪景畫

爲陶工部贈道者

將遊五泄宿吳系山庄遇陳老迎餉邀余輩先

登峨眉不果

卷之七

七言律詩

君從

九重

白燕

一首

續白燕

二首

寄成女彝守備登州

送方阜民公子還歙

送通政胡君入閩

言游武夷道中撫景因憶往年尙賓呂君天台

之約

落花

泊閶門值閏月中秋

送葛韜仲

飲枇杷園贈某君東道

奉送同府潘公募兵廣東

十四夜

月下梨花

四首

新建伯遺像

夜酌遲友人不至

贈府吳公詩

并序

與客登招寶山觀海遂有擊楫岑港一窺賊壘
之興謹和開府胡公之韻奉呈

爲子微題鷓鴣圖

兩宿齊雲下憩逆旅夜大雪因復登眺

孫忠烈公挽章

下第回值九日登塢土山訪北庵上人

訪玉芝師夜宿新庵聞蕭女臣

往年觀伎走解意當是北產故綴四律首章用

北語今年復來知是金陵上元人又攜一少

伎同坐鐘上分鑑放體空中名曰童子拜觀

音乃昔年所無者

與王山人對語

乙丑元日大雪自飲至醉遂呼王山人過尚志

家痛飲夜歸復浮白於園中

飲太白樓

楊道人訪我于繫索詩

新秋避暑豁然堂

過陳守經留飯海棠樹下賦得夜雨剪春韭迎

春值雪

宮人入道

贈秦仲虛

宿長春祠夜半朱君扣榻呼起視月山缺處露

錢塘僅一勺而夜氣滃之

恭謁孝陵正韻

答贈盛君時飲朝天宮道院

中秋雨集金氏園亭次陳思立

十六日霽與張長治伯仲集城隅次長治韻邦

憲死

贈遼東李長君都司

許口北遺以綾帛綿三物題曰袍具作詩謝之

小集滴水厓朝陽觀

徐州

駕歸自閱羣望于衢恭賦

張雲南遺馬金囊

壽吳宣府

美人紅甲

禹陵

曹娥祠

露筋祠

馮刑部索書冊

送嘯上人之五臺

并引

集李侯宅得鍾字

燕子樓

送余興國

駕幸月壇羣望西街

九月十六日遊南內值大風雨歸而雪滿西岫
矣

送新昌潘公

將別復偕遊碧雲流觴枯柳之下

送朱使君太僕

李子遂死予設位哭之遂擊木而歌此

讀問棘堂集擬寄湯君

金剛子珠串

聞都督再遷山西武寧

自全道走居庸雪連峰百仞橫障百折銀色晃

晃故來撲人中一道亦銀鋪也坐小兜冒以

紅氊疲羸數頭匣劒笈書相後先冰氣栗冽

肌粟蟲蟲如南夏痲痺苦吟凍肩倍聳憊甚
矣却羸得在荆關圖畫中浮生半日

送丁叔子北上慰乃兄

代壽黔公

三首

亞夫墓

白牝蛟

并引二首

讀文信公仙巖祠集焚帛

二首

夜坐有感轉憶往事

香煙

七首

春興

八首

送季子微赴李寧武總兵之約

南鎮之南原桃樹數百花時余數遊賞當武陵
也道士苦打攪盡伐之憶以詩

二月望後連日夜風甚不減前年而是日二兒
書至

唐伯虎畫崔氏且題次其韻

吳宣府新膺總督

子肅再赴戚總戎所未至死於都下

紅葉

蘭亭次韻

送長洲居山人士貞

重修乾清宮成迎慈聖再御

五色鸚鵡黃鸚鵡竝是聖母所馴各賦四首

賞成氏牡丹和韻

王翁八十令書貞松白石畫中

姚崇明晚暎堂

清涼寺云是梁武臺城

壽馬先生七十

元夕寄金武康

寄上海諸友人

戊辰廿有四日尙賓時中宿於園夜大風雨冰
厚尺詰朝得子甘北報走筆遍諸友

玉師挽章

養生書成紀事與夢

某氏新園

送趙大理

綠牡丹

次蘇長公雪詩

四首

青州贈鼉磯研副以詩奉答

莫老至聾矣

八月十八日阿枳三江觀潮夜歸示

三首

戲擬不住

讀某愍婦弔集

擬弔蘇小墓

聞里中有買得扶桑花者

四首

今來自嶺海者云扶桑花也予昔所見殊不類
是殆大蘇所詠涓涓泣露紫含笑焰焰燒空
紅拂桑耳花家剪雙頭見寄始覺首四作之
誤乘酒漫成六首以贖差錯插硯水瓶嫣然
有笑語意豈亦憐老人之衰眊耶復取餘瀝
澆之當纏頭耳滇蜀村歌云披蓑衣打杖頭
鼓風流在何處予擬答鄉諺云雪落長江裏
依舊化作水何不落則雨却要是個底不知
花神有知作何平章夜見夢云叟所謂黃連

樹下彈琴也 六首

寄吳通府以墨見寄

魏文靖公卮貯以梓匣輒賦

某君見遺石磬

賣貂

賣磬

賣畫

賣書

長至次朝

岳公祠

某君生朝抹牡丹爲壽

十月廿二日園西櫻桃數花便有蝶至

二首

訪李岫巖山人於靈隱寺

九月朔與諸友醉某子長安邸舍得花字

某伯子惠虎丘茗謝之

桐鄉馮母

畫魚旣作古詩矣久之復得七律

擬送巡滇者

二首

過伯升宅玩骨董而菖蒲尤盛魚有紅色有藍
色有玉有錦俱三尾如鼎又有水晶四尾者
雪中移居 二首

送婁某丞丹陽

錢王孫餉蠓不減陳君肥傑酒而剝之特旨

答嘉則

詣五洩驢上口占寄駱懷遠

九流

雞聲

蛙聲

聞有賦壞翅鶴者予嘗傷事廢餐羸眩致跌右
臂骨脫突肩曰昨冬涉夏復病脚軟必杖而
後行茲也感仙癰之易賊羨令威而不皆橫
楊哀吟輒得二首

建陽李君寄馴鵬俄殪野狸信至燕哀以三曲
賦得萬綠枝頭紅一點

王鄉人等二十年之父櫬歸自衛輝合其母壙
賦得漁人網集澄潭下

十七夕

賦得賈客船隨返照來

書劉子梅譜

有序二首

送某之大倉

將牧羊庚戌元旦筮之得明夷之上六

元夕休寧道中遙憶鄉里

賦得清秋落葉

清風嶺

焦山

林先生遷教瀧水

讀易園詩應一仕人之索

馬策之奉母住鳳凰山下之水樓

狐裘

歲暮夜雪拓二王詩人薤果小飲

卷之八

五言排律

宣府槐龍篇

有序

水仙

萬歷二年翰林院中白燕雙乳輔臣以獻進兩
宮並賞殊瑞聞而賦之

送史叔考讀書兵坑

觀浴象

和葛景文

抱琴美人圖

先除夕二日雪甚如嬰兒拳

畫坐草栗鼠

電

芭蕉花

子侯芳園王瓜駢秀傳聞遠邇快覩咏歌附驥

非才續貂聊漫

宴游西郊詩

并序

張氏子黃鸚鵡

後聞鸚鵡眼系直度兩眶人可洞視

題宋刻絲蓼花立鳥圖

丁卯六月十六日五鼓夢一憲公更訛予獄予

頗懇乞且歷數古人事憲公乃取片紙手畫

一白犬從雪中獵作題且曰汝賦得十韻卽
止予賦得十二句而憲公逡巡起予亦覺半
忘矣今續成之

卷之九

七言排律

上督府公生日詩

并序

奉侍少保公宴集龍游之翠光巖

數年來南雪甚於北癸未復爾人戲謂南北之
氣互相換似賈人帶之往來理或然歟邊塞

不易雨而今每潦十九韻

次夕降搏雪徑滿鵝鴨卵余睡而復起燒竹照

之八十韻

連雪後迎春憶舊十二韻

卷之十

五言絕句


題畫

墨竹杏花

四首

扇中雙蝶

蜂



白牡丹桃花

翦春羅垂絲海棠

石榴荷花

兩蝗蟲

又蘿蔔

回回馬

毛魚作隊游菱塘

畫

詠畫

春

夏

秋

冬

江船一老看鴈羣初起

似赤壁遊

石榴

竹染綠色

對岼觀嵯大瀑

獨釣寒江

閱書者倚老樹

雪景

魚鱗

杏燕子

寫竹答許口北年禮

寫蘭與仙華子

尖頭麻蟄

蒲桃

張氏別業

樂志堂

流霞閣

竹塢

青蓮島

小若耶

芙渠徑

浣花橋

水墨軒

桃葉渡 二首

六言絕句

村家飲

漁家圖

列子御風圖

卷之十一

七言絕句

贈呂山人

龕山凱歌 五首

嘉靖辛丑之夏婦翁潘公卽陽江官舍將令子
合婚其鄉劉寺丞公代爲之媒先以三絕見
遺後六年而細子棄帷又三年聞劉公亦謝
世癸丑冬徒書室檢舊札見之不勝悽惋因
賦五首

丙子亡十年其家以甥在稍還母所服潞州紅
衫頸汗尙泚余爲泣數行下時夜天大雨雪
將入閩方許二君餞別分韻

凱歌贈叅將戚公

二首

望夫石

宴遊爛柯山 三首

入武夷尋一線天道中述事 二首

雪中訪嘉則於寶奎寺之樓店

七里灘 二首

武林館中與徐仁卿同宿因贈 二首

趙君將買妾戲寄之

禪房夜話和韻書付玉公

折桃花

徐濟之攜新婦侍親揚州

徐濟之攜新婦侍親揚州

送丁子範

夏相國白鷗園 二首

竹枝詞 二首

閶門送別

予自浙抵新安登齊雲還浙道中旅館頗多奇

景而不成一字至衢自嘲一絕

寄徐石亭

乙丑春正月廿有四日與某等攜觴俎探禹穴

就十峰山人馬丈飲於小園林卉雲繁索得
海棠秧二本穿籬過別畦又掘竹母數根而
去時薄靄滃生山翠欲滴衆客怖雨輒爾拂

衣

送陸子之閩

留別倪子

天目山 三首

南海曲

嘉則擬紅衫四貌

春郊走馬

東山擁伎

秋江把釣

高樓對雪

燕京歌

七首

燕京五月歌

四首

自馬水還道中竹枝詞

乘霽自福田遍歷善應翠微洪光大悲諸招提
翠有石洞西夏僧兀坐其中自言至此可六

萬里齋罷擬游西湖輒止

上谷歌

七首

宣府教場歌

早渡銀洞嶺

胡市

邊詞

十六首

長干行

四首

鍾子投我篆章答此

擬往中止

菊

曹秀才

默泉篇

漫曲

古意

王元章墓

寄沈子

贈孫山人

山陽歌醉中贈魯君

挽陳君之配蔣

芙蓉死

麟并引 八首

漁鼓詞 四首

送林某 二首

設代林某答胡通政

雲州舍身臺

慕蘭篇

竹枝詞 二首

盤古社樹

托王老買瓦窰頭銀魚

買得一猫雛純黑而雄戲詠

五洩

二首

五洩霧

七十二峰歸來書寺壁

自燕京至馬水竹枝詞

寫扇與毬兒

嘉則衷緋而西

二首

過陳氏園看杜鵑花花高可十五尺餘郡中無

其比也

鏡湖竹枝詞 二首

上谷邊詞 四首

黃楊山 二首

秋熱更酷戲作扶桑女郎葵扇詩

無題

卷之十二

七言題畫絕句

畫兩僮枕帚而睡疑是寒拾應人索詠

畫高嶺莫行僧衆

應別索又一幅

白雲深山掘芝者

女仙彈琴

賦得奕仙

題王質爛柯圖

劉阮憶天台圖

二首

月宮仙子圖

賀知章乞鑑湖一曲圖

盛懋秋江畫董堯年索題

李子送小景

漁畫

二首

爲杭人題畫

二首

端陽題慕蘭雪畫

唐伯虎古松水壁閣中人待客過畫

題折花美人圖

抱琵琶偶竚蕉陰美人

王元章倒枝梅畫

畫梅時正雪下

題畫梅

二首

雲門寺題畫梅

竹

十首

寫竹與某

都門五月寫竹送某君之官新昌

勾勒竹

畫筍遺許口北

畫竹與吳鎮

二首

倒竹

畫竹

舊作竹與某復要予再作答此

寫倒竹答某餉

竹石

寫竹擬送友人之官長沙

初春未雷而筍有穿籬者醉中狂掃大幅

寫竹壽郁穎上

畫筍竹賀許口北得子

菊竹

水仙雜竹

荷

七首

畫荷花送陳都揮往招寶

畫荷壽某君

翎菊

畫菊

二首

牡丹

雪牡丹 二首

人有以舊抹牡丹索題者

遮葉牡丹

梨花 五首

題畫梨花折枝

水仙 五首

雪水仙

水仙蘭

葡萄 四首

王生索寫葡萄

杏花

雪粉團

畫石榴

榴

玉簪花

芭蕉

沈君索題所畫并賀人新婚

黃薔薇

木筆花

茉莉花

畫海棠

畫玫瑰花

青門山人畫滇茶花

蘭

松竹梅

大醉作勾竹兩牡丹次日始得題

作荷蘆於是日亦次朝題

芭蕉墨牡丹

芭蕉玉簪

芭蕉雞冠

梅桂諼草

枯木石竹


題畫

四首

獨喜萱花到白頭圖

題花圖

書花冊送王生



詠畫降龍

躍鯉送人

三首

魚蝦螺螄

題畫螭

松根醉眠道士一幅二首

雜品

柳渚雙魚

蘆汀鳴鴈圖

鳴鳥圖

畫布圖

書畫兔中有一白雉

郭恕先爲富人子作風鳶圖償平生酒肉之餉
富人子以其謾已謝絕之意其圖必立遭毀
裂爲蝴蝶化去久矣予慕而擬作之噫童子
知羨鳥獲之鼎不知其不可扛也雖然來丹
計粒而食乃其報黑卵必請宵練快自握亦
取其意之所趨而已矣每一圖必隨景悲歌
一首竝張打油叫街語也亦取其意而已矣

二十五首

朱太僕扇面花鳥

卷之十三

詞

寶珠齋飯罷筋響枕寂爲作一偈時宿東天目

如夢令

閨人纖趾

菩薩蠻

書唐伯虎所畫美人

眼兒媚

竹爐湯沸火初紅

蔣三松風雨歸漁圖

已上鷓鴣天

美人解

鵲踏花翻

畫中側面琵琶美人

鳳凰臺上憶吹簫

卷之十四

表

代胡總督謝新命督撫表

代初進白牝鹿表

代初進白鹿賜寶鈔綵段謝表

代江北事平賜金幣謝表

代再進白鹿表

代被論乞免得溫旨謝表

卷之十五

疏

爲請復新建伯封爵疏

卷之十六

啟

代奉景王啟

代謝閣下啟

代賀嚴公生日啟

又啟嚴公

賀兵侍江公擢戶書啟

代元旦賀禮部某公啟

謝督府胡公啟

啟諸南明侍郎

二首

答某餽魚

代賀張相公啟

代請胡總督啟

謝某

答某

上新樂王啟

卷之十七

書

與吳宣府

與季子微

答唐府公

奉徐公

答張翰撰

答許北口

答王口北

與馬策之

與柳生

與道堅

答李叅戎

與梅君

三首

答龍溪師書

答兄子官人

二首

與兩畫史

與許口北

與來大同

與季友

奉答少保公書

奉師季先生書

三首

擬上府書

擬上督府書

奉督學宗師薛公

論元門書 二首

奉答馮宗師書

答人問參同

卷之十八

論

論中一

論中二

論中三

論中四

論中五

論中六

論中七

會稽縣志諸論

地理總論

沿革論

分野論

形勝論

山川論

風俗論

物產論

治書總論

設官論

作邑論

戶書總論

徭賦論

戶口論

水利論

災異論

禮書總論

官師論

選舉論

祠祀論

古蹟論

卷之十九

策

問韓信破趙用背水陣其言曰置之死地而後
生置之亡地而後存又曰信非得素拊循士
大夫驅士人而戰故其勢必當置之死地使
人人自爲戰予之生地則走何前日石墩之
戰兵以臨水而大敗近日柯亭之戰兵登岨
卽舍舟以堅其死又敗將以爲不置之死地
耶則旣置之死地矣將以爲信之兵練習嚴
法而今日之兵不練習嚴法耶則信又謂驅
市人而使之矣用法同而勝敗異其故何也

代雲南策問

五首

卷之二十

序

胡公文集序

葉子肅詩序

送李子遂序

四書繪序

詩說序

送通府王公序

二首

送推府王公序

贈李都使序

陶宅戰歸序

沈氏號篇序

曲序

贈禮師序

肖甫詩序

元抄類摘序

二首

抄代集小序

抄小集自序

刻沛言序

陸氏譜序

李伯子畫冊序

贈吳宣府序

註蔡同契序

贈嚴宗源序

逃禪集序

贈婦翁潘公序

覽越篇序

王山人贈言

北臺疏草序

雲南武錄序

贈李宣鎮序

周愍婦集序

海上生華氏序

著郭子序

贈張君序

代邊帥壽張相公母夫人序

送沈君叔成序

入駿圖序

贈梁尙書公序

贈李長公序

白氏譜序

亦陶集序

壽史母序

張母八十序

贈沈母序

卷之二十一

跋

新建公少年書董子命題其後

書石梁鴈宕圖後

書梅花道人墨竹譜

書畫後

書茆氏石刻

送畫於寺書其左

書蘇長公維摩贊墨蹟

書米南宮墨蹟

書子昂所寫道德經

書夏珪山水卷

書李北海帖

書陳山人九臯氏三卉後

書八淵明卷後

書沈徵君周畫

書謝叟時臣淵明卷爲葛公旦

書朱太僕十七帖

又跋於後

跋書卷尾

二首

大蘇所書金剛經石刻

讀餘生子傳

書馬君所藏王新建公墨蹟

書吳子所藏畫

書季子微所藏摹本蘭亭

書紅眼公傳

書新建公二序手稿

跋司馬公草書

趙文敏墨蹟洛神賦

書草元堂稿後

卷之二十二

贊

觀音大士贊

白描觀音大士贊

題大士圖

提魚觀音圖贊

折廬達磨贊

伏虎畫贊

書瀟水羅漢畫贊

蓮葉大士贊

東方朔竊桃圖贊

純陽子圖贊

并序

梓潼像贊

二首

三彩圖贊

四老圖贊

四仙圖贊

四首

高皇帝像贊

一品三公圖贊

鳴教出所藏郭畫一叟持元物類石方長數寸
開口語又所攜竹筐中植一小旛置道旁一
叟聽其語執冊肘若却避然令贊之

自書小像贊

二首

商大公子像贊

余東白贊

宗侄像贊

三首

婁叟像贊

吳君像贊

郁君小像贊

書馬策之像贊

范子小像贊

王子小像贊

傅子像贊

柳生小像贊

許伯熙像贊

草誦

并序

題鳩

卷之二十三

銘

歙石硯銘

并序

歙石硯銘

二首

端石硯銘

二首

端石螭硯銘

無眼端石銘

馬策之端硯銘

二首

鼉磯硯銘

二首

鼎硯銘

破膽磬銘

并序

刺匣銘

篆櫝銘

竹秘閣銘

一首

書櫝銘 二首

卷之二十四

記

蜀漢關侯祠記

坐臥房記

西施山書舍記

函三館記

游五泄記

閘記

西溪湖記

義塚記

石頂浮圖記

修郡衢記

長春祠記

半禪庵記

呂氏始祖祠記

石刻孔子像記

烈婦姚氏記

鎮海樓記

酬字堂記

卷之二十五

碑

會稽吳侯生祠碑

徐相公碑

李先生祠堂碑

知清豐沈公祠碑

龐公碑文

劉公去思碑

卷之二十六

傳

贈光祿少卿沈公傳

白母傳

王君傳

彭應時小傳

卷之二十七

墓誌銘

高君墓誌銘

蕭女臣墓誌銘

吳孝子墓誌銘

嫡母苗宜人墓誌銘

伯兄墓誌銘

仲兄墓誌銘

亡妻潘墓誌銘

自爲墓誌銘

墓表

陳山人墓表

卷之二十八

行狀

呂尙書行狀

卷之二十九

祭文

祭北斗文

代祭東嶽神文

代督府祭趙尙書文

代祭陣亡吏士文

感夢祭嫡母文

春祭先墓文

祭少保公文

代上饋文

告丁母

告先主

哀諸尙書辭

祭張太僕文

會祭高君文

祭羅母文

祭少顛文

季先生入祠祭文

時祭文

縣祭文

入鄉賢祠府縣祭文

卷之三十

雜著

隍災對

附記質隍災而予否之之語

府隍神有二辨

祝僉事爲神於南昌

壽中軍某侯帳詞

義塚募文

讀絳州園池記戲爲判

景賢祠上梁文

鮑府君醮科

請稱法位

散花初獻

亞獻

步虛宜疏

回輦焚燎

友琴生說

一吾說

讀龍惕書

書古本叅同誤識

井田解

補遺

寄登州蔡守備都使

過許君草堂

咏觀音蓮

咏落葉

宿秦仲虛初陽臺上

御製詩經傳義

卷三

帝堯時虞舜禹土

初歷

初曆

初曆

初曆

初曆

青藤書屋目錄終

徐文長傳

同郡陶望齡撰

徐渭字文長山陰人幼孤性絕警敏九歲能屬文年十餘倣楊雄解嘲作釋毀二十爲邑諸生試屢雋胡少保宗憲總督浙江或薦渭善古文詞者招致幕府筦書記時方獲白鹿海上表以獻表成召渭視之渭覽罷瞠視不答胡公曰生有不足耶試爲之退具藁進公故豪武不甚能別識乃寫爲兩函戒使者以視所善諸學士董公份等謂孰優者卽上之至都諸學士見之果賞渭作

表進上大嘉悅其文旬月間遍誦人口公以是始重渭
寵禮獨甚時都御史武進唐公順之以古文負重名胡
公嘗袖出渭所代謬之曰公謂予文若何唐公驚曰此
文殆吾輩後又出他人文唐公曰向固謂非公作然其
人誰耶願一見之公乃呼渭偕飲唐公深獎歎與結驩
而去歸安茅副使坤時游於軍府素重唐公嘗大酒會
文士畢集胡公又隱渭文語曰能識是爲誰筆乎茅公
讀未半遽曰此非吾荆川必不能胡公笑謂渭茅公雅
意師荆川今北面於子矣茅公慙愠面赤勉卒讀謬曰

惜後不逮耳其爲名輩所賞服如此渭性通脫多與郡
少年昵飲市肆幕中有急需召渭不得夜深開戟門以
待之傾者得狀報曰徐秀才方大醉豪囂不可致也公
聞反稱甚善時督府勢嚴重文武將吏庭見懼誅責無
敢仰者而渭戴敝烏巾衣白布澣衣直闕門入示無忌
諱公常優容之而渭亦矯節自好無所顧請然性豪恣
間或藉氣勢以酬所不快人亦畏而怨焉及宗憲被逮
渭慮禍及遂發狂引巨錐割耳刺深數寸流血幾殆又
以椎擊腎囊碎之不死渭爲人猜而妬妻死後有所娶

輒以嫌棄至是又擊殺其後婦遂坐法繫獄中憤懣欲
自決爲文自銘其墓曰山陰徐渭者少慕古文詞及長
益力旣而有慕於道往從前長沙守季先生究王氏宗
旨謂道類禪又去叩於禪久之人稍許之然文與道終
兩無得也賤而情且直故憚貴交似傲與衆處不免袒
裸似玩人或病之然傲與玩亦終兩不得其情也舉於
鄉者八而不一售僦數椽儲瓶粟者十年一旦客於幕
府典文章數赴而數辭投筆出門人爭愚而危之而已
深以爲安其後公愈折節等布衣留者兩朞贈金以數

百計人爭榮而安之而已深以爲危至是忽自覓死人
曰渭文士且操潔可無死不知古文士以入幕操潔而
死者衆矣乃渭則自死孰與人死之渭爲人度於義無
所關時輒疎縱不爲儒縛一涉義所否雖斷頭不可奪
故其死也親莫制友莫解焉平生有過不肯掩有不知
耻以爲知斯言蓋不妄者其自名如此然卒以援者力
獲免旣出獄縱遊金陵北客於上谷居京師者數年獄
事之解張宮諭元怵力爲多渭心德之館其舍旁甚驩
好然性縱誕而所與處者頗引禮法久之心不樂時大

言曰吾殺人當死頸一茹刃耳今乃碎糜吾肉遂病發
棄歸既歸病時作時止日閉門與狎者數人飲嚙而深
惡諸富貴人自郡守丞以下求與見者皆不得也嘗有
詣者伺便排戶半入渭遽手拒扉口應曰某不在人多
以是怪恨之晚絕穀食者十餘歲人問何居曰吾噉之
久偶厭不食耳無他也尤不事生業客幕時有餽之洮
絨十許匹者遂大製衣被下及所嬖私褻之服靡不備
者一日都盡及老貧甚鬻手自給然人操金請詩文書
繪者值其稍裕卽百方不得遇窘時乃肯爲之所受物

人人題識必償已乃以給費不卽餒餓不妄用也有書
數千卷後斥賣殆盡幃莞破弊不能再易至藉藁寢年
七十三卒渭爲諸生時提學副使薛公應旂閱所試論
異之置第一判牘尾曰句句鬼語李長吉之流也及被
遇胡公值比歲公思爲渭地諸簾官入謁屬之曰徐渭
異才也諸君校士而得渭者吾爲報之時胡公權震天
下所出口無不欲爭得以媚者而偶一人晚謁其人貢
士也公心輕之忘不與語及試渭牘適屬令事將竣諸
人乃大索獲之則彈擿遍紙矣人以是歎渭無命而服

薛公知人焉渭於行草書尤精奇偉傑嘗言吾書第一
詩二文三畫四識者許之其論書主於運筆大槩昉諸
米氏云所著文長集闕篇櫻桃館集各若干卷今合刻
之註莊子內篇參同契黃帝素問郭璞羣書各若干卷
四書解首楞嚴經解各數篇皆有新意渭父總以龍里
衛戍籍領貴州鄉薦始至龍里也土人譁之總以教讀
自晦授童子孝經故謬其讀土人笑曰是不足逐也已
而得薦仕至夔州府同知渭貌脩偉肥白音朗然如唳
鶴常中夜呼嘯有群鶴應焉二子曰枚枳

陶望齡曰越之文士著名者前惟陸務觀最善後則文
長自舉業盛行操翰者羞言唐宋知務觀著鮮矣况文
長乎文長負才性不能謹飾節目然蹟其初終蓋有處
士之氣其詩與文亦然雖未免瑕類咸以成其爲文長
者而已中被詬辱老而病廢名不出於鄉黨然其才力
所詣質諸古人傳於來禩有必不可廢者秋潦縮原泉
見彼厯喧汜溢者須臾耳安能與文長道脩短哉文長
沒數載有楚人袁宏道中郎者來會稽於望齡齋中見
所刻初集稱爲奇絕謂有明一人聞者駭之若中郎者

其亦渭之桓譚乎

徐文長傳

公安袁宏道撰

余少時過里肆中見北雜劇有四聲猿意氣豪達與近時書生所演傳奇絕異題曰天池生疑爲元人作後適越見人家單幅上有署田水月者強心鐵骨與夫一種磊塊不平之氣字畫之中宛宛可見意甚駭之而不知田水月爲何人一夕坐陶編修樓隨意抽架上書得闕編詩一帙惡楮毛書煙煤敗黑微有字形稍就燈間讀之讀未數首不覺驚躍急呼石簣闕編何人作者今耶

古耶石簣曰此余鄉先輩徐天池先生書也先生名渭
字文長嘉隆間人前五六年方卒今卷軸題額上有田
水月者卽其人也余始悟前後所疑皆卽文長一人又
當詩道荒穢之時獲此奇秘如魘得醒兩人躍起燈影
下讀復叫叫復讀僮僕睡者皆驚起余自是或向人或
作書皆首稱文長先生有來看余者卽出詩與之讀一
時名公鉅匠駸駸知嚮慕云文長爲山陰秀才大試輒
不利豪蕩不羈總督胡梅林公知之聘爲幕客文長與
胡公約若欲客某者當具賓禮非時輒得出入胡公皆

許之文長乃葛衣烏巾長揖就坐縱譚天下事旁若無人胡公大喜是時公督數邊兵威振東南介冑之士膝語蛇行不敢舉頭而文長以部下一諸生傲之信心而行恣臆譚謔了無忌憚會得白鹿屬文長代作表表上永陵喜甚公以是益重之一切疏記皆出其手文長自負才略好奇計譚兵多中凡公所以餌汪徐諸虜者皆密相議然後行嘗飲一酒樓有數健兒亦飲其下不肯留錢文長密以數字馳公公立命縛健兒至麾下皆斬之一軍股慄有沙門負貲而穢酒間偶言於公公後以

他事杖殺之其信任多此類胡公既憐文長之才哀其數困時方省試凡入簾者公密屬曰徐子天下才若在本房幸勿脫失皆曰如命一知縣以他羈後至至期方謁公偶忘屬卷適在其房遂不偶文長既已不得志於有司遂乃放浪麴蘖恣情山水走齊魯燕趙之地窮覽朔漠其所見山奔海立沙起雲行風鳴樹偃幽谷大都人物魚鳥一切可驚可愕之狀一一皆達之於詩其留中又有一段不可磨滅之氣英雄失路托足無門之悲故其爲詩如嗔如笑如水鳴峽如種出土如寡婦之夜

哭羈人之寒起當其放意平疇千里偶爾幽峭鬼語秋
墳文長眼空千古獨立一時當時所謂達官貴人騷士
墨客文長皆叱而奴之耻不與交故其名不出於越悲
夫一日飲其鄉大夫家鄉大夫指筵上一小物求賦陰
令童僕續紙丈餘進欲以苦之文長援筆立成竟滿其
紙氣韻道逸物無遁情一座大驚文長喜作書筆意奔
放如其詩蒼勁中姿媚躍出予不能書而謬謂文長書
決當在王雅宜文徵仲之上不論書法而論書神先生
者誠入法之散聖字林之俠客也間以其餘旁溢爲花

草竹石皆超逸有致卒以疑殺其繼室下獄論死張陽和力解乃得出既出倔強如初晚年憤益深佯狂益甚顯者至門皆拒不納當道官至求一字不可得時攜錢至酒肆呼下隸與飲或自持斧擊破其頭血流被面頭骨皆折揉之有聲或槌其囊或以利錐錐其兩耳深入寸餘竟不得死石簣言晚歲詩文益奇無刻本集藏於家予所見者徐文長集闕編二種而已然文長竟以不得志於時抱憤而卒石公曰先生數奇不已遂爲狂疾狂疾不已遂爲囹圄古今文人牢騷困苦未有若先生

者也雖然胡公間世豪傑永陵英主幕中禮數異等是
胡公知有先生矣表上人主悅是人主知有先生矣獨
身未貴耳先生詩文崛起一掃近代蕪穢之習百世而
下自有定論胡爲不遇哉梅客生嘗寄予書曰文長吾
老友病奇于人人奇于詩詩奇于字字奇于文文奇于
畫予謂文長無之而不奇者也無之而不奇斯無之而
不奇也哉悲夫

下奇字
音機

新文長卷八

士大夫之志也。其志也。西。不。無。深。遠。之。所。

之。志。也。其。志。也。西。不。無。深。遠。之。所。

之。志。也。其。志。也。西。不。無。深。遠。之。所。

之。志。也。其。志。也。西。不。無。深。遠。之。所。

之。志。也。其。志。也。西。不。無。深。遠。之。所。

之。志。也。其。志。也。西。不。無。深。遠。之。所。

青藤書屋文集卷一

山陰徐 渭文長著

公安袁宏道中郎編

賦

涉江賦

晉潘岳作秋興賦序稱三十有二歲始見二毛時岳爲賈充掾寓直散騎之省見省中多富貴人乃起歸來之想及作閒居賦自述多落而少遷以見拙宦雖卒歸退休然合前賦而觀之誠見其嗜醇醲而姑言寂寞也嘉

靖壬子秋余年亦三十有二既落名鄉試涉江東歸友人顧予鬢曰子髮白矣余誠懼理道無聞而毛髮就衰至於進退之間實所不論雖才不逮潘岳而志或異焉乃作涉江賦以自見

壬子季秋予旣被棄涉江東歸水深則厲僕痛主困旅多太息夕發西陵日高造闕渭旣登一枝之堂俯而拜母母曰兒復如是歸乎兒則困窮兒好顏色兒腹應饑爲兒作食旣乃渭復往舊託之禪室掩關戶於晷刻崕然其坐忘焉乃有二三伯仲來相問視顧盼之間指予

鬢而謂曰子髮白矣年其幾何吾則宜然如子則那子
聞斯言不能無逆傾冠側首伯爲子擢擢不應手體短
善脫不脫而獲如黃甫活伯仲謂予豈以憂故進退有
時失得有數予告伯仲予豈不知細故芥蒂何足以疑
人生之處世兮每大已而細蟻視聲利之所在兮水趨
壑而赴之量大塊之無垠兮曠蕩蕩其焉期計四海之
在天地兮似晷空之在大澤中國之在海內兮太倉之
取一稊物以萬數而人處其一則又似乎毫末之在於
馬厓彼營營之微聲沾沾之細利又何殊於曳蟲股嘅

蠅脾入孔穴實糧齋第因小而形大會一蟻之何加再
語伯仲更聽予陳無形爲虛至微爲塵塵有隣虛塵虛
相隣天地視人如人視蟻蟻視微塵如蟻與人塵與鄰
虛亦人蟻形小以及小互爲等倫則所稱蟻又爲甚大
小大如斯胡有定界物體紛立伯仲無恠目觀空華起
滅天外爰有一物無罣無礙在小匪細在大匪泥來不
知始往不知馳得之者成失之者敗得亦無攜失亦不
脫在方寸間周天地所勿謂覺靈是爲真我覺有變遷
其體安處體無不含覺亦從出覺固不離覺亦不卽立

萬物基收古今域失亦易失得亦易得控則馬止縱則
馬逸控縱二義助忘之對外寇易防竊發莫支外寇形
呈竊發暗來積土漸高爲九仞臺九仞一虧終爲阜邱
予斯之憂他奚愴懷伯惟予髮良亦有說男子六八陽
氣衰竭膚面焦枯鬢髮頒白斯人稟常萬古一轍稟完
後老缺者早泄曷知小子不稟其缺年三十二形則六
八又予視髮元稠白希遠窺不得逼視始知不審其變
在何歲時豈以茲秋謂予憂爲

牡丹賦

同學先輩滕子仲敬嘗植牡丹於庭之陞春陽旣麗花
亦嬌鮮過客賞者不知其幾數日搖落客始罷止滕子
心疑而過問渭曰吾聞牡丹花稱富貴今吾植之於庭
毋乃紛華盛麗之是悅乎數日而繁一朝而落儻兮游
觀忽兮離索毋乃避其涼而趨其熱乎是以古之達人
修士佩蘭采菊茹芝挈芳始旣無有乎穠豔終亦不見
其寒涼恬淡容與與天久長不若茲種之溷吾黨也吾
子以爲何如渭應之曰若吾子所云將盡遺萬物之濃
而取其淡樸乎將人亦倚物之濃淡以爲清濁乎且富

貴非濁貧賤非清客者皆麀主則爲精主常皦然而不
緇客亦胡傷乎隨寓而隨更如吾子懃富貴之花以爲
溷已世亦寧有以客之寓而遂壞其主人者乎縱觀者
之倏忽爾於花乎何讐諒盛衰之在天人因之以去留
彼一貴一賤而交情乃見苟門客之聚散於翟公其奚
尤子亦稱夫芝蘭松菊者之爲清矣特其脩短或殊榮
悴則一子又安知夫餐佩采挈者之終其身而守其朽
質也則其於倏忽游觀者又何異焉滕子顧予曰有是
哉子盍爲我賦之渭曰唯唯何名花之盛美稱洛陽爲

無雙東青州而南越曾不足以頡頏稟陰陽之中氣兮
雖未必其記載之盡信視衆卉以獨妍兮真若悉有萃
乎水土之精光始山間之幽寂處天后之帝鄉后始命
移以入內兮備宮樹之列行亦何心於貴賤視用舍而
行藏茲上代之無聞始絕盛乎皇唐爾其月陂隄上長
壽街東張家園林汾陽宅中當春光之旣和正亭榭之
載營天宇曠霽兮絲游景物招人而事起彼貴子兮王
孫蹙游龍於流水遶茲葩而密坐藉芳草而苒苒感盛
年之若斯傷代謝之能幾爾則粉承日華朱含霧雨群

帶如翔交柯如拒凌晨併粧對客不語衛尉出婢子於
羅幃鄂君擁翠被於江渚當其百藥千葦照耀朱霞綠
葉紛紜望之轉賒若儒生之授學列女樂於絳紗迨夫
背戶迎窻上下薨楊二三作隊矯矯愈鮮飛燕進女弟
於遠條夫人挾三國而朝天錦瓣重捲檀心飛眉柔須
夜殷怒苞曉決宛婦姑之反脣似相稽而無說則有若
盛時合沓諸娣從韓媼以同歸颯焉凋衰漢主放宮人
而憎別風薦小麥雨委微溫楚姝舞歇於章臺陳后泣
罷於長門亦有細加巨上慎妃橫逼座之勢紫侍黃側

班姬抗同輦之尊或勁而卬婕妤當逸態於上殿或翹
而望處子窺宋玉於東垣旣離以披亦競而駢近不極
態遠不盡妍大彷彿乎佳麗意所想而隨存奚援引之
數姝可罄比而殫論然涓嘗聞如來演法在彼鹿園菩
薩莊嚴衆二十五寶髻鬟珠璣瓔組佛之勝相紫金
光聚大衆威儀具八萬數又聞崑崙閬風玉城瑤宮神
人飛行綽約玲瓏雲態雪光不可殫窮夫人之心想由
習生景與想成一牡丹耳世人多謂花如美婦則前所
援引諸姬群小之所象是也使元釋之子觀之遠嫌避

譏則後所援引大衆群仙之所象是也今此花長於學
士之庭在仲敬之宅仲敬將謂此花申申天天行行閨
閨佩玉瓊琚鼓瑟鳴琴其仲尼與七十子諸人乎縱謂
其婦人也稱煩則太姒始至宮人欣欣琴瑟鐘鼓樂而
不淫乎稱簡則二女湘君尋帝舜於蒼梧之野宓妃盤
姍解佩環於洛水之濱乎此皆不以物而以已吐其醜
而茹其美畔援歆羨與世人之想成者等耳若渭則想
亦不加賞亦不鄙我之視花如花視我知曰牡丹而已
忽移矚於他園都不記其婀娜藉紛紛以紆紆其何施

而不可

鞠賦

渭旣賦牡丹滕子復申辭曰曩吾之庭牡丹春華菊英
秋發吾子抽精於彼而抱響於此毋亦如吾所謂避其
涼而趨其熱者乎渭曰有是哉子之善戲而挾也乃筆
不停綴詞不及展遂賦曰誰乎誰乎芒芴曷常春至麗
日秋臨抗霜彼亦何熱此亦何涼惟付與之是聽非知
計之可詳履子廣庭覩茲烈芳繫名相之別數亦芟莖
之異萌染不出於五色維其變之莫量歷九秋而自如

周敷望而靡謝從顏色之中乾永附帶而不舍於時白
帝司辰列列辛辛木葉下而草萎霜露降而鴈征乃自
圃畦遷爾廣楹一則不足百尙有羸群而不黨矜而不
爭槩望若結伴而違俗單玩則各立而獨行乘金令而
始坼秉土氣之正精雖雜采之並敷惟彼黃之盛榮諒
盈庭而肯錦亦剖符而鎔金耀愈澤而不妖烈無吹而
自馨方辭謝乎徑塗處規埴而託身非瓦礫以爲嘉存
大朴之希聲彼主人兮誰子懷高廓兮心貞秉圭璋之
潔白樹文學之干旌則有幽人處士墨卿逸史候節序

之高朗知寒燠之迅駛弭蓋於門肅隊而至或移觴而
就筵賦篇章而未已爾則不以物驚不以物喜挺危朶
而愈勁舒正色而不媚匪鉛華以事人多君子之枉尺
豈無人而不芳亦胡庸以采佩當夫青陽發生桃李盛
花名園如霰上國如霞嚶好鳥其載鳴將何物之不化
胡爾類之自矜乃偃伏其萌芽迨寒氣之始肅日馳驚
乎南陸雲慘淡而無光野何萌而不縮爾乃自耀其孤
標恥賤同而貴獨謂所性之若斯兮或未必其盡然夜
不可以爲夙兮晨不可以爲昏苟榮悴之有時奚爾類

之能專將推之而不後抑挽之而不前彼蒼厚爾以遲
莫又何辭於末年紛後先亦何心兮避桃李之盛時抗
素秋而挺茂兮終焉保其不衰至乃微霜襲宇驚飈振
帷萼紺紫而不起葉比次而下垂閭閒宇兮無人悅星
月之懸輝則有似乎貞女永絕乎夫君放臣懷國而酸
悲尹子履霜於中野蘇武嚙雪於沙陲在顛沛而愈厲
至九死其靡違外容色之凋傷實中心之永矢嗟主人
之懷抱美材質之修嫿逾盛年而云邁稍凌夷乎末路
苟蒼蒼之爾私兮又何病於遲莫日中見而彌烈兮金

粹精於融鑄直守貞而罔渝於茲英其何負余假托以
抒忱兮信毋必而毋固

荷賦

渭旣賦牡丹與菊仲敬復請曰天有四時花有四品夏
荷冬梅子獨無意乎含毫續藻俾世稱四賦此雖小圃
之光而亦吾子之麗也余不得辭因復命筆塊連抱之
大甕立階楹以踟躕挹三尺之清水實五石之泥淤葩
燁燁其盈把芳霏霏以滿除逼而就之欲語不語徐察
其意若有告訴吾凌波之逸卿而擁蓋之公路也遠祖

當春秋吳越之世逢時遭偶居若耶之溪歐冶子淬劍之處也自會稽達剡水溪長岼澗淡蕩百里沙白泥肥雜蘆與葦種類繁生多不可紀則有乍決半舒小朶大朶短佇長竦低垂迅起柔標勁節疎陳密倚或向日而併嬌或從風而自靡其乍決也儼華燈之笑焰其半舒也宛新月之過朏其小朶之開群仙合掌而數甲斯尖其大朶之盤古佛現身而千目其背短跂則蠻奴踞以貢珍長竦則山峰矗而攢翠低垂挂馬肝而始剗迅起樹羽蓋而仰綴標有柔而將隨節有勁而示刺疎陳或

約隊而未過密倚疑附耳而不置向日併嬌未足稱妍
從風而靡曷以揚麗香不烈而愈恬色彌天而不媚其
房之俯仰也則有似乎客主之旣闌更舉爵而飛杯其
葉之掀翻也又有似於兄弟之寢興共長枕而大被是
以飲風露而華采集鳥魚而游戲五月清涼三伏不暑
曠漠之區煙波之宇根蒂懽娛枝葉容與花神每遊息
以無窮生意亦隨之而不去吾子不聞王之後宮名西
施者乎采掇不盈觀者如市羨我顏華中心如駭此固
千載之所美談而風人之所載記豈若茲主人之處我

也陶以爲沼以灌以壅覆之井幹以制以控茁蘖抽莖
束不得縱炎暑結棲鄒與魯閔豈俊臣之見推而請君
入於是甕實遭時之不偶爲觀者所侮弄是以見先生
之來有不能以言通而謬以意動者也余應之曰何子
見之不廣也吾聞自子之先以至於子皆得以君子名
者豈以託居之廣大而顧盼之光榮乎直幹不撓虛中
無物竅多比干之心清映伯夷之骨含芳烈其愈溫處
驕炎以不熱眇可望而莫親殫易事而難悅翮翹欲舉
挺生冰雪之姿瀟灑出塵不讓神僊之列是以映清流

而莫增其澄處污泥而愈見其潔且吾子既不染於汚泥矣又何廣狹之差別縱遭時有偶與不偶何託身有屑與不屑花乃垂頭默然似失仰而微笑似有所答知君子之令名非外物以丹牖於時遊魚躍於梗底翡翠集於房側微風芬以襲衣纖月高以映枕乃命主人酌酒而別

梅賦

往予薄游海外聞羅浮之勝而未得登焉蓋昔所稱入夢之種不可得而見之矣涉冬出大庾見庾嶺之梅則

多麤理而絳襦者歟抵玉山人言東嶽之奇往觀焉則
見其孤生瓌古偃伏迴卷一花千葉並蒂數萼忽上竦
而扶疎者歟至於依山臨澗覆橋橫野間松雜竹屋角
墻茨境非不美也未聞其走馬而征輿豈非品質靡異
類別有區人固玩視其習而好言其殊爾其孤稟矜競
妙英雋發肌理冰凝幹膚鐵屈留連野水之煙淡蕩寒
山之月蕤一攢而集霞葩五出而爭雪側披斷磧委朔
風其將吹忽上高空助凍雲之欲結杪數英之半掬中
萬斛之一搏古幹橫肱玉龍游而張甲編條聚腦白鳳

戢以梳翰珮玦續紛何啻凌波之子肌膚綽約無言姑
射之仙趣將幽而見取豔以冷而爲妍縕香氣於空表
弄皎色於霄端瘦影橫窓臞然山澤素魂麗壁忽爾嬋
娟託使將傳寄江南之遐信隨風暗度報塞北以春天
羌笛一聲韻全飄於纖指素琴三弄神屢託於冰絃是
以古道清流墨工圖史或拗之爲一窩亦種之於數里
圍棋酌酒相與偃臥其中落月迴風務印縱橫之所彼
稱旣醉逼清氣而不勝我則含毫占春光於長佳斯亦
可謂一節之高而未足以盡曠然之意乃有巖居之徒

溪飲之老短褐黃冠龐眉壽考跨蹇策筇熱漿烹藻望
谷口以窮搜坐石頭而拂掃亦有游心道德之儒含思
風雅之侶讀易說詩於其下咏騷作記當其處飛觥爵
於彌留顧徘徊而不去景得人而益增人因景而標致
斯風格之雅幽而韻調之殊異亦足以快心暢神洗囂
破滯又何羨乎羅浮之奇而東嶽之麗且余觀夫梅之
爲物也得氣之先得液之酸酸者木之正味先者序之
履端先則渾淪龐篤含泰和而獨飽酸則甘辛鹹苦受
何味而弗便含之飽者發斯盛便以受者和必完是以

先驅百卉遂占上林之苑均齊五味兼濟商鼎之鹽其
始也點綴文章洩天地之春於一夜其終也調和願養
收天地之功於萬全曾不知其處寂寞而貞厲守冷素
以自恬悠揚乎松菊之圃盤錯乎水石之間風飈撼之
而不動瘴癘攻之而罔顛雪霰旣零條枚益堅陰幽外
剝陽氣內漸迨花實之致用歷世味之飽諳何桃李之
弱質敢先後以齊肩苟天將降是人以大任察物理而
明其固然

前破械賦

嗟乎哉西河殘守東海孝婦差之豪釐千里岐路寸脰
尺支二木一金昨日何重今日何輕其在今日也栩栩
然莊生之爲蝴蝶其在昨日也遽遽然蝴蝶之爲莊生

後破械賦

爰有一物制亦自班鸛喙不啄琴體乏絃乃偕二友木
寶金紐與之爲三脰及足手一人邇之不棺而朽多其
高義隨我四年我分殉之何心棄捐二三神明呵護其
首司其去留爲我撞剖嗟乎哉爾完我死爾破我生破
完倏忽生死徑庭可不慎乎敢告司刑

畫鶴賦

朱冠縞衣四池元綠鐵脰昂尻金眸夾顛長喙易渚圓
吭聞天秉寥廓之高抱小蒼莽之微騫忽一舉而追九
萬之翼亦孤栖而養千歲之元爾其焦山瘞銘桂陽避
彈道林縱歸揚州負纏乘軒衛國徒傳甲者之言聞嘆
華亭誰共吳儂之歎由此觀之則形骸易泯不勝留影
之難楮墨如工返壽終身之玩爾其舐筆和鉛徵精召
巧或磅礴而解衣亦凝澄而命草想仙羽而彷彿於青
田揮束穎而希冀其元妙則有翩然以臨劃焉凝佇矯

矯波間亭亭松際黃樓酒價全憑橘潘而高赤壁夢回
徒憶車輪之翅乃若素壁財粉朱門始光徐展玉輪高
縣玳梁數丈輕綃方挂瀑一雙語燕忽驚行灑孤雪兮
毡毳頂殷荔而氏昂方拂瀾而振翔亦將嘯而引吭賡
以爲真儼致花之粉蝶久而始覺誤集障之蒼蠅然則
物固往往有神於繪而便於玩者矣又何必網兩翼於
蒼蒼

緹芝賦

緊探珠之巖榭迨臨鏡之波館地並秀以雙美氣偕和

而競煖爰有物以名芝忽卷然而從窾如茁玉而束瑤
旣杼輪而揭繖下縞練以裼中上緹纁而表袒皚薄雪
之將霏載彤雲而未斷巨者二咫映彼湖荷小者徑尺
燦竹妍柯河邊織錦掇支機而罷杼漢宮剪綵停寶鉸
以羞羅使君溫恭崇抑斥揚歛襟下問爲災爲祥旣登
覽乎隅椒復臨泛乎汪洋恐盛德之點璧惟偃步以循
墻爾其芝固無言默呈以露吐瑞藹之氤氲儼郁霏之
煙霧芳嗅嗅以襲衣裊亭亭而羃素遶數尺之元壤瑟
週離而奄布示彼絕奇逸於往睹非家積之餘慶符天

心而易故於是使君讓之不可推之不去和酒號曰子
爲我賦卽斯語而宮商謝不敏兮恐魚亂曰使君玉除
盛芝英兮一貢廷兮兩侍於楹兮斯爲之徵兮使君恥
痾匪蒸成兮芝草生兮采以鑄兮壽百齡兮斯爲之馮
兮

十白賦

有序

予被少保公檄自獲白鹿而令代表於朝始其
後踵至者凡十品物聚於好殆非虛語歟時予
各欲賦以諷公未能也公死於華亭氏子寄居

馬家飲中燭蝕一寸而成十章諷固無由且悲之矣

鹿二隻

爰有二鹿雪皓霜瑩後先互呈以雌以雄合入蹄而兩角蹲並壁以交宮桓桓撫臣敢告世宗謝山海之萃食仰芻豢於上宮諒遭遇之有時胡人與物而匪同

兔

謝彼月輪來此人間朗晴珀赤妙毳雪寒豈韓盧之可獵與魄蜎而共跚曩者食客之謀匪爲營於三窟今也

走狗之獲潛垂涕以雙潺

鵲

即使常羽亦且知歲矧伊白鵲而胡不慧匪舍疆以效
鵲詎攫雛而學鷲秋梁作架宜並色於銀潢古印幻騰
羞托翼於金墜

猴環赤玉誤
爲白沿耳

人亦有言王孫可憎衣以周公裂冠毀纓胡是物之善
幻脫蒼韞以膚瓊莫四朝三豈狙公之可罔旣冠且沐
致韓生之就烹

鸚鵡

昌黎二鳥賦云
白鵠亦與貢

鸚鵡來巢春秋紀之皜皜其翎曷其有之我在幕中實
維皆之不貢於廷拚然起之

鸚鵡

黃冠白章其鳴嘒嘒殊彼凡羽綠襟朱喙柰此條籠將
飛復墜我則禰衡賦罷隕涕

龜四

念寶龜之素甲羌迸迸今冰雪載九疇而出洛帝與茲
而偕錫雖入網於豫且苦靈骨之就鑽亦托跡於莊周

恍曳尾而超越

麕

拾遺有言微聲及禍視爾霜質秉金畏火踵白鹿而後
至既已非時向青草而長廕庶其得所

鼠

聞爾貪殘曷能冰潔乃縞膚而素毛矯變緇而爲白獨
不聞胡粉之晶晶今始黝於鉛黑


黃頭


時賞羅
者頗濫


鳥曰黃頭猛以善鬪白秉金精儼爾介冑虞人網以奏

功如拔猛士於千夫幕府喜而錫金似擲杯土於一覆

青藤書屋文集卷一終







PL
2451
P29
v.60
青藤書屋文集卷二

山陰徐渭文長著

公安袁宏道中郎編

樂府

張家槐

張家槐鵲巢枝使君纔出戶闔扉鞭行人上及飛彈
鵲母連鵲卵鵲母棄雛走何所曙衙開邸報來使君朝
去鵲莫歸

悲饗歌

吳人饗越人俎一臠忤舌死杖下肉少甘骨爲土

歌風臺

時漢高將夷英彭諸猛又知猛者
守欲背故曰安得和葛鄂州作

醉媪酒臥媪壚武家壚畔呼呼豐沛中群酒徒噉季
鼻大糟所都誰喚隆準而公乎十二年左纛還着紅衫
應午炎七尺所臨萬馬環諸王列侯敢不虔獵徒酒伴
隘巷看獨召故老金爵乾惜青春赭朱顏乃思猛士得
將安歸問野雞還我韓

又

鄂州篇衡縣權渭也俯拾所殘悲異代良楚酸謂河高

水流拍天渭雨過之河未然麻姑量海海愁淺三尺鳥
爪沒至翫大家作計一何長請看何人偏墮短

又

英彭不雌季心所猜今布越耳終當爲狶終當爲狶不
如我先之舊所得猛士十當一無遺十旣一無遺安得
不歌以思

又

騅渡江八千從非父老是使彼安識籍與梁巴蜀公縞
新城奉三老敎發帝喪義兵若河日以東乃知王者師

上親長禮教下首功蜀公親歷效驗明乃知猛士難四方守易戰攻誰兼不蹄買蹠驄擊太牢祀鄴鄉聽叔孫通徵魯諸生驚禮四公遠來于商

子嘗夢書所決不爲事心惡之後讀唐書李堅貞傳稍解焉

堅貞十七之死靡他去聲數夢男子百兩以御叶貞覺而

恚莫知其謂華盛來胥蝶也我貌未悴廢沐垢首塵膚敗

衰如葉未秋虐使萎黃自茲以往夕寢旦覺角雀謝穿

筐梅罷標卷婁雖羶理不樂蟻矧已肉矣曷感而蟻音宜

萬有膠轕曷可詰呵皇矣上帝其將謂何

六昔

昔朋友雉與鵠不得已今爲梟 昔骨肉鷺與鴨不得
已今爲鶻 昔宗親鵲與鶉不得已今爲鸛 昔官府
騶與虞不得已今爲虎 昔乳煦汗血駒不得已今於
菟 昔黔蒼萬夫英今視之蠅所生

青藤書屋文集卷二終

青藤書屋文集卷三

山陰徐渭文長著

公安袁宏道中郎編

四言古詩

鴈臺詩

陸子嘗買鴈放之因以爲號又鴈臺在杭江干

左江右湖名山有臺近陽背陰鴈爲之來江海之大矰
繳丸矢待鴈不來涼空覆水主人有馬客亦有舟出白
郭門於焉遨遊群焉以栖人亦鴈爾莊周爲蝶孰揆厥
理買鴈放生入雲出塞有問炙者張目不對

能居人世未可云念子覺無上夙昔斷羶葷焉能繫不
食焉得不耕耘况茲值秋陽寒氣慘不昕未可來居斯
語子以慇懃

來晨憇廣孝寺

可憐荒宇在於焉恣游賞古砌伏野草唯餘聖賢像巨
碣指高樹御墨浮天上昔人不在斯悠然引遐想曙入
鳥初散道寒露猶瀼回睇高山岑翻然策筇杖

登秦望山

素情忻晏遊碩人事永矢上此萬仞山復沿北溪水顧

瞻江海流神去蒼茫裡後峰千里來旁嶂兩川起往昔
窻中翠今茲巔上視佳哉是觀游吾鄉亦信美

沿秦望溪水

流水澄若無溪魚宛遊空磊磊聚圓石澹蕩偏能工高
寫象山曲伏響迴草中何朝飲麋鹿蹄踪去難窮

秦望山東南下折有峰紫鐵色錯豎似花蕊土人
呼雄鵝突余贈名花蕊峰

錯如鐵色紫出土幾千古寒空蕊尙繁秋水蓮難吐刻
削差可擬帶插不添嫵宛如齒齟齬張吻訟所苦千秋

後漢書卷之四
二
獻組繡名號未得主直少讓中岑他山視應父借言花
薤峰來春開何處

海樵山人新構

古莽伏圓址新構敞方榭去家不百步連山凡幾架衡
門夾栢欄卑池注微瀉群峰列窻牖佳木依簷瓦碑碣
墻垣中階級坡陀下曠霽坦以來遠暮蒼然化亭北指
夕月高臺嘯清夜嘉賓燕屢入麗人時或迓臥榻楔巖
石旁戶達僧舍主人胡不歸樵海未云罷東樵遡遊風
於茲焉息駕

又 曲池

濬池疊青山山色落池裡上栽百歲樹下週三折水日
夕衆鳥下客至數魚起助筵摘果實開蕪種芋子上山
一以望高城正東迤波漾堂壁瑩野濶登覽美羨子善
結架多在聚景址彼亭旣孤絕茲地何曠爾

與楊子完步浣紗溪梁有懷西施之鄉

明月照江水截梁與子步當時如花人曾此照鉛素江
流不改易月亦無新故薄雲淡杪林晴沙泛寒露借言
伊人閨應在煙生處

讀莊子

莊周輕死生曠達古無比何爲數論量生死反大事乃知無言者莫得窺其際身沒名不傳此中有高士

海上曲

雪隱城月高使君梯樓坐縣綆訊謀士但自苦城破問城一何多數百餘七箇長矛三十六虛弓七無筈腰刃八無餘徒手相右左轉戰路千里百涉一無舸發卒三千人將吏密如裏賊來如無人猝至使君下

又

暇日棄籌策卒卒相束手四疆險何限但阻孤城守曠
野獨匪民棄之如棄草城市有一夫誰不如木偶長立
睥睨間盡日不得洩朝飡雪沒脛夜臥風吹肘彼亦何
人斯炙肉方進酒

日暮進帆富春山

日暮帆重征江濶恥無度峰翠逐岬來樹榦參天去千
里始此行一日卽羈旅石瀨駛清磷雪壑聳殘素回睇
吳山岑蒼蒼渺煙霧

發嚴州舍舟登陸縱步十五里憩山麓叢榛遠眺

江中恠石

乘舟坐無聊遵途岝轉杳急流赴海馳恠石橫江倒仰
睇崆崎側惟見蒼翠矯覆莽映赭壁枝弱不勝鳥懸崖
窄可步聚纜密如篠舟子勿前征前路煙生草

將至蘭溪夜宿沙浦

中夜依水澤羈愁不可控遠火澹冥壁月與江波動寂
野聞籟微單衾覺寒重託踪蒲稗根身共鷗鳬夢

早發僊霞嶺

披衣陟崇岡日中下未已雄偉莫兩都噴薄走千里百

折翠隨人一望寒生背高卑互無窮參差錯難理蔓草
結層冰喬木秀縣藟晝餐就村肆小結依崖址去壑知
幾重剡竿引澗水回視高峽巔鳥飛不得比

自浦城進延平

溪山孕鐵英恠石穿水黑馬齒漱寒流冶火融初滴方
艇走石罅白日飛霹靂操舟信有神出人坦然適以知
庖丁者游刃有餘歷循理稱達人險難亦何惑

夜宿邱園喬木蔽天大者幾十抱復有修藤數十
尋縣絡溪渚

老樹拿空雲長藤網溪翠碧火冷枯根前山友精崇或
爲道士服月明對人語幸勿相猜嫌夜來談客旅

清澹灘

黑鰲穴地出噴沫從天下春雪跌深潭驚雷迸鐵罇回
思身所經險恠幾日夜老石萬片焦飛湍千里射藥叉
窺綠淵人命輕一詫或似鼓太冶青銅沸將瀉女媧撒
餘礫頑查攪不化念彼旣憮然值茲殊可訝短檠起沈
舟凸字振深窠因之誤絲髮長與世人謝浪怒一何愚
終古不得罷有時搏陰飈寒色慘朱夏借言呂梁叟何

時咨閒暇余雖愧達人笑對成一嚇

聞溪舟槳形如凸字

泛舟九曲

老王亂青冥皇天夜遺蛻餘骨散九州頭顱此焉寄人
視萬劫餘天意一夕計遊艇沸滄波髣髴熱營衛亭午
入數折冲然元氣閉縣峰昇羽人毛竹倚仙姊辟彼齒
牙蠹生死齟齬內世人不解奇但識世間事示之帝所
遺惟以溪山睇

武夷道士示予魏王子騫蛻首見紫氣

不死者已去死者留人間骨骸自何夕飛置山之顛取

視始伊誰縣綆月屢牽而不如餘魄安臥攢青蓮道士
苦斯役留函閣高椽過客好奇異啟閱請自便茲物真
仙靈磊磊黃琅堅高頂泥丸宮紫氣猶一弦晦明準天
時白黑互糾纏胡爲黃冠流示人禍福先爲予而變易
無乃勞子騫玉蘊山色輝斯理良自然

丙辰八月十七日與肖甫侍師季長沙公閱龕山
戰地遂登岡背觀潮

白日午未傾野火燒青昊蠅母識殘腥寒暑聚秋草海
門不可測練氣白於擣望之遠若遲少焉忽如掃陰風

噫大塊冷艷攔長島
惟沫一何繁水與水
相澡玩弄狎鬼神
去來準昏曉何地無
恢奇焉能盡搜討

十八日再觀潮於黨山

秋水自生幻海若
安措手驚雷砑雪獅
萬首敢先後山窺
本避濡俄驚足下吼
老壁拍波塵千仞落
衣袖望窮不見外
激灩明滅久人天儼
未消劫火燒宇宙
往昔每一凭恐怖
經旬晝那知迫視
惟其怖應不朽豈
惟我恐怖天地亦
應有景往日旣遷
恐怖亦却走

蕭荷花祠

俗傳露筋娘
娘者卽此

荷花一夕凋萬里秋無色獨遺花烈芳千秋襲陂澤揚
船遡大湖風緊日已夕水鳥習舊栖戢羽茭菰白弔古
解維舟去岼不盈尺秉燭褰繡帷金翹儼宮額燭滅颯
然中神爽凜孤魄念此芒吻微奚啻雄虺索豈無冶容
膏貞肌以爲臙念茲不能忘惆悵至明發

送明教往上海

翫雪東門家天寒雪正下繁林積素花群山映簷瓦杯
至不得休語密不可罷鳥集池樹顛色暝天欲夜顧予
同心人而有太息者云我爲道謀安得與君舍余爲重

解疏歛襟向前謝超言雖遣累離緒難釋望駕言春陽
初那得便徂夏執手歸路中衝寒爲君話

寄善畫葛君

展簃不盡規墨色鮮於洗細圖萬壑雲寄我青山裡感
之不能忘聊寄短篇耳

人燕

董生抱利器鬱鬱走燕趙賤子亦何能飄然來遠道行
止本無常譬彼雲中鳥朝飲西園池暮宿北林杪感事
復懷人生年苦不早欲弔望諸君跡陳知者少垂首默

無言春風秀芳草

古山篇贈余君

余君本今人而有懷古思三年臥白雲一醉撫流水握
管掃素箋閉門謝時事懶與今人交自號古山子

贈陳君

珍木無弱羽廣川饒勁鱗皇都鬱嵯峨多士如繁星陳
君在鄉曲少小馳芳聲去我三百里可望不可親昨子
志廣覽自越之燕京見君長安道一問知姓名却復訊
動止握手爲予陳自受相公知忽忽復幾春一朝去鄉

校今作太學生言溫動有禮志壯氣自信哲顏口若海
豐下而長身再往論文史終夕如倒囷藻思蔚以妍儼
與骨相并王良御八駿技絕物有神一日驚千里安得
留其行念子復南去攬策臨修程小見同越鳥祗入槍
榆群思君不能置短篇陳素情

戒舞智

富非聖所却貧乃士之常華屋非不美環堵庸何傷多
才戒舞智善閉靡不彰舞智向愚者弄偶於偶場偶自
不知弄爾弄何所償舞智向智者譬以光照光彼光不

受照爾照何由揚舞智兩不售不舞兩不妨請君聽予
言作善降百祥

寄彬中

鄴下老韋布能活刀下人魯連劇排難安得專其名不
見申包子含悽哭秦庭萬馬度關隴救郢却吳軍側聞
同心人急難等赴焚秦師不可出大義凜已明裁傾本
莫致安命以爲貞

答和公旦

高垣沼我驅棘刺長如荻松柏年十寸至今長五尺一

朝鎚籠藩小鷗決蓬翟忽逢東來鴻相煦以雙翼逝焉
渺長江別子當幾日不能偕我飛一顧一悲噫

雪

屋腐隙西椽密雪夜如織朝窺牀簟頭白粼高一尺側
身不敢搖寒籠戢僵翼伴侶同苦辛何從乞漿食

寄王子心葵

葵花似君心向日解違陰葵葉我所愧有足不能衛與
君夙相知把葵吳山時今日相思處南冠繫楚儼

寄陶工部

短劒在匣中秋水蓮花芒芒色豈不好終爲人所防所
貴金玉資含輝有餘光諒哉工部君璫瑜映明堂薰風
動九夏鳴音來鏘鏘至寶吐洪亮不特華澤芳沈思不
能寐攬衣視河梁

筠石篇

片石插寒塘冷冷箭竹黃誰提數寸管坐到一秋長我
亦耽清致傳聞今幾霜翻飛乏羽翼那得到君旁想是
莓苔綠坐令毛髮蒼疊膝嘉肺中望斷雲根觴今我操
題處青棘披孤墻日影淡無色十月梅早芳欲折以寄

遠無此長臂攘料理竹下人應少寒枝香

蔣扶溝公詩并序

零陵蔣先生者迅鷗鵬之遐翮秉龍蛇之屈伸
嘗欲頂摩青天手弄白日不着上下以栖混元
早歲妍精孔孟含藉六經故說有談空不詭正
道昔嘗出宰扶溝晚節薄遊四方挂冠拂衣如
漚在海雖隨光揚波於上代魯連高蹈於海濱
禦寇埋名於鄭圃先生放縱於吾越可謂閉戶
造車出門合轍者矣渭伯兄淮恬澹厭俗弱齡

訪道垂五十春元室冥奧未睹宮牆遭先生遡
舟閩粵放於山陰邂逅天緣值諸行道顧盼之
間疑謂異人遂數語浹襟懸榻彌月過蒙收畜
列諸僕御之徒旣而先生鴻跡遠曠再渡錢塘
期許後來意得執鞭長侍豈謂造物苛猛未更
寒暄伯已化爲異物烏乎陵海尙變人壽幾何
金丹未成玉顏曷駐渭每念此可謂寒心先生
哲人胡以導指南向耶頃者又將浮湘江並九
疑直指芝田家門一入渭於斯際能不依依夫

兄所師表弟胡不爾恐塵凡之姿仙聖所拒嗟
哉死者已矣生人去焉存亡惕心永以爲好異
日吸沆瀣之精景陟壺嶠之福庭飛九還之丹
火騎八極之游氣則天凡殊塗相見無日緬哀
伯氏重以離衷因獻五言

伯氏頗好道終歲事修服道上逢異人髭鬚灑林竹修
禮重致問德音美如玉扣之轉微茫焦螟游廣漠冀得
長奉侍雙飛向王屋人命安可期天猶互寒燠念別正
徂暑墓草已更綠灩灩日中霜亭亭風際木逢師苦不

早煉攝總成哭

柳浪堤楚頌亭二首爲溧陽史氏題

夾岼千章柳青春翠浪浮如將曲池水共作遶堤流長
蛇偃青蔭水鳥悅芳柔試於垂縷處一繫木蘭舟

又

屈子頌匪今軼也志空寓千載伊誰子后皇錫嘉樹曾
剡刺崇檐青黃揉廣阼

見離騷

永與茲亭留不遷乃其素

昨見

昨見食偶者析偶以爲薪零星椎股脾寸尺移尻腎心

曾本無有斧亦集其垠辟彼偃師工立剖瞬者身彼偃
師者析庸以免其嗔免嗔豈得已爲薪豈無榛何忘食
女德辛苦二十春食偶者答言當其爲偶辰我卽薪視
爾爾自不我知我志如此矣我欲爾也歌爾卽軒厥舐
我欲爾也舞爾卽蹈厥趾我怒爾唇闔我笑爾唇啟凡
我所控提爾卽如我自爾自不覺知昧我蓄薪志

偶也

偶也難億詐爲魚豈無知假令魚爲偶亦安避薪爲此
亦豈無謂聽我歌此詞當魚在沼時沼濶不容坻沼旣

不容坻研復朝洗之洗多墨豈少墨積盈沼池從此再
三洗喁噉恆在茲唇外無滴瀝縫唇墨卽入何況相沫
唏君在大氣中塞海皆氛霾君今口與鼻能免不埃噫
蘇武在虜中磕頭皆羊羝死生憑羝輩起處亦羝隈豈
惟起處隈嬉寧謝羝嬉君儕人如此而況我也魚我聞
君里諺契我魚也志非伴情所知事急隨則隨

狐粉

狐妖幻黛粉窈窕美佳人慕予且宜笑情好緣相親物
與人異調孰識僞與真荅予以慇懃靡曲匪好音魅也

一朝敗情歇音則存我欲灰茲音匪乏煬與薪譬以寶
貽魅寶既不我存何由奪而燼存此貽魅曲以不磨魅
愆

補屋

僦居已六年瓦豁綻椽縫每當雨雪時舉族集盆甕微
溜方度楣驟響忽穿棟有如淋潦辰米麥決篩孔五月
候作梅一雨接芒種菌耳花篋衣爛書揭不動樵子不
上山薪炭貴如礪生平好樓居值此念愈踴數椽猶僦
人安得峻櫨栱買瓦費百錢已覺倒囊籠命工勿多攤

行三集卷四
廿
擘艾聊救痛

作松棚

種松六萬餘千五百株活長養二十年大者僅如括西
齋落日多六月苦炎熱鄰園樹木稀遮翳不可得顧言
種樹資求用此時節命兒召兩傭伐幹并其鬣幹以需
柱梁鬣以備周匝四垂慎勿卑涼風任超越時移一丈
板獨踞文竹兀伸紙二丈餘舉墨陡一潑左盤持蚌螯
右罍把饗饗挂衣梅葉梢綠陰灑晞髮

理葡萄

去冬雪作硤無物不凍死橘柚斷衢州松柏亦多瘁園
有月支藤盤屈四五尺結實苦不多一斛有餘委迨其
堪落時丸丸挂璫水一日十挈竿與鳥爭啖舐將以餽
隣翁竊恐哂微細欲以付果坊不足一飡費幽之瓶盎
間漿潰敗其脆渴夜艱茶湯暫可灌消肺比者理舊須
應手落枯瘁及至更提攜僵梗忽斷碎如人兩手足而
痿其一臂支幹旣以孤收獲焉可倍夏景苦桑榆聊以
障西墜

刈圃

草蘖始一寸及壯丈有餘豈直藪卽帶兼以館蚊胥夜
熱不可寐寧止不露居竊恐值此輩股髀遭其咀就中
擬厥罪蚊也尤其渠其他不出境惟此遠追趨穿幃眇
紈塵打撲不勝飭更番以迭進安得盡屠誅聚響苦不
震萬穀啾嬰雛工者攬夢寐一夕百起呼蚊蠶固莫道
草實主其逋呼童問腰鎌不用安所須薙此忽如掃一
翅不得儲譬彼塞垣莽往往伏戎胡打冰燒其荒窟穴
空妖狐莫謂野人賤刈圃非雄圖

鼃磯研

研封石鄉侯喻麋墨
也新樂者青州王也

向者寶端歟近復珍鼉磯在海感蛟蜃文理多恠奇白
者爲雪浪星者黃金泥碎者銀作砂角者絲纏犀舉手
摸其理索索鋸響飛分符軍石鄉庸以鑒諭麋曩者辱
新樂遠寄青州來一夕忽失守仍召頑滑資一字十研
磨一行百推移淹此斫陣馬羈控不得馳乃者董文學
匣有方尺儲舉以爲我贈與新樂不殊

問軍中之系於國用

吾宗兩支其一雖衰而時一
振尚有召對于朝廷而仕者

最衰者則
我之支也

五宗異秦嬴秉德嗜仁義縣延值盛明仕版頗齒齒先

人秉魚須聯蟬及諸季列秩下大夫往往有三四追及
賢科書至今時一綴萬木有榮凋一體互強脆屈指四
紀來變痺劇一臂耕者鬻其鋤賈者降爲僧士者無一
人傭者倚而待飽者幸免饑饉者幸未可至論允嗣間
十室九蜂薑墓寢蒸禰時顧影兀孤介甚者乏繼承餒
鬼滿蒿碓余雖有兩兒性頗仇簡冊飲牛未渴辰按項
不能俛緣茲傷後昆思欲譜先代念彼從戎人蔓遠瓜
尙帶况值用也來舉扣其大槩彼衰更倍茲擲筆爲一
慨

避暑豁然堂大雨

梅候苦歊蒸幸得五日霽涼風驅濕魑奏功未全濟眷
言高山顛有堂敞西翠松篁作籟竿蕭颯爽神智乃偕
二三子挂絺於其地買酒穿市中炮鼈腥道器止取醉
飽爲安能謹趨避祖跣擇樹依叫號枕磚睡郡邑迫東
廂狂來忘邏逮冉冉日將傾理筇方即邁雷雨自西來
初尙雜晴蜺一言未及終振瓦落簷外衝風捎健鶻寸
進得丈退高景殊卑觀竄鳥在眉際本言迺炎苛翻令
咏奇致百事兼熊魚往往非着意

哀駱懷遠公驗詞

懷遠好詩什近體有佳聲遲余去五泄深衣遠相迎長
身而瘦頰自有山澤清命酒不停竿酒罷有餘情迨予
歸來後往往問寢興翫肩腊松火柿縷霜秋晴寄此遠
筐篚兼致倡與賡何時臥狸首聞之使心驚道遠不得
往逋此泉下羹

野蠶

越桑雖云盛不及吳中繁越女賣釵釧僅可完蠶山如
斯苦拯救良亦可憫憐如何野蠶種孳息多今年曳絲

滿郊郭食葉留其觔葉葉如蟲網枝枝垂釣緝涎縷無
所用膠衣黏頭巾過者苦拂拭桑女交攢輦提筐往西
園空手歸東隣卽欲買釵珥有錢無桑材嗟彼機上杼
秋來鮮聞聲匪來猶可說國輸良有程衣食無二理蠹
衣與食均嘗聞捕蝗法及此同瘞焚

范母詩

卽燦母

秉節三十年萬有二千夕一夕改霜心曉鏡換粧額范
母二十二獨居在羅幕五十七乃亡天長日幾落獨持
一寸冰萬古膠夜席當夏不得融何況秋霜白

白鵬

錢子易書故曰王孫蓋鏐之後也

野性悅鳥魚客寓尙籠致正如好竹人借居亦栽蒔鵬
鳥自南來貿入西河里王孫好法書籠以易吾字墨絲
繡雪衣綠蜀作襜帔有時嚙喉中鷺若嫺雲際日夕湖
水波秋樹葉微紫送客不出門白玉掃長彗

越王崢寺有僧歐兕蛻

伯圖旣灰寒衲蛻亦禪冷都付塑工泥迅矣千秋瞬我
來值桃花有似蝶遺粉一宿歸去來晨齋飽蔬笋

子效索贈其兩叔

勞子爲我言翁去不復活骨魄既已寒生事亦不熱多
我諸父慈視侄等見列時時惠釜鍾廚中作糜啜

送章蒲圻之官

嘉禎

傾蓋語日斜肉風吹雨竅惜哉越雞翰遇鵠不能抱眷
言激獎私忽駕就遠道尙矣漆園心爲吏不敢傲

柳元穀以所得晉太康間冢中杯及瓦券來易余
手繪二首券文云大男楊紹從土公買冢地一
坵東極闕澤西極黃滕南極山背北極於湖直
錢四百萬卽日交畢日月爲證四時爲伍太康

五年九月廿六日對共破剪民有私約如律令
詳玩右文似買於神若今祀后土義非從人間
買也二物在會稽倪光簡冢地中於萬歷元年
掘得之地在山陰二十七都應家頭之西尙有
一白磁獅子及諸銅器銅器出則腐敗矣獅尙
藏光簡家閩有黃克審

遙思冢中人有杯不能飲孤此黃克審伴千三百稔券
鎚四百萬買地作衾枕想當不死時用物必宏甚尊疊
羅寶玉裹袂賤繡錦豈有纖纖指捧此鍛泥蕈存亡隔

一坵華寂迥干仞活鼠勝死王斯言豈不審

又

古人笑不飲此說豈無見五斗叫劉伶哀來淚如霰嗟
彼太康子冢中亦杯坵固知好飲徒無咽可澆嚙杯出
黃土中忽復受傾灌譬彼避秦人乃不知有漢我欲學
盧充詣市賣金盃庶幾遇小姨知是崔氏玩

送蘭公子

阿翁學師
也揚州人

耶溪芹藻色相伴秋荷老公子竭重來傷心那可道會
日苦無多相別一何早八月廣陵濤一葉渡殘照

夜雨偕友人進舟雲門

夜影疊中流進舟篁竹浦鳴雨來斷雷山雲濕可譜及
岼沿黑堤攫猪復愁虎燎火得緇徒怖餘澁言語芋爐
聊炙衣一笑賴尊俎

天目獅子巖

巖是高峰禪處相傳嘗爲張真人所據師爭而有之張道陵與魔爭青城

事見其傳

我昔聞真人言修不死身選地滿天下與鬼爭青城一
岫插天目宛爾怒貌猙老釋據其口黃冠復來爭黃冠
匪他人云是真孫聃曇本上聖高道超沈冥說教雖

異軌俱以退讓名區區百尺鐵青紅抹秋榮龍女買色
線一夕繡可成胡爲兩龍象角吻同蒼蠅賦此覺蚩蚩
鑒之慎勿聽

燕子磯觀音閣

青山如美人樓觀卽奩粧若無一片鏡妙麗苦不昌茲
石一何幸值此江中央上乘巨構支下集帆與檣朱碧
得水鮮鳬鴈拂波光煙霧不見海神去萬里長我與三
友俱兼以僮僕雙日西買市飯半道謝驢羶五口將十
足蹶然餒且僵百錢成一遊安得甘旨嘗歸來之燈燭

微雨沾我裳沽酒不成醉頽然倒方牀猶夢立閣中遙
觀大魚翔

野火

馬血爲轉燐人血爲野火何爲松柏間赤輪陟如跛人
言鬼炬微神者赤而大騶導向空馳填雲盛旗馬枯冢
僻且荒來遊則云那我欲往詢之恐卽無可話隔河聞
於菟黃犢夜在野一夫呼以馳炬滅松露瀉

鷹

味嗽相鷹書
也出雜俎

味嗽識奇才千金買遼海纖翮睽秋空駕鵞百迴敗雲

中作戰場韓彭鼓天外

馬

誰家連錢驄
挹撥黃塵起千里
一飯間九州能有幾健
兒不得騎淚落青芻裡

犬

少年獵平原
左盧右宋鵲
兔起鶻落遲一顧
先已搏但
莫空中山前頭有湯鑊

狸

狸雖一尺軀
猛氣制十里有時怒一號
無牙墮梁死安

得此輩來坐吾書匣底

俠客

結客少年場意氣何揚揚
燕尾茨菰箭柳葉梨花槍
爲弔侯生慕騎驢入大梁

麗人

何處行雲去遙遙出洞房
月裏儻並色鏡中無此粧
所思望不見綃袂日邊揚

才子

佩筆不須長高唐侍楚王
紅蘅槩邊出白雪口中翔
殺

青供不及一夜白瀟湘

酒徒

御史別淳于金釵墮長夜五斗不濕唇雙鬟抱爐瀉笑
殺斗升腸耳熱索竿蕉

遊大尖

松茂桃
復盛花

萬松滴千山妙翠不可染割取武陵源固是天所遣秦
人跡無有雲中叫雞犬夜泊漁舟來下山尋不見

空上人常住少林索作於菊下

相逢菊花下相映菩提光試問少林壁穿雲幾許長指

月莫盼手擲拂閒挂墻睡鼾微作吼獅子一時降

宗孫有別字柱南者索賦

天柱山
在城南

天柱插南雲孤城滿蒼翠小鳳讀書餘內屐窺粉雉大
魚作鳥飛風穿萬林鼻舍北以圖南物與人意會念彼
共工額幸不觸斯際不然小折傷恐煩太皞妹小鳳顧
予言補天吾掉臂

上冢

吾叔邵武公當年與我翁雙陪聞蜀守竹馬走兒童歸
來知幾日相繼歸窰窰黃泥閉雪髭欲會那可得叔家

城北居高棟亦彫題邀賓夕駐馬爲母日烹雞一朝桑
海換不能保子孫負薪冢上道養鴨水邊村我今六十
五仍高破角巾年年上爺冢每每到孫家孫家留我坐
孫婦辦湯茶以我上冢牡啖孫且滿引遶籬黃蝶飛抽
籬高碧笋起視檐西東分簷住蜜蜂問蜂窠幾許四十
還有餘窠窠如不敗勝我十畝租

鸛攫鵲雛鷹黨翻然來救

水鳥修其脰插彼茄菰澤俛啄蝦魚深不下三尺況
乃噉中倉可內寸鱗百江海饒此州何往不充噉雄鵲

知乳雌作室高樹末三月始罷斤是予親所炙長脰一
何饕掠雛剽其宅叔仲兩三頭自竄寧顧伯顧鵲翁與
母叫噪徒額額蒼鷹等路人與鵲少平日不作鄉隣看
被纓救其格特恐李陽拳難螫鳴垤額盛邀爽鳩雄並
是夷門客朱亥袖鐵椎侯嬴出奇略左右信陵軍一舉
解趙壁五國破大秦九合成小白義高誠足憐多筭亦
何碩磔虺黑柏顛獨奮少犄角猶煩拾遺歌不朽俠徒
迹三復鴟鵂詩白日爲儂黑

感鷹活鵲雛事困憶曩衛衙梓巢鵲父死於弩頃

之衆擁一雄來匹其母母哀鳴百拒之雄却盡
啄殺其四雛母益哀頓以死群凶乃挾其雄逸
去

鸛婆止一時古語亮匪誣戟門巢梓者狹斜挺羅敷少
年繫青絲蹶張戎侯衙胡不自長守轉殪雪色顱乃向
琴瑟杪落此貞女夫群雄太無賴挾鰥匹子都有如惡
媒姆送贅填門閭借衣盛絳蔡叫呶傾百壺玩習爲故
事指鴈翻濶迂孰知狹斜內而有羅大家賊雄殺黃口
希以威怖圖殉夫義可族何計收其孥此事去已久三

紀頗有餘其時裂肝膽狂走日夜呼安得毛摯俠似此
鷹活雛弇州隔幾海有物暗高梧

設爲魚蝦所詰

啄鵲憎大鳥無恠吾子然從臾飽蝦魚子意一何偏鱗
卽賤於僦於羽何擇焉盛冬水如石膠鬣不得旋孕腸
急輓鼓張目不得眠菱菰芽始白桃花漲春田熨塊出
纍瑣多死漁者筌鱗裸及鵲鷖較估誰艱難矧茲網罟
酷百倍鳥有鷗雛攫子不許鱗爛子許旃乃乖漆園理
奪蟻與鳥鳶等爲一盜耳何猛此彼寬竊東子則許竊

西子拘鉗波臣詰如此而我難爲言衆生遞吞噬此業
何時捐西方古先生解破萬壁堅龍門儻罷躍飛去好
相叅汝或未卽去我姑代彼宣三戒嚴重殺五淨肉亦
權鵬飽六月息孝先腹便便

天竺僧

楊帆三竺淚弭錫五羊城黑人初以涉琉球次所經波

弧十五兆日矢九千羸

初至黑人次至琉球至廣州凡涉三萬里歲三周以弧矢筭之

得此

人疑鵬六息彼視螻一信衍旣隘九土師亦眇八

垠片楮畫大卵沃焦黨孤萍劈芥內閭浮粉塵陋虛鄰

鐵籠臥龍象銀瀾恬蛟鯨梵唄隻字掃江海百谷臣云
胡白氈底乃有赤篆文象宵幾何譯龍樹鮮悲唄挂履
度蔥嶺跌湫蛻巖雲投夾戢南寺乃偕領西昆漏沙白
箭準聖水他濤奔有爲乃復爾無量何由臻相色示戲
幻接引詎勞塵白馬幸維寺黃龍未演輪薄痾阻問訊
擬待桃花春

煩吳伯子治墓堂

火瘞世曰凶水封豈佳卜兩徙踰五紀先魄偃幽瀑多
子爲我更我遽往京國買石百尺餘托子安墓卓子亢

辦未遑我歸上冢哭鵝魴設未已老雅掠貍肉候果墓
旁兒指告蟻上燭草設無威儀人忘物不肅坐此無歡
期改燧十二木乃三年也昨者賣字錢募工可五六仍以煩
吾子歇百了一役

旱禱十七韻次陳長公

旱魃虐以猖商羊乃深避雲漢夜昭回遵彼槁條肄絕
意豕涉波必死蚌持翠蜥蜴山澤窮貍豕屠賈致黃縑
遞唄詛元冥等聾瞶如聞柴望禋感通有精義洪疇儼
恒陽繇露肅常饋商林沃乃深秦天豈終醉壇今隣閭

闔闔亦撤幽閔雷吏綠章封寧有不達字油然未崇朝
沛爾脩濡遂虎貓效蜡勞豐隆讐群崇連臂解桔槔極
目醒枯悴歌帝悅穰穰報典虔惴惴窶人無農憂連夕
美涼寐農獲譬中行美寐狷其次糴賤勝作農先生有
酒食

陳長公餉日鑄茶瓦窰港銀魚白下法炮巨鼈夜
酌深談次其韻

日鑄標槍芽月團捲旗避纖甲赭舊條柔針綠新肄瓦
窰五寸銀脊色偃微翠雙裙謔可談九肋底能致伯云

準食醫治以聰我瞶斟炮法內京酌長非外義珍此五
侯鯖慚余十漿饋主旣唱無歸客顧稱未醉階蟲先秋
吟徑竹上霄闕叔夜寂鳴琴子雲寥問字待扣匪洪鐘
立涸是盈漣泗鼎曠沈淪神姦恣精崇伍員終鴟夷三
閭竟憔悴白駒返谷空黃鳥臨穴惴千古究何窮再燭
不能寐曲禮問更端梵詮編復次伯槥旣已空吾出吾

簞食

伯子近
稍重聽

修拄杖首修髮網膠漏磁壺及哥窰甌某亦病隻

耳聾次前韻

猾器幸自殘黷繇巧規避辟諸鞅掌人彼逸此獨肄一
竹楚啼頰雙磁越密翠物非人易求道遠我難致無丞
有重聽髮覆彌黨贖約髮無紀綱晨帳缺宋義握粟付
驥工寧減朝食饋詎意彼驥者無往不辭醉桴纓高箱
塵馬尾枯橐悶踉蹌攢八針邀呼輸四字浪言伏卵清
竟滌下流遂櫛束起鬢鬆嘲呼免臚崇竹返磁亦歸黥
補色終悴注瓦智靡昏捧玉神若惴甑破視何益囊空
臥安寐辱卽寵爲下

老子云寵辱若驚爲下孔云其次
辟色色卽禮貌之衰也其下則饑

餓受周近
豕交矣

辟乃色最次屠門盛豕交寧爲愛而食

旱甚久不應禱再追前韻

祝融黨義輪元冥引車避課窮燧人蘇徵及棗杏肆轍
鮒槁厥頰壇緞禿其翠走索華陽逋沈瘦永難致竟辜
燒尾恩翻仇瘰角贖玩惕如不聞曠瘵秉何義余齋廢
酒沽朋祭阻肉饋方嗤澤畔醒敢思河朔醉承風獨有
雌納月幸無閼哽哽向隅悲咄咄作空字朝廷聞客云
宵鋤盜隣遂雲密不東郊棘孽復西崇昨矛凜今靡舊
殍理新悴漸少播乞驕而多褐犬喘待盡歌有爰無叱
祈尙寐感此疾威旻遣以競病食

送友人

寒風夜中起游子朝作客河流一尺冰屋瓦三寸雪君
把轡與鞦觸手冷於鑊此時山中人覆絮敗毛褐欲寄
寄莫由此意共誰說

送王雪漁北上

惟陰所佩劒不審值何許佩劒以釣魚於義亦何取一
日幾垂竿竿竿可幾鯉叶乃至捐漂廚庸以益漁腑我
取魚之劒聊略爲漁估卽非百金資可易數月黍漁也
智絕倫何獨昧茲舉腸饑乞可爲劒去何所仗之楚復

之漢漁並仗劒往可以負漁竿踉蹌見劉項猝辦恐後

時載質先出疆

叶上聲

王郎不釣魚故亦無竿餌聞郎所

持竿貫以山中紫毫長一寸餘竿只五寸止居則南狎
越行則北聳燕淮陰劒三尺郎劒五寸縣歸來報千金
漂母是何人封侯劒不取却取釣竿親

吳季子餉我細腰壺蘆石上芝

葫蘆老細腰乃似細腰女卽令楚宮來今亦不堪舞我
聞方外醫庸以盛藥九梧子及魚眼可容百萬千老圃
畜蔬種亦夠一頃田我旣醜醫帳亦復少蔬阡擬挂於

扶老支吾五岳顛心強足不健終歲掩帳眠止取作蒸
鵝聊以謔客涎

又

芝朶雖不潤芝色堅且古根鬚絡拳石如筋蝕臂股絡
古不復脫初芽寧藉土石色旣已黃芝紫亦稍嫵有如
意魁梧狀貌乃婦女穀城弔老人淚下潛如雨置我筆
研間長與留侯語

大寒嶺啖新胡桃頻婆諸果

北游作

天險旣已異地產應亦殊胡桃及平波朱碧明椒隅入

夏而徂秋葉翠尙不渝但少鳥與雀而多羸與驢易水
非不邇灤河不爲迂但求一寸鱗如海求猿狙遙想燕
太子食客焉得魚以知荆高徒日嚼羊與猪猛風增食
肉嗔憤易雖盱慷慨赴秦庭不復顧其餘乃緣謀略短
豈真劍術疎舞陽一豎耳何乃與之俱哀哉樊將軍空
割一隻顱國有千乘大能用王可圖乃恃五寸鐵爲計
亦何愚

往馬水口宿煙麓陀庵

昔從良涿行茲山在雲際昨夕宿茲山雲乃出衣袂四

徒夾一輿兩膝拳至鼻一里轉百盤鋸牙不得直結葦
以爲廬削木冒金髻夜鐘但超懸晨雞聊一嗜巉巖旣
高騫嶺岼復孤厲回思燕趙時築城遏胡騎安得盡如
斯脫巾開戶寐

湘竹一妙管付截壞其頂文

武侯敗街亭馬謖違節制兵穎迥不同大小俱是事茲
管湘中來百中其一耳有如玳瑁魚腦血徑彈子又如
鸞與鶴頂發楊梅紫全體匪不華獨此猶覺異詎可拘
尺寸但須存紋綺畏炎不得行付托昧厥旨舉刀一鏗

然顛落不可止持歸以復予魚鶴不成理對之一捧腹
削圓方竹比

口中

口中萬吞吐莫道一俗字芻豢離喙屑冰雪滿牙齒身
中百所爲亦莫涉一俗但爲鸞鶴翩暮卽雲霞宿有斤
不削人有繩不直木淤泥填大千荷葉自抽綠從此戒
爾後慎莫蹈往覆有如垂教言斷舌肘其足

騶虞

騶虞生猛虎鳳凰產梟鷲二聖有朱均太虛亦青瑩纖

纖妙膚理盎然長疣贅梗楠固鴻材鍾斛瘳其際橘柚
匪不甘豪蝟匝芒刺美惡一何殊胎孕乃非二越雞伏
鵠卵變之苦無計果羸秉何神蝟蠋乃能似

曇陽

曇陽一髻左道人三朵花誰云只是你安知不是我大
海徹岼冰小生沒處躲

又

聞道居縣竹看來幻落花團團輪北斗處處種西瓜遍
地皆祇樹何方不落伽

又

無鼻無眼孔有頭有尾巴蛟龍大蝮蜒蝌蚪小蝦蟆一
結生百結百些無一些

又

將軍騎健馬稚子打慈鴉各奔前程路都來暮鼓衙同
舟迷敵國驀面認通家

又

何事移天竺居然在大倉善哉聽白佛夢已熟黃梁托
鉢求朝飯敲鑼賣夜糖

又

明知騎竹鳳還道媚妖蛇可怨者落帽難饒者脫靴一
靈生滅已百吠是非耶

又

男女兼黃白丁寧囓再三特將鐵掃帚痛掃世姪貪竊
幸師與我不異青與藍

又

火龍長九九泥蛇八十一一物而兩呼兩呼只一物將
泥認外蛇見蜂硬割蜜

又

好人不在世惡人磨世尊聰明管自己闕冗任乾坤遺
命云聞帝多應是嚇人

又

獅子吼未歇蝴蝶霎已來衆生自矇矓抵死致疑猜認
賊由他去謗佛何爲哉

青藤書屋文集卷四

青藤書屋文集卷五

山陰徐渭文長著

公安袁宏道中郎編

七言古詩

贈呂正賓長篇

海氣撲城城不守倭奴夜進金山口
銅簽半傳鷓鴣膏刀血斜凝紫花繡
天生呂生眉采豎別却家門守城去
獨攜大膽出吳關鐵皮雙裏青檀樹
樓中唱罷酒半曛倒着儒冠高拂雲
從遊泮水踐繩墨却嫌去采青春芹

行狀集卷三
呂生固自有奇氣學敵萬人非所志天姥中峰翠色微
石榻斜支讀書處

三茅觀觀潮

黃旛繡字金鈴重仙人夜語騎青鳳寶樹攢攢搖綠枝
海門數點潮頭動海神罷舞迴腰窄天地有身存不得
誰將練帶括秋空誰將古概量春雪黑鰲戴地幾萬年
晝夜一身神血乾升沉不守瞬息事人間白浪今如此
白日高高慄不光冷虹隨日縈城隍城中那得知城外
却疑寒色來何方鹿園草長文殊死獅子隨人吼祇樹

吳山石頭坐秋風帶着高冠拂雲霧

陰風吹火篇呈錢刑部君附書

八山

側聞公遠臨江滸普薦國殤補化理之不及超
沉淪而使脫涓敷揚鮮才歡喜無量賦得陰風
吹火篇以獻附書別作四首兼乞覽觀率戲效
李賀體不審少有似否別奉唐集一部伏希垂
納

陰風吹火火欲燃老梟夜嘯白晝眠山頭月出狐狸去
竹徑歸來天未曙黑松密處秋螢雨煙裏聞聲辨鄉語

有身無首知是誰寒風莫射刀傷處關門懸纛稀行旅
半是生人半是鬼猶道能言似昨時白日牽人說兵事
高旛影臥西陵渡召鬼不至毘盧怒大江流水枉隔饒
馮將呪力攀濃霧中流燈火密如螢饑魂未食陰風鳴
髑髏避月攫殘黍幡底颯然人髮豎誰言墮地永爲厲
宰官功德不可議

楊妃春睡圖

守宮夜落胭脂臂玉堦草色蜻蜓醉花氣隨風出御墻
無人知道楊妃睡皁紗帳底絳羅委一團紅玉沉秋水

畫裏猶能動世人何恠當年走天子欲呼與語不得起
走向屏西打鸚鵡爲問華清日影斜夢裏曾飛何處

雪

暮天寶色珊瑚紫海氣結雲雲不盡瑤闕重關金鎖寒
枕席無歡帝妃死百神走馬散曹吏馬蹄踏空神各視
天孫纖手裁素羅纒帳橫施九萬里鮫人絲色光海波
海犀輸織一萬馱神人買賻不足用長鬟散綰呼諸娥
世人不解天上苦羅帳錦箏圍日暮換取貂襴拂玉鞍
起向山南射黃兔

後山先生集卷五
三
萬里比隣篇贈嘉則

白藤織笈春花密青袍剪水波紋濕出門寸步卽天涯
幃底牽衣絃正急關山斷路不斷雲吳刀割水那得分
章華楊柳弄舊色何地却少春申君人生遠遊須及春
青天能容七尺身芳草長途去萬里望望吾家隨處是

述夢

伯勞打始開燕子留不住今夕夢中來何似當初不飛
去憐羈雌咄惡侶兩意茫茫墜曉煙門外烏啼淚如雨

又

跌而濯宛如昨羅鞋四鈎閒不着棠梨花下踏黃泥行
踪不到棲鴛閣

今日歌

是年虜寇古北口入薄都城

琉球佩刀光照水三年不磨繡花紫換錢解向市中懸
我貴彼賤無人市家惟此刀頗直錢易錢不得愁欲死
客問此刀值幾何廣州五葛飛輕兩乃今求市不較量
但輸三葛錢亦止千人十往九不顧向刀長立折雙趾
一日不食良已饑兩日不食將何以却走異縣告長官
往日停車儻知已平生自有孟嘗心今日翻思門下士

二馬行

誰家兩奴騎兩驄誰是主人云姓宗朝來暮去夾街樹
經過煙霧如游龍問馬何由得如此淮安大荳清泉水
曾排兩嶽橫難羈尾撒圓毬驕欲死陽春三月楊柳飛
騎者何人看者稀梅花銀釘革帶肥京城高帽細褶衣
馬厭豢養人有威出入顧盼生光輝去年防秋古北口
勁風吹馬馬逆走對壘終宵不解鞍食粟連朝不盈斗
將軍見虜飽掠歸據鞍作勢呼賊走士卒久矣知此意
打馬追奔僅得殼天寒馬毛腹無矢饑腸霍霍鳴數里

不知此處踏香泥一路春風坐羅綺

送蘭應可之湖州

梅黃雨霽帶陰輕送客西門驛路平
會多忽別疑且驚
愁心應手絃淒清荷花鏡裏紅
侵舫時共耽遊楫徐漾
思君茗溪若天上空佇清歌對誰唱

觀獵篇

并序

王將軍邀予觀獵時積雨初霽飛走者避匿予
從將軍諸騎士牽狗出太平門抵海寧沙上頃
刻馳百餘里不見一雉兔而還乃割所攜鮮飲

月唐寺中

茅刀割水嬌紅茜風偃寒稍臥長堰青林疎樹隔荒墳
白水茫茫看不見將軍本是北平豪記得依稀身姓曹
怕向揚州作貴客慣從下澤驟鳴鑣萬里秋郊平似舸
千騎圍中一是我箭叫餓鴟龍騰快馬趁鹿逐麀解絛
挈鎖耳後生風鼻頭出火自來此州殺賊不暇阜鵬氣
銷韓盧魄墮昨見儒生衣長履大入揖令公揮金不謝
抽筆制詞轡弓輒射住釋挾屠刳牛食鮓外枯中腴無
所不可促騎請邀徵徒出野牽天莫遲見兔輒打儻遇

大兒一發斷髀爲先生壽引滿十竿健兒跪領將軍言
翻身上馬去如煙寶刀映日不足數角巾受風真可憐
淺草平堤水痕聚萬蹄避水移家去沙擁肥螯掠岸飛
絲牽小身當空乳漢將窮追路欲闌胡家甌脫避何難
今朝立馬祁連上不見匈奴一騎還

題侄子家所藏雙鳳鳴陽畫

海水動天天欲曉天曉日炙珊瑚老鮫人泣夜不得眠
早起來聽鳳凰叫梧桐百尺秋雲際竹梢覆水千年子
一飛一宿還一鳴百神張樂鈞天啟梧生誠亦難鳳出

良不易願以黃金鑄梧樹莫教飛向丹山去

畫鷹

聞南編練光浮膩傳真誰寫蒼厓鷺生相由來不附人
綠韝空着將軍臂八月九月原草稀百鳥高高兔走肥
煙中歛翼遠不下節短暗合孫吳機此時一中貴快意
深林燕雀何須避惟將搏擊應涼風誰貪飽鸞矜山雉
昨見少年向南市買鷹欲放平原轡凡才側目飽人餒
不似畫中有神氣夜來鷗梟作精魅安得放此向人世
秋風一試刀稜翅

贈歌者

東風吹雨楊花落清歌細遶鳴鐘閣斗酒將傾客不來
白日斜飛晚雲薄回腰欲舞不得舞試買羅衫倩誰估

對明篇

四明山高萬丈南爲姚邑面前屏北卽新昌後門障新
昌有客身姓呂要與此山約爲主尺素馮將一穴通屋
後安窓小如許窓中有時颯風雨說是山靈教送與夜
來猛虎嘯一聲雄心枕畔風吹去長安花枝高入天金
陵有酒多如泉花留酒勸不肯住歸來只愛窓中眠窓

中有書積萬卷書盡是山靈管有才無命不干時亦
對山靈同一莞聞道去年醉采石醉去狂來呼李白散
髮題書萬竹中騰身舞劍青天側此時山靈失主人自
騎青虎尋復尋肉眼那知神道至主人自識交親臨竭
來筆端自有神橫開醉眼雙作嗔此時墨雨添江水此
際詩花弄莫春莫春江水平無邊射策封書復幾年明
珠不遇賈胡識寶劍難酬夜色鮮詠諸漢庭方朔老如
聞永謝長安道况我今爲抱拳人蟣虱移家宮絮襖兩
人曾作青春身當時同說不同貧君今幸不爲樊鹿亦

似蛟蟠不得申蓮花之峰亦佳麗君胡中道相捐棄邀
我題詩對四明我自貪君百壺旨只恐蓮花嗔四明喜
我亦付之一醉矣

繼溪篇

海水必自黃河來桃樹還有桃花開試看萬物各依種
安得蕙草生蒿萊龍溪吾師繼溪子黠也之狂師所喜
自家溪畔有波瀾不用遠尋濂洛水年年春漲溪拍天
醉我溪頭載酒船一從誤落旋渦內別却溪船三兩年

北雲篇

君家樓北樓子山大椿千年去不還白雲一片松間起
游子相望淚如雨殷勤夜烏莫更啼東方日出煙生縷
賦得百歲萱花爲某母壽

二十年前轉眼事憶共郎君醉城市阿母烹雞續夜筵
夜深燭短天如水我母當時亦不嗔郎君過我亦主人
兩家酣醉無日夜鐔愁甕怨杯生菌只今白首二十載
我母不在爾母在八十重逢生日來雙扉况復門庭改
我今破網未畚然兩翅猶在彈丸邊郎君長寄書一紙
阿母多應贊一言上壽誰人姓張者圖裏萱花長不謝

阿母但辦好齒牙百歲筵前嚼甘蔗

楚宗室雞將啄蟻畫

錦葵窠下雄雞白黃蟻有翼飛終澁不應草葉更相遮
五寸荆軻千里隔王孫妙思快啖吞馬遷奇筆寫鴻門
當機對敵只如此翻令看者飛心魂

沈刑部善梅花却付紙三丈索我雜畫

長安街上塵如霧葛布眼眼風難度歸來掃溷索長箋
一束溪藤沈刑部墨漿五合飽蒼蠅刺葉藤花畫不
成門前銅蓋呼人急却是冰兒來賣冰乾喉似火逢薪

熱一寸入口狂煙滅自慚野卉不成妍刑部梅梢如拘鐵

送陳君會試

霜花作錢綴芳草折荷送客邪溪道荷乾葉老障啼鴛
不及梅花弄清曉折却梅花贈所知娥江東邊舜江西
封書七尺長髯客早晚長安白馬嘶長安白馬去如雲
杏花有情要逢君爲君留却花三載肯倩東風嫁別人
去年君來棘牆柵半醉不醉秋月白遺我海蚶顆三百
瓦溝一一瑩霜雪今年君馬向長安我無一絲挂君鞍
但飛一滴相思淚萬里隨風到杏園

天壇

高皇乘此馬夕月今誤用之
爲郊白雀事見酉陽雜俎

張公當時騎白雀下與高皇共斟酌一從九鼎向幽燕
碧壇空鎖琉璃斲古松舊栢黑成迷綠瓦從中一雉飛
揚雄不得陪郊祀空憶當年執戟時龍駒遠自施羅來
開平已死無人騎却付羽林誰健兒壓沙五石緩其蹄
真人雄心老更雄月中自控赴齋宮四十八衛萬馬
中一塵不動五里風黃栢太苦蔗太甘盛時文字忌新
尖當時作頌卑枚馬付與金華宋景濂

十六夜踏燈與璩仲玉王新甫飲於大中橋之西

樓

樹枝畫月千條弦十五不圓十六圓挂向酒樓簷外邊
南市好燈值底錢大中橋上遊人坐不飲空教今夜過
紅脂在口香在樓那能一個到壚頭青衫白馬無聊甚
望斷黃金小鈿鞦

六月七日之夕與梅君客生及諸鄉里趁涼於長

安街醉而稱韻得片字

長安白苧風吹斷銀河瑟瑟難成片楚人慣自唱陽春
一曲未終人已散西內湖荷沒鶴長裁笛不得只聞香

東方萬瓦寒樓閣月照金鳩琥珀黃

摩訶庵括子松下聽弦上人彈琴

上人號無弦云翰林人所與

括子松知幾樹黛色遙遙入雲際上人彈琴坐其底十
指引出七條水松清琴妙聽者寒松葉堆翠成高山流
濤遶殿撼鐵板獅子欲吼復不敢泛聲忽歇浮雲佐細
猱一寸猿騰去南園玉蝶隔花聽東海金鳩乘霧語頽
師一曲悲昌黎我亦聞弦別鶴悽悽來忽問無弦旨指
鳴弦鳴須答對是不是問太史

諱雪

一笠黃茅小草屋也巖巖一囊藿瘠儒也

梅花一夜窓中見，昨冬少雪春無霰。寒來借景苦無多，
窓小只須三百片。每舉枯杯對此花，只愁落盡是風沙。
誰知滕六雖無賴，亦遣殘綃縞樹叉。一行分向朱門屋，
誤落寒酥點羊肉。錦屏不使凍胭脂，飛絮落鹽絃上撲。
四條觔急冷鷓鴣雞，一二時中肉作圍。豈無一笠黃茅裏，
僵殺巖巖一甕虀。初起青蘋本亦同，大王畢竟是雄風。
總令受者自分別，難道青天秉至公。

白鵬詩

閩南煙雨迷青嶂，孤雌挾子飛天上。却憶羈雄不得歸，

兩槩深籠鏡波漾片雪長梢向尾分有時夢見武夷君
山長水遠無書寄不及南飛鴻鴈羣主人爲爾苦惆悵
開籠欲放非難放矰繳鷹鷂何處無萬里馮誰報無恙

握錐郎

城西南握錐郎醉臥人家樓上牀樓上女兒髮未長汗
脫胭脂浣午粧錐郎雙管鼾正急女兒一見走且僵走
向廚中喚爺娘認是西家老鵠鷄從來不亂雌雄匹定
是多爲麴蘖傷扶下樓層梯十二明朝說與都不記豆
蔻孤香依舊含葡萄千日如前醉我聞此語高其人有

迹無心那可嘆東牆桃花各有主肯使西家共個春楚
國才芳無宋玉東鄰如花女獨宿攀牆喚玉已三年王
對楚王堅可憐小臣不比登徒輩似隔銀河路幾千阮
籍酣來眼不青阮咸醒處大奔鶉借馬追姑生奪婢因
喪弔女哭無情哭無情笑有態倒千金須一買即使囊
空買不成韓香竊却未相應罷繡豈少倚市門且須濁
水澆乾唇投桃或可求連理贈藥安知不涓津烏雜配
獸亂羣卓軫鳳皇生逾賤韓塚鴛鴦死越芬青陵一曲
崩高雲

星渚篇

昨夕夢見張騫至今朝忽遇婁星渚同是天河往復還
可曾相識牛和女牛女迢迢河漢邊烏鵲爲橋半月圓
黃姑憐彼久離索折取瓊枝插作妍龍山盡處深波白
夜夜子來弄明月釣竿拂却珊瑚長波聲細作琵琶咽
此時子思橫不禁此際蕭郎繫妾心樓中刻漏滴復滴
月裏梧桐陰復陰婁子訝子醉欲去去買鯉魚長尺許
旣教柳葉出娥眉更取花枝催羯鼓鼓聲高急似鳴鼉
星高月落奈如何依稀鵲叫東方白爲作迢迢星渚歌

無題

中秋作

黑雲風搓成細索皎月天開空霽落雲索條條有時斷
月皎夜夜同君樂杯酒壺觴不盡興坐到天明復沽飲
彩雲五色月染成添護蟾宮桂花影

廿八日雪

時綿被
被盜

生平見雪顛不歇今來見雪愁欲絕昨朝被失一池綿
連夜足拳三尺鐵楊柳未葉花已飛造化弄水成冰絲
此物何人不快意其奈無貂作客兒太學一生索我句
飛書置酒雞鳴處天寒地滑鞭者愁寧知得去不得去

不如着屐向西頭過橋轉柱一高樓華亭有人住其上
我却十日九見投昨見帙中大可詫古人絕交寧不罷
謝榛旣與爲友朋何事詩中顯相罵乃知朱轂華裾子
魚肉布衣無顧忌卽令此輩忤謝榛謝榛敢罵此輩未
回思世事髮指冠令我不酒亦不寒須臾念歇無些事
日出冰消雪亦殘

題畫

南海荔枝我曾喫今見雙鸚奪殘一邊郎元是隴西人
乃能畫此南中物我聞南海之枝更絕倫却只聞之未

入唇不知雙鳥爭殘顙只是海南還是閩

鄭本白兔

噫吁嘻蝦蟇無翼能載羿妻宋鵲之捷寧不能飛人言
日廣千里月亦如之七爲樓臺三爲坻吳昱斫桂不得
睡帝命牽犬而獵之婁金之宿徒有光芒趙簡之翟旣
以贈將昱兮持手不得獵下呼鵲也騰蒼蒼玉兔告蟄
蟄不得庇宋鵲上天玉兔下地

沈叔子解菰刀爲贈

沈子報讎塞外行一詫便得千黃金買馬買鞍意不愜

更買五尺番家鐵鏤金小字半欲滅付與碧眼譯不出
細瓦廠中多狐狸京師夜行不敢西叔子佩之只一過
黃蒿連夜聞狐啼今年我從上谷行中丞遺我聊癸庚
買驢南歸只兩旬只愁馬上逢黃巾叔子見我無所仗
解刀贈我行色壯畢竟還從水道歸挂在蓬窓兩相向
一日十拔九摩挲鞘影鱗鱗人向河須臾報道漁罩外
電脚龍騰五尺梭

客強予畫十六種花因憶徐陵雜曲中二八年時
不憂度之句作一歌因爲十六花姨歌舞纏頭

亦便戲效陵體用陵韻

東鄰西舍麗難儔
新屋栖花迎莫愁
蝴蝶固應憎粉伴
牡丹亦自起紅樓
牡丹管領春穠發
一株百蒂無休歇
管中選取八雙人
紙上嬌開十二月
誰向關西不道妍
誰數關頭見小憐
儂爲頃刻殷七七
我亦逡巡酒裏天
昭陽燕子年年度
誰能鏡裏無相妬
鏡中顏色不長新
畫底胭脂翻能故
花姨舞歇石家香
依舊還歸紙研光
莫爲弓腰歌一曲
雙雙來近畫眠牀

予作花十二種多風勢中有榴花題其卷首曰石

醋醋罵座

洛陽城中崔處士花園麝起花妖至封姨十八太顛狂
石家醋醋新高髻醋醋能嬌百帶牢珊瑚枝上織鮫鮓
明珠似月搖難落冰住黃魚白鱔膠封姨身重不能斤
翻杯濕却石家裙初來競唱迎姨曲轉眼翻爲罵座人
朱唇粉暈山眉遠愁來皺斷春蠶繭石娘嬌小不辭觴
夜深潮淺腮紅軟金鈴不動仗崔徽明歲馮他十八姨
借問當時諸女兒可似此中數抹藍燕脂噫吁嘻胡蝶
灰黃蜂錐封姨之風豐隆雷問畫圖有與無十八姨胡

爲乎高陽酒徒燕市狗屠耳熱之後秦箏嗚嗚明日重
陽無錢可沽十八姨胡爲乎十指握鉤五白呼盧夜叉
子都同醉一壚十八姨胡爲乎

蟹

雖云似蟹不甚似若云非蟹却亦非無意教君費裝裹
君目裝裹又付題世間美好人奪冒略涉小醜推向誰
此幅難云都不醜知者賞之不容口塗時有神蹲在手
墨色騰煙逸從酒無腸公子渾欲走沙外漁翁拘楊柳

王鷺亭鴈圖

本朝花鳥誰高格林良者仲呂紀伯矮人信耳輒觀場
只曉徐熙與崔白崔徐一紙價百金風韻稍讓呂與林
卽如此圖王鷺亭云是剡溪雪夜人鴈兒一掃六十隻
何隻不落青天雲沙黃蘆白喜相逐逸者飛鳴勞者宿
不須彭蠡泛扁舟彭蠡湖今在吾目

畫百花卷與史甥題曰漱老謔墨

世間無事無三昧老來戲謔塗花卉藤長刺濶臂幾枯
三合茅柴不成醉葫蘆依樣不勝揩能如造化絕安排
不求形似求生韻根撥皆吾五指栽胡爲乎區區枝剪

而葉裁君莫猜墨色淋漓雨撥開

又圖卉應史甥之索

陳家豆酒名天下朱家之酒亦其亞史甥親挈八升來
如椽大卷令吾畫小白連浮三十杯指尖浩氣響成雷
驚花蟄草開愁晚何用三郎羯鼓催羯鼓催筆兔瘦蟹
螯百雙羊肉一肘陳家之酒更二斗吟伊吾迸厥口爲
儂更作獅子吼

九馬圉人圖二圉醉瀕墮

王元美爲太僕卿時刻
穆王八駿圖形如蠅蟻

穆王八駿西馳去造父把轡爲之御此時八駿誰傳形

太倉老王太僕卿刻石嵌在卿之庭馬瘦尾尖了無肉
頸長筋綻抽蘭莖儼如蝘蜒緣壁騰謂之爲龍特無鱗
此圖之馬乃九匹却比八駿多其一骨聳肉勻亦奇物
老眼寧知畫者誰摩挲却是孟頫筆牧夫九人二人醉
醒者扶之醉不墜河南山東牧馬兒汗酒胡葱醉似泥
此時儻墮無扶持馬且失矣太僕笞

完淳篇

人索咏其別字

七孔雖外交誰令滑其裏一朝一鑿之七日渾沌死大
隗山上牧馬兒軒轅黃帝稱天師牧兒馮馬馬則擾伯

樂治馬馬生巧噫吁嘻海若太倉之米莊生濠上之魚
紀涓木雞之無敢應野老鷗鳥之忘其機葛天無懷差
可意盧敖汗漫長相思不周崩墮只下土破天一角誰
與補石頭五色爛如花女媧十筭高能許君不見朱提
着銅銀墮膺心銀之鴈知何限蜘蛛借雨許驪置絡緯
將聲混紡車巧則巧矣真則差鄭君號完淳陳君請我
說我謂淳之完辟彼雲中月自雲自月自掃除高團依
舊金蟾蟾

閩工某摹伯時昭君下嫁圖單于親逐之隨騎士

胡姬姬嬌而騎與單于竝
穉健可畏韞衣結束
文馬華旌及姬之靴帽
竝妍絢可愛而掌琵琶
者尤勝胡決不辦此李
蓋以意爲之取悅人目
馬三兄投賦賦之

毛奴索金嬌不弓貌取西施爲嫫母一朝遠嫁作閼氏
不及官斜一杯土奴也貌嬌故不真龍眠貌嬌相隔千
餘春朝風莫雪一萬里粉腮那得嬌如此故知兩貌師
彼此妍媸雖各別竝是以意而爲之人生觸處有不幸
東脫網罟西亦奔漢宮顏色不及天子知胡廷憔悴未

必單于終始相親近琵琶小妾百雙眉是胡是漢盡花
枝老羝夜醉葡萄酒遞人氊帷知不知

朱次公讀書飛來山羣彥過訪攜飲塔顛方拈六
韻擬賦雨至踉蹌而下漫聞次之

枕書小睡門開半客來就榻彈書喚攜壺醉客相輪尖
餓鶴窺餽攪雲亂僧厨沸酒百蚊飛雙棗沈茶紫繭微
酒罷書橫依舊睡夢爲蝴蝶別花歸

崧臺醋

辣鼻作犀向月叩便啣鼻涕一尺長十叩九低頭作鷺

才能一噓吸作霧積年糟蠱爛人腸雲從毛孔走大荒
一戰笑受糟酋降伯倫無婦堪詒左誰持五斗來賀我
戰捷知真却病不興敗少渠真不可西國葡萄那得來
吾鄉豆醞逐家堆黃公握曲千年返卓氏當壚百店開
新渦放水荷花白舊棧濺珠黃琥珀個個釀聞忉利天
人人夢到華胥國華胥國食醯醢生無歡死無哭孟公
紫菰賽黃獨綠臺大拇抽肥玉一澆一段魯微生閉在
春瓷餉醉人一噓一噓醉輒醒醒來却苦多煩惱醒固
不惡醉亦好

張旭觀公孫大娘舞劍器

大娘只知舞劍器安識舞中藏草字老顛瞥眼拾將歸
腕中便覺蹲三昧大娘舞猛懶亦飛秃尾錦蛇多兩腓
老顛蛇黑墨所爲兩蛇猝怒鬪不歸紅氍粉壁爭神奇
黑蛇比錦誰叩低野雞啄麥翟與暈一姓兩名無雄雌
老顛蘸墨捲頭髮大娘幞頭舞亦脫留與詩人謔題跋
常熟翁來索判頻常熟長官錯恠人

書茅氏畫

臺閣絲綸圖茅
老將贈一貴人

小李將軍固名筆輕描細染工如織若圖臺閣與絲綸

界畫便須三十日茅君揮灑無一塵只如此幅自清真
瀟瀟數點江湖墨寫出巖廊輔世人

附畫風竹於箏送子甘題此

送君不可俗爲君寫風竹君聽竹梢聲是風還是哭若
個能描風竹哭古云畫虎難畫骨

漁圖

何人畫秋色蘆花繡如組罷釣睡孤舟月滿瀟湘浦撒
網打魚驚雁飛釣竿閒挂冷魚磯醉餘正好割鮮膾恠
殺松鱸畫裏肥

壽王生

四十年前王國鳴紅帶編繩束髮青衆客對之俱含情
我亦把酒勸一觥欲引其答驕不應今來轉睛年六十
頭髮雖黑髭鬚白諸朋作壽鵝雙蹠我却龍鍾行不得
送省一格四柿朱令我自喫省我沽惜少方闌唱鷓鴣
方闌若在亦醜吾

沈將軍詩

沈以鼓吹
起行間

將軍者誰沈家郎學書學劍學漁陽呼臬喝雉疲夜場
月低日高睡竟忘軀幹雖小膽則强十年從軍官參將

殺賊歸來坐五羊明珠芡米側槃量買得綠珠可姓梁
一妻五妾愁專房廣西藤酒世無雙海南紅螺不假鑲
直錢雖少貴天生鸚鵡不談立酒旁文犀玳瑁細碎粧
龍腦一縷飛中央左縣翡翠玉蟲鬢右挂鏤金小鳳皇
迴身未步身先鏘盼影入鬢斜月光拽郎髭鬚郎吻張
大卮小卮響喉嚨池中豈少雌鴛鴦安得老鴿專頡頏
郎誰與歡思邊疆誰者換馬邯鄲娼盧龍將軍急才良
見郎謂何用不臧且試鎖鑰扼背吭分道密雲汝往當
漢家猛士守四方沈郎沈郎不尋常我思古人等雁行

吹簫者誰勃丞相

春野圖

北門之外多佳麗白水茫茫遶天際中有幽人春野翁
摘荷採芰紉衣袂春野讀書曾萬卷只今一字不欲看
只將元氣手中調不許紅塵眼中散昨者鑄鼎鍊九還
吾欲從之乞一丹青牛在田不肯語輕簑大笠天將雨
劉雪湖梅花大幅

梅花自是花中魁畫梅花者今數誰雪湖劉子故不俗
未畫梅花先寫竹花梅篠竹兩相於直榦橫梢鏤不如

最好片雲遮一抹尤宜大雪踏孤驢我與劉君相見初
較量長短將髭鬚圈花少讓元章筆發韎元章不若吾
捉筆呼煤將發韎閉門自不令人看須臾歇筆乃開門
一掃槎枒三丈絹我客金陵訪畫梅畫梅莫妙盛行之
劉君放逸不可羈一劉一盛無雄雌我今白日題梅畫
恍忽如夢羅浮夜覺來香風攪衣帶花下美人是何代
洞巖入鼈口有石杵石橋及石池諸景

洞梁高負泥沙惡一軀巧骨裹痴韎昨聞已是三十年
今夕張燈始捫摸初疑螺尾不可梯再進再折無盡期

魚腦別波枯未已蜃脚逢沙澁懶移人言此語得大槩
却須請君說細微桃根倒殭蟲嚙久蜜脾仄挂蜂歸稀
二洞三洞止一隙解衣臥洞身投鼈三洞之門曰鼈口蒼桺爛
斧或有人石橋浸影終無月當時蔣侯身不死一去親
賁五日米遙聞櫓響送江船頭上恐是錢塘水僧云洞巖寺及
田地俱鄉人蔣二舍其探洞事如此今鹽橋蔣相公是也避秦豈直武陵隈何事桃
花不出來星河作影當歸路疑是淳于夢大槐

蘭泉篇

白虹細細三千尺蘭荇葉葉垂青碧百草諸芳不敢吹

惟有湘洲杜若與之齊浴蛟飲鹿無不可漱齒洗耳隨
君宜

青藤書屋文集卷五終

青藤書屋文集卷六

山陰徐渭文長著

公安袁宏道中郎編

五言律詩

銅雀妓

重泉鎖玉燕闕燭繞金蛾君銷陵柏土妾斷偃松蘿薦
夢無雲雨留香別綺羅願爲銅雀瓦生死托漳河

出塞

漢將去堂堂邊塵靖不揚雪沈荒漠暗沙攪塞風黃虜

帳朝依水胡酋夜進觴舞兒迴袖窄無奈紫貂香

琉球刀

時客常山

客將刀出市云是大琉球海泛防龍合天陰聽鬼愁揮
空霜欲落脫匣水堪抽萬里烽煙地隨身去莫留

又

單刀新試舞雙劍舊能輪雨過腥聞血風旋雪裹身對
鑲歸思動挂壁蒯緱塵醉後時橫看終當贈與人

西北

西北誰家婦雄才似木蘭一朝馳大道幾日隘長安紅

失裙藏鎧塵生襪打鞍當壚無不可轉戰諒非難

又

金鞍七寶欹玉手控青絲人馬才相得風雲氣本奇勢
輕香易墮樣巧影難爲馳罷雄心在何曾斂翠眉

又

尺錦卽成裝當眉綰結方須與撒身手馳驟蹴風霜簷
影千門亂街心一帶長忽逢游冶子繫馬問家鄉

桃花堤上看美人走馬

和青霞君

一鏡圍湖水千峰遶梵宮大娘迴劍器小伎落驚鴻影

深穿柳日蹄響帶花風望斷梨腮粉紅塵一道中

春日過宋諸陵

藁葬未須憐生時已播遷威儀非舊典世代是何年過
客悲山鳥王孫種墓田回看隴頭樹似接汴京煙

又

落日愁山鬼寒泉鎖殯宮魂猶驚鐵騎人自哭遺弓白
骨夜半語諸臣地下逢如聞穆陵道當日悔和戎

孟后怨

福薄姑言信君難國事非官家儼平昔賤妾獨何依汴

水千秋逝山花幾度稀還憐先帝寵夜夜月中歸

竹月篇爲易道士賦

脩竹隱丹扉蕭蕭映月微林稠光不礙葉動白俱飛製
鼎看圓魄裁簫度羽衣翻經清夜永猶帶露華歸

寄尙賓因借石磬

南明棲息久凡著幾何書夜峽月生石朝窻雲入疏特
懸孤磬在時扣萬山虛自笑耽清物持來一借予

宛轉詞

宛轉一臂斷流落二喬輕覆水已無及通家如有情歸

來粧粉暗啼罷淚痕清莫道紅裙怯官家盛甲兵

湖嚴氏有二女其翁以長者許渭繼室渭自愆盟
頃聞爲海寇斷其翁臂二女俱被執旋復放還
便已作宛轉詞憐之後知其長女被執時卽自
奮墮橋死幼女放還亦死因復賦此宛轉詞中
覆水句正悔愆盟也

訝道自愆盟天成烈女名生前旣無分死後空餘情粉
化應成碧神寒儼若生試看橋上月幾夜下波明

順昌道中新晴

解轡投山屋束鞍聞曙雞風雲留宿雨花草踏晴泥曉
峽喧谿路春沙泛馬蹄遙知武夷曲只在亂峰西

十六夜宿葉坊玩月

昨照橋中閣今輝驛口沙清光迷魍魎冷暈嘔蝦蟆與
水浮諸海將山碧一涯春風正司令桂樹斲停花

杜鵑花

煙雨艷陽天山花發杜鵑魂愁數葉暗血漬一叢鮮正
色爭炎日重臺沓絳箋春風幾開落遺恨自年年

古鏡

後文縣志卷之
白日淘杯土青天射兩丸且須防薄蝕詎止鑒衣冠神
物含光易深山識寶難不知丘壑裏還掩幾冰團

陳女度尼

青春正及笄削髮度爲尼別母留粧粉參師歇畫眉幻
真臨鏡現生滅帶花知未必今來悟前身受記誰

金客

君是鄴兒非黃須短褐衣單身亡命去虜首賣錢歸業
曠家人棄門寒結客稀自知終有用窮巷且藏機

贈相士

節鉞下明州東隨一劍留帷中占勝色市上立清秋碧
眼胡僧避青囊道侶求相逢多幕客曾見李藩不

分賦得吳山送俞君還韻

吳山碧石頭雄抱浙江流大可興雲雨微還適覽遊常
登應結戀乍別不能留明朝翠色遠知爾在行舟

芸閣校書篇

薄霧靄香筒青紉走蠹蟲一梯陟劉向萬帙映楊雄鳥
下窺書古花飛綴字紅他年在天祿羞與俗人同

飲雲居松下眺城南

夕照不曾殘城頭月正團霞光翻鳥墮江色上松寒市
客屠俱集高空醉屢看何妨高漸離抱筑却來彈

送內兄潘伯海謁選

之人千里行言宴款郊城牽爾衣裳處紛予帷幙情見
兄兼念妹送舅祇攜甥明歲承恩日龍池萬柳青

聚法師將往天台止其徒玉公庵中余爲留信宿

玉芝

欲向天台去先爲剡水尋秋行萬山出夜宿一庵深燕
語調花氣猿歸帶講心年年石梁興送爾益沈吟

省試周大夫贈篇罷歸賦此

贈篇有天池欲化龍句 莓厓

十謁九不薦那能長作儒江光凌棄壁闌色黯歸繻薇
蕨求新主羹湯問小姑風雷亦何限終是惱凡魚

豐吏部公邀泛西湖觀荷明日寄作令與嘉則敘

父追和

吏部元耽飲良辰尊俎攜分明在湖上記得似耶溪別
浦紅裙漿垂楊白馬堤茫茫荷葉路共水入天西

賦得戰袍紅

時少保公得瑣暗刺製袍命賦

海罽染啼猩征袍製始成春籠香共疊夜帳火俱明自

與鵝旗映還宜
蟒繡縈戰歸
新月上脫向侍兒擎

嚴先生祠

碧水映何深
高蹤那可尋
不知天子貴
自是故人心
山靄銷春雪
江風灑暮林
如聞流水引
誰識伯牙琴

白鵬

少保公所遺

片雪簇寒衣
烏絲繡一圍
都緣惜文采
長得侍光輝
提賜朱籠窄
羈棲碧漢違
短簷側目處
天際看鴻飛

初入京瞻宮闕

域中夷夏極
天上帝王家
西內宸居逼
南都鼎地賒
烏

啼御溝柳象散閣門花昨到貧方朔封書載幾車

來青亭

畫棟將雲遶修簷傍漢開亭非邀翠入山自送青來遠
色虛難寫遐觀縱未迴共言春景麗不見使人猜

元旦與肖甫較射

烟光海日曛青帝早司東候轉弓猶勁標疏的略紅耦
鸞雙月吐長臂一猿通本是無爭者心知此際雄

季長沙公哀詞

彭山老師

槐樹宛低迴猶疑講席開死因雙宿去生爲六經來遶

瑟飛春水傳燈暗夜臺三年更築室未了獨居懷

懷陳將軍同甫

時鎮滇漢鑿昆池於長安而將軍親見於滇成一笑矣

飛將遠提戎翩翩氣自雄椎牛千嶂外騎象百蠻中銅
柱華封盡昆池漢鑿空雁飛真不到何處寄秋風

鈕大夫園林

按察公石溪

萬樹梅花國垂簾試一凭高樓烟欲暮遠岫雪將晴帆
舫時時渡溪橋處處橫若耶無限景都有此中情

送高叟入燕

橫山

少小幽燕客重游白髮多人欽舊然諾客和古悲歌紅

葉淮流舫黃塵沛縣騾向來沽酒處留得幾嬌娥

背樹

背樹零宵露羈魂斷曉鋪正當愁盡地誰遣放啼鳥拭
淚身仍繫酬恩計轉迂應勞垂老魄結草向冥途

賦得看劍引杯長

高會莫匆匆魚腸把似公睥睨寸心在慷慨百壺空客
散平原夜波寒易水風秦讐不能報淚落酒杯紅

賦得暗塵隨馬去

春夕麗春燈芳塵似有情難隨羅襪緩却逐馬蹄輕高

縷迷鞍淺低光影澄平酒家莫留繫一夜遍都城

賦得芹芽

青春曲水湄芹吐小芽滋在野未堪摘獻君知幾時暖
風來燕子寒食伴棠梨一夜休教老留尖煮鱸絲

鎮江

落日挂城角孤蓬憇水窻草長交浦斷潮大入河降筍
蕨辭鄉飯櫻桃過鎮江吳船夫婦唱十曲九成雙

王山人丹房

漁鼓或作愚鼓

時房在何所宛在水中央丹竈泥初濕紅顏藥正黃菱

花歸舫亂荷葉過人長一自彈漁鼓陶陶醉幾場

仲春李子遂季子牙史叔考坐雨禹跡寺景賢祠
中醉餘賦詩並用街字子遂來自建陽一別數
載

病久不到此荒祠草上堦陰晴連日異閩越幾年懷夜
梵潮三丈春酥雨一街梨花無月處有客醉金釵

法相寺看活石

蓮花不在水分葉簇青山徑折雖能入峰迷不可還取
蒲量石長問竹到溪灣莫恠淹斜日明朝恐未閒

侶琴篇爲趙子賦

豈無蘭蕙好獨結嶧陽桐養鶴多因爾遊魚亦爲儂風
雷縣一壁山水伴千重一作梅花弄都令雪滿空

寶刀詩

雙鈕黑銀鏤來從大土酋絛絨結蠻女鐵色照并州不
惜金千鎰能縣水一溝牀頭好珍重兼許茂先收

答謝上谷諸公

一客宣城鎮真多地主良停車松樹下投轄井中央紅
燭籌枚滿蒼毛塵話長別來知幾日柳色滿紅墻

書箴贈顧鴻臚

廿載神交後尺書長跪辰
涸魚幸不死閨月亦徒春
碧柳深高館紅雲近侍臣
相過不能數叔夜懶方真

王口北見遺貂帽因往

制伯貂冠而玳蟬

一圍消雪遠兩翅辟塵賒
朔北凍殺馬遼東買斷牙
錦筵津頰玉深戶擁腮花
一罩山人幘徒遮鬢髮華

納妾詩

角枕覆衾長新香異舊香
昔年曾射雉此日復求凰
杏靨開春鏡鴉雲換晚粧
夫君莫早起初日未高梁

駿霞篇爲天台黃子賦

燕市千金駿天台一片霞持將兩神物較許大名家每
過愁驢直言歸必日斜御河生隔斷楊柳暗宮鴉

梨

潘家大谷梨見潘岳賦及柳子厚詩近河間以
黑瓮獻其膏入京梨有一種名鴈過消紅而瑩
班班似犀下咏物
十七首俱用正韻

潘家大谷梨今遍九河堤接樹冰千鞠單顆水一提馬
馱香黑甕鴈過脆紅犀未怕相如渴王孫儘翠眉

杏

蜜甘人享蜂徒自苦杏甘則蠹
杏徒自苦不若苦李之自全也

杏有海東紅珍高百品中色來先壓市子大欲沈籠釀

苦蜂何爲人甘蠹亦同道旁繁李樹好去問王戎

李

閩有夫人李洛下
有嘉慶縣李並佳

閩種夫人異燕枝嘉慶同蹊堪爲李廣核可付王戎碎
玉當唇綠飛錫遶臂紅歸來憶滋味能得幾時醲

頻婆

一名平波

石密偷將結他雞伏不成千林黃鵠卵一市楚江萍旨
奪秋廚腊鮮專夏盃冰上元燈火節一顆百錢青

胡桃

燕近出雞頭子
頗佳而價亦踊

羌果薦冰甌芳鮮占客樓自應懷綠袖何必定青州嫩

玉寧非乳新苞一不油秋風乾落近騰貴在雞頭

白櫻桃

櫻桃琥珀珠一樹忽磈礫入袖迷吳苧如珩信楚書朱唇嘗處訝翠葉凍邊舒欲問丹陽鳥曾銜此類無

土豆

絕似吳中落花生及香芋亦似芋而此差鬆甘

榛實軟不及菰根旨定雌吳沙花落子蜀國葉蹲鴟配茗人猶未隨羞筋似知嬌顰非不賞憔悴浣紗時

薯蕷

卽山藥

共中識舊方爽吻得新嘗臍廩衰年壞山薯此地良芋

魁徒軟美松粉藉餵餽楚些那遺此清酥點蔗霜

鐵腳

吳下縣披細燕中鐵跣纖俄爲羣少炙祇用一竿黏暗
雪辭饑啄紅椒飮醉髯窺螳黃雀事公子慎金丸

黃鼠

膏厚而
瑩徹

幸不爲殘嚙何由昌劣名庖廚窮口腹天地窘生成淺
草遮人拙深膏傍燭明斷虀吾自分食肉任干城

半癡

小鳥形半于雛而脆美上谷人與
黃鼠共稱然癡而易襲遂以名

厄與癡相半禽將鼠共縣味雖供客好名却使人憐所

下惟雙筍何妨少一拳如聞三嗅叟笑殺雉羹筵

酒三品

曰桑落襄陵羊羔價並不遠每甕可十小盞須銀二錢有奇

小甕五雙盞千蚨五瓮香無錢長買醉有客偶攜將醞藉宜高價淋漓想故鄉狹斜壚不少今夜是誰當

荔支

出新會者名進奉絕佳有以小瓮載販陽江者到卽競報其土產稍劣或邀食多以蔗隨

放猿取高荔蘇公事也

帆檣報荔支猶憶海南時一邑明勾漏千罌枕蜜脾消中隨蔗往高樹放猿之近日肝腸別依稀餓采薇

又

當醉更須醉當餐便買餐幾年千里外一顆百金難飛

騎休輕刺垂猩且奪看老甜今已矣世味飽鹹酸

熊

此李勣尉獵而托饋大兒故三四用蜀陳家事五六則憶曩食熊獵掌特甘醲而此顧亞必豕

熊也七八用茂先事意謂

儻恣口腹何所不至耶

李廣射熊歸生肩付大兒都無一寸白儻有幾條笞腊

掌吾曾飫鮮蹠勝略差窮饕亦何劇急鮓白魚遲

黃羊

味絕勝善走俺答偶馳饋宣鎮故五六云然三四晏子語言也七八戲言耳雖貴胡亦未

聞食

駢者

紫塞黃羊美超騰不易供蹄雖千里外命寄一廚中誰

致西河俎言穿老上弓賓筵三動指早晚到駝峰

河豚

白下酒家簷河豚荻笋尖寒江晴後雪爛柳窵中鮎萬
事隨評品諸鱗屬并兼惟應西子乳臣妾百無鹽

送薛鴻臚左官袁州

佐郡袁州去江行萬里西興牽春水鴈心斷早朝雞蠻
境風烟近巫鄉習俗迷正須煩料理滕閣未遑躋

雨

一雨連秋夏無朝不冥迷曉添四壁篆夜助百蟲悽蒙

翥遮城漏蒸潮汗礎泥直愁衡岱頂亦障海鳥飛

夕霞

第三首魚勞則尾
赤詩云魴魚頰尾

明霞剪脚齊茜水人霄泥鴈鶩千行外巖巒一角西石
家錦步帳海國紫玻瓈安取揮戈術相留莫遣飛

又

明霞爛且都雨歇霽霄鋪萬國樓臺莫孤村烟火晡波
鱗銷琥珀海色上珊瑚一抹須彌翠胭脂月鏡孤

又

元氣渺太素丹鉛何所粧白魚勞尾變紅石補天長刺

付烟嵐彩全併沆瀣光俄飛一片紫騎鳳是蕭娘

送某子北土

送子有所思秋風來何翩拜翁挂貂處談我篝燈前棗
紅芻馬店霜白聽雞天一隊長鞭裏輕寒早着縣

某君中貢選送之

物有幽奇者飛騰各擅方巨魚須北化細芷不南香在
獄持何贈穿泥以劍將回思成一笑君自有魚腸

人言鳳尾蕉花於某縣庭命作

鳳尾本蕉材紅花綠葉穗縣庭今一見蠻地不曾開孔

雀羞金翠蕭娘坐粉腮
潁川黃霸在辛苦送祥來

壽葛貞母

終歲不成粧
釵寒古鳳凰
詩堪將柏賦
年亦與松長
列女誰同傳
稱人果未亡
當筵思舉案
誤遞百年觴

乙亥元日雪酌梅花館

有扁二曰柿葉
堂曰葡萄深處

秋葉已凋疎
春林積雪初
溪藤不復買
裙練免偷書
挂碧來鳴鳥
堆紅補破廬
待予新買屋
自種兩三株

又

花葉看雖少
藤稍遶更賒
蒼須搖水雪
白玉碾龍蛇
碧

氣將檐薄濃陰奪竹斜去年深夏熱特地爲予遮

初夏送某客入廣

廣中賈客寓所隔岸則倡居也率以一錢擲艇子輒渡

海南多寶地客也傍春行涉嶺梅九綻當塵荔子明百香番賈舶雙翠美人纓會向青樓去時呼艇子乘

賦得風入四蹄輕

雷總戎嘗騎千里馬風掣其衣僅存襟背又云趙總戎亦然故

三章

云

駿馬四蹄風形容有杜公一塵不動外千里颯然中白草連天靡蒼鷹踢翅從檀溪不須躍隨意過從容

又

愛妾換初訓將軍驀紫駟颼颼只聞響陣陣不禁秋練
影難長曳屏星易一流路旁看不細多是失回頭

又

借將從虎物并去翼龍腓戍削纔辭櫪崩轟已破圍寒
呼隨蹕起黑旋畏鞍飛曾聽將軍說雙雙碎鐵衣

又

赤驥本龍精行時不是行看遲八尺影過急一團聲帶
烙成駢死嘶鹽了此生孫陽何處是淚盡太行程

雨舟載鶴詩

買鶴載歸去况逢風雨天客裝兼有此江影雨瀟然濕
重氍孤雪波長立暮烟園池寧有此漠漠迥堪憐

元夕之辰偕友人集九里之天瓦寒泉二庵各賦

并序

去郭九里曰九里者爐峰舒臂其西高則亂石
偃拔駭獸穿林下則迴泉紆縈驚虺入草兩精
舍各據所勝止息緇黃因石以覆則爲天瓦依
流而茨乃題寒泉鸞鶴之所必棲猿麋舍此莫
集也某君南來之暇稍厭賓筵及予元夕之候

載觴其中上下高流狎弄魚鳥落帆到舍則月
白燈紅矣似別武陵悔返城市景遷情改寧免
生滅之緣各有賦篇令予作敘

尋常難淡泊况復值茲辰山水留吾輩燈花媚別人言
歸城市去似別武陵春一路梅花水今年弄月新

擬壽長春祠何老

雲母何姑粉增城幾葉春馮心行好事作屋住仙人鍛
柳堆山鑊眠松弄水銀面上桃花色流年始七旬

京中送友人南歸

不道歸真急翻嫌握手遲
綠蠅秋漸少黃鳥日相思
以我尙未去問君來幾時
答言春盡後北雁與同飛

送蔡安父之黃州

安父黃州去乃當中夏時
榴花作火艷梅雨爛蠶絲
研墨沄沄燥窻書葉葉吹
今朝霽如此別馬快風嘶

與葛景文

冬潦無人出君胡爲來歟
山樓隔年病江渡幾封書
健後堪風雨貧來無菜蔬
不能留一飯歸去寺烟餘

畫紅梅

卽使胭脂點猶成冷淡枝杏花無此幹鐵樹少其姿挂
壁紛紅雪圍春在錦池無由飄一的嬌殺壽陽眉

畫竹

萬物貴取影寫竹更宜然穠陰不通鳥碧浪自翻天憂
憂俱鳴石迷迷別有烟直須文與可把筆取神傳

筵中漫贈王良秀筆史

囊琴三尺餘投我主人居老叟能稱隱諸郎總解書夜
深時喚酒春盡共騎驢去到西湖上梅花帶雪舒

吳門逢孔將軍於塾

舊日堪爲將今來復授經主人盛供帳醉尉止都亭終
歲只在野因子一入城相悲十年事淚落酒杯平

書倪元鎮畫

一幅淡烟光雲林筆有霜峰頭橫片石天際渺長蒼雖
廣須金換如真勝壁藏偏舟歸去景入畫亦茫茫

無題

翁也專樞密儂今職贊襄西京留守重北帽侍中方陵
氣松鱗紫湖霜藕葉黃江南秋色好此去滿帆檣

賦得草窻篇爲周衛卿之號

周繪
工蟲

草綠鳥喈喈閒窗一斗開百蟲堪上筆一片欲遮苔莫
影紗紋澱春芽老氏孩元公有知不一笑隴牛堆

食虎眼

虎眼荔枝之佳品

虎眼白琉璃誰能隸虎皮小毬蜂粉結高液鳥羣司婦
去茶如薺王歸膽亦飴由來甘苦柄舌觀豈能持

解

紅綠樸文窰薑橙擣未高雙螯交雪挺百品失風騷饒
喜朝爭穀颺聞夜泣糟大蘇無缺事只恠佞江瑤

蘇傳江瑤

柱乃不傳解

又

水族良多美惟儂美獨優若教無此物寧使有監州辟
鬼秦關夜輪魁海稻秋河豚直一死只好作蒼頭

又

吳興饒吻守越國朶頤人風韻誰偏少吹噓爾絕倫沅
江九肋驚松泖四腮鱗遍試張華醋還誰五色文

又

爾故飽菱芡饑來竊稻梁逃蕭孟嘗走結草杜回亢蛻
許山蟬嫩腥憐海麝香那能親箬笠夜夜伴漁郎

又

織篠挈干籃枯筐養八蠶縛嚴愁廣武霧重死淮南金

紫膏相蝕尖團酒各酣秦人不曾識付與兩齊參蠶筐見檀

弓八蠶者南粵種也

胡市歸胡館不一刻羶觸數日

胡養復胡王無鷹不飽颺滿城屠菜馬是鼻掩綿羊卽
苦新輪輦猶勝舊殺傷從來無上策莫笑嫁王嬙

客餉我笋脯一小筐穉而甘澹擬謝

晨觴急十斟笋脯美遼參玉版禪師韻黃冠道士簪山

存仍受虎春代并更禽籜畔夫將婦隨農插綠針

聞人賞給事園白牡丹

白牡丹殊雅曾於舊譜聞
掃眉嬌號國新寡縞文君黑
牯眠雲飽黃蜂奪雪芬
愛憎誰與定賒酒借花醺

又

梁園月下白青瑣第中逢
定是千金買來陪一捻紅珍
奴學龜息越女鬪猿公作意
驅脂粉天然輸與儂

又

休量姑射子不語息夫人
香暗聞龍腦須黃見蝶身雪

腮宜買笑霜鬢可饒嗔莫學盧郎婦題詩謔老人

化城寺

方引主人轄轉爲山寺嬉門深當水盡路曲入松移破
鐸搖簷鴿寒萍蔽沼龜過溪無虎嘯枉送遠禪師

明日至古博嶺雨

無寸非濃霧寒空濕太勝泥深驢項沒雨近帽簷生練
泄未到眼客途先苦行真成評嚼欖敢與棗兒爭

京邸贈沈刑部

叔成自安鄉召入善畫梅在
署竟日伸紙洞庭遍浸安鄉

人多驄馬客君慙白雲司棘署了公事梅花作雪枝帶

寬知懶在馬重覺塵隨頗憶洞庭否烟波十二時

哀周鄭州沛

莫以拘攣輩交攻放達偏窮如知老後樂似欠年前匣
藻鮫俱泣園花石共遷傷心能幾輩教我不潸然

又

雪涕尋前誼敲門憶昨晨梟盧呼未歇蝦蟇醉仍頻日
者過荒館霜顛破角巾飄零霎如此昨日故將軍

曉發句容

宵來醉眠處忽爲遠林遮三尺短綬爛一程長耳賒村

村落斜月樹樹抹輕霞只尺丹陽近江魚入饌嘉

送沈叔子南都迎母

馬上定苦渴幾迴停轆轤別兄當北邸接母到南都桃
葉橫前渡荷花滿後湖此行大家逐誰敢問當壚

送馮叔系之南都訪舊

江國柳雖盡將及梅花新路遠卽逢雪天寒別有春高
牙紛海幕長劒著孤身乞取封書去難辭舊主人

景文至其舅劉所過園中

兩橐行廚過清醪溢瓦盆一行澆鬱思百覆失煩冤笋

候人家飯鶯天桃杏村無由共甥舅鎮日數園門

送俞生之入楚

頗善繪事

作客向襄陽鰈頭大舸裝江行多雪候旅宿盡漁鄉此
景俱堪抹行囊好爲藏歸來逢鑒賞幾度抹山窓

張子錫往訪其弟長治

伯兄官署去因寄仲君書問政應如水添厨稍出魚越
人多好着潞錦小花裙看取寄歸匣都無一尺餘

與任生話舊

麻衣飄雪處益動而翁思近日君家事予僦那得知筭

天應薦墓柏涕可枯枝莫作徒悲切遺書退學詩

送張君會試

明年此時節意氣何揚揚但遣馬蹄疾莫愁花路長幾
多青樓婦認取舊檀郎何處最笑指當壚壓酒娘

挽上虞葛翁

聞道自髫年傳經徹舊編裹糧百里外卒業一燈前閱
傳知高士遺孤是大賢斯人真不死可以慰黃泉

授經館中懷江東諸同志

時復病

能得幾回春匆匆滯此身一江書易寄連月性難馴買

藥獨行市敲門暫訪人幾時束書卷來伴釣魚綸

蠟屐

一生幾兩屐此語爾非迷何事淪猩趣終年弄馬蹄萬
錢收錦屨五岳遍丹梯齒畔如瀕損厓蜂借一脾

題雪景畫

諸暨陳仲子

幽人凭水檻釣者挈魚投况對千山雪而無一客留臘
酒此時熟老夫終歲憂壺公能醉我跳入畫中休

爲陶工部贈道者

終是千年鶴今先返舊地到家人尙在入洞雲來迎紫

氣莫西渡青山留震盟野夫慙尹喜却辦候關情

將遊五泄宿吳系山庄遇陳老迎餉邀余輩先登

峨眉不果

遊轡維林竹山窓來獵燈青蘇炊白稻碧筍束紅藤坐
落半宵月流分曲水亭忽逢山下老邀上峨眉層

山中寄良叔公曲水亭
山丁朱蠟土細冒骨

山窗來嶺嶺青嶺
白溪舊後束瓊觀坐

細冒不果

米穀五城寄吳山
五縣刺朱彭諭墨余輩次登

青藤書屋文集卷六終

